

Крымтот

4-48

Черкез-Ам



САБАЛАР
КЪУЧАГЪЫНДА

Черкез-Али

САБАЛАР КЪУЧАГЪЫНДА

РОМАН

Гъафур Гъулам адына
Эдебият ве санъат нешрияты
Ташкент — 1973

БИРИНДЖИ КЪЫСЫМ



Орман... Гедженинъ бей вакъыты. Орталыкъ чым-чырт. Къушлар сускъан, копеклер авламай. Сувукънынъ зеэринден бутюн махлюкълар сакълангъанлар. Тюкюрсенъ ерге тюшмейджек. Эр шей терен къар астында. Ирмакъларнынъ шырылтысы эшитильмей. Олар буз къатмерлери тюбюнден акъалар. Голлер де буз тюбюнде. Бу жансыз тынчлыкъны паттасатта арчаларнынъ ве чамларнынъ чытырдысы боза. Сувукътан тереклер чатлайлар. Тюм-тюз чёльни анъдыргъан. Кама озенининъ устюнде къарлы шейтан бораны ойнай.

Кой татлы юкъугъа далгъан. Тегиз чам агъачларындан кертилип япылгъан эвлерде орман ишчилери юкъ-

лайлар. Олар яринки иш кунюне къувет топлайлар, раат-ланалар. Ялынъыз бир эвде мунарлы яркъ корюне. Бу Айриенинъ пенджереси. Айрие юкъламай. Сол авучыны янагъы тюбюне къойып, кровать устюнде янтайып ята. Къаршысындаки агъач бешикте еди айлыкъ къызчыгъы—яш ананынъ бирден бир эвляды, къаны-джигери юкълай. Айриенинъ кроватинда эки ястыкъ. Биринде озю ята, дигери бош. О, бош ястыкъкъа аркъасыны айландыргъан. Тосат-тосат козьлерини ачып бешикке бакъа. Сонъра аркъа тарафкъа айланып козь ташлай. Ястыкъ бош. Онынъ саибни аля даа кельмеген. Не ичюн? «Бу чатлама аязда о къайда олмакъ мумкюн? Ах, бу дюньяда беклемек деген шей олмагъайды...» Бу тюшюнджелер Айриенинъ юрегини къурт киби кемирелер.

«Янъылдым гъалиба...—дей озь-озюне.—Екъ, янъылмадым. Алиман мени севе. Севмеген олса, ана-баба оджакъымдан айырып, мени бу узакъ дияргъа алып келирми эди? Мен онынъ артындан тюшип кельгеним ёкъ. О манъа догърусыны айтмакъ керек эди. Гизлеген олса, бу алчакълыкъ дегильми? Екъ, Алиман манъа бойле хиянетлик япмаз. Мен онынъ севгисине инанам. Бутюн варым-вариетимле онъа берильдим. Он докъуз яшына келип, къызлыгъымны онъа теслим эттим. Сой-сопумдан айырылдым. Эль-эджнебилер арасына келип кирдим. Екъ, ёкъ, о мени севе. Бир сыкълет иши олса керек. Бельки башкъа болюкке ёллагъандырлар. Ава сувукъ, къайталмагъандыр»...

Айрие сют киби безз чыплакъ аякъларыны кроваттан саркъытты. Пармакъ уджларынен папучлерини араштырып кийди. Чубалгъан къара сачларыны эки къолунен омузларынынъ устюне ташлады. Яваштан адымлап бешикнинъ янына кельди. Фиданенинъ нагъышлы ёргъанчыгъыны тюзетти. Бешикнинъ кенарларындан тутып, даа къызлыкъ ренки кетмеген кирез киби дудакъларыны назиктен Фиданенинъ манълайына тийдирип алды. Бала сескенди. Анасыны эмген киби дудакъларыны къыбырдатты. Сонъра, кене токътап къалды. Айрие юкъулы козьлеринен онынъ бетине бакъты. Къашларыны, козьлерини эследи. Пек бегенди. «Юкъла къозучыгъым, юкъла», деп бешикни саллап ташлады. Сонъра пенджеренинъ янына кельди. Токъталды. Динъленди. Перденинъ бир уджуны котерди. Тышта къаранлыкъ. Бир шей коръмедди ве ёшитмедди. Фидане ынъранды. Айрие бешикни

яваштан саллады ве недендир кьоркькьан адам киби, «Юкьла кьызчыгьым, бабань гьалиба кельмейджек», деп пысылдады. Бу сёзлерден сонь Айриенинь ичине буз тюшкен киби олды. Эти-тени чимирдеди. Кьалтырап ёргьан тюбюне кирди. Козьлерини юмды. Лякин, юкьлап оламады. Кене хаяллар дерьясына далды: «Алиманнынь бойле кельмеген геджелери ола тургьан эди. Лякин мени хаберсиз кьалдырмай эди. Ишке кетеджекте, я да акьшам аш вакьтында: «Ярын келип оламам бельки» деп ташлай эди. Мени о вакьыт бир шей раатсызламай эди. Амма шимди... Хусусан Фидане догьгьан сонь бу адетини вазгечти. Эм гедже кьалувны сыкьлаштырды. «Ёкь, бу кьа мырда бир кьыл бар». Коюмизде кьомшумыз Ниетша акьайнынь кьарысы Мелек апте, акьайы кельмесе, ёр вакьыт шай дей тургьан эди. Анам да онынь гоньлюни алып, «Акьыз, ёр шейден кьыл кьыдырмазлар» деп шакьалаша эдилер. Я меним гоньлюмни ким алсын? Сырдашмагьа кимсем ёкь. Бутюн эгленджем Фидане олды. Ёкьса мен, Фидане догьгьан сонь, Алимангьа дикькьа-тымны эксильтимми? Ола билир, мен буны сезмегендирим. Анам тевекель айтмай эди: «Акьай деген шей балам, тыпкьы саат кибидир. Оны вакьтында кьурмасань, чыкьырыкьларыны майлап турмасань, бир кунь илле устасынынь кьолуна тюшер»,— дей эди. Лянет, шейтангьа. Ёкь, мен Алиманда бойле сувукьлыкь сезмедим»...

Айрие бираз тынчланды. Узун кирпичкери ёргьун козьлерининь устюне саркьтылар...

Пенджере тюбюнде лакьырды эшитильди. Соньра, кьадын хихилдысы чыкьты. Айрие сескенди. Диньленди. Кьадын бир даа хихилдап алды. Давуш кьапы тарафкьа-авушты. Айрие кьалтырады. Чильтер шалыны омузлары устюне ташлады. Кьапыгьа тараф адымлайджакь олды. Джесарети етмеди. Барып кровать устюне отурды. Кьапы кьакьылды. Бу, Алиманнынь давушына бенъзей эди. Айрие турды, пармакь уджларына басып, яваштан кьапыны ачты. Алиман насылдыр бир кьадыннынь кьолундан тутып, оны эвге давет этти. Кьадын ичери адымлады, онынь артындан Алиман кирди. Пальтосыны чыкьарды. Айрие пальтоны алып чюйге ильмек истеди, Алиман онъа бермеди, озю ильди. Соньра кьадыннынь пальтосыны алып кене шу чюйге ильди. Айрие эки козюни Алимандан алмады. Алиман исе, оны эслемеген киби, озь ишини япа берди.

— Не шашып кѡалдынъ Марина, мына кровать, яслан,— деди о сувукъ кѡанлыкѡнен.

— Чай кетирейимми?— деди Айрие онынъ лафына ѡмиет бермеген киби.

— Керекмей!— деп кесгирди Алиман.

Кѡадын эп аякъ устюнде отура. Онынъ санки тили тутулгѡан. Индемей. Кимерде бир бешикке тараф козь ѡте. Сонѡра озюни гунясыз бир махлюкъ ерине косѡтереджек олып, козьлерини сюзип ташлай. Кулюмсирейджек ола, лякин кулип оламай. Бетининъ кѡаны кѡача, сувукъ йылангѡа ошап кѡала.

— Марина, не кѡатып кѡалдынъ я? Юрь, кроватькѡа ерлеш!— деди Алиман текрар. Марина кене отургѡан еринден кѡыбырдамады. Онынъ эки козю Айриде ве бешикте эди. Алиман сычрап турды. Маринанынъ белинден тутып, кровать тарафкѡа итеди. Марина тиреледжек олды, омузлары арткѡа кѡайрылды. Алиманнынъ кокюсине таянды. Лякин, кучлю кѡоллары оны кроватькѡа ерлештирдилер.

Бешик янында, аякъ устюнде кѡатып кѡалгѡан Айрие, аля даа меселенинъ аслына етмей. О, Алимангѡа бакѡа, онынъ козьлеринде мерамет, инсаниетлик нурлары сечмек истей. Хайыр, Алиман адамлыкѡтан кечкен. Аксине, озюнинъ япкѡанына гѡурурлана. Акѡайлыкъ косѡтермек истей. Айриенинъ козюне бакѡмай, бешикни эслемей. Агѡызынѡдан янѡылып бир лаф чыкѡмасын зеэрини пускюреджек кѡатиль киби долана.

— Не шашып кѡалдынъ, сѡндир ярыкѡны!— деди о. Сонѡра гимнастѡркасыны чыкѡарып, кроватькѡа отурды. Кѡушагѡыны бошатмагѡа башлагѡаныны корип:

— Алиман, джаным, сен не япасынъ шу?— деп ташлады Айрие.

— Не япкѡанымны коресинъ де гѡалиба,— деп, Алиман кроватькѡа созулды.

— Ёкъ, ёкъ! Ич оладжакъ шей дегиль, Алиман! Ольдюрме мени, баланѡны аджы!

Айрие бутюн кевдесинен онынъ устюне йыкѡылды. Аюв панджасы киби кѡара юнли кѡоллар Айриенинъ назик, юфкѡа беденине япышты. Айрие пол устюне серилип кѡалды.

— Масхара, бу недир сенинъ эткенинъ?!— деп Айрие еринден котерильди.— Мен о кѡанджыкѡны тѡшегиме яткѡызмам! Тур, ороспу!

Энди озюни джоймагъа башлагъан Айриенинъ назик пармакълары Маринанынъ сачларына санчылды.

— Алёша, бу не, бу насыл медениетсизлик?— деди о Алимангъа бакъып.

— Бакъ сен о юзсизге, меним тёшегимде даа медениет къыдыра. Мына санъа медениет, мына, мына...

Алиман Айриенинъ белинден котерип алды, Алды амма, онынъ къолларыны Маринанынъ сачларындан айырып оламай. Айриени не якъкъа къакъыштырса, Маринанынъ башы да о якъкъа саллана. Буны корьген Алиман Айриенинъ къолуна къатты бир юмрукъ эндирди. Айриетакъаттан кесильди, полгъа серильди. Эссизленген киби олды. Онынъ ачувдан сыкъылгъан авучларында Маринанынъ юлкъулгъан сачлары къалды.

Бираз сукюнеттен сонъ, Марина Алимангъа янтайып:

— Мен кетем, азизим, мында къалмайым,— деп онынъ козьлерине бакъты. Сонъра Алиманнынъ юнли кокрегини къолунен сыйпап алды. Алиман онынъ пармакъларыны авучына сыкъып, дудакъларына якъын кетирди. Опеджек олды, опьмеди. Янагъына тийдирди, сонъ бирден ташлады. Маринанынъ къолу авада къалды, Алиманнынъ бойнуна асылмагъа джесарети етмеди.

— Мен кетем,— деди о текрар.

— Бир якъкъа кетмейджексинъ!

Алиман кестирип шай дегенинен Марина Айриени ишмар этип косътерди.

— Эмиети ёкъ,— деди Алиман.

Марина юрекленди. Эки къолунен онынъ бойнуна атылды. Алиманнынъ къалын джелькеси Маринанынъ омузына эгильди. Кирпи териси киби серт тюкли янагъыны Маринанынъ янагъына тийдирип алды.

Узакътан копек давушлары эшитильди. Эм бир копек дегиль. Бир къач копек авлай. Давушлар кеттикче якъынлай. Фидане уянды. Айриесескенди. Фидане кескин сес чыкътарып агъламагъа башлады, Айриесескерини ачты. Бетине саркъкъан сачларыны котерип сыйпады. Отургъан еринден четке-чевреге козь ташлады. Турмакъ истеди, турамады. Такъаты етмеди. О санки тюш корип уянды. Чырайынынъ бенъзи къачты, дудакълары агъарды. Копек давушлары онынъ къулагъына да кирди. Элесленди. Лякин эмиет бермеди. «Фидане бундан абдырап уянса керек», деп тюшюнди. Бутюн такъатыны джыйып еринден турды. Агъызыны ачып бир лаф айтмады. Онынъ ичюн

әписи бир әди, дерсинъ дюнья биткен де, аятынынъ сонъу кельген. Аркъасыны кроватькъа тараф чевирип бешикининъ янына кельди. Фиданени къолуна алды. Лифчигининъ дёгмесини къутарып, әвлядыны кокюсине басты. Фидане сусты. (Козьлери юкълай, дудакълары кыбырдай. О ана сютюнден леззет алмакъта әди.

Копек давушлары әвге якъынлагъанда тындылар. Лякин, азбарда лакъырды әшитиле. Айрие пенджереге тараф ынтылды. Тышары бакъып етиштиралмады, къапы къакъылды. Айрие баланы бешикке яткъызып, сонъра къапыны ачмакъ истеди. Къапы къатты къакъылып башлады. Алиман турды. Омузына пальтосыны ташлады ве къапынынъ янына келип бираз токъталды.

— Ким бу?— деди о къапыны ачмайып.

— Ачынъыз, милицияданмыз. Кедровкадан кельдик.

Алиман Мари́нагъа тараф козь әтти. Сонъра сувукъ козьлеринен Айриеге бакъты. Марина дивар бетке чевирилип, омузларына ёргъанны тартты. Алиман, къапыны ачты. Ичери ешилъ япынджалы әки адам кирди. Айрие къапыны къапатаджакъ олып босагъадан бакъса тышта копеклернинъ янында тургъан учюнджи бир адамны даа әследи. Копекнинъ бири босагъа янындакы валенкилерни къокълай. Бу Маринанынъ валенкилери әди.

— Багъышланъыз, Алиман Шакирович Шахардин сиз оласызмы?

— Меним.

— Я сиз ким оласыз?

Бу суаль Айриеге берильди.

— Мен, мен онынъ апайы олам.

— Айрие Шахардина?

Айрие, әбет, деген киби башыны силькти. Онынъ юреги кене раатсызланып башлады. «Меним адымны къайдан биле экен бу адамлар», деп тюшюнди.

Фидане юкълап къалгъан әди. Айрие оны тез-тез бешикке ерлештирди, устюни орытти ве яваштан бешикни саллап ташлады.

— Юкълагъан ким? Уятынъыз!— деди милиция хадими кроватькъа ве Алимангъа бакъып.

— Ким олгъаныны озюнден соранъыз.

Хадим япынджасынынъ әтегини баланынъ бешигине илишмесин деп арткъа тараф котерип ташлады да, кроватькъа якъынлашты. Маринанынъ омузындан тюртип

— Марина Ласточкина, турынъыз!— деди.

Марина индемени. Эшитмемезликке урды.

— Марина Ласточкина!

Марина меселенинъ асылыны та узакътан копеклернинъ авлагъаныны эшиткенде анълагъан эди. Онынъ ичюн о эвден чыкып кетмек истеген эди. Кетип етиштирмады. Алиманнынъ ярдымына ишанды. Алиман бу ернинъ къурты. Онынъ хызмети де джинаетчилерге къаршы. Болюкте хозяйство ишлерининъ мудирин олып чалышкъанына баягъы вакъыт олды. Арбий хызметтен бошалгъан сонъ, бу ишке тайин этильген эди. Марина онынъ бу орталыкъларда къазангъан базы итибарыны эльбет де биле. Шунинъ ичюн Алиманнынъ якъасыны бошамай юрди.

— Марина Ласточкина!

Бу сес онынъ юрегине окъ киби санчылды. Энди идалашмагъа шей ёкъ. Онынъ изине догъру тюшкенлерини анълады.

— Ласточкина дегиль, Бубенцова!— деди Марина ёргъаныны ачып.

— Ве Марина Летучкина,— деп къошты хадим.

— Учеви де сиз оласынъыз, турынъыз!— деди дигер хадим.

Марина кене турмай. Йымшакъ кровать устюнде керилп башлады. — Алёша! Кель тувгъаным, сонъки кере...

Алиман еринден кыбырдамады. О таш кесилип къалды. Айриеге бакъты. Айрие юмгъан агъызыны ачмады, Алимангъа аркъасыны чевирип бешикке тараф адымлады.

— Тур еринъден Ласточкина! Сенинъ балдырларынынъ коръмеге кельмедик мында. Шахардин, сен де кийин. Он беш дакъкъа муддет сизге.

II

Арадан эки афта кечти. Ава бираз тынчланды. Ель өксильди. Кама бетте де къар бораны токътады. Кунеш шавлелери къар данчиклерини кумюш киби йылтыраталар. Аванынъ темизлигинден озюнъни тендюрист дуясынъ, енгиль нефес аласынъ. Кунеш парылдай, лякин кызыдырмай. Бойле авада ишлемек де яхшы, кезинмек де. Я джюйрик ат екип, чананен сагъыр орман ичине выз киби синъип кетмекни айтмайсынъмы? Айрие бойле аваны, манзараны пек севе эди. Ёкъ, шимди онынъ тю-

шюнджеси башкѡа. Онѡа кѡышнынѡ дюльберлиги бир тюрлю зевкѡ бермей... Арчаларнынѡ пытакѡлары кѡарнынѡ агѡырлыгѡындан ерге саркѡкѡанлар. Олар, гуя агѡыр юк астында кѡалгѡан киби башларыны эгилѡткенлер. Айрие ѓл бою бу арчаларгѡа козѡ ташлай да, «Олар да мени анѡлай, манѡа кѡайгѡылы бакѡалар, меним киби сюкюнетке далгѡанлар» деп тюшюне.

ГАЗ—69 машинасы Кедровка оперпунктынынѡ алдына келип токѡтады. Машинадан кѡуджагѡындаки баласынен Айрие тюшти. О догѡру оперпунктнынѡ кѡапысына тараф адымлады. Айрие бу ѓлларны энди огренип кѡалды. Алиман алынгѡандан берли эки кунѡде бир мында келип кѡайта. Келе, амма, файдасыз. Бир шей анѡлап оламай. Шу мусибетли геджеден сонѡ, не олды-не кѡалды, Айрие бильмей. Бугунѡ оны Алиманнен корюштиреджеклер. «Асыл манѡа оны корѡмек керекми?» деп тюшюне Айрие. Бойле видждансызлыкѡтан сонѡ, онынѡ тек бетине тюкюрмек лѡйыкѡ. Ёкѡ, бильмек керек, себеби не? Бойле алчакѡлыкѡкѡа кѡапылмагѡа не меджбур ѓткенини бильмек керек. Корюштирсинлер, зарар ѓкѡ. Бир даа козѡ-козѡге келип лаф ѓтейик. Акѡай о, бельки, шу быралкѡынынѡ себебинден янѡлышкѡандыр? Баламнынѡ да бабасы. Ёр алда корюшсек джаным раат оладжакѡ...

Айрие балабан бир одагѡа кирди. Оданынѡ ичинде тоны ве пальтосыны чыкѡармайып бир кѡач адам отура. Оларнынѡ чырайларына дерсинѡ кѡар ягѡгѡан. Кимсе лаф ѓтмей. Айриенинѡ киргенинѡ биле ѓслемедилер. Ода сыджакѡ. Айрие баланынѡ белини чезди, тахта отургѡыч устюне яткѡызды. Пальтосыны ташлайджакѡ олды, ташламады. Адамларнынѡ союнмай, тыш урбанен отургѡанларыны ѓследи. Бираздан сонѡ сыкѡлетленди. Даянамады. Башындан шалыны чезди, пальтосынынѡ якѡасыны ачты.

Кѡапыда невбетчи корюльди. Ода ичиндеки адамларны козюнен сюзип чыкѡты да:— Шахардина!— деп чагѡырды. Айрие абдырап балагѡа япышты. Кѡапы янында отургѡан невбетчи онѡа киреджек одасыны косьтерди. Оданынѡ кѡапысына кѡара мешин орьтюли ѓди.

Стол башында мазаллы ве дюльбер майор отура. О Айриени корѡгени киби кулюмсиреди.

— Баланѡыз юкѡлаймы?

— Юкѡлай.

— Дивангѡа кѡойынѡыз, кѡолларынѡыз раатлансын. Ушюдинѡизми?

— Ёкъ, машинада сыджакъ эди.

— Алиман Шакирович Шахардиннинъ апайы ола-сызмы?

— Апайы.

— Не вакъыт эвленинъиз?

— Экинджи йылгъа айланды.

— Яхшы яшайсызмы?

— Пек яхшы эдик. Мынавы бала догъгъан сонъ...

— Я бала догъмаздан эвель?

— Яхшы эдик.

— Севесизми акъайынъызны?

— Севем.

— Я о сизни?

— Бильмейим.

— Буны догъру айттынъыз. О сизни...

Айрие майорнынъ козьлерине тикилип бакъты.

— Ёкъ, мен бир шей демейим. Эльбетте, сиз севген сонъ, о да сизни...

Айрие башыны ашагъы саркъытты. Майор суаллерининъ ардыны кести. «Казбек» къутусындан бир папирос алып, бош тарафыны тырнагъынен чертти, сонъра уфю-рип агъызына къапты. Чекмеджени тартты, серник ёкъ эди, джеплерини бакъты, ёкъ. Еринден турды, Айриенинъ янашасында къызарып тургъан собанынъ къапагъыны ачты. Уджу янып сёнеяткъан акъкъайын кусевини алып, папиросыны тутандырды. Стол башына кечти. Айриеге козь къиясындан бакъып папиросыны джигерлерине къа-дар чекти. Агъызындан, бурнундан тютюн чыкъарды, азгъана козьлери яшлангъан киби олды. Кене индемей къагъытларыны къарыштырып башлады.

Бу аджиз дакъкъалар ичинде Айриенинъ козьлери огюнден чокъ шейлер келип кечти. Лякин, Алиманнынъ косьтерген сонъки унери даяныладжакъ шейми? Насыл олса да, о кене Алиманнен корюшмек фикиринде эди. Онынънен козь-козьге келип, сонъки кере лаф этмеге, онынъ агъызындан:— Багъышла Айрие,— деген сёзни эшитмек истеди.

Майор Айриенинъ фикирини козьлерине бакъкъанда анълады.

— Эринъизни коръмек истейсизми?— деди о.

— Истейим.

— Яхшы, биз сизни корюштирмиз. Башта мынавы къагъытнен таныш олунъыз,— деп Айриенинъ алдына бир

папка ачып кѡйды. Майор Айриени сынап корьмек истеди. «Ола билир, акѡайынынъ базы бир ишлеринден хабердардыр. Меселенинъ тез ве догъру чезильмесине ярдым этер,» деп тюшюнди.

— Алынъ, окъунъ. Ашыкъмай окъунъ. Кельген машинанъызнен эвге кѡайтырсыз.

Айрие бутюн дикѡкъаты ве тюшюнджесинен папканынъ ичине далды: «Шахардин Алиман Шакирович, 1920 сенеси догъгъан... Астраханьда. Бабасы татар. Анасы Азербайджанлы... Эвли. Кѡадыны...»

Майор Айриенинъ козюне бакъты.

— Булар ойле меракълы дегиль, сиз о якъыны окъунъыз,— деп кягъытны айландырды. «Марина Ласточкина, кене о Бубенцова, кене о Летучкина, джинаетчи-рецидивистка. Хырсызлыкъ япып, экинджи кере суд олды. Сонъки кереси колониядан кѡачты. Ёлда ат чанасынен шеърден келеяткъан кѡадын — учъ баланынъ анасы Фрося Вяткинанынъ ёлуны баса. Урбаларыны ташландыра. Пальто-сыны алып устюне кие. Валенкилерини, антерини, шалыны ве юзь сексен кумюш акъчасыны ала. Кѡадынны тюп урбасынен орман ичинде кѡалдырып, чанагъа минип кѡача. Шеърге якъынлашкъанда атны, чананы ташлай. Бир кунъ Шахардин Алиман Шакировичнен таныш ола. Сыкъ-сыкъ корюшип башлайлар. Бири-биринен эр ве кѡадын киби яшайлар. Шахардинни джан-юректен севгенини бильдире. Озюне джелъп эте. Ондан документлер ала, ниает паспорт саиби ола. Фрося Вяткина орман ичинде йыкъылып, эссизлене. Бузлай ве оле. Кѡар куртюги онынъ джесетини орте. Кѡыдырувлар нетиджесинде Фросянынъ джесети ве устюнден чыкъарылып алынгъан пальто тапыла. Ласточкинанынъ изине тюшюле. Бойлеликле, кѡабаатсыз гражданка Фрося Вяткина фаджиалы суретте эляк ола. Джинаетчи Марина Ласточкина исе Шахардин Алиман Шакировичнинъ кѡанаты астында гизлене»...

Айрие артыкъ окъуп оламады. Козълери мунарланды, башы айланды. Майор графинден сув алып Айриеге узатты.

— Ичинъиз, яхшы олур,— деди о, ве Айриенинъ муляйим, гунясыз козълерине бакъып кѡалды.

— Демек, сизнинъ бу шейлерден хаберинъиз ёкъ. Яхшы. Имза этинъиз.

— Неге?— деди Айрие сёнюк козълеринен майоргъа бакъып.

— Хаберинъиз олмагъанына.

Айрие джансыз адам киби пармакъларыны зорнен кыбырдатып, имза чекти. Насыл имза эткенини озю эс-лемеди, къалеми папканынъ устюне тюшип кетти. Майор папканы алып, стол устюне къойды.

Айриенинъ козьлери яшланды. Назик дудакълары къалтырады. Бир шейлер сорамакъ истеди, айтып оламады. Дудакъларынынъ къалтырагъанындан тили айланмады. Фиданенинъ ёргъанчыгъы арасында кыыстырып къойгъан орьнекли явлучыгъыны алды. Кичкене авучына сыкып, дудакъларына басты. Янакълары устюне тыгъырып тюшкен козь яш тамчыларыны майоргъа косътермейджек олып, башыны ашагъы эгильтти. Ерге бакъты, козьлерини юмды. Къара кирпичлерининъ уджлары сыланды Айрие енгильден явлукъны козьлерине тийдирип алды ве башыны котерди. Ич бир шей олмагъан киби, кене майорнынъ козюне бакъты. Майор онынъ муляйим, дюльбер бетинде, агъламсырагъан козьлеринде къадынлыкъ гъуруры сезди.

— Сиз, джесюр къадынсыз, урьметке, севгиге лыйыкъ къадынсыз, Айрие,— деди ве невбетчини чагъырды.

— Шахардинни алып келинъиз, корюшсинлер.

— Ёкъ, кетирменъиз! Риджа әтем.

Айрие бу сёзлерни кычырып айтты ве еринден котерилип тургъаныны сезмей къалды. Невбетчи майоргъа бакъты.

— Кетирменъиз!— деди майор.

Сонъра Айриенинъ янына кельди. Омузлары устюнден саркып тургъан шалынынъ уджуна санчылып къалгъан чам ярчыгъыны алып ташлады да:

— Раатсызланманъыз, даа онынъ бу джинаетте догърудан-догъру иштирак эткени-этмегени тасдыкъланмады. Джинаетчи Марина. Иш әтрафлыджа бакъылгъан сонъ, къабаатсыз танылса, къайтарырмыз.

— О сизинъ ишинъиз,— деди Айрие озь-озюни къолгъа алып.— Къанун оны къайтара билир амма... Айды, сагълыкънен къалынъыз, майор аркъадаш...

Газик еринден кочти. Айрие Фиданени ёргъанына сарды. Белини кыырмазы лентанен сыкътырып багълады. Онынъ тек козьчиклери йылтырай. Анасына бакъа, бир шейлер айтмакъ истей, сонъра козьлерини четке айландыра. Онынъ бир шейден хабери ёкъ. Бабасы демир пармакълыкъ артында. Не ичюн? Анасыны ашшалагъаны, аякъ астына алгъаны ичюнми? Ёкъса, башкъа джинает

ичюнми? Я анасынынъ намусы тапталгъаны джинает дегильми? Не ичюн анасы онынъ урьметини къазанып оламады. Ёкъса, Айрие акъикъий севгиге лыйкъ дегильми эди? Ёкъ, Фидане шимди бу шейлерни бильмей. Онынъ бу агъыр дакъикъаларда бутюн келеджек аятынынъ такъдири чезильгенинден хабери ёкъ. Бабанен яшайджакъмы, бабасыз оседжекми, о бильмей. О ялынъыз агъламагъа биле. Ялынъыз ана сютининъ леззетини-дамыны биле.

Айриенинъ башы тюшюнджеден агъырлашып кетти. Санки, онынъ бойнуна бир пудлыкъ демир илинген. Янъы догъгъан ай киби индже айланма къашларынынъ ортасында бир туюимчик пейда олды. Бу — тюшюндже, къааръ ве къасевет нокътачыгъы эди. «Янъгъыз къалдынъ къызчыгъым. Анамлар узакъталар. Сой-сопумыз ёкътыр мында. Къыш, сувукъ. Яхшы ки, эвде одунымыз чокъ. Къартоп бар, курпе де етерлик. Бааръни тапсакъ анамларгъа кетермиз. Мен бабанъдан бу шейлерни беклемеген эдим. Алчакъ адам экен. Четте-буджакъта чарпынып юргени етмеген, даа эвге де алып келип... Ана санъа,— инсан не этсе, озюне этер,— дегенлери бойле шей экен. Башынъа еттинъ, бизни де масхара эттинъ, ёл ичинде къалдырдынъ».

Бу тюшюнджелер Айриенинъ мийини ёралар, къаныны сувуралар. «Къуртулыр экенми? Я къуртулса, меним козюме насыл бакъаджакъ, утанмайджакъмы? Онда юзь ёкъ экен. Утанмакъ ичюн инсангъа юзь керек...»

Шофер Айриенинъ терен тюшюнджелерге далгъаныны эслеп, сёз кёшты:— Не башынъызны астынъыз, бир эки кунъден акъайынъыз эвде олур. Бельки онынъ къабааты ёкътырдыр. Бираз акъылландырмакъ ичюн тутсалар керек,— деди.

Шофернинъ бу сёзлери Айриени тюшюнджелер алкъасы ичинден тартып чыкъарды. О башыны котерип, шоферге бакъты. Терен кокюс кечирди, озюни енгиллешкен киби ис этти. Къашларынынъ ортасында пейда олгъан туюимчик чезилип кетти. Чырайы кене эвелькиси киби муляймлешти, озюнинъ дюльбер ренкини алды. Шофер Айриенинъ тынчлангъаныны корип, кулюмсиреди ве кене бир шейлер айтмакъ истеп, онъа тараф бакъты.

— Огюнъе бакъ,— деди Айрие.— Къар куртюгине батып къалырсынъ.

Батмам! Сизинъ киби гузель ханымны авадан учурып кетерим.

— Сизлер, эпинъиз, къадын корьсенъиз авадан учурмакъ истейсиз, амма, батып къалгъанынъызны дуймайсыз.

— Эр кишилерни баштан чыкъаргъан къадынлар дегильми?

Бу анде Айриенинъ козю алдына Марина кельди. «Коресинъми, акъай кишилер насыл ойланалар, бутюн къадынларны Маринанен бир этелер,» деп тюшюнди.

— Ёкъ, кимсе-кимсени баштан чыкъармай. Адам, озю адам олмалы. Бу къадынгъа да айт, сизге де, шофер аркъадаш.

— О-о сиз анавы Ласточкаларгъа ошамай экенсиз.

— Алла сакъласын. Ольсем ондан хайырлы.

— Бош лаф. Аят пек муреккеп, билип олмайсынъ. Омюрде ойле олып чыкъа ки, бири Ласточкагъа урула, дигери къарталгъа тутула. Сонъ къайда къонаджакъларыны бильмей юрелер.

— Сен лафынъны ачыкъча айт йигит.

Шофер башыны кене Айриеге тараф бурды. Кулюмси-реп бакъты, бир шейлер айтаджакъ олды, лякин агъызы ачыкъ къалды. Машинанынъ арты тапталгъан къар изинден чыкъып, сол тарафкъа тайып кетти. Сол копчек бош къарнынъ ичине батты, сагъ копчек исе буз устюнде вызлы-вызлы айланып башлады.

— Ой, анасыны,— деди шофер ве къапысыны ачып тышкъа, къар устюне сычрап тюшти. Машинанынъ артына кечип, къар ичине батып къалгъан копчекни бакъты. ойле шараитта юрге бильгенини, озюнинъ теджрибели шофер олгъаныны бильдирмек макъсадынен сызгъырасызгъыра машинанынъ артындаки ящикте къалачланып тургъан къалын зынджырны тартып ерге тюшюрди. Сонъра домкратны алып, баткъан копчекнинъ арт рессоры астына ерлештирди.

Ава бозулып башлады. Кунеш къар булутларынынъ артына сакъланды. Тёпеден япалакълап сепелеген къар данчиклери ёлнынъ устюне без чаршаф киби ортьюльди. Машинанынъ тёпесини индже къар шербентиси къаплады. Айрие еринден истемей-истемей турды, сагъ тарафтан къапыны ачып ёлгъа чыкъты. Машинанынъ артында чалышмакъта олгъан шофернинъ манълайында тер бурьтюклерини корип, озюнинъ четтен бакъып тургъанына эфкъарланды.

— Ярдым этейимми?,— деди Айрие. Шофер онынъ лафына къулакъ асмады, ишини девам этти. Копчекнинъ

алдыны куреп, аякъларынен яхшы таптады ве зынджырыны копчекнинъ тюбуне ерлештирди. Домкратнен машинаны котерип копчекке берген агъырлыкъны эксильтти. Сонъра, руль башына кечип, яваштан кочюрди ве ич бир зорлукъсыз ёлгъа чыкъты.

Айрие къуванды. Шофер зынджырыны ве домкратны алып ящикке котерип атты. Устюнинъ къарыны памукъ къолчакъларынен къакъты ве кулюмсиреп Айриеге бакъты. Айриенинъ манълайы устюнден саркъкъан сия сачларына къар йылдызчыкълары япышып къалгъан. Къашлары ве янакъларында ириген къар данечиклерининъ кумюш киби йылтыравукъ тамчылары корюлип турмакъта. Янакълары гульпенпе алмасы киби къызаргъан. Дюльбер, назик дудакълары озъ ренкини джоймагъан.

— Боран чыкъмагъайды баре,— деди Айрие машина кочкенинен.

— Каманы кечсек, сонъ къоркъмагъа шей ёкъ. Ормангъа кирген сонъ истесе шейтан бораны чыкъсын,— деди шофер Айриеге бакъып. О Айриенинъ сачларында иримеге башлагъан къар данечиклерини даа шимди эслеп алды. Сонъ, негедир базанып, Айриеге шакъа тарзында лаф кьошты:

— Сизни къар астында бираз 'даа тутмакъ керек экен, языкъ, бильмедим.

— Ничюн я, сизге не этмишим бар?— деди Айрие озюни сербест тутып.

— Асыл къара козь, къара сач адамгъа къар пек яраша. Сиз, къар анасына ошап къаладжакъ экенсиз де.

— Айды, сен огюнъе бакъ, кене сафсаталап башладынь. Бизден энди эписи кечти. Къар кызы да, къар анасы да...

Айрие кене тюшюнджеге далды. Лякин шакъа севген бу шофер йигит онынъ хаялланып башлагъаныны эслей де, илле бир шей айтып лафкъа кене джелъп эте.

— Сизден эр шей кечсе, бизлер не япаджакъмыз? Ойле пек тез рухтан тюшменъ. Алиман Шакирович бу ерлернинъ къарталы. Онынъ пек чокъ япкъан йигитликлери бар.

— Онынъ йигитлигине вакътынен биз де сукълангъан эдик, амма... Эр йигитнинъ бир къусуры ола экен...

Машина Камагъа якъынлашты. Шофер дикъкъатыны арттырды. Машинанынъ чабиклигини эксильтти. Бу ернинъ шарайтыны, икълимини бильмеген адам, шим-

ди озюнинъ къоджаман озен устюнден кечейткъаныны ич де анълап оламайджакъ. О, кендисини тюм-тюз чѣль бойлап кетем беллейджек. Акъикъатен, бузлагъан озеннинъ устюнде адам боюнджа къар ягъгъан. Озенден узанып кеткен тюм-тюз мейданлыкънынъ устюнде ич бир къара нокътачыкъ корюнемей. Конделен кестирип озеннинъ о бир четине чыкъкъан чана ёлу, эки тарафтан дивар киби къалангъан къар куртюги арасындан кете. Мында машина тайып, ёлдан чыкъар демене аджет ёкъ. Эр алда, адам джан котере, дейлер. Озен устюнден машинанен кетейткъанынынъ билип, хавфсырайсынъ. Шофер, индемей тургъан Айриеге бакъып алды.

— Мына, отъкен йыл бааръ ташкъыны вакътында Алиман Шакирович мында буюк джесюрлик косътерди,— деди.— Бир къач адам чанагъа къартоп юклеп койден къайта эдилер. Озеннинъ ортасына кельгенде буз чатлады. Бузнынъ бир тарафы къая киби юкъары котерильди, дигер тарафы сувгъа авдарылды. Заваллылар, аты ве чанасынен буз тюбюне кеттилер. Бу фаджианы, мына, бизим шимди тюшип кельдигимиз джапнынъ тёпесинден авджы корип къала. О тюфек атмагъа башлай. Бу ерде адет шай. Тюфск сеси эшиткен адамлар ярдымгъа джувуралар. Не къадар патроны бар эписини атып битирген. Къайдандыр, башта Алиман Шакирович келип чыкъа. Меселени анълай, амма кеч. О заваллыларны энди тапсанъ ал. Шу арада озен ёлунда кене бир чана пейда олгъан. Оларнынъ ортада буз чатлагъы олгъанындан хаберлери ёкъ, эльбетте. Алиман Шакирович авджынынъ лыжаларыны алып байырнынъ тёпесинден тайып, чананынъ огюне чыкъа. Оларны артына къайтарып фаджиалы олюмден къуртара. Ондан сонъ, буз кочип кеткенге къадар, Каманынъ устюнде кимсе корюнемеди. Ялынынъ эр эки тарафында къаравуллар турдылар. Буларнынъ эписини Алиман Шакирович япты. Онда арбий низам бар, эм ишини де арбийдже япмагъа севе.

— Мен бу хаберни эшиткен эдим. Оларнынъ арасында бизге таныш олгъан бир адам да бар экен,— деди Айрие.

Машина ормангъа якъынлашты. Баягъы вакъыт даа кетмек керек. Орман ичинде энди къаранлыкъ чѣкип башлады. Шофер газгъа басты, машина вызылдап юксек чам ве арча тереклери арасына кирип кетти.

— Сиз дженкте олдынъызмы?— деди Айрие.

— Ёкъ, етиштиралмадым. Мен барып чыкъкъандже дженк битти. Хызметимни одеп къайттым.

— Озюнъиз не ерлисиз?

— Бу ерлим. Ерли чалдон.

— Я ойле дегенинъиз не?— деп кулюмсиреди Айрие.

— Эшитмединъизми? Бизлерге, ерли халкъкъа ойле дейлер.

— Э бу сизнинъ таныш чамларынъыз экен даа,— деп Айрие машинанынъ пенджересинден кокке догъру узанып кеткен сап-сары чам тереклерине бакъты.

— Эльбет де, алышкъан еринъде яшамакъ къолай келе Манъа чокъ ерлер теклиф эттилер. Яхшы къызлар да расткельди Къалмадым. Озь чалдонкама келип эвлендим.

— Яхшы япкъансынъ. Меним киби матюв дегиль экенсинъ. Алиман Шакирович капитан эди. Фашистлерни коюмизден айдап кеттилер. Сонъ аскерлеримиз бир ай къадар бизде отурдылар. Шу адам козюме пек яхшы корюнди. Бутюн аскерлер онъа табий олалар, оны селямлайлар, онынъ мусаадеси олмаса кой ичинде биле чыкъып юрмейлер. Алиман бизим эвге келип башлады. Мени севгенини ве манъа эвленмек истегенини айтты. Мен разы олдым. Анам къарышмады:— Озюнъ билирсинъ,— деди. Акъранларым:— Шаштынъмы Айрие,— дедилер. Мен оларны динълемедим. Мени кунълейлер белледим Къыскъасы, эвендик. Чокъкъа бармай дженк битти. Оны бу якъкъа хызметке ёлладылар. Меним козюме бир шей корюнмеди. Истесе дюньянынъ четине ёлласынлар, дедим.

— Э. офицер апайы олгъан сонъ, о якъы белли, по морям, по волнам...— деп тишлеп алды шофер.

— Меним о вакъыт по морямдан хаберим ёкъ эди.

— Амма, шоколаддан хаберинъиз бар экен.

— Сиз ярамаз чалдон экенсиз. Шай зытыма тие берсенъиз, лаф этмейджем. Айдай бер машинанъны. Баламнынъ да эси кетти бутюн кунъ...

— Эй, эй... Севги дюньяда нелер яптырмай. Лякин, менимдже севги деген шейде алдав ве акъикъат эр вакъыт ян-янаша туралар. Ана шу эки моментни бири-биринден феркъ этамагъаннынъ севги машинасы илле авариягъа огърай.

— Догъру айтасынъ,— деди Айрие.— Эки къальб бир олмаса, ят ашагъы оль. Мен Алиманны озъ къальбимнен, озъ аршынымнен ольчедим...

Машина ормандан чыкты. Орталыкъ кене ярыкълангъан киби олды. Лякин, акъшам якъын эди. Койнинъ оджакълары тютей. Тютюн дос-догъру тёпеге котерилип кете.

— Бу гедже ава даа зияде сувутаджакъ,— деди шофер оджакълардан сырыкъ киби догъру созулып чыкъкъан тютюнни эслеп.

Айрие козюни машинанынъ ог джамына тикти. Къаршыда сыранен къурулгъан агъач эвлернинъ арасындан озь эвини таныды. Ялынъыз онынъ оджагъы тютөмей эди. Айрие кене къасевет юкю астында къалды. Шофер бир шейлер даа айткъан киби олды, лякин Айрие онынъ ич бир сёзюни анъламады. О ярынки кунюни тюшюне эди.

III

Язнынъ чилле вакъыты. Едисай вадисининъ къумлыкъ чёллеринде кунеш тёпенъден ура, табанынъдан чыкъа. Эр шей янгъан, къавурылгъан. Алдынъда патта-сатта расткельген къыйыш-къонгъыр саксаулларнынъ базы бирлеринде азгъана ешиллик сакъланып къалгъан. Баарь ташкъынлары вакъытында мейдангъа кельген ирили-уфакълы голлерде сув ерине джам киби бем-беяз туз къатып къалгъан. Этрафта ялынъыз чилле къуртларынынъ чырылтысы эшитиле. Олар чырылдай-чырылдай да, сонъ токътайлар. Гъалиба патлайлар. Оларнынъ чырылтысы тынса, озюнъни аятсыз бир дюньягъа тюшкен киби ис этесинъ. Мында аят барлыгъыны ялынъыз эки шей хатырлата. Бириси — чилле къуртларынынъ чырылтысы, экинджиси — саксаулар. Саксаул не къадар чыдамлы осюмлик экен. О, язнынъ атешли кунешине, къышнынъ адджы сувугъына, къум боранына, къар боранына — табиятнынъ не къадар къышымы олса, эписине даяна. О атештеп башкъа ич бир шейден къоркъмай. Саксаул къум чёллерининъ джаны ве ярашыгъы экен. Бу манзараны сейир этип, газикнинъ пенджересинден бакъып кельмекте олгъан адамнынъ козюне насылдыр бир талдалар корюнди.

— Эслеп оламайсызмы? — деди руль башында отургъан дабла бегли, къымпый козъли къазах йигити. — Биэ,

ана, шу ерге бараджакъмыз. Шу корюнгенлер тал тереклеридир. Балтабай урувы сачып къалдыргъан.

— Я озьлери къайдалар?

— Зувгъанлар. Та революция вакъыты. Озьлерининъ шу талларгъа асыладжакъларыны дуйып сыптырылгъанлар.

— Этмишлери олса керек?

— Етерлик экен. Бабамны да къамчылагъан ит огълу. Он учъ яшында къызыны бермегени ичюн. О меним энъ буюк аптем экен. Энди анама ярдымы тийип башлагъанда, бу ит огълу итнинъ онъа козю тюшкен. Ким бильсин къачынды апаы япмакъ истеген. Озю джайль олса да, бу ерлерде алла кесильген. Бир-эки бинъ къою олгъанынен адамларны айван ерине корьген. Гъарип аптем онынъ излевинден къоркъып озъ-озюни якъып ольдирген. Анам да ондан сонъ чокъ кунъ корьмеген. Ээ, языкъ, Будённынъ къолуна тюшмеген. Алыр эди пайыны амма...

— Я Амангельдиге расткельген олса?

— О-го!.. Амангельдининъ адыны эшиткенде оларгъа сычан делиги бинъ алтын эди. Сиз оны къайдан билесиз?

— Амангельди Имановнымы? Къазахстан топрагъында яшап да, онынъ киби халкъ къараманларыны бильмемек айып дегильми? Жангильдиннинъ интернациональ отрядыны айтмайсынъмы? О, та он секиз сенеси Владимир Ильичнинъ косьтеришинен Актюбинск фронтына сия етиштирген. Онынъ отряды агъыр шараиткъа бакъмадан Волга бою ялдап Астарахангъа келе. Каспийни агъач шхуналарнен кечип, Бузачи деген ярым адачыкъкъа чыкъа. О ерден девелернен ве атларнен, ашсыз-сувсыз бир алда къумлыкълардан кечип, Челкар станциясында Москвадан кетирген сия ве патронны Актюбинск фронтынынъ командасына теслим эте. Бу къараманлыкъ дегильми? Сизде ойле къараманлар ве къызыл командирлер даа пек чокъ. Гусман Азербает он еди яшында экенде безъ казакъларнынъ тачанкасыны бир озю къувалап ете де, дёрт пулемётчыны кесип ташлай. Тачанканы, учъ атны, пулемётны ве дигер сияларны тутып алып келе. О вакъыт «Къызыл Байракъ» орденинен мукафатлангъан ильк къазахлардан бири Азербаетдир. Бу джесюр адам Улу Ватан дженкинде де къараманджа курешти. Кене орден ве медаллернен мукафатланды. Лякин, дженкнинъ сонъуны корип олама-

ды. Уруш мейданында къараманджа эляк олды. Бу ерлерде Совет акимieti ичюн къан тѣкип, къатты куреш алып баргъанлардан бири даа Джексенбаевдир.

— Билем, Шакир Джексенбаев сонъундан генерал олды,— деди шофер гъурурланып.

— Генерал-майор эди. Беязлар бойле командирлерден аман тапмай эдилер. Лякин къолларына фурсат тюшсе, хатир бакъмай, озъ джанаварлыкъларындан къачынмай эдилер.

— Догъру айтасыз. О копеклер Амангельдини де ойлекъыйнап ольдюргенлер. Ах оларны шимди тапсанъ да...

— Олар озъ пайларыны алдылар. Амангельди Иманов Тургай уездинде Совет акимieti ичюн къараманджа куреш алып барды. Халкъ ичинден осип чыкъкъан бу къараман уезд арбий комиссары олды. Онынъ ѳлбашчылыгъынен тешкиль этильген къызыл аскер отрядлары Актюбинск фронтында буюк джесюрликлер косътердилер.

— Сиз пек образованный адам экенсиз. Сизинъ киби ѳлджу меним машинада эр вакъыт олсун. Амангельдини менден яхшы билесиз,— деди шофер кулюмсиреп.

— Бильмемек мумкюнми? Ойле къараманларны тарих несильден-несильге етиштире. Амангельди озюнинъ макъсадына иришеджегине, къазахнынъ азатлыккъа чыкъаджагъына иманы къавий бир адам эди. О солдатларгъа шойле дей: «Къазах халкъынынъ такъдири большевиклернинъ енъишине багълыдыр. Эгер большевиклер енъильселер, демек биз де енъильдик. Шунынъ ичюн биз бутюн кучь-къуветимизни ортагъа къойып большевиклерге ярдым этмеге борджлымыз».

Алаш-орду бандитлери бойле къараманнынъ башына еттилер. Эр алда, озю коръмесе де, онынъ алып баргъан куреши зая кетмеди. Асырларнен эзилип кельген къазах халкъынынъ Амангельдиге ошагъан бир сыра джесюр эвлядлары Анненков, Дутов киби беяз айдутларны озъ топрагъындан сипирип аттылар.

Шофер машинаны къум ѳлунынъ ортасында токътатты.

— Бир тюшип аваланмайсызмы?— деди янындаки адамгъа. Экиси де енгий ишнен бирер саксаул тереги янына бардылар.

— Энди якъын къалды гъалиба?— деди янындаки адам машинагъа мингенинен.

— Бир сааттан барырмыз.

— О-о. Талларны коръгенимиз къайда къалды?

— Чёльде ойле ола, эмдже, козюнънен корьген еринъе барып еткендже кимерде, джанынъ чыкъа.

— Джанымыз чыкъмасын, даа япыладжакъ ишлер чокъ.

— Иш къачмаз. Мына мен он бир йылдан берли мынавы баранканы айландырам. Бир кунъ токътасам, башыма келип къоналар.— Парланды десем,— налева кеткенде парланмай да!— деп зытыма басалар. Мында налеваны къайдан аласынъ? Бостандан барып бир чувал къарпыз кетирсенъ, бу ерде онъа да «налева» дейлер.

— Озюнъеми, базаргъамы?

— Къазахнынъ базарнен алып береджеги ёкъ. Къазахкъа, анавы сизинъ «чёп» кечмей, къазахкъа эт керек, браток, эт!

— Чёп, дегенинъ не я?

— Капуста-мапуста, петрушка-метрушка дейсиз де, ана шу. Дженк йыллары ашагъан чёпим манъа ольгендже етер.

— Дженк эттинъми?

— Етиштирамадым. Армиядада копчек устюнден тюшмедим. Биринджи «класс» олып кельдим. О-о, мен машинаны ойле огрендим, чах-чах этип башладымы, не дерди олгъаныны айтыр къоярым. Армияда сютли агъызлар эписи меним этрафымда доланып юре эдилер.

— Ким дединъ, анъламадым?

— Новичоклар даа. Рале башында отурып «права» алгъанлар. Баранканы къолларына туттыргъан сонъ, эписи танърысыны къаргъап башлайлар. Аджыйсынъ завалыларны. Аджемилик дегильми санъа. Даянамайсынъ, барасынъ янына, машинасынынъ къулагъыны бурып берсинъ, коче кете. Тек мында, мынавы бизим «Алсаба» да меним къадирымни бильмейлер...

Газик «Алсаба» колхозынынъ эски эвлери арасындан кечип, кене тюм-тюз чёльге чыкъты. Бу ерде чёльнинъ бир тарафы юксек дагъларгъа барып янтая. Дагъларнынъ тёпеси бем-безд къар. Худжур шей. Ашагъыда сыджакътан тенинъ пишеджек, тёпедде, къол узатсанъ етеджек киби ерде къар. Козюнъни къамаштыргъан бу къар ёлагъындан бираз ашагъы, тим-тик тёпелер ве сарф къаялар къаршысында чешит сой тереклер оськен. Орман шекилини алгъан бу тереклик ёлагъындан бираз даа ашагъыда өнйишли-ёкъушлы къырлар узанып кеткен. Къырларнынъ этегинде исе, уджсыз-буджакъсыз бош топракълар ерлешкен.

Машина, ниаат узакътан корюнген шу тал тереклерининъ салкъынында келип токътады. Шофернинъ янында отургъан адам еринден турмады. Бир къач дакъикъа индемеди. Сонъра шофернинъ бетине бакъты да:

— Яхшы йигит экенсинъ, кель таныш олайыкъ,— деп къолуны узатты.

— Молдабай!— деди шофер алдын алып.

— Андрей Андреевич Каштанов. Янъы совхознынъ директоры.

Шай дегенде, шофер онъа ойле тикилип бакъты ки, козьлери дабла бетининъ ичине къысылып кеттилер. Кенардан бакъкъанда анъламакъ къыйын. О, эм кульгенге, эм агълагъангъа бенъзей эди.

Директор машинадан тюшти.

— Тааджипли шей,— деди Молдабай онынъ артындан бакъып.— Совхозы ёкъ, директоры бар...

Къаршыда тёпеси къамышнен ортыюльген алчакъ эвчик тура. Эвчикнинъ алдында бир къач адам нелердир лаф этип эгленмектелер. Директор догъру оларнынъ янына барды. Бу адамлар къуруджылар ве механизаторлар эдилер.

— Киринъиз,— деди директор оларгъа эвчикни косътерип. Оданынъ ортасында эренделенмеген тахтадан ясалгъан узун стол тура. Столнынъ эки тарафында аякълары ичери къыйышып кеткен, мыхларынынъ уджлары тюртип чыкъкъан эки узун скемле.

— Ерлешип отурынъыз,— деди директор озюне кичкене табуретканы алып. Сонъра кепкасыны чыкъарып столнынъ устюне къойды. Онынъ зильфлери агъарып башлагъан. Тёпе сачлары сийреклекшен. Лякин огден бакъкъанда сачларынынъ сийреклиги чокъ белли олмай.

— Меселе шундан ибарет достлар,— деди о къашларыны туюклендирип.— Эпинъизге малюм ки, партия ве укюметимизнинъ къарарына бинаэн бу ерде янъы совхоз мейдангъа кетиреджекмиз. СССР Министрлер Совети,— деди о ве портфелини ачып бир топ къагъыт чыкъарды.— Бу ишке буюк эмиет берди. Смета айырылды. Кадрлар яваш-яваш кельмекте. Етишмесе, озюмизге азырламакъ керек оладжакъ. Шимди вакъыт агъыр. Мемлекетимиз куль-виран ичинде къалды. Дженкнинъ акъибети бизге алты юз етмиш докъуз миллиард кумюшке отурды. Бу не къадар буюк зарар! Янъы бешйыллыкъта эсас вазифе

харабе алгъа кетирильген халкъ хозяйствосыны къайта баштан аякъкъа турсатмакътыр. Мен беллесем,— девлет кетирип берсе, биз япармыз,— деп эль къавушып отурмагъа кельмедик мында. Эр шей озюмизнинъ къолумызда. Олмаса, етишмесе, къыдырып тапмакъ керекмиз. Анълашылдымы? Сиз, гараж мудире ве баш инженер, базар эртеси кунюне къадар он машина азырламакъ борджлу-сыз. Машиналарны керек алетлернен темин этинъиз! Адамларны мен озюм тапарым. Дагъгъа, агъач кесмеге кетеджекмиз. Прораб аркъадаш, сенде тола меселеси на-сыл тура?

— Тола шимдилик етерлик, цемент ёкъ.

— Цемент бугунъ кетириледжек. Къабул этип алмагъа азыр турынынъыз!

Баш инженер бир шей сорайджакъ олып ниетленди, лякин,— Андрей Андреевич,— деп етиштиралмады, агъызы ачыкъ къалды.

— Мен битирмедим, деди директор оны токътатып. Сонъра, кене прорабкъа бакъты.— Ташчылар бригадасы текмиллендими?— деди о яваштан.

— Экинджи бригадагъа секиз адам етишмей.

— Шимдилик тютюнджилерден алып къошынъыз. Цемент ятмасын! Бояджылыкъ, акълавджылыкъ ишлери насыл?

— Кеченлерде сиз корьген эки эвни битирдик, къабул этмеге мумкюн.

— Молодец къадынларгъа!.. Сен не демек истей эдинъ, Матвей Петрович?— деди директор инженерге бакъып.

— Он машина азырлап оламамыз, Андрей Андреевич, экисининъ радиаторы, экисининъ карбюраторы...

— Етер!— деди Андрей Андреевич. Директор айттымы, битти!

Инженер агъызына сув алгъан киби сусты. Стол башында индемей отургъан учъ адам даа бар эди. Оларны директор танымай. Андрей Андреевич лафыны битиргеннен оларгъа козь ташлады. Кенарда отургъан арыкъ черели, узунджа бойлу адамнынъ кокюсинде орден ве медаль колодкалары бар эди. Директорнынъ козю онъа тюшти. Индемей тургъан бу адам бирден джесаретленип, директоргъа мураджаат этти:

— Директор аркъадаш,— деди о кирпичлерини къыбырдатып.— Биз Озбекстандан кельдик. Сизинъ къагъытынъызнен. Тек биз дегильмиз. Тышта даа барлар. Къо-

Джума эртеси куню эди. Бир афта ичинде совхозда баягы ишлер япылды. Янъы къурулгъан эвлернинъ биринде совхоз идареси ерлешти. Ташчылар бригадасы текмилленди. Янъы кельген ишчилерден эки къуруджылыкъ бригадасы даа тизильди. Гаражнынъ иши де ёлуна къойылды. Машиналар зарурий къысымларнен темин этильдилер. Энь яхшысы шу ки, Озбекстан ве дигер ерлерден кельген адамлар арасындан яхшы шофер йигитлер тапылды. Машиналар шеэрден токътамай-турмай къуруджылыкъ материалы ташымакъталар. Янъы проект боюнджа темели къойылгъан совхознынъ меркез сокъагында янъы-янъы эвлер котерильмектелер. Онынъ адыны Ленин сокъагы деп адландырдылар. Ишчилерде рух сагълам. Къазанч яхшы. Озь къолларынен озьлерине яшамакъ ичюн эвлер къуралар. Къурулып биткен эвлерге невбетнен эски «Алсабада» да яшагъанлар кочюрилелер. Директор озюне шофер оларакъ, анавы айнурлы кулькюси олгъан Молдабайны алды. Ишлер не къадар сырасына къойылса да, эр алда къуруджылыкъ керестелери вакътында келип етишмей. Янъы къурулмакъта олгъан совхозгъа пек чокъ шей керек.

«Озюмиз дагъ тюбюнде отурсакъ, къолумызда техника олса, не ичюн барып озь къуветимизнен агъач кетирмейджекмиз?» деген фикир Каштановкъа раатлыкъ бермеди. Шунунъ ичюн, биринджи кере башлангъан бу муим иште шахсен озю иштирак этмеге къарар берди... Лесхоз совхоз ичюн дагъдан махсус ер айырды.

Дагъгъа кетеджек машиналар гаражнынъ алдында азыр туралар. Директор кельсе кочеджеклер. Директор Молдабайнен эки кунълик ашайт алмагъа кетти.

— Эр шей сырасында, ерли-еринде тура,— деди Молдабай шейлерни машинагъа ташып къойгъан сонъ.

— Анда бир ящик даа бар,— деди директор. Бу ракъы яшиги эди. Молдабай оны силькинмейджек ерге ерлештирди. Гаражнынъ алдына кельдилер. Дагъгъа кетмек ичюн азырлангъан шоферлер руль башларына кечтилер. Колонна кочти. Огден Молдабай кете. Ёлны ондан яхшы билъген ёкъ. Янъы машинада чалышып башлагъанына къувангъанындан не лаф этеджегини билъмей. Кимерде бир Каштановкъа бакъа. Бир шейлер айтаджакъ ола, лякин

ранталарымызнен кельдик. Къайда ерлешеджегимизни бильмей юремиз...

Директор къою къара къашларыны котерди. Манълайынынъ ортасында терен бир чызыкъ пейда олды. Ордени адамнынъ суали директорны тааджилендирмеди. Чюнки, бойле суальни о биринджи кере эшитмеди. Андрей Андреевич баш инженерге, гараж мудирине, прорабкъа чыккып кетмеге рухсет этти. Олар ерлеринден турмакъта эдилер, ичери партия тешкилятынынъ секретары Къурбанбеков кирип кельди.

— Мен сени беклеп тура эдим,— деди директор онъа къолуны узатып. Сонъ кене къаршысында лаф этип тургъан кишиге бакъып:

— Тыштаки адамларынъызны чагъырынъ кирсинлер,— деди. Ордени адам къапыдан чыквар-чыкъмаз ичери бири-бири артындан ёргъун чырайлы, гъамлы, кедерли бир къач киши кирди.

— Тютюнджисизми?— деди директор оларгъа отурмагъа ер корьсетип.

— Къолумыздан келе тургъан,— деди янъы киргенлерден бириси мыйыкъ астындан кулюмсиреп.

— Билем, билем... Дженктен эвель олгъан эдим о якъларда. Мында тютюннинъ башкъа сортыны етиштиреджекмиз. Бу ернинъ топрагъы, бу ернинъ икълими, шаранты мында тютюннинъ энъ яхшысыны етиштирмеге ве номай берекет алмагъа умют догъура. Бу умютни омюрде корьмек ичюн бизге яхшы кадрлар, тютюнджи мутехассылар керек. Шунынъ ичюн биз сизлерни бу якъкъа давет эттик. Кельдинъиз чокъ яхшы, эм даа келеджеклер. Лякин, достлар, шимдилик къолумыздаки имкянгъа, бу шаранткъа даянаджакъсыз. Кельген ишчилерни ерлештирюв ишинен, мына, партия тешкилятынынъ секретары Къурбанбеков аркъадаш огъраша. Ишчилер вакътынджа «Алсаба»да яшайджакълар. Тютюн сачмаздан эвель, яшамагъа юва керек. Шунынъ ичюн эпинъиз белли бир вакъыт къуруджылыкъта чалышаджакъсыз. Анълаштыкъмы?

Сонъра директор Къурбанбековкъа бакъып:— Бу адамлар бизим келеджегимиз, оларны бугунъ ерлештирмек керекмиз,— деди.

Къурбанбеков аяккъа тургъанынен адамлар зий-чув олып онынъ артындан кеттилер.

онынъ къашлары туюкленгенини корип, юткъына ве индмей. Каштанов пек джиддий адам. Юксек бойлу, кенъ омузлы, кучлю-дерманлы. Дженк оны баягъы ипратса да, озюнинъ тешкиятчылыкъ къабилиетини, кемалатыны ёкъ этмеди. О чокъ корьген. Юксек бильгили, теджрибели ве медений адам. Халкъ хозяйствосынынъ чешит пытакъларында чалышкъан. Эр ерде озюни мусбет косътерген. Къайда барып чалышмасын, эр вакъыт озъ хозяйствосынынъ дегерли шорбаджысы олгъан. Онынъ энъ эйи шахсий хусусиетлеринден бириси шу ки, адамларны анъламагъа биле, оларнынъ табиятыны, психологик хасиетлерини догъру огренмеге тырыша. Озюнинъ шахсий мунасибетинен адамнынъ анъында эстетик дуйгъу уяндырмагъа тырыша. Шимди укюмет онъа буюк иш ишанды. Бом-бош чель ичинде янъы совхознынъ негизини къоймакъ ве будиярнынъ тарихында олмагъан янъы сорт тютюн етиштирмек керек. Кичкене япракълы, гъает хош-къокъулы дюбек тютюни. Къолай вазифе дегиль. Къуруджылыкънен бирге, топракъларны да ишлемек керек...

Молдабай козь къиясындан бир даа бакъып алды. Каштановнынъ къашлары язылды, озюнинъ дюльбер шекилини алдылар.

— Тюшюнджелерден вазгечсе керек,— деди Молдабай ичинден.

Машиналар къыргъа тырмашып башладылар. Мында махсус япылгъан ёл ёкъ. Ерли халкънынъ араба екип, ат, я да эшек аркъасына минип къатнагъан топракъ ёлу. Дженктен эвель бу ёлдан бинъде бир колхоз машинасы юрген. Шимди исе, бир ерде машина изи корюнмей. Дженктен сонъки биринджи изни Молдабай къалдырып кетмекте. О кимерде бир къопайсырап газгъа басып ташлай. Лякин, Каштанов разы олмай.

— Ашыкъма, йигит,— дей онъа.— Бойле ёлларда ашыкъчанлыкъ кечмей. Ашыкъсанъ озюнъ де, машинанъ да мынавы ярнынъ тюбюнде, аякъларынъ, копчеклеринъ де тёпеде олурсынъ.

— Мен бойле ёлларны корьген затым, Андрей Андреевич. Тормозлар тутса олгъан.

— Тек машинанынъ тормозы дегиль, озюнъки де тутмакъ керек,— деп кульди Каштанов. Молдабай онынъ кульгенине къуванса керек, чюнки озюнинъ козьлери де къысылып кеттилер.

— Анавы къырнынъ устюне чыкъсакъ, токътатыр-

сынъ . Колонна узюлип къалмасын!— деди Каштанов онынъ юмукъ козьлеринден хавфсырап.

Машиналар бири-бири артындан къырнынъ тёпесине котерильдилер. Бу ешилъ алан ичинде оларны беклеп тургъан дагъджы огдеки машинагъа къолуны саллады. Каштанов газикнинъ къапысыны ачып, узун аякъларыны узатып тюшти. Онынъ устюнде галифе штан, аягъында керз чызмалар. Шоферлер кабиналарындан чыккып, директорнынъ этрафына топландылар. Дагъджы Каштановнен корюшти ве бираз тёпеде агъач кесмеге изин берильгенини анълатты.

— Айтынъ, ишчилер де тюшсинлер!— деди Каштанов. Эр бир машинада учер адам бар эди.

— Ишлер насыл, аркъадашлар?— деди о эр кес топлангъан сонъ.

— Ярамай!— деп къычырды шоферлерден бири.— Янымызгъа бир къой алмагъа унуткъанмыз!

Адамлар шакъылдап кулюштилер. Оларнынъ шенълигини корип, даа зияде рух котермек макъсадынен:

— Эт олмаса да «градус» бар,— деди Каштанов.

— О-о, братцы, яшаймыз! Молдабай, даа козьлеринъни юмып отургъанынъ не?

— Ялынъыз бир шартнен. Биз машиналарны юклеген сонъ, ишчилернен берабер бирер данечик атармыз, шоферлер исе, бизге баккып зевкъ алырлар,— деди Каштанов кулюмсиреп.

— Разы дегильмиз! Олмайджакъ шей!— деп къычырыштылар шоферлер.— Ёлда ичмеймиз, шеэрде ичмеймиз, дагъда мумкюн!..

— Яхшы, достлар, меселе юз граммда дегиль. Бу шакъа. Сиз озюньизнинъ къайда олгъанынъызны билесизми? Тянь-Шанъ дагъынынъ тёпесиндесиз. Мынавы аланнынъ юкъарысындаки дагълыкъта «атларны» туварырмаз. Эр кес элинден кельгенине коре агъач кеседжек. Тереклерни йыккып, пычып азырлагъандже кичкене звеноларгъа болюнормиз. Юклегенде эпимиз бирликте юклермиз. Меним изиним олмагъандже бир машина еринден кочмейджек. Къачан машиналарны юклермиз, о вакъыт эпимиз бирликте ёлгъа чыквармыз. Биз мында йигирми эки адаммыз. Къана, айтынъ бакъайым, бу ишке не къадар вакъыт керек?— деп токътады директор.

— Дагъы билир!— деп къычырды артта тургъан ишчилерден бири.

— Дагъ, эр ерде дагъдыр, къыбырданувунъ билир! — деди кенардан дигери.

— Учъ кунъ! — деп къычырды деми ракъы давасы эткен шофер.

— Достлар! Йигитнинъ сёзю ишинен бир олмакъ керек, — деди директор. — Эки кунъ, эки гедже, сизге! Базар эртеси куню саба саат онда бу ерден кочемиз, анълашылдымы? Айды, машиналаргъа!!!

— Андрей Андреевич! — деп негедир итираз этеджек олды артта тургъан бир киши.*

— Директор айттымы, битти! — деди Каштанов онынъ сёзюни болюп. Сонъра башыны эгильтип газикке сокъулды. Дагъджы да директорнынъ янында ерлешти.

Машиналар къаршыдаки энъ юксек къырнынъ артына бурулдылар.

— Аджайип манзара, — деди Каштанов.

Онынъ козю алдында узундан-узакъ энъишли-ёкъушлы къырлар пейда олдылар. Ашагъы тарафкъа бакъсанъ башынъ айланаджакъ. Терен йылгъалар, серин вадилер ешилъ къадифеге бурюнгенлер. Дерелерден бурулып кичкене ирмакълар, чокъракъ сувлары акъалар. Джаплар къаршысында адджы алма, когем, бурюльген, арча, курюч, юке ве дигер тереклер оськенлер. Арча ве пихталар кийик емиш тереклеринен аралашып тик къаяларгъа янтайгъан ве энъ тёпеден къар орътюли ёлакъкъа къадар бой созгъанлар.

— Бу ерлер аля даа бизим геологларымыз тарафындан менимсенильмеди. Академик Павлов Къара-Дагъ манзарасыны американынъ намлы Йелло-устон миллий паркынен къияс эте. Чокъ языкъ ки, алим, бу аджайип, дюльбер ерлерни корьмеген. Корьген олса бельки къияс этмеге акъран кельген бойле бир ер даа тапмаз эди...

— Мынавы тюзлюкке! — деди дагъджы Каштановнынъ сёзюни болюп. — Айландыр машинаны бу якъкъа!

Директор пытакълары ерге саркъкъан къарт арча терегини косьтерди. Машиналар бири-бири артындан келип, ярым алкъа шекилинде тизильдилер. Ишчилер зий-чув олып, ерге тюшер-тюшмез аджеле ишнен о якъкъа, бу якъкъа даркъаштылар.

— Къана, топланынъыз бу якъкъа! Ярым саат муддет сизге! — деди директор. — Ашанъыз, тюшюн-ташынынъыз. «Силяларны» къолгъа алып, мына бу ерден уджюмге

башлайджакъмыз! Мен озь звенома учь адам алам. Мынавы биринджи тургъан машина да бизимки.

Каштанов шай дегенинен, эр бир шофер озь машинасыны агъачнен темин этмек ичюн, озюне звено тешкилятландырып башлады. Арадан ярым саат кечмеди, пычкы ве балта сеслери юксек къаяларгъа янъгырап кеттилер. Биринджи арчаны Каштанов озю йыкты.

— Терекнинъ тёпесине бакъынъыз, анги якъкъа авгъан олса, о якъкъа йыкынъыз!..

Каштанов ишчилерни бойле инджеликлерге баргъандже огютледи. Балта ве пычкы сеслери яваш-яваш бири-биринден узакълашып, ходжа дагънынъ ичине синъип кеттилер...

Балхаш беттен котерильген булутлар яваш-яваш дагъларгъа тараф джылышмакъталар. Молдабай енъинен манълайыны сильди ве булутларнынъ къайнап, могурдекленип бири-бири артындан къувалашкъанларыны эследи.

— Булутларны коресизми, Андрей Андреевич?!— деди о тёпеге бакъып.

— Булутларда ишинъ олмасын, олар узакъталар, сен алдынъа бакъ!

— Гедже ягъмур тюбюнде къаладжакъмыз. Адамларгъа айтмакъ керек, онъа коре иш тутсынлар!

— Бар айт! Шимди тереклерни ялынъыз тюбюнден йыкъсынлар. Пытамакъ, догърамакъ ишини геджеге къалдырсынлар!..

Молдабайнынъ хавфсырагъаны акъикъатен догъручыкты. Булутлар дагънынъ тёпесинде уюрилип башладылар.

— Артыкъ оларгъа кетмеге ер ёкъ. Бизим устюмизге бошанаджакълар!— деди Молдабай.— Бу ернинъ табияты ойле. Башымыз устюндеки къаяларнынъ тёпесине келип булут уюрильдими, ягъмурнынъ дагъгъа ягъаджагъыны билъ!..

Гедженинъ эппейи вакъыты эди. Зиндан къаранлыкъны яшын айдынлатты. Кокте бир шатырды къопты амма, ер сарсылгъан киби олды. Адамлар кескен пытакъларыны балабан атешке ташлап, онынъ ярыгъында мукъайтыкънен ишлемекте эдилер. Башта тамчылар тюшип башлады. Сонъ шувулдап, инълеп ягъмур кельди. Гедже... Дагъда ава пек салкъын. Ягъмур тамчылары энъсенъе буз киби тюшелер. Ишчилер тереклернинъ астарына сакъландылар. Аякъ устюнде туралар. Ер сылакъ. Кабиналарнынъ

ичине, машиналарнынъ тубюне тыкылыштылар. Ушюг башладылар. Лякин ягъмур ич сакинлемей. Каштанов машинанынъ ичинде амма, кене ченъгеси къалтырай.

— Кочюр моторны бираз кызынайыкъ,— деди Каштанов. Молдабай стартерге басты, машина индемени. Кене басты, мотор кене кочмеди.

— Свечасы сылангъандыр, саба ола, хайыр ола...

Молдабай директорнынъ ушюген сайын омузларыны кыыса бергенини эслеп:

— Мына сизге хош манзара, академик Павловны кетире де, косьтересинъ,— деди шакъа тарзында.

— Етер, етер Молдабай. Сен ягъмурнынъ не вакыт токътайджагъыны айт, атешлер сёнип кетмезден алдынчыкып къурунайыкъ.

— Мен алла дегилим. Олгъаны-оладжагъы шоферим. Онынъ не вакыт токътайджагъыны къайдан билейим, Андрей Андреевич?

— Не вакыт ягъаджагъыны бильдинъ де?

Молдабай кабинадан башыны чыкъарып, бетини кокке чевирди де:

— Кок сим-сия. Геджелейин булутларны корип оламайым. Эр алда, ельнен кельген ягъмур тез кечмек борджлы,— деди.

V

Базар эртеси куню къуруджылыкъ мейданында сексен кубометр агъач бошатылды. Дагъгъа чыккыанлар бойле семерели иштен сонъ, бир кунъ эвде раатланмагъа рухсет алдылар. Къуруджылыкъ объектлери бираз вакыткъа къадар агъачнен темин этильдилер.

— Керек еринде билип къулланынъыз. Бир ёнгъасы зиян олмасын! Девлет тарафындан келеджек кересте арткъачлыкъ этмез. Эписининъ таинленген ери бар,— деди директор янында ырджайып тургъан Матвей Петровичке.

Инженер козлюклерини сюртти, козь кыыасындан зорнен кулюмсиреп Каштановкъа шубели бакъты, лякин индемени...

Къурбанбеков директорнынъ бу ишинен ич де разы олмады. О дагъда иштирак эткен ишчилернен, шоферлернен корюшип субетлешкен сонъ, партия тешкилятынынъ азаларыны топлады ве шойле къараргъа кельдилер: «Янъы

къурулмакъта олгъан совхозгъа, бу буюк хозяйствогъа пек чокъ къуруджылыкъ керестеси керек. Директорнынъ тешеб-бюсинен япылгъан дагъкесюв ишининъ шубесиз буюк эмиети бар. Лякин бу усул совхозымызнынъ итияджыны къандырып оламай ве хозяйствомызгъа паалыгъа отура. Бу ернинъ шараитында бизге буюк къыйынлыкъ догъургъан дагъ кесюв ишинден вазгечмек керекмиз. Йигирми эки адамнынъ эки кунде сексен кубометр агъачны балтанен, къол пычкъысынен азырлап, машиналаргъа юклеп, буюк эзиет иле сарп ёлларнен совхозгъа кетирильмеси — ич де озь-озюни къоруп оламай. Эм адамлар къыйнала, эм ишининъ эффеки олмай. Шунунъ ичюн биз орман санайысы Министрлигинен анылашып, республикамызнынъ шималъ районларындаки бирде-бир леспромхозгъа мукъавеле эсасына озь ишчилеримизни ёлламакъ керекмиз. Олар андаки умумий шараиткъа уйып чалышырлар, леспромхоз исе бизни даимий суретте керек олгъан керестенен темин этип турар».

Акъшам директорнынъ кабинетинде партия тешкилятынынъ бу къарары этрафында къызгъын лакъырды башлады.

— Озюмизге ишчи къувети етишмегенде дагъ хызмети бизге не керек? — деди идареде отургъанлардан бириси.

— Биз мында тютюн асрамагъа кельдик, дагъны дагъджылар кесе берсинлер, — деди дигери.

Каштанов янашасында индемей отургъан Къурбанбековкъа козь ташлады ве идаре азаларынынъ келишиксиз чыкъышларыны болип:

— Аркъадашлар, партия тешкиляты пек акъыллы ве зарурий бир меселе котерди, — деп сёзге башлады. — Беш, он адамдан ибарет намуслы комсомол ве коммунист яшлардан бир звено тешкиль этип, мытлакъ бирде бир леспромхозгъа ёлламакъ керек оладжакъ. Бизим республикамыз чокъ саадан бай олгъаны киби орманджылыкъта да белли ерни тутмакъта. Кокчетов, Кустанай, Павлодар, Шималий Казахстан, Целиноград ве дигер областларны алайыкъ. О ерлернинъ орманы бизим барып кельген дагъымыз киби дегиль. Анда леспромхозлар бар. Агъач азырлав иши, о ерде, шубесиз башкъаджа, илери усулларнен алынып барыла. Бизде адам етишмей дейсиз, я анда етише беллейсизми? Дженкнинъ эр ерге, эр бир хозяйствогъа тесири олды. Менимдже бу ишке ялынъыз озь авеслиги олгъан адамларны ёлламакъ керекмиз. Сиз не дейсиз

Мурадасыл аркъадаш?— деди директор кенарда отургъан узун, кенъ омузлы йигитке.

— Мен разым,— деди о отургъан еринден.— Лякин бригадир олмам. Меним шимдилик пычкъы юрсетмеге кучим етерлик. Бир йылгъа дейсизми, ёкъса зиядеми, менимчюн эписи бир.

— Тешеккюр сизге Мурадасыл аркъадаш!— деди Къурбанбеков еринден турып.— Орман ишине бригадирни биз таин эталмаймыз. Оны леспромхозда чезерлер.

— Мен бу ишке комсомол яшларымызнынъ актив къошулмасыны истейим. Башта озюм кетмеге сёз берем,— деди комсомол тешкилятынынъ секретары Галя Гурченко.

— Чокъ яхшы фикир,— деди Къурбанбеков.— Биз ялынъыз совхоз адындан тешкиятлы суретте барып чалышмакъ ичюн кетеджек аркъадашларгъа ёлбашчы оларакъ бир коммунистни багълармыз. Леспромхозгъа барып адамларны ерлештирген сонъ озю истесе совхозгъа къайтып келир.

— Буны санъа авале этермиз,— деди Каштанов.

— Пек яхшы. Мен разым. Биз, Андрей Андреевич, Министрликте бу меселени аль этсек хозяйствомыз кересте къасеветинден къуртулыр эди.

— Яхшы. Орман санайысы Министрлигине мен озюм барырым. Сиз, Матвей Петрович ве Гурченко бир къач кунъ ичинде адамларны азырланъыз...

Не исе, бугунъки къалабалыкъ кунъден сонъ, Андрей Андреевичнинъ кабинети тынчланды. Стол устюнде почта тура. Газеталарнынъ астындаки конвертлернинъ ичинден бир данесини алып, къаверенкли мешин дивангъа созудды. Мектюпте шойле язылгъан: «Андрей! Мен сенден айырылам. Аризамны халкъ судына язып ташладым. Озь шейлеринъни келип ала билесинъ. Катя».

Бу — Андрей Андреевичнинъ къадыны, Катерина Мануйловна Синельниченконынъ мектюби эди. Каштанов къгъытны ястыгъы тюбюне къыстырды. Устюне одеялны тартып козьлерини юмды. Онынъ хаялы узакъларгъа кетти. Смоленск тюбюндеки урушлар, сонъра партизанлыкъ. Шеэрнинъ азат олунмасы. Госпиталь ве ниает Катерина... «Эбет, догъру яза Катюша,— деп тюшюнди о. Къадын ичюн шеэр еринде акъайсыз яшамакъ азаблы бир шейдир. Энди бу якъкъа авушмагъа мумкюн. Баш сокъмагъа ер бар. Эвлер шеэрдеки киби олмаса да, ярамай дегиль. Ялынъыз Катеринагъа чалышмагъа... Балалар багъчасы

баарьде ишке тюшюриледжек. Бу иш Катеринанынъ бутюн аятынен багълы. Балалар онынъ джаны-джигери...

Каштановнынъ кирпичкери бошадылар, дудагъы аза-чыкъ аралыкъланды, къолу дивандан саркъты. Енгиль-енгиль пуфылдап башлады. Директор къатты юкъугъа далды.

Орманда чалышкъан адамларнынъ бош лаф этмеге, бири-бирини чайнамагъа, ошеклемеге аслы вакъыты къалмай. Буны орманкесерлер яхшы билелер. Мында иш куню кечип-кеткенини дуймай къаласынъ. Технология къаиделери эсасына тизильген иш кунюнинъ эр бир дакъикъасы эсапкъа алынган. Орман боюги устасынынъ ёлбашчылыгъы алтында еди-секиз бригада чалыша. Бригада азалары исе, ишнинъ кетишатына коре, звеноларгъа болюнелер. Кесиледжек тереклер пытакъсыз ве узун олсалар звенода адамларнынъ сайысы чокълаша, амма дагъ чытырман ве тереклер токъал-чёкюр олса, о вакъыт бригада дёрт, я да беш звеногъа болюне. Бойледже, орманкесерлер ялынъыз иш пай этильгенде корюшелер ве яхшы участок ичюн давалашалар. Сыкъ ве тегиз оськен, бою кок юзюне созулып кеткен чамлыкъ бригадагъа тюшсе, мында иш къызгъын кете, «берекети» де чокъ ола. Къыйыш-къонгъур чамлыкъта ишлемеси агъыр. «Кутюгинден ве къатып къалган пытакъларындан башкъа адамгъа бир шей къалмай», деп сомурдана орманкесерлер. Кимерде бу сомурдашувлар джан агърысынен бите, чюнки эр кес гурь ормангъа авес эте. Бу табийй шей. Лякин гурь ормангъа тюшкенлер де: «Алмам пиш, агъзыма тюш»,— деп, эль къавушып отурмайлар. Тереклерни йыкъып, пытакъларындан темизлеп, девлет тарафындан косътерильген чешит сорт сымарышлар эсасына пычып, демир копчекли атлы арабачыкъларгъа юклеп, юкълары складкъа алып кетип теслим этмек керек. Не къадар чокъ агъач теслим этсенъ, о къадар чокъ къазанчынъ ола. Къысметли орман дегени де мына шу. Иш тек бунынъле битмей. Кесильген пытакъларны ве тереклернинъ арасындаки яш фиданларны, бутюн чалы ве чырпыларны бир тамам кесип, темизлеп якъмакъ керек. Къыскъасы, кечильмез чытырманлы орман чалгъынен чалынган киби тюм-тюз чёльге бенъзей. Кесильген мейданда ялынъыз кутюклер къадалып къалалар.

Кереги киби осип етмеген чытырман ормангъа тюшсенъ:—«Иши чокъ, парасы ёкъ»— деген фикир эр кес-

нинъ юрегини зсэрлей, кейфини боза. Шунынъ ичюн, болюк устасы пек теджрибели ве темиз ахлякълы ёлбашчы олмакъ керек. Адамларнынъ тѣккен эмегине догъру къиймет кесмеге бильмесенъ, эрте-ярыкъ ишинъни ташла да къач. Бир кунъ илле орманкесерлернинъ «Дагъ къанунына» огърарсынъ. Чюнки, девлет тарафындан бу ишлерге акъ одев меселеси пек догъру ве адалетли къойылгъан. Буны орманкесерлер яхшы билелер. Озь акъкъыны ве укъукъыны яхшы бильген ишчилер эр кунъ саба болюкнинъ складына топланып, бири-бирлеринен юзме-юз корюше, фикир алышып-беришелер. Бутюн лакъырды иш акъкъында кете.

— Мен къысметсиз ормангъа тюшкениме янмайым,— дей бириси,— меним акъкъымны девлет бере, кимседен ѳксик къазанмайым...

Дигер бириси кенардан чыктып. Онынъ сѣзюни боле:

— Меселе къазанчта дегиль. Сенинъ япкъан ишинъ корюне, менимки тютюн олып авагъа кете. Айлыкъ алгъанда адамлардан утанасынъ. Сен девлетке агъач берип акъча аласынъ, мен исе авагъа думан савурып акъча алам.

— Менимдже, утанмагъа бир шей ёкъ,— дей янындаки адам.— Эпимизнинъ ишимиз бири-бирине багълы. Мен чалы кесмесем, сен де агъач берамайсынъ...

— Акъайлар, динъленъ сизге бир шей айтайым,— деп балтасынынъ уджуны кутюкке санчты эсмери юзлю бир къадын.— Сафсатаны вазгечинъ. Бир афтадан, башкъа иш усулына кечемиз. Комплекс, ѳшитесизми, комплекс!

— Ана санъа... Я ойле дегенинъ не акъыз?!

— Онынъ не экенини шимди санъа анълатып отурайыммы? Ишлесек корермиз. Орманнынъ яхшысына яманына тюштим деген шей олмайджакъ экен. Кутюгинден чырпысына баргъандже бир котёлгъа тюшеджек.

— Къашыгъынъа не расткельсе оны ашайджакъсынъ десе,— деди къаршыда отургъан яш къадын чырайыны сытып.

— Мияв козьлеринъни манъа парылдатма,— деди эсмери къадын.— Пек догъру закон. Берекетсиз ормангъа тюштим, деп, мийимни чукъчукълап юресинъ. Санъа чамнынъ энъ узуны да кутюк олып корюне, къыскъалыкъ эте, энди бельки тоярсынъ.

— Меним тойгъаным етер, сен той. Мияв козьлю олсам да, янымда чам киби ёсмам бар.

— Панти бурнунъны пек котерме. Ёсманъны тутып алырым, чарыкъ дудакъларынь салыныр да къалыр,— деди эсмери къадын шакъанен.

Адамлар бу эки къадыннынъ орман ишинде не пай этамагъанларына шашып индемей турсалар да, эсмери къадыннынъ сонъки сёзлерине шакъылдап кульдилер. Яш къадын даа зияде зытланды.

— Вай, къара петакъ, санъа ким асрет къалгъан гъарип, деп созды мыскъылнен.

— Асыл сени озъ звенома къайсы мараздан алдым. Бутюн адамларны бозасынь, иштен сувундырасынь,— деди эсмери къадын. Сонъра кутюкке санчылып тургъан балтасыны тартып алды да:

— Айдынъ, джемаат, етер бизим зырылтымызны динъ-легенинъиз, кеттик,— деп ормангъа догъру адымлады.

Яш къадыннынъ ачувы даа язылмай эди. О не айтып червасыны ятыштыраджагъыны бильмей. Орман ёлу бою адымлагъан адамларнынъ арасындан огге ынтылып, кене шу эсмери къадынгъа якъынлашты.

— Компекс-момпекс деп чыкътынъ бугунъ, звеновойлыкътан насыл къуртулып къалгъанынъны корермиз,— деди зытланып.

— Сенинъ тилинъе теспи олмайджагъымны бильсем, бугунъ звено башы олмакътан ред этер эдим,— деди эсмери къадын адымларыны бозмайып.

— Билемиз, билемиз сенинъ эр вакъыт буюкликке къызышып юргенинъни. Айриенинъ бойнуны да сен урдынъ.

— Айрие киби олгъайдынъ. Капитаныны къуджакълай да юре. Сенинъ киби чам давасы этмей.

— Айса къуджакълап юре санъа. Тюневин оны Чамлыкъ станциясында корьгенлер. Къуджагъында баласы бар экен, зорнен таныгъанлар.

Айриенинъ адыны эшиткенинен эсмери къадын тарс токътады. Бир адым даа атмады. Ишчилер орман ичине, озъ иш ерлерине даркъалып кеттилер. Бу эсмери къадын — Айриени яшлыкъ чагъындан бильген энъ якъын досты ве сырдашы Макъпуле Ашыралиева эди. О ишчилернинъ артындан сюзюлип къалгъан шу даваджы яш къадынгъа шубели козьлерини тикип:

— Токъта, акъыз! — деди. Яш къадын Макъпуленинъ джанына энди тийдим беллеп, къуванчлы козьлерини парылдатты.

— Къулагъым сенде, айта бер, — деди де, кене адымлайджакъ олды. Макъпуле ачувланды. О, бу яш къадыннынъ танымай эди. Макъпуле оны биринджи кере мында коръди. Амма, онынъ раметли анасыны, къартлыгъында бакъылмай хорланып ольген бабасыны яхшы биле эди. Ана-бабасы шайлы адамлар эдилер. Кимсенинъ малында, барлыгъында козьлери олмагъан, озъ къара къуветлеринен кечинген. намуслы къартчыкълар эдилер. Олар шеэрге кочип кеткенде Макъпуле даа яш эди. Бугунъ онынъла даа эткен бу яш къадын оларнынъ сонъки баласы экен. Адыны Зера къойгъанлар. Асыл о вакъыт Зералар пек мот эдилер. Шу алидженап къартчыкълар бунынъ ана-бабасы олгъаныны билген сонъ, Макъпуленинъ козьлери алдындан бир сание ичинде о муляйим инсанлар келип кечтилер. «Бойле ана-бабадан, насыл ола да, ичинде веэрли йыланлар ойнагъан къыз догъа билир» деп тааджиленди о. Сонъ кене Зерагъа козь ташлады. Зера овюни сыкъмайып адымламакъта эди.

— Токъта, дейим санъа! — деп къычырды Макъпуле текрар. Зера токътады. Макъпулени өриштирген киби омузларыны бургъучлап:

— Не керек? — деп бурнуны котерди. Макъпуле онынъ янына келип козьлерининъ ичине бакъты да:

— Айрис акъкъында айткъанларынъ догърумы, акъыз? — деди.

— Догъру олмаса халкъ айтмаз эди.

— Оны Чамлыкъта ким корьген?

— Корьгенлер бар. Дрезина беклей экен. Энди, бельким, анасына бешик саллатадыр. Офицер торуны, салламай не япаджакъ бичаре, — деп шакъылдап кульди. Макъпуле онынъ кулькюсини бир кереден кесмек истеди:

— Къанджыкъсынъ сен! — деди онынъ козьлеринен тикилип. — Мен буны санъа чокътан айтаджакъ эдим, сени догъургъан анагъа урьмет этип, халкъ огюнде тиймеге истемедим, анъладынынъмы?!

— Сен бу лафынъ ичюн пешман олурсынъ звеновой шерфе! Меним киби яш къадынгъа...

— Яш къадынгъа дегиль де, яш къанджыкъкъа! — деп текрарлады Макъпуле бир даа. — Адамнынъ бахтсызлыгъына къуванма! Онынъ капитаны эп бир санъа кельмез, Ярынки кунюнъни тюшюн, ахлякъсыз. Бар, джёне ишинъе!

Орман ичинден андан-мындан «Бойся!» сеслери эшитильди. Демек, орманкесерлер ишке башладылар. Юксек

чамлар шувулдап ерге ургъанда аягъынъ тюбюнде топракъ титрей. Бу маальде орман ичинде юрмек пек хавфлы. Эр кес озюнинъ ишлеген еринде. Хавфсызлыкъ техникасы къаиделерине риает этмейип, четке бурулдынъмы, терек астында къалырсынъ. Пычкъыджынынъ янында ишлегенлернинъ бутюн дикъкъаты пычылмакъта олгъан теректедир. Терекнинъ авдарылмасына бир къач сание къалгъанда пычкъыджы: «Бойся!» деп къычыра. Къычыра амма, терекни базыда бир ель башкъа тарафкъа авдара биле. Онынъ ичюн эр бир пычкъыджы терекнинъ тёпе далларына бакъкъанда не якъкъа авдарыладжагъыны ве къач метр ерге сериледжегини бильмек борджлы.

Чамларнынъ шувултысыны ве «Бойся!» сесини эшиткен сонъ Макъпуленинъ юреги тынчланды. Чюнки, пычкъыджы Мурадасыл «Бойся!» деп башладымы, къасеветленмеге бир шей ёкъ. Бутюн звенонынъ берген агъачыны бир озю йыкъа ве кейфиетине коре чешит сортларгъа догърай. Пычкъы онынъ къолунда санки дерсинъ ава чала. Сагълам йигит. О леспромхозгъа кельгени киби озюни корьсетти. Совхоздан кельген ишчилерни орман болюгининъ бригадаларына даркъаттылар. Чюнки орман ишинден кереги киби анъламагъан адамларгъа айры бригадада чалышмакъ къыйын ола.

— Ишчи куню бугунъ де къызгъын башлады,— деди Макъпуле озь-озюне.

Орман болюги устасындан сорап, койге къайтмакъ ичюн складкъа догъру джёнеди. Айрие акъкъында эшиткенлери онъа тынчлыкъ бермеді. Макъпуле чешит тюшюнджелер ичинде къалды. Айрие онынъ энъ севимли, айрылмаз досты эди. Яшы ондан баягъы буюк олса да, балалыкъ чагъындан бири-бирине алышып-къарышып къалгъан эдилер. Айрие онъа «апте» деп, озь тувгъаны киби якъын корер ве бутюн сырыны ачар эди. Макъпуле ясе, онъа тувгъан аптесинден де якъын олмагъа тырышыр эди. Айриенинъ анасы Себия къартый оларнынъ достлыгъына къуванып, Макъпулени де озь къызы киби севди. Заваллы къартый бош вакъыт таптымы, теспи чекип башлай. Айы, кунюни шашырмай оразасыны тута ве беш вакъыт намазыны къыла. Бу тертипни Себия къартый ала даа бозмай. Дженктен себеп чокъ фелякет корьсе де, дал-фидан бойлу огълундан айрылмагъанына шукюр эте. Шимди олар буюк бир одада яшайлар. Ичинде балабан собасы бар. Одун чокъ. Собанынъ янында, та келинлик

вакътындан к̑алгъан эчки терисини т̑шеп, намаз к̑ыла. Саба огълу ишке кете. Себиля к̑артий онынъ бахтыны истеп дува эте. Бирден-бир к̑ызы Айриенинъ узакъкъа эрге тюшкенини хатырласа, юреги парчалангъан киби ола. Бу вакъыт Макъпуле келип, онынъ гонълюни ала. Эвини джыйыштырмагъа, к̑артопдан чешит сой ашлар пиширмеге ярдым эте. Илле к̑артоп питеси. Оны эр кес беджералмай. Себиля к̑артий леззетли ашларны корьген адам амма, шимди не япсын, кобетеге, минген к̑амырдан к̑атлама созмагъа, чиберек чырылдатмагъа чареси ёкъ. Макъпуленинъ энъ пек аджынгъан шейи де бу эди.

— Етмишке кирген адам не к̑адар даа яшайджакъ? Ун тапсам шу г̑арипке бир кобете ашатайым,— дей ве дегенини япмагъа тырыша. Макъпуле пек тирнекли ве беджерикли к̑адын. Онынъ эм тилинде, эм элинде бар. Айрие киби о да бабасыз осьти. Онынъ бабасы дженк башлагъан йылы Брест к̑алъасы тюбюнде, анасы бомба тюбюнде к̑алды. Учъ к̑ардашына эм аналыкъ, эм бабалыкъ япты. Акъай киби чалышты. Онынъ кемалатлы, тирнекли к̑адын олгъаны шимди де корюнип тура. Ормангъа чыкъар-чыкъмаз оны звено башлыгъы тайин эттилер. Бутюн болюкке намы кетти. Орманда онынъ звено-сындан чокъ агъач берген тапмазсынъ. Идаренинъ алдындаки «К̑ызыл тахтада» башта Макъпуленинъ адыны коресинъ. Ишчилер онынъ звеносына авесликнен келип чалышалар.

Зера киби тили зеэрли адамларгъа о эр вакъыт керек джевапны берир, лякин ишке кедер кетиртмез. «Пайынъны ал, ишинъни яп», дегенлерден бирисидир. Кимсеге г̑арезлик кутьмей. Айтаджагъыны козюнъе бакъып айтыр. Адамнынъ артындан айтмакъны алчакълыкъ сая. «Озю догърунынъ иши догърудыр» дегенлери киби онынъ ишлери де эр вакъыт огюне кете.

Макъпуле складкъа келип чыкъкъаныны абайламады. Дагъ болюгининъ устасы Мефодий Пантелеевич эстакадалар арасында юре эди. О штабелленген агъачларнынъ сортлары к̑арышып-к̑арышмагъаныны тешкере. Макъпуленинъ якъын келип к̑алгъаныны эслегенинен:

— Коресинъми мынавы двадцатканы,— деп озеги к̑ып-к̑ырмазы агъачны тюртип косътерди. Диаметри йигирми сантиметрлик бу агъач к̑уруджылыкъкъа ёлланыладжакъ сагълам агъачларнынъ арасына к̑арышып тюшкен. Бу иште ялынъыз складда чалышкъан к̑абул-

джы-бракёр кѡбаатлы. Кѡбулджы агѡачларнынъ хаста-
лыгъыны эким киби бильмек борджлы. Чурюк агѡач
сагѡлам агѡачкѡа кѡарыштымы, кѡыймети эксиле, бундан
орман болюгининъ ишчилери ве умумен «Леспромхоз»
буюк зарар коре.

— Бунѡа не дейлер?— деди Мефодий Пантелеевич
кене шу агѡачны тюртип.

— Краснина,— деди Макѡпуле бир кереден.

— Догѡру айтасынъ бойле агѡач шахтагѡа кечмей.
Кѡбулджынынъ козълери буны корьмеген. Сенинъ зве-
нонѡда пычылгѡан брак олса керек?

— Мефодий Пантелеевич,— деди Макѡпуле джиддий-
ликнен,— агѡачнынъ пытакъларына, кѡабугѡына бакъып,
хасталыгъыны анѡлагѡан энъ яхшы пычкѡыджылардан
бизим болюкте кимни билесиз?

Мефодий Пантелеевич Макѡпуленинъ козюне тикилип
бакъты.

— Сен манѡа кене Мурадасылны айттырмакъ истей-
синъ, ойлеми?— деп кулюмсиреди.

— Мурадасыл бир вакъыт бойле брак япмаз. О, агѡач
экими. Бу иштен анѡламаса, кельгени киби пычкѡыгѡа
япышмаз эди.

— Агѡач экими амма башкѡа шейде экимлик яп-
май,— деп кульди Мефодий Пантелеевич. Макѡпуле бу
шакѡаны озюне чекти.

— Керек олса, оны да япар, кѡолундан кельмейджек
йигитке бенъземей,— деди Макѡпуле.

— Догѡру айтасынъ. Мурадасыл яхшы адам. Арекет
этинъиз, болюгимизде бир той япайыкъ.

— Меним тоюм чокѡтан япылды, Мефодий Пантелее-
вич,— деди Макѡпуле гонъюльсизленип.— Энъ яхшысы,
сиз манѡа бугунъ изин беринъиз, мен эвге кѡайтайым.
Мусафир кѡаршыламакъ керек.

— Бизге мусафирликке дегиль де, яшамагѡа кельсин-
лер. Сизинъ киби ишкир адамлар чокѡча кельсинлер.
Мурадасыл бугунъ иштеми?

— Юкѡары чыкъып, динѡленип бакъынъыз, онынъ
«Бойся!» сындан орман инълей.

— Айды, яхшы, кѡайт Макѡпуле. Лякин сен бугунъ
мусафиринъни беклеме.

— О тюневин кельмек борджлы эди...

Макѡпуле шай дегенде Мефодий Пантелеевич даа бир
шейлер айтаджакъ олып ачкѡан агѡызыны япты. Айта-

джакъ лафы ичинде къалды. Тюневин ёлда дрезина къа-
пакълангъаныны ве бир къач адам яралангъаныны айтып,
Макъпулени къасеветлендирмеге истемеди.

Ормандан койге къайтып кельмек ичюн бир саат ёл
юрмек керек. Макъпуленинъ бутюн тюшюнджеси Айрие
эди. Онынъ акъайынен узлашамагъаныны Макъпуле биль-
се де, меселенинъ айрылыкъкъа барып чыкъкъанындан
хабери ёкъ эди. Айрие озъ мектюплеринде аиле вазиети-
нинъ бутюн инджеликлерини язмай эди. Макъпуле хаял-
гъа далды: «Эв сыры, эвде къалмакъ керек, дей эди Ай-
рие. Догъру айта экен. Сыр сакъламагъа бильмеген адам
ич бир вакъыт севип оламаз, эм ойле аиленинъ оджагъы
тез сёнер».

Айрие озъ къорантасына, акъайына садыкъ бир къадын
эди. Не чексе, озю бильди. Тапса ашады, тапмаса даянды.
Онынъ бу хусусиетлерини Алиман янълыш анълады. Кой
баласы деп бакъты онъа. Фидане догъгъан сонъ Айрие-
нинъ эль-аягъы бир тамам багъланды. Алиман озюнинъ
янълыш фикирлерининъ къурбаны олды. Онынъ эль-аягъы
исе, бир тамам чезильди. Айриеден узакълашып башлады.
Озюне башкъа эгленджелер къыдырды. «Къыдыргъан
тапар», дегенлери киби, о да тапты... Макъпуленинъ бу
шейлерден хабери ёкъ эди. Айриенинъ келювине о, бир
тарафтан къуванса, дигер тарафтан терен къайгъы астын-
да къала. Тез-тез койге келип етсе де, корюшсе, къызлыкъ
вакъытларындаки киби бир сырдашып тойса, сонъ джаны
раат оладжакъ.

Койге якъынлашкъанда онынъ къаршысына Зеранынъ
«Ёсмасы» расткельди. Макъпуле бу адамны бильмей.
Онынънен бир ерде олмады, къонушмакъ сыра кельмеди.
Озю бир юваш адамгъа бенъзей. Баягъы вакъыттан берли
демирёлда ишлей. Кимсеге зарары тийген адам дегиль.
«Асыл дюньяда ойле олып кельген ки, алманынъ эйисини
къурт еген. Зера киби жаризге ляйыкъ адам дегиль
амма, ойле расткельген, не япаджакъсынъ? Ай-ай, инсан-
лар къысметине къанаат этип, раат-муаббет яшасалар...
Ёкъ, адамнынъ козю тоймай экен. Оны ялынъыз бир авуч
топракъ тойдура. Сагъ экенде не къадар берсенъ азлыкъ
эте... Зера меним звономдаки анавы арслан киби Мурада-
сыл къадар пара аладжакъ ола. Чаресини тапса оны да
бир къашыкъ сувгъа богъаджакъ. Шу адамнынъ тёккен
тери эсабына бутюн звононынъ яхшы къазангъанындан
хабери ёкъ. Сабадан акъшамгъадже башы ашагъыда.

Бунъа даянгъан бель олурмы? Мурадасылнынъ бели даяна. Онъа табиат челик киби сагъламлыкъ берген. Анълашылгъанына коре Зеранынъ акъайы да эксик къазанмай. Сонъ бунъа къанаатленмеген, нефисини йибере берген адамгъа не десенъ ери дегильми? Алла сакъласын, шимди бу дагъ ичинде онынъ акъайынен расткельгенимни корип къалмасын, атеш пускюрир. «Есмасыны» къазангъа къойып къайнатыр. Екъ, о манъа бугунъ бир саташты, бир даа илишсе кене шу пайыны алыр. Динсизнинъ акъкъындан имансыз келир...»

— Не башынъны астынъ я?— деди о Макъпуленинъ тюшюнджелерини болюп.

— Тюшюнмеге шей азмы? Эки омузынъ устюнде баш ташыгъан сонъ, тюшюнмеге меджбурсынъ,— деди Макъпуле адымларыны сыкълаштырып.

— Тюневин ёлда дрезина къапакълангъаныны эшиттинъизми?

Макъпуле бу лафкъа бир кереден эмиет бермейджек олды. Сонъ, абдырап сорады:

— Тюневин дейсинъми? Олюм бармы?!

— Ичи адам толу олгъан сонъ... О якътан кимсени корьмедим, не десем ялан.

Макъпуле адымларыны сыкълаштырып алгъаныны дуймай къалды. Онынъ устюне къайнагъан сув текюльген киби олды. Эсмери чырайы къансызланды, къоркъунчлы бир тюрс алды. Зеранынъ акъайы онынъ артындан бакъып къалгъаныны баягъы ёл юрген сонъ эследи.

«Демесе, Айриечигим къазагъа огърады? Я ольген олса?... Къуджагъында баласы да бар. Вай, тувгъанчыгъым не япайым экен? Мына, ничюн о тюневинден берли келип чыкъмай. Коресинъми дубараны. Шимди догъру Себиля къартийге барайым. Эгер анда Айрие олмаса... Сонъ, эр шей белли... Асыл бу Себиля аптемнинъ корьмегени бармы? Инсан чокъ шейге даяна экен. Та балалыгъында оларны бир мырза пек хорлагъан. Бутюн койнинъ джемааты чалашлар къурып, ёл кенарында, къарягъмур астында чекишкенлер. Мырзанынъ эткенлери де бурнундан чыкъты амма, шу койнинъ халкъы оны аля даа къаргъай. Кель-келелим Советлер кунюнде, энди яшайыш корьдим дегенде, акъайы Сейдамет колхозда биринджи электрик станциясы къурайткъанда къазагъа огърап олды. Айрие о вакъыт кичкене къардашчыгъынен бу гъарипнинъ къолунда къалды. «Оксюз ольмез, орьселенир, кунъ

корер», дегенлери киби бу сабийлер де, меним киби, бабасыз осип етилер. Энди оларнынъ файдасыны корейим дегенде, башымызгъа дженк фелякети чыкъты. Онынъ бутюн азабыны биз корьдик. Чайырларда сыпанакъ, аткъулакъ, къыджыткъан къалдырмадыкъ. Бир къазан къыджыткъан шорбасына, бир къашыкъ ундан умач чалып, джан къуртардыкъ. Буларны Айрие де яхшы биле... Совет ордусы коюмизни азат эткенде къуванчымыз ичимизге сыгъмады. Айрие о вакъыт кемалына кельген къыз эди. Пишкен алма терегинде турмагъаны киби, онъа да эвли-баркълы олмакъ керек эди. Я кимге барсын? Койде бир яш къалдымы? Эписи дженкте эдилер. Чокъусундан аля бугунъ хабер ёкъ. Эляк олды яш дживанлар. Сонъ, анавы топчыларнынъ командири онынъ артындан тюшти. Гузель адам эди. Себиля апте разы олды. Мен де разы олдым. Эвленилер. Яхшы яшап башлагъан эдилер. Амма шимди не олды? Озюнен корюшмегендже айтмасы къыйын. Корюшмек?.. Вай кене дрезинанынъ къапакълангъаны эсимден чыкъты... Бу да насыл бир фелякет?»

Макъпуле бу тюшюнджелернен Себиля аптенинъ азбарына келип кирди. Уйле маали эди. Къапы алдында Себиля апте эчки сагъмакъта. Азбарда тынчлыкъ. Къартийнинъ чырайында бир тюрю денъишиклик сезильмей. Демек, Айрие кельмеген. Макъпуленинъ ичине буз тюшкен киби олды. Эти-тени чимирдеп кетти.

— Себиля апте Айриеден хабер ёкъмы?— деди о дукакъларыны къалтыратып.

— Ёкътыр, балам.

Себиля апте шай деди де, эчкининъ эмчегини сонъки кере сыкъып, къопкъасыны кенаргъа тартты.

— Сизге кетмеге азырланам, деп язгъан мектюбиня озюнь окъуп корьген эдинъ. Ондан сонъ бир шей кельмедди.

Макъпуле индемени. Къартийнинъ къолундан къопкъасыны алды. Ичинде бир литр къадар сют бар эди.

— Баягъы сют бере экен айванчыкъ,— деди Макъпуле.

— Эй, балам, къавелик сютни берсе олгъан. Манъа даа не керек? Юнус сют севмей. О къадар зорлайым, агъызына биле алмай. Бабасы киби салте этли, хамыр ашлар севе. Оны да мында къайдан аласынъ. Айгиди дюньялар сени. Кене яхшы, балам, къартоп чокъ. Къартоп да экинджи отъмектир. Бир вакъытлар о да ёкъ эди. Сиз йигирми бирнинъ ачлыгъыны бильмейсиз. О да дженктен бетер

бир кыргынылыкъ эди. О вакыт къртоп олгъан олса, кимсе ачыкътан кырылмаз эди...

Эвге кирдилер. Макъпуле кърпканынъ сютюни безден чыкъарып, кичкене алюмин къазанчыккъа тѣкти.

— Отур, кызым,— деди Себиля къртий Макъпулеге миндерчикни косътерип.— Мен абдест алайым, вакътым кечеятыр.

— Отурмакъ къайда, Себиля апте. Бир аякъ кирип хатир сорадым. Айриеден хабер ѳкъмы экен?— дедим.

— Ах, балачыгъым, онынъ тюшкен ери дюньянынъ бир чети экен, дейлер. Андан бизге келип чыккъандже... Ким бар, ким ѳкъ...

Къртийнинъ козьлери яшланды. Макъпуле онынъ гонълюни котермек истеди.

— Сабыр этинъ, Себиля апте. Келир. Ёлгъа чыккъан, ёлда къалмаз. Торунынъызны да корерсиз. Эчкинъизнинъ сютюне о да ярдым этер.

— Кельсин де балам, сют экимизге де етер.

Макъпуле сагълыкълашып чыкъты. Лякин къайда кетеджегини, кимден не барып сораиджагъыны бильмеди. Баракнынъ артындаки тар сокъакъчыкъ бою адымлады. Сонъра, токъталды, терен тюшюнджелерге далды...

Къара хабер ерде ятмай, дегенлери киби, дрезина къа-
пакълангъаны эр кеснинъ агъызында .Лякин, дрезинада
кимлер бар эди, кимлер къазаланды, буны кимсе бильмей.
Макъпуле конторагъа тараф адымлады. Онынъ козю
огюнден бинъ бир чешит шей келип кечти. Бир йыл
эвельси бу ерлер бус-бутюн орман эди. «Чамлыкъ» стан-
циясынынъ адыны догъру кърйгъанлар. Этрафы чам те-
реклери олгъан сонъ, станциясы да чамлыкъ оладжакъ
эбет. Шимди Макъпуленинъ яшагъан ве чалышкъан бо-
люги бу станциядан отуз докъуз километр авлакъта ер-
лешкен. Бу болюкке къратнамакъ ичюн, «Чамлыкъ» стан-
циясындан отуз докъуз километрлик тар демирёл пытагъы
кърурмакъ керек олды. Макъпулелер совхоздан келип ишке
башлагъан сонъ, бу демир ёл къруруджылыгъы бир къач
айгъа биле бармады. Отуз докъуз километрлик месафедде
дѳрт дане кичкене демирёл станциясы кърурлды. Сонъра
бу станцияларда орман болюклеринде чалышкъан ишчи-
лер ичюн эвлер, бараклар япылды. Буларгъа — Онынджы,
Йигирминджи, Отузынджы ве Отуз Докъузынджы адла-
ры берильди. Мына шунынъ ичюн Макъпулелернинъ яша-
ган болюгине Отуз докъузынджы дейлер.

Айриеге Чамлыкъ станциясына келип тюшмек ичюн поезднен эки бучукъ сутка кельмек керек эди. Насыл да олса, къуджагъына баласыны алып, о ёлгъа чыкъкъан. Чамлыкъ станциясыны келип тапкъан. Адамлар оны корьгенлер, лаф эткенлер. Амма, я корьгенлери энди эки кунь олды да. Бу не демек? Эки куньден берли насыл ола да, Отуз докъузынджыгъа келип чыкъмай бу къадын? Мында, эльбетте бир шей бар. Дрезинаанынъ къапакълангъаныны эшиткен сонъ, Макъпуле темиз шашты. Машина къатнагъан виляет дегиль. Барып-бакъып кельмекнинъ чареси ёкъ. Телефон ялынъыз Чамлыкъ станциясынен багъ тута. Адамлар бутюн ишлерини ялынъыз шу дрезина вастасынен битирелер. О да къапакълангъан. Ёлда аретокъ токътагъан. Не япмалы? Мына бойле вакъытта истеристемез къышны хатырлайсынъ. Къышта мин чананъа орманнынъ дёрт-бир якъына ялла балам. Не батакътан къоркъасынъ, не гольден. Эр шей буз астында къала. Бу ернинъ халкълары, анджакъ, чана ясамагъа огренгенлер... Эм боялы чаналары да бар. Бу чаналарда байрам куньлерини отькерелер, шеэрге къатнайлар, мусафирликке баралар, тойларда кезинелер. Эм бу чаналарны не къадар вызлы айдасанъ, айда. Ич де къапакъланмайлар. Къапакъланмамасы ичюн чананынъ эки тарафында къанат киби махсус япылгъан эки агъач билек бар. Вызлы айланмаларда чана бир тарафы устюне янтая ве ёл догърулгъан сайын ,яваш-яваш чана да догърулып озюнинъ эски изине тюше. Чананынъ зевкъыны ерли халкълар эльбет де яхшы билелер. Кельме адамлар буны кереги киби анълап ола-майлар.

Агъыр йыллар. Дженкнинъ къалдырып кеткен яраларыны тюзельтмек ичюн нидже эмек, нидже маълай тери тёмек керек. Муаребе кечкен ерлерде койлер, шеэрлер харабе бир алгъа келип къалды. Койлер янды, шеэрлер йыкълды, копюрлер патлатылды... Буларнынъ эписини къайта баштан къурмакъ керек. Къурмакъ ичюн исе, кересте керек. Я ашамакъ, ичмек, киймек меселесини айтмайсынъмы? Къарнынъда оркестр чалса, къолларынъ ойнамай. Мурадасыл киби йигитке бир куньде отуз кубометр агъач пычып абрамакъ ичюн, къазанынъ ичинде юрек тутаджакъ киби бир шейлер къайнамакъ керек. Агъыр вазиет. Дженк бутюн мемлекетни хараплады. Уруш ёлларында къыргъынлыкъ олса, халкъ хозяйствосында, койлерде, колхоз-совхозларда дургъунлыкъ олды. Техника

олмаса, ишлемеге акъай къолу къалмаса, амбарлар бошап кетсе, укюмет къайдан алып береджек санъа. Бу вазиятти яхшы анълагъан Совет халкъы дженктен сонъ енълерини чермеп ишке киришти. Олар эр шейге къатландылар. Устю ~~жымур~~, асты чамур олса да, даянды, чалыштылар. Баткълыкъ ерлерде демирёл къурдылар. Керек эди. Кой ве шеэрлерге къуруджылыкъ материалы керек, шахталаргъа агъач керек. Агъач, агъач. Эр ерде, эр къуруджылыкъ мейданында агъачсыз иш олмай. Мына, ничюн Макъпулелер, Мурадасыллар, Мефодийлер саба ярыгъындан, акъшам къаранлыгъына къадар орман ичинден чыкъмайлар. Олар ичюн, дерсинъ шимдилик бир тюрлю зевкъ яшамай. Бутюн зевкъ иште. Яхшы ки, ишнинъ къолайыны билесинъ. Орман ишини эр кес бильмей. Бу, багъчаджылыкъ я да экинджилик дегиль. Эр алда, эмск севген адам эр иште озъ кемалатыны косътерир экен. Мефодий Пантелеевич дерсинъ омюринде даа бойле ишкир адамлар корьмеген.

— Не айтсанъ, дегенинъ киби япалар. Пек сёз динълей ве нефес алмай чалышалар,— дей о топлашувларда. Шунынъ ичюн болюкке орман ишининъ кетишатыны корьмеге ким кельсе, технорук оны башта Мефодий Пантелеевичнинъ орман болюгине алып келе. Чюнки, анда кимлер чалышкъаныны, юзю къызармайджагъыны биле. Мефодий Пантелеевичнинъ орман болюги бир йыл ичинде бутюн «Леспромхоз» боюнджа биринджиликни алды. Къышлыкъ делянканы комиссиягъа теслим эткенде эр йыл бинълернен штраф берген олса, бу адамлар ишке тюшкен сонъ, онынъ болюги мукаяфат алып башлады. Орман усталарынынъ тилинен айткъанда о бойле ола. Къышта къарнынъ теренлиги орман ичинде бир метрни кече. Кесиледжек тереклерни къарнынъ устюнден йыкъсанъ, баарьде къар ириген сонъ, делянканынъ ичинде бирер метрлик кутюклер тикленип къалалар. Бу орман ишинде джинает сайыла, чюнки агъачнынъ энъ кейфиетли ери тюбюнден башлай. Эр бир терекнинъ тюбюнде бир метр кутюк къалдырсанъ, орман болюги пек чокъ къийметли материал гъайып эте. Шубесиз, орманда къышта чалышмакъ, яздан агъыр ола. Пычкъыджынынъ къолунда балтасындан, пычкъысындан, уйтеп йыкътырыджы сырыгъындан башкъа, мытлакъа куреги де олмакъ керек. Эр бир терекни йыкъмакъ ичюн, бир метр теренлигинде къарны ерге къадар куреп, терекнинъ тюбюни ачмакъ шарттыр. Бу агъыр вазифеге эр кес озюндже янаша. Пычкъыджынынъ анълы,

я да анъсыз янашкъаныны иш вакътында тешкерип билъ-мекнинъ чареси ёкъ. Нетиджеде, яз келе, комиссия къадалып тургъан кутюклерни, янып битмеген пытакъларны коре ве демянканы къабул этмей. Орман болюги бунъа бир чокъ пара тёлемеге меджбур ола.

Мефодий Пантелеевич бу къасеветлерден ве штраф төлевден къуртулды. Чюнки, онынъ болюгинде бир тамам анълы ве ишкыр адамлар чалышалар. Шунынъ ичюн онынъ адамларгъа бакъышы сонъ вакъытта бутюнлей денъишип кетти.

— Асыл, бу дюньяда козюмнен корьмегендже бир шейге инанаджагъым кельмей,— деди о бир кунъ Макъпулеге.— Мен совхоздан янъы кельгенлерни атта болюгиме алмагъа истемедим. Ильки кунълери олардан четлеп юрдим. Гизлемейим, бу акъикъат. Янълыша экеним. Албу исе, олар да, эр кес киби адий адамлар экенлер. Мурадасылнынъ эм озюне, эм ишине сукъланмамакъ мумкюн дегиль. Эм бу адамларда чокъ гузель хусусиетлер бар экен. Мына, бизим Отуз докъузынджыда сокъакъта тиленип, салланып юрген ким бар? Эмек севген адам къысметини сокъакътан къыдырмай.

Мефодий Пантелеевичнинъ бу сёзлери ичюн Макъпуленинъ къуванчындан козьлери яшланды. Тувгъан бабасыны, озь севимлисини гъайып эткен, ве дженк фелякетинде инджерип къалгъан юрекни севиндирмеге чокъ шей керекми, аджеба? О юречик азачыкъ аджджыгъа чыдамай, патлап кетеджек ола. Бир агъыз татлы лафкъа да чыдамай, учып кетеджек ола. Мефодий Пантелеевич Макъпуленинъ козьяшларына аджынып бакъты.

— Зарар ёкъ, Макъпуле, сиз энди къыйынлыкъны баштан котерип аттынъыз. Ишни яхшы билесиз. Тек адамларгъа айтмакъ керек, чокъча къартоп сачсынлар. Не ерге урлукъны ташласанъ, берекет. Яз къыскъа. Тез-тез давранып сачсынлар. Къышта, эр алда, мен сенинъ тоюнъда зевкъланмакъ истейим,— деди о шакъа тарзында.

— Мефодий Пантелеевич, сиз той лафыны эр корьгенде манъа айта бересиз, кимге эвлendirеджек оласыз я мени?— деди Макъпуле джылмайып.

— Мурадасылгъа,— деди о Макъпуленинъ козюне джиддий бакъып.

— Мурадасыл мени бегенмей, Мефодий Пантелеевич. О пек дызман адам, шайлы йигит, лякин мен онъа келишмейим. Яшым буюк.

— Зарар ёкъ, келиштирмиз.

— Зорнен севги олмай, Мефодий Пантелеевич. Демирнинъ эки уджу бир къызмаса, не къадар чёкючлесенъ бир-бирине къуралмай.

— Къурамагъа тырышмакъ керек, анълайсынъмы? Сен о къадар атик бир къадынсынъ, бунъа чаре тапамайджакъсынъмы? Коресинъми Зераны? Шимди эр шейни фронтчасына чезмек керек. О да янъгъыз, сен де янъгъызсынъ...

— Мен Зеранен тенъ олмагъа авес этмейим. Бу месе-леге атиклик кечмей. Эм акъайлар пек атик апайларны бегенмейлер, сакъыналар. Мурадасыл пек юваш адам.

— Юваш, лякин баш! Сен оны бир йылдан танымазсынъ, Макъпуле. О талапкяр адам.

— Шубеленмейим. Онынъ келеджеги яхшы.

— Лякин, Зера кибисине илишсе, бир айдан йигитни танымазсынъ. Языкъ олур адамгъа. Эр алда сен тюшюнип бакъ, Макъпуле. Мен болюгимиз адындан тоюнъны яраштырмагъа азырым.

— Сагъ олунъыз, Мефодий Пантелеевич. Сиз манъа буюк бир вазифе даа юклединъиз, деп кулюмсиреди о, — лякин инсан юрегине ёл тапмакъ, дагъ йыкъмакътан да кыйын...

Мефодий Пантелеевичнен Макъпуле арасында бойле самимий лафлар чокъ ола. Орман болюгининъ ёлбашчысы озюни бойле саде алып баргъаны ичюн ишчилер оны севелер, онъа урьмет этелер. Шунынъ ичюн де озъ вазифелерине намуснен янашалар. Ишлеринде бирде-бир къусур япсалар, брак я да башкъа эксикликни корьмей къалсалар бири-бирине аркъадашча ярдымда булуналар.

— Мефодий корьмезден эвель тюзетип къой, — дейлер. Буны ёлбашчыдан къоркъып дегиль де, онъа урьмет этип япалар.

VI

Макъпуле конторанынъ агъач мердивенчиклеринден хаста бир алда тюшти. Чырайы солукъ. Сабадан берли аш ашамай, рухуны эзиетлеп юре. Бир уют эткен ери контора эди. Мында да оны кимсе тынчландырамады. Демирёлда, Отузынджы километрде дрезинанынъ къапакъ-

лангъаныны ве ичиндеки адамларнынъ чокъусы агъыр
яралангъаныны анълады.

О башыны асып кетмекте эди. Кимсени эслемей къу-
лагъына ич бир шей кирмей. Онынъ козьлерине къаран-
лыкъ чёкти. Аякълары къалтырап башлады. Адымларыны
сийреклештирди. Ерге баскъанда аягъы тюбюнден дюнья
авдарылып кеткен киби олды. Салланды, йыкъылаязды.
Сагъ къолунен башына япышты. Ёл кенарында къаланып
тургъан агъачлар устюне отурды. Козьлерини юмды.
Бираз вакъыттан сонъ, бир юткъунып алды, къулакъла-
ры ачылды. Дюньяда аят девам эткенини, сеслерни, шама-
таларны эшитип къуванды. Къаршыдан атлы адам корюн-
ди. Бу Мефодий Пантелеевич эди. Макъпуле котерилип
тураджакъ олды, кене аякълары тюбюнден ёр къуртылып
кеткен киби олды. Отурды, кене къолунен козьлерини къа-
патты. Мефодий Пантелеевич атындан тюшти. Макъпуле-
нинъ къолуны котерип, юзюне бакъты. Онынъ козьлери
нурсыз эдилер.

— Не олды санъа?

— Башым айланды.

— Ачтырсынъ.

Макъпуле индемени. Мефодий Пантелеевич:

— Тур, еринъден,— деп онынъ къолундан тартты.
Макъпуле турды, зорней кулюмсиреп Мефодий Пантелее-
вичнинъ бетине бакъты.

— Эписи кечти, сагъ олунъ, дюнь гедже ярамай юкъ-
лагъан эдим,— деди о.

— Ёкъ, кечкени ёкъ. Ма, ал мынавы талонларны да,
догъру ашханеге бар. Аша ве ятып раатлан.

— Ёкъ, ёкъ, Мефодий Пантелеевич, менде талон бар.

— Ёкътыр сенде талон, баш кутме. Сен эвге къайтам
деп уйлелик талоннынъ Мурадасылгъа бердинъ. Билем
мен сенинъ табиятынъны.

— Асыл сиз мени не вакъыт оледжегимни де билесиз
гъалиба?— деп кулюмсиреди Макъпуле. Сонъра озюне ке-
лип, Мефодий Пантелеевичке дрезина ве Айрие меселссини
айтып анълатты.

— Манъа мытлакъа Отузынджыгъа барып кельмек
керек, Мефодий Пантелеевич,— деди Макъпуле.

— Транспорт ёкъ, ёлда тюневинден берли арекет токъ-
тады.

— Джаяв кетерим.

— Кеч олды, озюнь де алсызсынъ.

— Зарар ёкъ.

— Ойле олса, ма, ал мынавы атны, дагда кѳор-кѳунчлы!

— Айса сиз рухсет этинъиз арандан бир ат даа берсинлер, яныма Юнусны, анавы электрикчи баланы алырым.

— Яхшы. Лякин, башта ашханеге!

Макъпуленинъ кѳуванчындан козьлерине ярыкъ кирди. Атнынъ джугенинден тутып, догъру Себиля аптенинъ эвине кельди. Юнус ер кѳазып отура эди. Макъпуле онъа кѳолуны салады. Юнус курегини ерге санчты ве Макъпулеге тараф адымлады.

— Юнус, бар, арандан бир ат эгерлеп ал, Мефодий Пантелеевич айтты. Экимиз бир ерге барып келеджекмиз.

Юнус бир шей сорамады, джувурып арангъа тараф кетти. Бираздан эгерленген атнынъ аркъасына минип кельди.

— Аферин, йигитлер бойле олмакъ кереклер,— деди Макъпуле ве экиси де атларнынъ джугенлеринден тутып ашхане янына кельдилер. Атларны электрик дирегине багълап, ашханеге кирдилер. Макъпуле портманети ичинден демичик Мефодий Пантелеевич берген талонларны чыкъарып, ашчыгъа узатты. Бирер чанакъ кѳартоп шорбасынен, бирер тепси кѳартоп пюреси ашадылар. Артындан бирер стакан татлы чай ичтилер. Юнус агъызыны, бурнуны фуфайкасынынъ енъине сюртти, сагъ олунъыз Макъпуле татам деген киби джылмайды. Ашыкъып турдылар, атларына миндилер ве демирёлны кечип Отузынджыгъа тараф бурулдылар. Акъшам якъын эди. Ормангъа киргенлери киби кунешнинъ зиясы гъайып олып кетти. Макъпуле Юнуснен ян-янаша келип:

— Эй, йигит, кѳайда кеткенимизни не сорамайсынъ?— деди.

— Макъпуле татам, менимчюн кѳайда олса олсун, ич фаркъы ёкъ. Сиз янымдасыз, не якъкъа бур десенъиз, азырым. Мени хырсызлыкъкъа алып кетмейджегинъизни билем.

— Кѳайдан билесинъ, бельки...

— Мен сизни догъгъанымдан берли билем. Анам мени афтадарнен сизге ташлап дегирменге кеткенини де билем. Аювчыкъ, оксюз Эльмазчыкъ масалларынъызны да билем.

— Унутмадынъмы?

— Ольгендже унутмам. Балалыкътаки шейлер унутулмай экен.

— Йигит, мени динъле. Биз сенинъ татанъны кыдырмагъа кетемиз.

Шай дегенде, Юнус бирден атынъ джугенини тартты. Чырайы джиддийлешти.

— Сиз не айтасыз шу, анъламайым?— деди о шубелин козьлерини Макъпулеге чевирип.— Татарджа айтынъ.

— Айса мен сеннен къазахча лаф этемми?

— Анълашылмай. Бу дагъ ичинде татанъны кыдырамыз дегенинъиз не я?

— Динъле. Айриени эки кунъ эвельси, баласынен берабер Чамлыкъта корьгенлер. О сизге тюневин келин чыкъмакъ борджлы эди. Ёлда дрезина къапакълангъан...

Юнус атыны токътатты. Чырайы тюрленген алда къулагъыны Макъпулеге тикти.

— Айтып битиринъ, сонъ кетермиз,— деди о.

— Сонъу, ана шу. Бунынъ санъа йигит олгъанынъ ичюн айтам. Гъарип ананъа сакъын бильдирме. Меним анълагъаныма коре къазалангъанлар. Отузынджыда олса кереклер. Тек олюм олмагъайды...

— Эшитмедим, эм акъылыма да кетирмедим,— деди Юнус атыны кочюрип.

— Сен электрик диреклери тѣпесинде оласынъ, амма мен ердем. Эр алда хаберлер ерде чокъ ола,— деди Макъпуле онынъ артындан етип.

— Асыл бир тувгъан аптем бар, бизимле берабер олгъан олса, бенъзи солмаз эди.

— Эй, кадам, кыыз баланынъ такъдири башкъаджа ола. Тевекель онъа эвнинъ мусафири дегенлер. Вакъты кельдими, къуш киби уча да кете.

— Учмакъ-учмакъ амма, къонаджакъ еринъни де бильмек керексинъ.

— «Йыкыладжакъ еримни бильсем, тобан тѣшер эдим»— деген къартлар. Къыйын шей, севгинен шакъа олмай. Мына сен де чагъынъа кельдинъ, не эвленмейсинъ?

— Манъа даа учып кельген сою расткельмеди.

— Э-э... Сен ойле тюшюнсенъ янъылырсынъ. Учып кельген союндан сакът ол. Энъсенъе къонар да омюрлик мийинъни чокъчылар. Бир данеси къонайым деп юре эди... Яхшы ки, козюмизни ачтыкъ.

— Кимни айтасыз шу?

— Озюнъ пек яхшы билесинъ. О сени хамутлап отура эди, амма...

— Макъпуле татам, сиз мени электрик диреклери устюнде юре деп, ердеки шейлерни бильмей беллейсизми? Бизге тёпеден эр шей корюне.

— Корюне амма, аз кьалдынъ Зеранынъ кьапкьанына тюшмеге.

— Зеранынъ меннен эсаб кескени чокътан.

— Сен де кьуру кьалмадынъ, ярамаз?!

— Онынъ энди лафы арам. Яшлыкъ белясы. Баарьде кьар ирип кеткени киби, о да яшлыкъ арарети эди, сёнди кетти.

— Айды не олса да, ойле кьушчыкълардан сакът ол кадам. Онынъ энди яхшы ходжасы бар. Бу лафлар, мына бу сагъыр дагънынъ ичинде кьалсын. Яшасын, бахтлы олсун. Бахт эр кеске керек.

Юнуснынъ аты конделен яткьан агъачкьа сюрюнди. Озю де абынып атнынъ джалынларына япышты. Белини догъурткьанынен арткьа айланып, Макъпулени тенбиеледи. Макъпуленинъ аты сюрюнемеди. Огюнден кеткен атны эслесе керек.

— Огдe кьар ийинтиси бар!— деп кьычырды Макъпуле.— Мукъайт ол, батакъ олмасын.

— Отузынджынынъ тавларында батакъ олмагъан ер бармы?

— Бизге расткельмегейди дейим.

— Шунынъчюн мында кьаза чокъ ола. Бу демирёл батакълыкъ устюнде кьурулды. Агъач юкю вагонлар кечкен сайын ёл чёке. Дрезина вызлы юрген шей... Хайырлысы олгъайды баре.

— Эгер аптем бу кьазадан кьуртулгъан олса, мен оны энди бир якъкьа йибермем. Акъайы дегиль, истесе султаны кельсин. Анам меним ичюн йигирми султандан кыйметли. Гъарип асретликтен, яныкътан кьуруп кьалды. Сиз де айтынъ, Макъпуле татам, кетмесин, эп бир анам ынджыныр.

— Энди сагъ-селямет юзюни корьгейдик. О якъыны келиштирир эдик. Ичимде бир сувукълыкъ бар, кьоркьам Юнус.

Юнус индемени. Юткьунып алды. Тюшюнджеге далып кетти. «Бир аптем бар, демесе ондан да айрылдым, деди о озь-озюне. Тувгъансыз яшамакъ агъыр шей. Аптеме бир шей олгъан олса, анам да онынъ артындан о бир дюньягъа ёлджу. Анамнынъ бахтына, баре зарарзевал корьмегейди. Бабам ольген сонъ, меним аскъымны

чеккен аптем олды. Колхозда чалышты, бизге ачлыкъ чектирмеди. Анам хаста эди. Аптем, эм анамны, эм мени бакъты. Унутмадым аптечигим мен сени, эм унутмам. Ашаткъанынъ, ичиргенинъ, кийдиргенинъ ичюн омюр билля, алдынъда озюмни борджлы саям. Экимизни бир ана догъурды, бир ананынъ сютюни эмдик. Бизни айырмагъа кимсенинъ акъкъы ёкътыр. Ёкъ, ёкъ, татачыгъым сагъдыр...»

— Не сусып къалдынъ Юнус, демирёл корюнеми? Линиядан чокъ узакълашмайыкъ. Акъшам вакъыты джоюлмакъ мумкюн,— деди Макъпуле Юнуснынъ хаялыны даркъатмакъ истеп.

— Мен бу ерлерни беш пармагъым киби билем.

— Пек къопайма. Бойле орман къопайларнынъ джелъкесини тез сындыра.

— Орманнынъ да озъ къануны бар. Оны бильсенъ, бир вакъыт джоюлмазсынъ.

— Эбет шашмаларсынъ, лякин ёлунъны тапа билирсинъ.

— Кунешке бакъып эм вакъытны, эм сыртны, эм къыбланы бильмек мумкюн. Буны бизге хавфсызлыкъ техникасыны огренгенде айттылар.

— Я кунеш олмаса? Мына, шимдики киби. Энди кунеш къонса керек?— деди Макъпуле чевреге бакъынып.

— Кунеш олмаса, тереклернинъ пытакъларына бакъ. Мына сырт тарафтаки пытакълар, мына къыбла тараф. Коресинъми, пытакълар анги тарафта зияде оськенлер? Тереклер де инсанлар киби сыджакъны ве тынчылыкъны севелер.

— Сени, эгер Мефодий Пантелеевич бильмесин, шу ан озъ болюгине алыр. Башлы яшсынъ, амма... Эр алда мукъайт ол.

— Сиз къоркъуп башладынъызмы шу, Макъпуле апте?

— Къаранлыкъ чёккенинен акъылыма анавы тётя Маланья кельди. Былтыр кузьде гъайып олгъан эди де?

— Озю къабаатлы.

— Коресинъми, сен кене янълыш лаф этесинъ. Олян, сенинъ ананъны бугунъ чыкъар йибер бойле орманнынъ ичине, о сенинъ пытагъынъны анги тарафкъа оськенини къайдан бильсин? О дёрт дивар ичинде зар-зорнен къыбласыны тапа, худжур адамсынъ.

— Тётя Маланья озю кѣбаатлы, кене айтам, эм айтырым.

— Вазгеч шуны. Кѣопай адамны динѣлемеге истемейим.

— Динѣлемесенѣиз, динѣлеменѣиз. Лякин, тётя Маланья шашмалагѣанынен бир терекнинѣ тюбюне чѣкип, сабаны беклемек керек эди.

— Олян, бир кѣаот кѣадын орман ичинде сабагѣа кѣа-дар даянырмы? Онынѣ кѣыркѣ отю олса, эписи бир керекден патлар.

— Чыдамакѣ керек эди. О заваллы... Эджель иште, не япаджакѣсынѣ. Лякин, аюв ашагѣандыр дегенлерине мен инанмайым. Чюнки аюв ашаса изи я да кемиклери кѣалмакѣ керек эди. Халкѣ не десе-десин, о гѣарипнинѣ баласыны бирде-бир сазлыкѣ ютты. Аювлар кузьде пек ачкозь олмайлар. Мына шимди расткельсенѣ, о-о-о, ишинѣ битти.

Макѣпуле атынынѣ джугенини кѣакѣып алды, Юнус-нен кене ян-янаша кетмеге тырышты. Тырышты амма, тереклер кедер этелер. Ян-янаша эки ат девамлы кетип ола-май. Де бири, де дигери артта кѣала. Аюв лафы Макѣпу-лени текмиль кѣалтыратты.

— Сен дагѣ шейтаны экенсинѣ, шимди аювгѣа расткельсек не япармыз Юнус?

— Астымызда ат,— деди Юнус.— Ялынѣыз кѣачып кѣуртулмакѣ мумкюн. Сен огден кѣачарсынѣ, мен кѣам-чымнынѣ уджуна майлы фуфайкамны кечирип бир серник беририм. Атешни корѣгенинен аюв токѣтар.

— Вай, ярамаз. Мен сенинѣ ойле джамбазлыкѣла-рынѣны бильмей эдим. Тереклер арасындан ярыкѣ корю-нип башладымы шу?

— Энди кельдик демеге мумкюн. Кѣаршыдан корюнген ярыкѣ — Отар чѣлю. Демек, ормандан чыкѣаятырмыз.

Олар тюм-тюз мейдангѣа чыкѣтылар. Санки саба ачыл-гѣан киби олды. Отар чѣлюнинѣ о бир четинде Отузын-джынынѣ эвлери корюнди. Бир кѣач эв ве узун бараклар. Бу кичкене койчикте бир орман болюгининѣ ишчилери ве демирѣлджылар яшайлар. Чамлыкѣ станциясы оларгѣа якѣын олгѣанындан бутюн керек ве ихтияджларыны шу станциядан барып алалар.

— Кѣазалангѣанлар медпунктта олса керек,— деди Макѣпуле атынынѣ джугенини тартып.— Догѣру анда ба-райыкѣ. Кимсе олмаса невбетчи эмшире бардыр, о бизге меселенинѣ асылыны айтып берир.

Юнус, ёл ичинде ойнап тургъан дрезинаджы Васильнинъ огълуны корип таныды.

— Бабанъ эвдеми?— деди о эеджаннен.

— Милиция алып кетти.

— Корьдинъми?— деди Макъпуле сабырсызланып.— Хайырлы къаза олса, онъа милиция тиймез эди.

Юнус индемени. Онынъ юреги сыкъ-сыкъ урып башлады. Тувгъаны дегильми санъа, ичтен чеке. Макъпулеге дуйдырмайджакъ ола. Экиси де индемей медпунктнынъ янына кельдилер. Орталыкъта кимсе ёкъ. Тамам акъшамлыкъ аш вакъыты. Эр кес эвине кирсе керек. Макъпуле медпунктнынъ пенджересинден бакъты. Перде артында кимсени корьмеди. Ичериде адам сеси эшитиле. Аятнынъ къапысыны ачты, кимсе ёкъ. Одагъа киреджек олды, къаршысына эмшире чыкъты.

— Къайда, къайда? Олмай кирмеге!— деди о сертейип.

— Манъа Айрие керек!— деди Макъпуле нефесине тыйылып.

— Фамилиясы, ады?— деп эмшире ахрет суаллерини берип башлагъан эди, къапыны ачып Айрие чыкъты.

— Вай, тувгъанчыгъым, джаным-джигерим!.. Айрие Макъпуленинъ бойнуна асылып къалды.

— Баланы уятаджакъсыз, ашыкълар!— деди эмширс. Айрие ве Макъпуле къуджакълашкъан алда софагъа чыкътылар. Эмшире лампочканы якъты. Софанынъ ичи ярыкъланды. Аякъ устюнде къатып къалгъан Юнуснынъ бетинде козьаш тамчылары йылтырадылар.

VII

Эр куньки киби, бугунъ саба да совхознынъ директоры Каштановны юкъусындан Молдабай уянтты. О арбийджесине тез-тез кийинип, ешилъ кепкасыны къашларына къадар басып къапыдан чыкъты. Машинагъа мингенинен:

— Объектлерни айланып чыкъайыкъ, сонъра Алма-Атагъа!— деди о, Молдабайгъа бакъмайып.

Кеттилер. Бутюн къуруджылыкъ мейданларында олдылар. Каштанов бригадирлернен корюшти, прорабнен субетлешти. Ишлерни бир ёлуна къойгъан сонъ, догъру Алма-Атагъа тараф ёл алдылар. Шеэрге кельгендже орталыкъкъа къаранлыкъ чёкти. Сокъакъларда халкынынъ, хусусан яшларнынъ къайнашкъан вакъыты.

— Бу халкънынъ бир иши ёкъмы, эви ёкъмы, эр кес тышта,— деди Молдабай ве дёрт ёлнынъ хачлашкъан еринде тургъан милиционерни корип, машинаны чаналатты.

— «Ала-Тау» янында мени ташларсынъ. Эвге озюм юрип барырым,— деди Каштанов. Молдабай ойле де япты.

Каштанов шеэр бою яваш-яваш адымлап меркезий Универмаг янына кельди. Адамларнынъ акъынтысына кьошулып, о да универмагкъа кирип кетти. Катеринагъа бир шей бакъып алмакъ истеди. Универмагнынъ ичинде адам джойыладжакъ. Каштанов анги болюкке барып, не аладжакъыны озю бильмей. Бираз шашмалап турды. Сонъра юрди, юрди, бир шей тапып аламады. Дюнъяда къадынгъа шей алмакътан да белялы иш ёкъ экен. Галантерия болюгинде зий-чув олып, итеклешип тургъан къадынларны коръди. Якъын кельди, лякин оларнынъ неге талашкъанларыны анъламакънынъ чареси ёкъ. Невбетсиз арагъа тыкыладжакъ олды. Къадынлар чувулдашып башладылар. Кенаргъа чекильди. Невбети якъынлашып къалгъан бир яш къадынгъа козю тюшти. Бу къадыннынъ бою, къияфети тыпкъы Катеринаны анъдыра. Джесюрленди, догъру шу къадыннынъ янына барды.

— Озюнъизге аладжакъ шейинъизден манъа да алсанъыз,— деп кьолуна яваштан акъча туттырды ве кенаргъа чекильди. Къадын эки йылтыравукъ пакет алып, адамларнынъ арасындан зорнен сыптырылып чыкъты. Пакетнинъ бирини Каштановнынъ кьолуна туттырды да, чубалгъан сачларыны козьлерининъ устюнден алып:

— Багъышлайджакъ кызынъыз менден семизми?— деди кулюмсиреп.

— Ёкъ, тыпкъы сизге бенъзей.

— Айса алгъанынъыз нафиле дегиль. Белине яхшы уяр. Менимки алтмыш беш...— деп бош кьолунен озюнинъ белини косътерди. Каштанов индемеди. Бу къадыннынъ джильвеленип тургъаны онъа бираз кьолайсыз корюнди. Кетеджек олды, лякин къадын онынъ алдына чыкъты:

— Бегенем къадынларгъа шей алгъан акъайларны,— деп кулюмсиреп кетти.

Каштанов кьолунда не олгъаныны озю бильмей. Пакетни газетагъа сарып кьолтугъына кыыстырды ве сокъакъкъа чыкъты. Адымларыны тезлештирип шеэрнинъ кенарындаки янъы къурулып башлагъан массивге тараф кетти. Эвининъ янына кельди. Дёртюнджи къаттаки джамлы балконнынъ пенджересиндеки ярыкъны коръди.

Бу Каштановнынъ секциясы эди... «Катерина эвде», деди о ичинден. Айырылмагъа къарар бердим, деп яза. Бакъ сен оны не тюшюнип тапкъан. Олуджыдыр, затен къадынларны анъламакъ кыйын.»

Мердивенлерден котерильди. Къапынынъ янына келип динъленди. Ичериде тынчлыкъ. Чанъны къакъты. Бир сание даа динъленди. Кене къакъты. Ичериде лакъырды эшитильди. Акъай лакъырдысы. Катерина къапыны аралыкъ этти. Каштановны корьгенинен килитнинъ устюндеки зынджырнынъ топузыны чыкъарды ве буюк оданынъ лампочкасыны якъты. Каштанов ичери кирди. Аякъкъапла-рыны ташлады.

— Демек, Андрюша, сен менден ялынъыз «айырылды», я да «ольдю» мектюплери алсанъ, сонъ келеджек-синъ, шаймы?— деди Катерина эрининъ козьлерине бакъып. Сонъра пальтосыны алып ильди.

— Къапы къакъылса да эшитмейсинъ,— деди Каштанов онынъ опыкели суалине джевап бермейип.

— Ашханеде лаф этип отурамыз. Кель, таныш ол, достымнынъ огълу.

— Андрей Андреевич,— деди Каштанов къолуны узатып.

— Валерий.

— Я батьканъ ёкъмы?

— Валерий Никифоров!— деди о пельтекленгенинден утансырап.

— Институткъа кирмек истей. Анасы пек ялварды: «Шу баланы кириш имтианларына азырласанъыз», деп риджа этти. Тюшюнип бакътым, бош вакъытым чокъ. Ред этмедим.

— Демек, инженер олмакъ истейсинъ?

— Архитектор, Андрей Андреевич,— деди Валерий кестирип.

— Озюнъни неден зайыф дуясынъ?

— Языдан.

— О-о Катерина Мануйловна онынъ устасы. Амма сен математикагъа дикъкъат эт. Анда эсас меселе математикадыр.

Валерий Каштановнынъ лафларына къуванып кулюм-сиреди ве кетеджек олып аякъкъа турды. Сагълыкълашып къапыдан чыкъаджакъта:

— Катерина Мануйловна, ярын келейимми?— деп со-рады.

— Мен ананъа айтырым.

Валерий мердивенлерни тыпырдатып тюшип кетти...

— Катюша, ма, санъа кичкене бахшыш алдым!— деп Каштанов кьолундаки пакетни узатты.

Катерина бир кьолунен пакетке япышты, дигер кьолуны Каштановнынъ энъсесине кьойып, кьуджакълады ве татлы-татлы опыти. Сонъра чытырдатып пакетни ачты.

— Ах, меним кыйметлим, акъыллы директором! Мен билем де сенинъ манъа ярамай шей алмайджагъынъны. Озю де Братиславада чыккъан. Кенъ сою. Белимни яхшы тартаджакъ. Чорап илиштирмеге ильмеклери де бар. Токътачы кийип бакъайым. Устюме уяджакъмы экен... Андрей, манъа бакъмай тур.

Каштанов дивангъа таянып онынъ лафларына дикъкъат этмеген киби отура, амма, эки кьулагъы Катеринада. О не алып кельгенини энди бильди. «Я барып да устюне уймаса?» Козъ кыйясындан онъа таба бакъа, лякин дуйдырмай ве сесини чыкъармай.

Катерина бу гульгулли тюсте, йылтыравукъ резина кьушакъны белине тартты. Сонъра тегиз аягъыны диван устюне кьойып, тени тюсте капрон чорабыны сыйчалап кийди. Кьушагъынынъ резиналарыны тартып чорабынынъ уджларына илиштирди.

— Тамам меним размерим экен. Къайдан бильдинъ, тувгъаным?— деп Каштановкъа сарылды.

— Апайынынъ белини бильмеген акъай олурмы?— деди Каштанов онынъ кьувангъанындан мемнюн къалып.— Бизде эр шей ола. Москва темин эте. Бойле чешит йылтыравукъ къадын ильванлары совхозымызнынъ тюкянларында толуп ята... Сени кочюрмеге кельдим, Катерина. Совхозымыз пек аджайип ерде. Джанынъ сыкъылмагъа вакъыт къалмай. Анда чап, мында чап, акъшам олса сериль де ят! Якъында дагъгъа чыккъыкъ. Чокъ дюльбер ерлер экен. Кемиклеримиз джибингендже зевкъландыкъ.

— Яхшы зевкъ. Санъа сыланмагъа, сувукъланмагъа олмагъаныны бильмейсинъми? Шакъаны быракъ, Андрей. Бу сенинъ айткъанларынынъ эписи илериде оладжакъ шейлер. Сен ойле адамлардансынъ. Билем мен сени. Шунунъ ичюн сени о якъкъа ёлладылар.

Катерина онынъ кьучагъындан кенаргъа чекильди. Дивангъа ясланды. Сагъ аягъыны сол тизининъ устюне

ташлады. Беяз балдырлары ачылып к̑алг̑аныны озю сезсе де, эмиет бермеди.

— Эбет, сан̑а яхшы,— деди о назланып.— Чапып юрмеге де, серилип ятмаг̑а да... Джанын̑ истеген як̑-к̑а кетесин̑, келесин̑. Сан̑а эр шей мумкюн. Сенден даг̑лар да к̑уртулмаз. Я мен? Ман̑а анда тавук̑ бак̑-тыраджак̑сын̑мы?

— Катюша, сен оджасын̑, тербиеджисин̑. Тезден балалар баг̑часы азыр оладжак̑. Мектеп кузьде ачыладжак̑. Коресин̑ми, сенин̑ «тавук̑ларын̑» ян̑ы биаларда, ян̑ы шараитта тербиеленеджеклер. Истер мектепте, истер балалар баг̑часында чалыш. Сенин̑ киби кадрлар шимди бизге мына бу ерден керек,— деп Каштанов к̑олуны бог̑азынын̑ тюбюнден сильтеп алды.— Адам иште толусынен файда кетиреджек олса, баласы ичюн раатсызланмамак̑ керек, дог̑румы? О балалар бизим келеджегимиз. Оларнын̑ тербиеси ичюн сизлер, педагоглар к̑айг̑ырмак̑ борджлысыз... Амма насыл ерлер, Катюша, бир келип кор̑сен̑, бир даа к̑айтаджак̑ын̑ кельмез. Бир як̑ына бак̑сан̑, тюм-тюз ч̑ель. Йымырта тыг̑ыртсан̑ парланаджак̑ы ёк̑. Козюн̑ алдында юзлернен километр месафе ачылып тура. Дигер тарафы юксек даг̑лар. Я авасыны айтмайсын̑мы?.. Мында яшайышмы бу? Дёрт дивар ичинде сык̑ылып отурасын̑. Атта саг̑ырлашып к̑алг̑ансын̑, чан̑ны да эшитмейсин̑...

Каштановнын̑ бу сон̑ки с̑зюнде башк̑а мана бар эди. (О, Катеринаны бираз ден̑емек истеди. Лякин Каштановнын̑ маналы с̑злерине Катерина эмиет бермеди.) Аксине, онын̑ юрегини иритеджек татлы с̑злернен джевапланды.

— Янымда сен олмасан̑ к̑ыйметлим, ман̑а эр даим к̑аранлык̑,— деди о татлы тильнен. Сон̑ра козьлерини сюзип, Каштановк̑а ойле бир дюльбер бак̑ыш ясады ки, бу с̑злернин̑ юректен айтылг̑аныны, айтылмаг̑аныны бильмек к̑ыйын эди.

— Сон̑, Катюша, кетемизми совхозг̑а?

— Ёк̑, Андрей. Мен билем, сан̑а к̑ыйын. Ман̑а да сенсиз джан сык̑ысы. Лякин, бу йыл к̑ыш мен мындан кочмейим.

Каштановнын̑ к̑ашлары туйильди. «Валерий дюльбер ог̑лан. Сулюк киби бир яш. Перчеми ман̑лайы устюнден сарк̑ып тура. Лаф эткенде козьлери фенер

киби парылдай. Лякин о, Катеринадан чокъ яш», деп тюшюнди о.

Каштановнынъ ачувлангъаныны эр вакъыт къашларындан бильмек мумкюн. Эльбет де, Катерина онынъ бу хусусиетини эр кестен зияде биле. Бильсе де еринден къыбырдамады. Ялынъыз сол аягъыны онъ аягъы устюне авуштырды.

— Къышкъа къадар бала багъчасы къурулып битер ве керек кадрларнен темин этилир,— деди Каштанов сувукълыкънен.

— Коресинъми, даа къуруджылыкъ кете. Сен худжур адамсынъ, Андрей. Шимди мен анда кетип не япайым?

— Я адамлар не япалар? Беш бинъ километр ерден кельгенлер не япалар? Я мен? Мен не япам, мени тюшюнесинъми?!

Каштанов къычырып башлагъанынен еринден котерилип кеткенини дуймай къалды. О балконгъа чыкъты. Жебинден бир «Экстра» чыкъарып къапты. Лякин думанлатып етиштирамады. Катерина тартып алды ве чёплик сепетине ташлады. Жебини къармалайджакъ олды. Каштанов даа янъы ачылгъан папирос къутусыны озю чыкъарып, онынъ къолуна туттырды.

— Санъа бу шейни агъызынъа алмагъа олмагъаныны та госпитальде айткъан эдилер,— деди къадыны яваштан. Сонъра, эркеленип:— Андрюша, меним бирданем, ашыкъма, яхшы тюшюнип бакъ. Бельки меним дегеним догърудыр. Бааръ дагълар артында дегиль. Къыш кечсин, авалар джылынсын, санъа бааръ келини олып барырым. Балалар багъчасында директорнынъ къарысына да бир ер тапылыр. Тербиеджилikke кирип окъумакъны билип теклиф эткен экенсинъ сен манъа...

Шай деди де эрининъ бойнуна сарылып, онынъ тюйик къашларыны пармагъынен сыйпады. Сонъра, берберханеде кунъдюз къабартып кельген къокъулы сачларыны Каштановнынъ серт тюкли янагъына, сакъалына тийдирип алды. Каштановнынъ къашлары язылып кеттилер.

— Ойле олса, мени ничюн чагъырдынъ?— деди Каштанов йымшагъан сонъ.

— Мен сени чагъырмадым. Айрылам, деп яздым. Ич олмагъанда афтада бир келип кетамайсынъмы, Андрей? Аягъынъ тюбюнде машинанъ олса...

— Меним ёлларда юрмеге вакътым ёкъ, Катя. Энди бойле анълашайыкъ. Бааръге къадар бир афта мен ке-

лип кетсем, экинджи афта сен келирсинъ. Машина ёларым.

— Коресинъми насыл тюшюнип таптынъ. Эр алда меним Андрюшамда акъыл деген шей бар.

Бу арада Катерина эрини сынап корьмек макъсадынен лафыны чевирип йиберди:

— Я барып оламасам?— деди о.

— Келирсинъ. Директор айттымы, битти!

Каштанов бу сёзлерни бирде-бир иш акъкъында къатты къараргъа кельген сонъ къуллаана. «Директор айттымы, битти!» деген сёз агъызындан чыкътымы, онъа бир даа итираз этмейджексинъ. Ишнинъ нетиджесини корьмегендже ондан къуртулып оламазсынъ. Катерина онынъ табиятыны пек яхшы биле. Шунынъ ичюн индемеди ве бармакъ-кельмек акъкъында лафны токътатты.

Саба Каштановнынъ кейфи пек гузель эди. Катерина чай къоймаздан эвель сютли къаве пиширди. Бу онынъ кейфини даа зияде котерди.

— Сен ишинъе кечикме, Катя, мен Молдабайны беклейджегим,— деди о фильджаныны тепсиге къойып.

Катерина кузгю къаршысына кечип, чубалгъан сачларыны тюзетти, бетини енгильден низамгъа чекти, озюнинъ ве Каштановнынъ устюне духи септи, кирпичлерине ве къашларына чинатий пармагъынен тийип алды, дудакъларыны бояламады. Каштанов оны насыл бегенсе, ойле де япты. Сонъра плащынынъ енъине къолуны сокъып онъа аркъасыны айланды. Каштанов онынъ омузларына плащны тартты, къатланып къалгъан бурюшикерлерини сыйпады ве сагълыкълашмакъ ичюн къолуны узатты. Катерина къолуны бермеди, омузларына узанып енгиль-енгиль опыти ве мердивенден тюшип кетти. Сонъки басамакътан атлап, къапыдан чыкъкъандже каблукларынынъ тыкъырдысы эшитильди.

Каштанов саатине бакъты. Молдабайнынъ келеджек вакъыты якъын эди. Балконгъа чыкъты. Шеэрде, адегенде, эр саба башлагъан джанлы арекетни—ишке ашыкъкъан адамларны, торунчыкъларынынъ къолундан тутып кеткен битайларны, бири-бири артындан тизилип къалгъан таксилерни эследи. Папирос якъаджакъ олып, къолуны джебине сокъты. Катеринанынъ огюти акъылына кельди.

Троллейбус токътатгъан ерде бир къач яш ве къыз пейда олды. Оларнынъ арасында Валерий де бар эди. Каштанов оны перчеминден таныды. Эки троллейбус кеч-

ти, олар ничюндир минмедилер. Сонъра бир таксининъ алдына чыкып токътаттылар. Бу такси Ыссыкъ-куль ёлуна бурулды. Лякин, эки яш къалды. Олардан бирисининъ къолунда гитара бар эди. Аньлашылгъанына коре бу яшлар шеэр дживарына, къырларгъа кезмеге кетелер.

«Яшлыкъ ойле шей экен... деп тюшюнди Каштанов. Эм зенаат огренмек истейсинъ, эм кезмек, эм яшамакъ. Чокъ языкъ ки, биз о зевкълы кунълерни корьмедик. Энди перчем йиберип башлагъанда шу хайырсыз дженк чыкты. Бутюн яшлыкъ зевкъыны о алып кетти. Валерий яхшы ниетте. Архитектор, къуруджы олмакъ истей. Чокъ яхшы ниет. Анасы Катеринанынъ досты экен. Демек, бильген адамынынъ баласы. Ярдым этсин, окъусын. Барсын къуруджылар аилесинде бир архитектор даа артсын. Джемиет ичюн файдалы зенаат. Къартлыгъымызда хатырлармыз. «Яхшылыкъ яп да, денъизге ат» дегенлер. япкъан эйлигинъ бир кунъ илле алдынъа чыкъар.

Къаршыдан газик корюнди.— Бу бизим Молдабай олса керек,— деди Каштанов.

Машина келип эвнинъ азбарына янашмакъта эди, Каштанов къапыны килитлеп, мердивенден тюшти.

— Аферин! Вакъытны шеэрде де шашырмадынъ!— деди Каштанов Молдабайгъа ве машинагъа ерлешип совхозгъа догъру ёл алды

Тамам уйле маали эди. Машина идаренинъ алдына келип токътады. Каштанов бу ерде чокъ эгленмеди. Баш агрономны тапты ве экиси берабер парниклик ичюн айырылгъан ерни, къурулмакъта олгъан тютюн аранларыны, баарьде биринджи кере фиде отуртыладжакъ тарланы бакъып чыктылар.

— Аранлар келеджек кузьге къадар азыр олыр,— деди Каштанов баш агрономгъа тарладан къайткъанда.— Сиз, Еремеев аркъадаш, шимди парник хозяйствосына зияде эмиет беринъиз.

— Тюневин манъа бир къач адам кельди. Бизни тютюнджилик бригадасына ёлланъыз, биз къуруджы дегильмиз, тютюнджимиз, деп итираз эттилер,— деди Еремеев.

— Сен оларны манъа алып кель.

— Яхшы,— деди Еремеев ве посёлкагъа кирер-кирмез машинадан тюшип къалды.

Каштановнынъ куню бугунъ де бош кечмеди. Экинди маали олгъанына бакъмадан о кене бир якъкъа даа ашыкъа эди. Онынъ иши битмей...

Акъшам директорнынъ кабинетинде баш сокъмагъа ер ёкъ эди. Адамларнынъ, чокъусы аякъ устюнде туралар. Оларнынъ арасында бир къач къадын ве анавы эв сорап кельгенлер де бар эдилер. Директорнынъ козюне кене шу кокусинде орденлери олгъан арыкъ черели, къара къашлы адам чалынды.

— Сизнинъ фамилиянъыз? — деди директор онъа.

— Арсланов Самедин.

— Дженк эттинъиз я? Къайсы къысымда эдинъиз?

— Эписини къошсам, секиз йыл арбий хызметте булундым. Фин кампаниясындан сонъ, эвге къайтып эвлендим дегенде, мынавы даа мешакъатлы сою чыкъты. Бунынъ да сонъуна къадар дёгюштик.

— Смоленщинада олдынъмы?

— Ёкъ. Киев, Кишинёв орталыкъларында, Москва, Ленинград тюблеринде уруштым. Дженкни Сербия сынъырында битирдим. Енъиш куню озъ танкымнен Москва парадында иштирак эттим.

— Танкчы экенсинъ де, мен сени тютюнджидир деп турам, — деди директор шакъанен. Адамлар кулюштилер.

— Экиси де къолумыздан келе, — деди Арсланов кестирип. — Дженклер, танкчы этти, кой яшайышы — тютюнджи. Армиягъа кеткендже техникум битирдим. Агроном олып чалыштым. Мына документлерим, — деп энди орьселенип ве сарарып къалгъан кягъытларыны, эмек дефтерини директоргъа узатты. Директор алды, лякин ачып бакъмады. Янында отургъан баш агрономгъа — Еремеевке узатты.

— Аркъадашлар! — деди директор адамларнынъ дикъкъатыны джелъп этип. — Бизлер, сизинъле берабер бу совхознынъ ветеранларымыз. Бизлер онынъ ильк темель ташыны къойдыкъ, бизлер биринджи баразнаны ачтыкъ. Энди эсас вазифемизге киришмеге невбет кельди. Бу йыл бааръде биринджи кере тютюн сачаджакъмыз. План буюк дегиль. Лякин бугунъки шараитта онынъ астындан чыкъмакъ ичюн баягъы иш япмакъ керек. Ярындан башлап парник хозяйствосы ишлеринен огърашаджакъмыз. Менимдже, Еремеев аркъадаш, — деп баш агрономгъа бакъты. — Сиз мына бойле аркъадашлардан, парникте чалышмакъ ичюн бригада тешкиль этинъиз. Барсын бу тютюн севдалары озъ теджрибелерини янъы шараитта омюрге кечирсинлер. Мына, шимдилик бу къадар. Ишинъизге мувафакъиет, достлар! Еремеев ве сиз къалынъыз, — деди директор Арслановкъа бакъып.

Адамлар чувулдашып чыктылар. Чокъ вакъыт идаренинъ алдында турдылар. Бири-бирлерине нелердир исбат этип, ерге чызыкълар чызып косътердилер. Анълашылгъанына коре олар энди парник хозяйствосы акъкъында сёз юрютип башладылар.

Директор Арслановкъа шойле деди:— Сизни парник хозяйствосына бригадир тайин этем. Бутюн ишни, мына, баш агроном Еремеев аркъадашнен фикирлешип алып барынъыз. Адамларны сиз яхшы билесиз. Бир джедвель япып келинъиз. Мында бакъып чыкъармыз. Анълашылдымы?

Еремеев бир шейлер айтаджакъ олып ынтылды, лякин етиштирамады. Каптанов аякъкъа туруп кепкасыны козълерине басты ве Еремеевке бакъып:

— Ярын ишке киришинъиз!— деп кабинетинден чыкты.

Баш агроном, Арслановнен берабер кечке къадар директорнынъ кабинетинден чыкъмадылар. Олар башта адамларны джедвельге алдылар. Арсланов эписиининъ ады, фамилиясыны язып кельген. Сонъра парник хозяйствосы ичюн керек олгъан бутюн кедиклер, кубре меселеси ве дигер зарур ишлер акъкъында фикир алышып-бериштилер. Баш агроном Арслановнынъ юзюнде озюне якъын бир ярдымджы тапкъанына гъает къуванды. Еремеев кой хозяйствосы институтыны битирген сонъ, мемлекетнинъ бир чокъ тютюнджилик районларында чалышкъан. Агъармышта, Арикляда олгъан. Аман-Къотанда махсус теджрибе кечкен. Озюни уста тютюнджи оларакъ косътерген. Шимди бу ерде дюньягъа кельмекте олгъан янъы тютюнджилик хозяйствосы оны пек раатсызлай. Девлет тарафындан бу ишке буюк эмиет берильгенини анълай. Керек тедбирлер корюльсе ве агротехника къаиделери эсасына аракет этильсе, бу ернинъ щараитында буюк берекет етиштирмек имкяны олгъаныны биле. Шунынъ ичюн де раатсызлана. Арсланов киби теджрибеси олгъан адамларнынъ янындан кетеджеги кельмей.

— Сиз раатсызланманъыз,— деди онъа Арсланов.— Бизлер таш устюнде тютюн етиштирген адамлармыз. Онынъ бутюн инджелигини, арсызлыгъыны, назиклигини баба-деде кунюнден огренип кельдик. Бу ерде, бу кубрели къара топракъта, эграфында шырын сувлар акъып тургъан диярда тютюн асрамакъ мумкюн. Мен зан этсем, мында ялынъыз учъ шейден сакъынмакъ керек. Бирин-

джиси — кучьлю ельден, экинджиси кышнынъ къатты сувугъындан, учюнджиси—баарьде фидени отуртув вакъытында апансыздан келип чыкъкъан кучьлю ягъмурлардан. Эр бир ишни онъа коре, япмакъ керек. Парник хозяйствосынынъ ишини де, буларны козьге алып башламакъ керекмиз. Фидени апансыздан бузлатмагъа мумкюнми? Мумкюн. Парниклерни бу ернинъ шейтан бораны котерип ала билирми? Тапсанъ ал. Фидени отурткъан сонъ бир сель кечсе, тарлада бир тюп къалмаз. Догърумы, айткъаным?

— Сиз алим экенсиз. Самедин, Пек догъру. Буларнынъ эписини шимдиден козьде тутмакъ керекмиз. Меним сизге Самедин дегениме джанынъыз агъырмасын. Озюме якъын корьгенимден шай дейджегим келе.

— Меним, армияда да, дженкте де, эр ерде адым-ёлум Самедин кете. Кимерде Семён да дейлер. Насыл къолай кельсе ойле айта беринъ. Фаркъы ёкъ.

Еремеев ве Арсланов директорнынъ кабинетинден чыкътылар. Тышта кимсе ёкъ эди. Ерге къаранлыкъ чёккен. Кокте сийрек-сепелек йылдызлар пейда олгъанлар. Четтен-буджакътан машина гурюльтиси ве адам сеслери эшитиле. Кыруджылыкъ объектлеринде аля даа иш девам эте.

— Юринъ, эвге барайыкъ, бир къаве ичермиз,—деди Самедин.

— Мында къавени къайдан алдынъ я? Биз чайгъа алыштыкъ.

— Кыаве бизлер ичюн пек характерли. Хусусан элибашлылар ичюн. Кыаве дегирмени, джезвеси олмагъан сийректир. Меним анам дженк фелякетинде де джезвеси ни унутмагъан.

Аркъадашым бомба тюбюнде къалып ольген. Анам эки яшында огъланчыгъымнен къалгъан. Аш, сув ёкъ. Баланы бакъмакъ керек. Ким бакъсын? Анам къарт эди, хаста эди. Озюнинъ чаресини тапамай. Сонъ не япсын, экиси де эляк оладжакъ.—Мен ольсем де зарар ёкъ, ашымны ашадым, яшымны яшадым, тек бала сагъ къалсын,—деген бичаре. Не тапса онъа къаптырмагъа тырышкъан. Нейсе бизимкилери кельгенлер. Анам. Эскендерни «Балалар эвине» ерлештирген. Армиядан къайтып кельгенимнен оны тапып алдым. Анам да сагъ-селямет эди. Мына эпимиз бир ерде яшаймыз. Эскендер бу йыл мектепке бараджакъ. Анам да бам-башкъа олды, козюне ярыкъ кирди. Юринъ кирейик, ёл бою лаф эткенимиз недир я?

Еремеев къаве ичмеге кирмеди. Башкъа вакъыткъа къалдырды. Лякин Самединнен экисининъ лафы баягъы вакъыткъа сюрди. Олар «Алсаба»гъа кельгендже бири-биринен яхшы таныш олдылар. Еремеев озюнинъ дженкте олмагъаныны, барот къокъусы къокъламагъа сыра кельмегенини, фронтны темин этмек ичюн Орта Асия республикаларында махсус иш алып баргъаныны, шунунъле берабер о ялынъыз тютюнджилик саасында дегиль, башкъа кой хозяйствосы пытакълары боюнджа да белли бир деджеде агрономлыкъ теджрибеси олгъаныны айтты.

Олар сагълыкълашып, экиси эки мааллеге, озъ эвлерине тараф адымладылар.

«Алемде кунеш бир олса да, эр ерни бир къарар къыздырмагъаны киби, инсанларнынъ такъдири де бири-бирине бенъземей,— деп тюшюнди Арсланов бираз юрген сонъ.— Биреви догъа, осе, ана-баба ферагъынен яшай. Эвлене, бала-чагъа саиби ола. Омюрининъ сонъуна къадар бир тюрлю дерт-беля коръмей. Дигери исе, бам-башкъа ола. Анасындан догъгъанына бир ай толмай, бабасы оле. Бабасыз къалгъан бала козь ачып акъай олдым, эвлемейим дей. Эвлене. Бала-чагъа пейда ола. Къайдандыр, оны олмайджакъ дерт-дженк фелякети келип тапа. Биринден къуртулдым дегенде, дигерине тутула. Акъибети о да бир кунъ эманетини бере...»

Бу тюшюнджелернен Самедин келип эвине кирди. Анасы ве Эскендер юкълай эдилер. О ашханеге кирип бир шейлер къапынмакъ истеди. Къазаннынъ къапагъыны ачты. Къарыштырып бакъты. Къоюрып башлагъан лакъша шорбасы. Маддеси алмады. Чай къайнатты. Къатып къалгъан пите парчасыны чайгъа джибитип юткъунды. Сонъра ортасы саркъып кеткен эски пружиналы кроватькъа ясланды. Тюшюнджеге далды.

«Институт битирмегеним меним къабаатым дегиль. Мен дженк эттим, ватанны душмандан сакъладым. Институткъа кирмек шимди меним озюме багълы. Истесем кирер окъурым. Амма эр къуш вакътында учса яхшы. Еремеев менден яш. О, баш агроном, мен исе... Зарар ёкъ. Тек бана айткъаным киби, сагълыкъ олсун. Эр шейнинъ башы сагълыкъ дегенлер. Чалышып озюмни косътерейим. Яшайыш тюзельсин, сонъ бакъармыз. Совхознынъ келеджеги буюк. Биз онынъ негизини къояйыкъ, къурайыкъ, медений бир земаневий шеэрге ошатайыкъ, devlet алдында борджумызны эда этейик, сонъ зевкъыны сюрермиз.

Олюп кетсек, бир кунъ бизни анъарлар. Бизим адымыз онынъ тарихында язылып къалыр . Несилимиз бизни унутмаз».

Арслановнынъ козьлери юмулды. Башы Эскендерге тараф бурулып кетти. Лякин юкъламады. Азачыкъ аралыкълангъан козьлери алдына огълунынъ мерум анасы—севич тоямагъан яresi кельди. Сонъра сагъ тарафына айланды ве тамагъына бир шей тыкъылгъан киби къолайсыз хырылдамагъа башлады.

VIII

Отуз докъузынджы болюкте бугунъ «айлыкъ куню». Орманкесерлер бу кунни ойле адландырдылар. Къач вакъыт эвельси айлыкъны ормангъа, ишчилернинъ чалышкъан ерине кетире эдилер. Бу тертип, ничюндир, биревлерге эльвермеди. «Леспромхоз» идареси пек келишикли бир иш япты. Айлыкъ, раатлыкъ куню берильсин деген къарар чыкъарды. Ишчилер бунъа джан-гонъюльден къувандылар. Чюнки, базы вакъытларда, белли-бир себеплерден планлар толмай къала. О вакъыт раатлыкъ кунюни къайдан аласынъ. Амма, айлыкъ вакъыты кельдими, биль ки, раатлыкъ куню мытлакъа бериледжек. Ишчилер бунъа энди алышып къалдылар. Биревлери бу акъта ич де тюшюнмейлер, дигерлери исе бу кунни дёрт козьнен беклейлер.

Бугунъ конторанынъ янында эр кесни расткетирмек мумкюн. Айлыкъ аладжакъ да, алмайджакъ да бу ерде доланып юре. Мында биреви шакъалаша, дигери иш акъкъында, базылары исе шахсий меселелер акъкъында тюрлю-тюрлю лафлар этелер. Акъча берилип башлагъан-дже адамлар бир ерде олалар. Акъча алгъан сонъ топ-топ олып даркъашып кетелер.

— Бугунъ, ничюндир, пара кечикти,— дей биреви.

— Пара дегиль, Настенька кечикти,— деп догъурта дигери.

Кенарда обаланып тургъан агъач төмеклернинъ устюнден къулакълы къалпакъ кийген бир яш адам:

— Акъайлар, ярым окъкъагъа къавиль этмейикми!?— деп къычыра.

— Тюш бу якъкъа!— деп оны чагъыралар. Бир къач киши ярдымлашып, агъач обасынынъ ичинден тегиз пы-

чылгъан бир төмекни тартып чыкъара ве тюз тарафыны устке кетирип ерге къадайтып отурталар. Домино оюны кызышып кете. Ишчилер бу дёрт доминоджыны сарып алалар. Таш ургъан сайын оюнджыларгъа, «Биз де сизге къошулурмыз» манасында керосин тёкип, зиль туталар. Къадедешлер бири-бирлеринен тапышкъан сонъ, тамакълары кытыкъланып башлагъаныны айтышып кулюшелер.

— Бу не маразнынъ акъчасы олды?— дей сабыры тюкенген бир къадын кенардан.

— Бойле шей олмай тургъан эди де? Мефодий агъа къайда шу!?— деп кычыра биреви.

— Эй, шашмалама! Мефодий санъа акъча берми ёкъса?

— Сен орманда ондан къачып юрсенъ де, кассада кыдырасынъ я?!

Адамлар шакъылдап кульдилер.

— Агъызынынъ тый, тыймасанъ тыярым, ичине ракъы къуярым!

— Не ерли олгъанынынъ бильдирмесенъ де билемиз, четлевик!..

Къаршыдан Макъпуле корюнди. Тили къашынгъанлардан бириси оны корьгенинен:

— Мурадасыл кечикти!— деп ташлады. Къадынлар кихилдап кулюштилер. Макъпуле оларгъа якъынлашкъанынен:

— Мусафиринъ хайырлы олсун, акъыз!— деп кулькюни токътаттылар.

— Меним мусафирим сизинъ де мусафиринъиз,— деди Макъпуле кестирип.

— Пек якъын достынъ экен. Хайырласакъ да акълымыз.

— Сагъ олунъ, дарысы сизге.

Макъпуле башкъа бир сёз айтмайып, конторагъа кирип кетти.

— Акъыз, эшиттинъми, акъайындан айрылып кельген анавы мусафир деген шей...

— Акъайы бизим халкътан дегиль экен. Къолуна бир бала туттыргъан да йиберген.

— Вазгечинъ шу мыш-мышларны,— деди кенарда тургъан семиз къадын.— Даа кельгенине учъ кунъ олмай, эр шейден хабер берип башлады сизинъ инфорбуйро.

Къадынлар тиллерини кыстылар. Шу арада конторанынъ мердивени устюнде Зера пейда олды.

— Бугунь акъча олмайджакъ, джемаат! Настя кассасыны джойгъан. Ювезликте оны кейфли корьгенлер. Элди беш бинъ! Эй, йигитлер, эшитесизми?! Сакъалларынынъны сыйпа да къайтынъыз!

Доминоджылар къолларындаки ташларыны бир кереден кутюк устюне ташладылар.

— Не сорасанъ, Зерадан сора. Бу шейтаннынъ эр шейден хабери ола,— деди къадынлардан бириси.

Эр кес Зеранынъ козюне бакъа. Адамларнынъ онъа инанаджагъы кельмей. Къайтаджакъ олып кимсе ериндеи ынтылмай. Бираз сукюнеттен сонъ, мердивенлернинъ устюнде Макъпуле пейда олды.

— Акъыз, Макъпуле, догърумы шу Настянынъ Таубасыда эткенлери?

Макъпуле къадынларнынъ арасында Зераны корьгенинен, меселенинъ асылына етти.

— Пара олмайджагъы догъру. Къайтып раатланынъыз,— деп эвине тараф ашыкъып кетти. Адамлар бирер-экишер олып даркъашмагъа башладылар. Контора янында ялынъыз анавы мыш-мышчы учъ къадын ве Зера къалдылар. Олар, ничюндир бири-биринден айрылышып оламайлар.

— Корьдинъизми Макъпуленинъ чырайыны?— деди Зера.— Ачувындан зеэр пускюреджек олып юре.

— Зеэрини озюнинъ башына пускюрсин.

— Анавы кельген мусафир онынъ досты экен, акъыз?

— Шу тентек Юнуснынъ аптесини бильмегенинъиз не энди?— деди Зера оларнынъ лафыны даа зияде къызыштырмакъ истеп.— Макъпулеге ошاپ, о да бурунлы олса керек.

— Шунынъ ичюн бурнунынъ тозуны къакъып йибергенлер даа.

— Атик шейчик экен. Та андан мында ёл тапып кельгенине бакъ сен онынъ?

— Ойлелери, керек олса, денъизден джаяв кечер,— деди Зера сесини къабартып.

— Устюне дрезина авдарылгъан, кене буруны къанамагъан.

— Баласы зарарлангъан экен,— деди индемей тургъан семиз къадын.

— Кене не олса гунясызларгъа ола,— деп къадынларнынъ огюне чыкъты Зера.

Олар ашханеге кѣадар бирликте кельдилер ве бири-бирлерини кѣыймагѣан киби, нелердир фысылдашып зор-нен айырылыштылар.

Айриенинѣ кельгени акѣкѣында адамлар арасында чешит тюрлю эмиш-демишлер юре. Лякин, не себебтен, не кѣадар вакѣыткѣа кельгенини, акѣайындан айрылгѣан-мы-айрылмагѣанмы, мында отураджакѣмы, ѣкѣса кѣайтып кетеджекми, буларны текмилинен кимсе бильмей. Бу шейге ѳр кестен зияде Зеранынѣ джаны сыкѣыла. Зера март мышыгѣы киби коше-кошеден, эв-эвден чапкѣылып юре. Ошек даркѣата, мунафыкѣлыкѣ зенаатына янѣы-янѣы адамларны джелѣп эте. Онынѣ бу ахлякѣсызлыгѣыны ве бош-богѣазлыгѣыны болюкте яшагѣанларнынѣ чокѣ-усы анѣлап башладылар. Лякин, бир адам чыкѣып да онынѣ агѣызыны кѣапаткѣаны ѣкѣ. Бу бозукѣ кѣадыннен ялынѣыз Макѣпуле чеккелеше. Амма ипсиз, кѣазыкѣсыз бу кѣадын Макѣпулеге де баш бермей. Дегенинден кѣайт-май агѣызыны кеттикче джая бере. Энди Макѣпуледен вазгечти, Айриеге авушты. Айрие даа башына эсини джыйып оламай. Кельгенине, сагѣ-селямет тувгѣанлары-нен, достынен корюшкенине инаналмай. Бу яш кѣадын-нынѣ аилеси йыкѣылды. Неден себеб? Даа буны кереги киби озю анѣлап оламай. Алимангѣа олгѣан севгиси онынѣ юрегини кѣайгѣыдан бошамай. Ичи яна, куде, озь-озюнен куреше. Кѣайда барып сѣкюледжегини, дердини тѣкеджегини бильмей. Бойле агѣыр дакѣикѣаларда инсан-гѣа инсан керек, акѣикѣый дост керек. Зера кибилери исе, сени бир кунѣ эвель мезаргѣа тыкѣмагѣа азырлар. Ойле адамлар не озюне, не джемааткѣа. Кимсеге файда кетирмейлер. Файдасы турсын, я зарарыны айтмайсынѣмы? Кѣафа тасынынѣ ичинде инсан мийи ташыгѣан адам бойле гѣарезликлернен огѣрашкѣанда, адамларнынѣ бахт-сызлыгѣына кѣувангѣанда, эвеля, озь-озюнден утанмакѣ керек. Инсанлар арасында инсан олып юрмек яхшымы, ѣкѣса инсан сыфатыны ташыгѣан йыртыджы олып юрмек яхшымы? Инсан баласы омюрининѣ сонѣуна кѣадар юзю-нинѣ астаыны джоймамакѣ борджлы. Утанмагѣа бильген адамда намус-ырыз хасиетлери яшай. Утанмакѣ ичюн исе, бет керек. Лафнынѣ яманы да, яхшысы да ерге тюшмей. О илле адамына барып етише. Эски заман арбийлеринден бириси Сарай мунафыкѣлыгѣынынѣ огюни алмакѣ ичюн шойле деген: «Бирде-бир кимсе акѣкѣында, адамнынѣ озю олмагѣанда, яман лаф сѣйлеменѣиз. Ернинѣ кѣулагѣы

бар, илле бир кунъ бильдирир онъа». Зеранынъ бугунъ идаре янында эткен лафлары Айриеге барып тиймейджекми? Я барып тийсе бундан Зеранынъ муюзлери чыкъаджакъмы? Эм башкъасы дегиль, кене шу мыш-мышчы къадынлардан бириси барып етиштирир.

Макъпуле идареден чыкъып, догъру Айриеге кельди. Олар даа бири-бирлерини корип тоямайлар. Макъпуле къач кунъден берли акъшамлары кечке къадар оларнынъ эвинде отура. Лаф битмей. Хатырламагъа шей чокъ. Не-ден башлап, неде токътайджакъларыны бильмейлер. Ниа-ет, экиси бир тѣшекте ятып къалалар. Себиля аптенинъ къуванчы ичине сыгъмай. Юнус, акъайджасына, азбар ишлеринен огъраша. Аптесининъ кельгенине, анасынынъ эв ишлеринден къолу бошаладжагъына джан-гонъюльден севине.

Айрие Макъпуледен бир шей гизлемеди. Башына келип-кечкенлерни эп икяе эте. Икяесининъ сонъуна асыл чыкъамай. Макъпуле оны буюк дикъкъат иле динълей.

— Дейджегим, Макъпуле, беш айдан сонъ Алиманны суд эттилер. Анавы къанджыкъ Ласточкинагъа берген справкасы онъа пек паалыгъа отурды. Эки йыл бердилер,— деди Айрие лакъырдысыны девам эттирип.

— Сонъ бир даа корюшамадынъмы?— деп Макъпуле онынъ сѣзюни больди.

— Суд олгъан сонъ корюштим.

— Не деди?

— Мында замет чекерсинъ, ананъларнынъ янына кет,— деди.

— Багъышла, сенинъ алдынъда къабаатлым,— деме-дими?

— Екъ.

Шай дегенде Макъпуленинъ чырайында ачув аляметлери пейда олды. Лякин Айриеге дуйдырмадан эп онынъ лакъырдысыны динъледи.

— Ана, ойле, алды кеттилер. Ондан сонъ мен бир озюм анда не япадажакъым? Эвимде пейда этмеге башлагъан чанакъ-чѣльмегимни сатып устюмдеки устюмде, башымдаки — башымда, дегенлери киби ёлгъа чыкътым. Энди бир шейге янмайым, балам зайыфлады, онъа янам. Дрезина къапакълангъанда кечки озюм ольгейдим. Къуджагъымдан атылып кеткенини дуймай къалдым. Сабийим пек къоркъты. Бир еримизге зарар кельмеди амма, коресинъми, лаф эталмай. Ах, бирданечигим, бульбуль киби

тилинъ чыкып башлагъан эди де, не сустынъ яврум,— деп янындаки миндер устюнде юкъламакъта олгъан Фиданенинъ сия, къувурчыкъ сачларыны сыйпады.

— Кимге бенъзей акъыз?— деди Макъпуле сыджакъ гонъюльнен.

— Тыпкъы онынъ озю, коръмейсинъми манълайыны, къашларыны?..

— Ёкъ, менимдже, бабасындан зияде санъа ошай. Бу юсе корерсинъ, кескен башынъны къойгъансынъ.

— Эким яваш-яваш тили ачылыр,— деди. Мына шимди бутюн къасеветим бу бала олды.

— Къассеветленме, Айрие, шукюр эт. Хайырлы къуртулгъанынъа къуван. Олюм деген шей козьнен къаш арасында дейлер, кене бир эйилик этмишинъ бар экен, джанынъыз сагъ къалды.

Базар эртеси куню иштен сонъ ишчилер кене идаренинъ алдына топландылар. Энди меселе анълашылгъан эди. Таубасы деген ер бутюн бу этрафлардаки орман болюклерининъ ве колхозларнынъ район меркезидир. Чамлыкъ станциясы ве Таубасы экиси бам-башкъа тарафларда ерлешкенлер. Орман болюклеринден Чамлыкъ станциясына эшелонларнен агъач ёлланыла. «Леспромхоз» идареси де Чамлыкъта ерлешкен. Лякин, район меркези Таубасыда олгъанындан ишчилернинъ айлыгъыны андан барып кетирмек керек ола. Отуз докъузынджынен Таубасынынъ арасы он докъуз километр. Мында яз ве къыш машиналар къатнайлар. Олар ерли ишлернен мешгъуллер. Агъач ташувнен ич бир тюрлю алып береджеклери ёктыр. Болюкнинъ кассири Настя ишчилернинъ ярым айлыкъ парасыны джойгъаны тасдыкъланды. Настянынъ озюни район милиция болюгинде туталар. Тешкерювлер кете. Бутюн милиция хадимлери аякъкъа турсатылды. Эр ерге хабер этильди. Постлар къойылды. Амма, бундан ишчилерге не файда? Оларгъа пара керек. Къайдан алсанъ ал, параны бер.

Бу вакъиа шойле олып кече: Настя элли беш бинъ кумюш параны алып, ешилъ брезент торбачыкъ ичине къоя. Торбачыкънынъ агъызыны махсус япылгъан зынджырчыкънен тарттырып килитлей. Сонъра, озгъарыджы хадимнен къапынмакъ ичюн ресторангъа кирелер. Бирер данечик ичелер. Азлыкъ эте. Текрарлайлар. Музыка динъ

лейлер. Кереги киби кейфленген сонъ, ёлгъа чыкъалар. Къартоп юкю машинаны гокътатып, кузовына минелер. Машина колхоз ёлуна буруладжакъта шофер кабинадан чыкъмайып оларны тюшюре ве озъ ёлуна девам эте. Настя ве озгъарыджы хадим ёлнынъ кенарындаки яш акъкъайын тереклери тюбуне ясланалар. Озгъарыджы хадим къоюн джебиден ресторанда ичилип битмей къалгъан шишени чыкъара. Агъызына котерип бир къач ютум даа юта. Сонъ Настягъа зорлап ичире. Резиллер ешиллик ичинде юкълап къалалар. Ерге къаранлыкъ чёккенде уяналар. Экиси бири-бирини зорнен таныйлар. Торбачыкъны кыдырып башлайлар. Тапсанъ ал. Настя, ресторандан чыкъкъанда торбаны къолунда туткъаныны биле. Къартоп юкю машинаны хатырлай, лякин номерини ве анги колхозгъа кеткенини экиси де бильмейлер. Бу ерден колхозгъа кеткен тек бир ёл бар. Олар бу ёл бою ёнеп кетелер. Ятсы вакъыты колхозгъа келип чыкъалар. Къартоп бошатылгъан амбарны сорап тапалар. Шофер озю бу колхоздан экен. Эвине баралар. Азбаргъа чагъырып чыкъаралар. Ешил торбачыкъны сорайлар. Шофер омузларыны кысса,—хаберим ёкъ,—дей. Озгъарыджы хадим бу ерде акъайлыкъ сата. Шоферни къоркъузаджакъ ола. Шофер исе, бильмедим-корьмедимден таймай. Не япсынлар? Барып озъ-озълерини милициягъа теслим этмеге меджбур олалар. Биз былаштыкъ, сиз куренъиз, деген киби, кенаргъа чекилип, параны милициягъа кыдыртмакъ истейлер. Милиция Отуз докъузынджынынъ болюк мудиринен багълана, керек адамларгъа бильдириле. Настяны ве озгъарыджы хадимни милиция машинасына отуртып кене шу колхозгъа алып келелер. Шоферни юкъусындан турсаталар. Амбарджыны тапып къапысыны ачтыралар. Сабагъа къадар учеви амбар толу къартопны бир кошеден дигер кошеге авуштыралар. Торбачыкъ ёкъ. «Ер ярылды, ерге кирди», дегенлери догъру шей экен. Сонъра Настяны, озгъарыджы хадимни ве шоферни Таубасыгъа, район милиция болюгине алып келелер...

— Мына санъа дубара. «Акъылсыз къуюгъа бир таш ата да, кыркъ акъыллы чыкъарамай»,— деди контора алдында тургъан ишчилерден бири.

— Настя башына беляны озю сатып алгъан озю джевап берсин. Девлет ве халкъ онъа муим иш ишанды. Орманда чалышкъанларнынъ эмек акъкъына бойле месулиетсиз янашмакъ оладыр даа?

Ишчилер арасында бойле чешит лакъырдылар джай-
рап башлады.

Мефодий Пантелеевич конторанынъ басамакъларындан
истемей-истемей тюшти. О белледи ки, шимди ишчилер
оны сарып аладжакълар ве пара талап этеджеклер. Хайыр,
кимсе еринден къыбырдамады. Базы къадынлар, аксине,
Настянынъ тарафыны тутып, лаф этип башладылар:

— Заваллынынъ эвде балачыгъы бар. Озь башына
о къадар параны котерип атмагъандыр, бир себеби олса
керек...

Эр кишилер индемедилер. Мефодий Пантелеевич догъ-
ру оларнынъ янына кельди. Тюневинден берли тамагъы
къытыкъланып тургъан доминоджылардан бири:

— Мефодий агъа, къуруды бу, къуруды!—деп тама-
гъынынъ тюбюни чертип косътерди.

Янындаки адам онынъ къалпагъынынъ къулагъындан
тартып агъач устюне отуртты.

— Догъру, аркъадашлар!—деди Мефодий Пантеле-
евич. Къуруткъан да бар, къарардан зияде сылаткъан да...

Адамларнынъ къаба кулькюси онынъ сёзюни больди.

— Бу меселеде ишчи сыныфы къабаатлы дегиль,—деп
къолуны шакъаджы доминоджынынъ омузына урды. Сиз-
ге бир кунъ даа сабыр тюше. Дирекция, партком, местком
эписи бу меселенен огърашалар. Ярын гъайрыдан чек
язып, бухгалтер озю Таубасыгъа кетеджек.

— Озгъармагъа мени алсын!—деп къычырды агъач-
лар устюнде отургъан кичкене, арыкъ адамчыкъ. Халкъ
кене хорнен кулип йиберди.

— Агъызынъа агъач кирсин, бу къадар ичмек оладыр
даа,—деди Зера къадынларнынъ арасындан.

Мефодий Пантелеевич Зерагъа козь къиясындан ба-
къып алды, лякин индемеди. Сонъ кене эр кишилерге
тараф айланды да:

— Айдынъ, аркъадашлар, эвлеринъизге къайтынъ,
саба ишке!—деди.

Къаршыдаки сокъакъта Мурадасыл пейда олды. О
адамларгъа якъынлашкъанынен шакъаджылардан бири:

— Олян, акъча алмагъа да бойнунъа отъмек чантасы
такъып келесинъ,—деди.

Кене кулькю башлады. Мурадасыл кимсеге къулакъ
асмады, дерсинъ шакъаны эшитмеди. О адамларнынъ ара-
сына келип кирди, селямлашты, Мефодий Пантелеевич-
нинъ элини алды. Шакъаджы адамларнынъ бириси мыс-

къылнен онынъ бойнуна асувлы тургъан чантагъа илише-
джек олды. Мурадасыл:

— Къолунъны тарт!— деди джиддий бакъышнен.

— О-о-о! Бу адамгъа эки кунъ даа айлыкъ бермесенъ
чекеджегинъни коръ!

— Зырылдай бер, тилинъ талса бельки тынарсынъ.

Мурадасыл Мефодий Пантелеевичке тараф айланды.

— Сиз манъа аджеле керексиз, Мефодий Пантеле-
евич,— деди ве экиси берабер идареге котерильдилер.

— Муим бир иш бар, Мефодий Пантелеевич,— деди
о бир шейден къоркъкъан киби.

— Айтса я, элимден кельсе ярдымгъа азырым.

— Болюк башына кирейик,— деди Мурадасыл.—
Мумкюн олса парткомны да чагъырынъ.

— Юрь, олар шимди эписи андалар. Анавы меселе
эписининъ мийини айландырды.

Мефодий Пантелеевичнинъ «анавы меселе» дегенини
Мурадасыл анъламады. Чюнки, о эки кунъден берли мын-
да ёкъ эди. Адамларгъа айлыкъ берильмегенини де
бильмей.

Болюк башынынъ кабинетине кирдилер. Мурадасыл-
нынъ селямына болюк башындан башкъа эписи джевап
бердилер. Сонъра кимсе джумгъан агъызыны ачмады.
Кабинет сукюнет ичинде къалды. «Керчектен мийлери
айлангъан гъалиба», деп тюшюнди Мурадасыл. Бир къач
сание кечкен сонъ, болюк башы Мурадасылгъа козь таш-
лап:

— Мен сизге керекимми?— деди къайгъылы бакъыш-
нен.— Айтаджагъынъ олса, айта къой, къулагъым сенде,—
деп кене столы устюндеки къагъытларыны къарыштырып
башлады.

Мурадасыл узун аякъларынен эки адым атлап, догъру
болюк башынынъ къаршысына кельди. О хавфсырап козь-
лерини Мурадасылгъа тикти. Мурадасыл исе, агъызыны
ачмайып, ич бир сёз айтмадан бойнундаки чантаны чыкъа-
рып болюк башынынъ столы устюне ташлады.

— Бу не?— деди о тааджипленип.

— Ачып бакъынъыз,— деди Мурадасыл.

Кабинет ичиндекилер эписи турып столны сарып ал-
дылар. Болюк башы чантанынъ ильмегини къыйынлыкъ-
нен чезмекте эди. Мурадасылнынъ сабыры тюкенди.
Даянамады. Кучлю къолларынен чантаны тартып алды
да, болюк башынынъ алдына авдарды. Столнынъ устюне

Настянынъ джойгъан ешилъ торбасы тюшти. Торбанынъ агъызы килитли. Ичинде элли беш бинъ... Болюк ёлбашчылары бири-бирине бакъышып аякъ устюнде къатып къалдылар.

IX

Орман болюгинде иш къайнай. Бригадалардан юкъары складкъа токътамадан агъач келип турмакъта. Къабулджы яш складнынъ бир башындан дигер башына джувура. Кельген агъачларны къабул этип эстакадаларгъа бошатып етиштирамайлар. Орманда пычкъыджыларнынъ «Бойся!» сеслери кесильмей. Олар бугунъки агъачны энди вагонеткаларгъа толдуруп йиберселер де, ишни эп девам этелер. Ярынгъа азырланалар. Эр бир звенода адет шай. Норманы толдурдынъмы, ярынгъа иш еринъни азырла. Яхшы, теджрибели орманкесерлер, бу шартны бир вакъыт бозмайлар. Шунунъ ичюн олар эр кунъ график боюнджа озъ вазифелерини эда эткенден сонъ, бираз раатланмагъа да вакъыт тапалар.

Мефодий Пантелеевич бутюн бригадаларгъа хабер йиберди:

— Бугунъ ишни бир саат эвель токътатып, складкъа топлансынлар.— деди. Ишини битиргенлер яваш-яваш складкъа тараф ёнейлер. Тамам айтылгъан вакъытта складкъа газик келип токътады. Машинадан Леспромхоз директоры, болюк башы ве бухгалтер тюштилер. Мефодий Пантелеевич оларгъа кунъделик график арткъачынен толгъаныны айтты.

— Айлыкъ меселесинден отърю башсызлыкъ, низамсызлыкъ косьтерген ёкъмы?— деди директор.

Мефодий Пантелеевич эр кеснинъ озъ иши башында олгъаныны, къызгъын чалышкъанларыны, базы звеноларнынъ ярынки кунъ ичюн азырлыкъ корьгенлерини айтты. Болюк ёлбашчылары эстакадаларны козьден кечирдилер. Директор складда пек чокъ агъач йыгъылып къалгъаныны корьген сонъ, «Леспромхоз» дан къошма вагон ёллайджагъыны билъдирди.

Орманда шувулты токътады. «Бойся!» сеслери ве пычкъыларнынъ инъильтиси тынды. Ишчилер складкъа топландылар. Эр кеснинъ дикъкъаты директорда.

Мефодий Пантелеевич топлашувны илян этип, онъа сёз берди:

— Кечкен айнынъ екюнлери нетиджесинде «Леспромхоз» боюнджа кочюджи Къызыл байракъ сизинъ болюкке такъдим этиле. Мефодий Пантелеевич, байракъны даима мында, болюгинъизде тутынъыз!

Аркъадашлар! Биз партия тешкилятынен бирликте шойле къараргъа кельдик,— деди директор сѣзюни девам эттирип.— Бугунъден сонъ ичкиджиликке урунып, низамсызлыкъкъа ёл берген адамларны къатты джезалайджакъмыз. Умют этемиз ки, сизинъ аранъыздан ойлелери чыкъмаз. Малюм ки, ичкиджилик акъибетинде болюгимизинъ кассири озъ ишине сувукъ ве джинаетчесине янашкъанындан себеб, эки кунъ айлыгъынъызны кечиктирип бермеге меджбур олдыкъ. Бу меселеде косътерген чыдамлыкъ ве инсанперверлигинъиз ичюн дирекция сизге буюк тешеккюр бильдйре.

Директор бухгалтернинъ папкасындан чыкътарып шу къарарны окъуй: «Иште косътерген унери, темиз ахлякъы ве девлет хазнасынынъ файдасына гражданлыкъ борджыны намуснен эда эткен Эмирвелиев Мурадасылгъа бинъ кумюш мукаяфат берильсин. Бу къарар бутюн болюклерде ве Мурадасылны бизге ёллагъан «Алсаба» совхозынынъ ишчилери арасында да даркъатылсын».

Ишчилер гурюльдешип кеттилер, эль чырптылар. Лякин меселенинъ асылыны даа эр кес бильмей эди. Шамата токътагъанынен Мефодий Пантелеевич ишчилерни айлыкъ алмагъа давет этти. Складны гъаля-гъуля басты. Кимсенинъ айткъаны анълашылмай. Эльбет де, лакъырдынынъ чокъусы Мурадасыл акъкъында кете эди. Адамларнынъ бир къысымы пара алмакъта, базылары исе Мурадасылнынъ этрафына топландылар. Мурадасыл кимнинъ суалине джевап береджегини бильмей. Эр кесни ялынъыз бир шей меракъландыра: «Аджеба къайдан тапкъан экен Мурадасыл о торбачыкъны?»

— Динъленъ, айтайым,— деди о къалпагъыны манълайынынъ тёпесине котерип.

— Анавы колхоз бар да, не шунынъ ады?..

— Эбет, э-хе билемиз, адыны напасынъ я, айтса шуны.

— Анда урукълыкъ къартоп къыдырып баргъан эдим. Акъшам кунъ къонайым деген мааль эди. Таубасынынъ ёлуна чыкъаяткъанда, бакъсам, ёл кенарында ешилъ торбачыкъ ята. Алдым. Агъызыны ачамадым. Кеседжек олдым. Лянет шейтангъа, дедим, кесмедим. Къолумнен о якъ, бу якъ айландырып бакъсам, пачка-пачка пара.

Тыкътым отъмек чантама да юре бердим. Ёлгъа чыккъа-нымнен машина таптым. Догъру келип болюк башынынъ столы устюне къойдым. Весселям.

Ишчилер даркъаштылар. Суаллернинъ арды кесилди. Лякин, бир шейлер айтаджакъ олып юткъунып юргенлер даа чокъ. Ничюндир, эр кес озъ фикирини ачыкъ айтмакъ истемей. Ёлда кене Зера лафны башлады:

— Айтмадыммы мен сизге, Мурадасылда акъыл бутюн олмагъаныны энди бильдинъизми?— деди о.

— Акъылсыз адамгъа дирекция мукафат берирми, акъыз?

— Мукафат?! Мукафат онынъ бир айлыкъ къазанчы, амма торбачыкъ беш йылгъа етер эди...

Макъпуле олып кечкен бутюн вакъианы кунъ эвель бильгенинден сабадан берли индемей юре эди. Мурадасылгъа мукафат берильгенине о да джан-юректен севинип къайтмакъта. Шимди кене къулагъына Зеранынъ дамсыз лафлары чалынды.

— Беш бинъ, беш йылгъа етер амма, намус инсангъа омюрлик керек,— деди о Зерагъа бакъып.

— Айды, сиз озъ намусынъызнен къарт олунъыз. Адамнынъ беджериксиз сою ойле олур. Мен олгъан олсам о торбачыкънынъ ерини тез тапар эдим, амма...

Зера Макъпуленинъ индемей адымлагъаныны корип, онынъ зытына тиймек истеди.

— Омюрлик акъайсыз къалсам ойле матювге чыккъам,— деди о.

Макъпуленинъ юреги оке толып-ташса да, индемени, четке бурулды.

Акъайлар Мурадасылнынъ янындан къызгъын лакъырдыларнен адымламакъта эдилер. Бугунъ эр кеснинъ рухы котерильди. Эписининъ джебинде манълай тери тѣкип къазанылгъан эмек акъкъы. Олар эвлерине, балачагъаларына ашыкъалар. Мурадасылнынъ джеби эр кеснинъ джебинден къалын. Лякин о бир якъкъа ашыкъмай. Оны эвде кимсе беклемей. Янъгъызылыкъ да бахтсызлыкънынъ бир чешитидир. Мурадасыл буны пек яхшы биле.

Макъпуленинъ башына бир къасевет даа тюшти. Айриенинъ келюви ве онынъ айле вазиети эр кестен зияде Макъпулеге тесир быракъты. Себиля апте исе янъыдан дюньягъа кельген киби олды. Къартлыкъта адамгъа не

керек? Эвинъ-баркъынъ джыйыштырылса, ашынъ-сувынъ пиширильсе, урбанъ темиз-пак тутулса олды кетти. Пишир къавенъни сюз де отур. Лякин Себиля апте къаве сюзип отурмагъа алышмагъан. Бутюн омюри бою бир кунъчик тынчлыкъ корьмеген. Иштен, эв хызметинден, къаар-къасеветтен эти-тени къатып къалгъан. О кене де тынч туралмай. Омюри боюнджа эль къавушып отурмагъа алышмагъан. Айриесининъ козьлерине бираз бакъып тура да, дюньясыны унута. Сонъра бирден абдырап:

— Вай, балам, эчкини унуткъаным да я,— деп къопкъасыны илиндирип ала да азбаргъа джувура. Сют сагъып кельген сонъ, собаны къарыштырып башлай. Къазан, чанакъ-чельмек шатырдата. Бир шей тапмаса къаве дерменини алып айландыра. Дерменини айландырмагъа башладымы, биль ки, бу Себиля къартийнинъ раатлыкъкъа чёккен вакъытыдыр. Бу дакъикъаларда бутюн дикъкъатынен кене Айриесининъ козьлерине тикилип къала. Бу дюльбер, муляйим козьлер онъа яшлыгъыны хатырлаталар. Къызынынъ кельгенине къувангъанындан кимерде бала киби шашмалай. Айткъан лафларынынъ фаркъына бармай. Баягъы вакъытлар бойле девам этти.

Айрие раатланды, ёргъунлыгъыны савуштырды. Хошкельдиге келювлернинъ арды кесильди.

Бир кунъ Айрие оглюгини багълап анасынынъ янына кельди. Къолундан къопкъасыны алды, соба якътырмады, савут-саба ювдырмады.

— Вай, балам,— деди Себиля апте,— Мен санъа бакъып къол къавушып отурайыммы айса?

— Меним мусафир олып отургъаным етер энди,— деди Айрие.— Бу ишлернинъ эписини мен япмакъ борджым. Сиз къаве дерменинъизни бакъынъыз, Фиданеге мукъайт олунъыз. Эв ишлери эндиден сонъ меним бойнума къалсын.

— Айды, балам озюнъ билирсинъ. Хызмет бир вакъыт битмей. Санъа да етер, манъа да...

Шенъ бир алда, кулюмсиреп къапыдан Макъпуле кирди.

— Кель, къызым, бир къавечик къояйым,— деди Себиля апте онъа. Сонъра дудакъларыны къалтыратып лафыны девам этти.— Бу Айрие деген зат манъа адым аттырмай, акъыз,— деди о къуванчлы козьлерини сюзип.— Элим-аягъым тыршавланды къалды. Бутюн ишимни тутты да алды къолумдан.

— Айса, дерменни де бу якъкъа беринъиз, сизге къаве чекмеге де олмай,— деди Макъпуле шакъанен.

— Ёкъ, феляннынъ маразы... Деф олчынъ янымдан. Сиз мени темиз ольдюрп къояджакъсызмы шу?— деди Себиля апте яшлыгъындаки киби эркеленип.

Макъпуле миндерчик устуне ясланды. Себиля апте еринден турды, нелердир сомурданып, онъа ястыкъ узатты.

— Раатлан бир парча, ёрулгъангъа бенъзейсинъ.

Макъпуле ястыгъыны сагъ омузынынъ астына ерлештирди, янбашлап ятты. Себиля апте, ашханеге, Айриенинъ янына чыкъты. Макъпуле козьлерини юмды. Бир чырым алмакъ истеди. Лякин чешит фикирлер ве хаяллар онынъ юкъусыны къачырдылар.

«Айриени кельгенинден берли динълейим, деп тюшюнди о,— лякин анъламасы къыйын. Энди о якъкъа къайтмайджагъы анълашылды. Алиманнынъ эткенлери белли. О къадар ашшалагъан сонъ... Кене онынъ акъкъында яман фикир айтмагъанына шашам. Мен Айриенинъ ерине олсам, бинъ йыл акъай туюю коръмесем де шу алчакъкъа бир даа къайтып бармаз эдим! Онъа, даа, беш ай аш ташыгъан. Языкълар олсун чеккен заметине. Устюнде бир джарты антери къалгъандже онъа ташып ашаткъан. Амма, о юзсиз аладжагъыны алгъан сонъ биле корюшкенде афу истемеген. Йип богъазына видждансызнынъ! Хорлагъан гъарипчикни, чокъ хорлагъан. Ёкъ, ёкъ, онынъ кибилерине мерамет этмейджексинъ, юз бермейджексинъ. Чаресини тапсанъ эсабыны кеседжексинъ. Акъылынъа тюшкенде яныкъламакъ дегиль де якъанъны къакъаджакъсынъ, vessелям!.. Мен буларны Айриеге айтмам. Не къадар достым, сырдашым олса биле айтмам. Аиле бозгъунлыгъы чыкъкъанда четтен къарышсанъ, кимерде ахмакъ ола да къаласынъ. Яшайыш озю косътерир онъа...»

Бугунъ акъшамлыкъ ашны Айрие пиширди. О кулер юзнен:

— Юнус гедже сменасында, софрагъа буюрынъ,— деди алюмин чанакъларгъа шорба бошатып.

Макъпуле софрагъа джылышты. Айрие де онынъ янына ерлешти.

— Тизлеринъни къапат,— деди Себиля апте онынъ балдырларыны корип. Айрие юзбезни тизлери устуне ташлады.

— Мында санки эр киши бар,— деди Макъпуле Себиля аптенинъ сертийгенини эслеп.

— Эр киши олмаса, мелеклер корерлер, олар да бивимнен берабер софра башында отуралар. Эй ярабби... гуняларымызны афу эйле.

— Леззетли аш пиширгенсинъ, Айрие,— деди Макъпуле агъач къашыгъыны текрар чанакъкъа далдырып.

— Бойле шейлерге онынъ къолу балалыкътан яраша эди, санки бильмейсинъ?— деди Себиля апте къопайсырап.

— Билем, билем,— деди Макъпуле къартийнинъ гонълюни котерип.

— Амма бу ернинъ къартопындан къач тюрлю емек пиширильгенини билеми экен, сорадынъ озюнден?

Айрие кулюмсиреди ве индемени.

— Зор оюнны бозар,— дегенлер. Башынъа тюшсе бильмей де коръ кунюньни,— деди Себиля апте тизлери устюне тюшкен отъмек уфакъларыны чёплеп.

— Мурадым шакъа, Себиля апте. Санки мен Айриени бильмейим.

Аш ашалып, софра джыйылгъан сонъ, яры гедже авгъандже лаф этип отурдылар. Баягъы дертлер сёкюльди, баягъы адамларнынъ къулакълары чынълатылды. Къыркъ дереден сув кетирильди, чокъ планлар бичильди. Хайллар узакъларгъа — дагълар, дерьялар артына толкъунланып кеттилер. Айрие — Макъпулени, Макъпуле — Айриени айтты. Чокъ шейлер хатырлап кулюштилер. Чокъ шейлер хатырлап ынджындылар. Себиля апте янашдаки кичкене одачыкъкъа кирип юкълап къалды. Айрие, Макъпулени бу гедже де эвине къайтармады.— Берабер ятайыкъ,— деп зорлады. Яттылар. Экиси бир ёргъан тюбюне кирдилер. Яшлыкъ вакъытларындаки киби къуджакълашты, шакъылдаштылар.

— Машшалланъ бар, акъыз, кокюслеринъ таш киби,— деди Макъпуле чалкъа тюшип.

— Баланы кестирген сонъ, шукюр, бир джорукъ олдым. Кене озъ алыма келип башладым.

Айрие терен нефес алды. Бир ан индемени. Сонъра Макъпулеге тараф айланды ве лафыны девам этти:

— Таш киби... Анавы джинабет бу сёзни бир кере хатиримчюн биле айтмады. Шу тар антерчигимни устюме кийип юргеге зарым, акъыз, тюрте чыкъалар тюбден. Эркеклернинъ козю исе, алла сакъласын... Сюзюле къалалар артынъдан...

«Джинабет» деген сёз Алимангъа айт эди. Бу сёз

Макъпуленинъ юрегине ярашты. Лякин, индемени. Эндиден сонъ Алимандан Айриеге яр олмайджагыны Макъпуле къарарлаштыра эди. Лякин, къарышмагъа истемей.

— Акъыз, сен «джинабет» дегенде бакъса акълыма не кельди. Динъле, санъа бир шей айтайым,— деди Макъпуле ястыкътан башыны котерип.— Кеченлерде, акъшам устю эвде чамашыр юва эдим. Бир даа бакъсам сюрди кельди анавы Мурадасыл деген шей.

— Ким о?

— Токътаса, лафымны больмесе. Бир дызман йигит. Сонъ не япайым, аякъ устюнде къаттым къалдым. Этимтеним чимирдеп кетти. Юр, отур, демейим даа, акъыз. Бакъса сен меним матювлигиме. О заваллы да, кирмеге кирди амма, бир шейлер айтса экен... Омузларымдан ашагы легенге саркъып тургъан сачларыма бакъты да къалды. Бир даа артыма айлансам, не корейим, бу къаршымда тургъан сырыкъ киби эриф, кес балтагъа бир сап, дегенлери киби алмадан-бермеден:

— Мынавы чантаны коресинъми?— деп бойнундаки отъмек чантасыны чыкъарды да, чамашырларым устюне ташлады.

— Корем, сонъ не олгъан экен?— дедим мен сувукълыкънен.

«Ичи пара толу, ёлдан таптым, демесинми акъыз! Мен абдырадым ве бир кереден:— Я оны манъа не алып кельдинъ?— дедим.

— Не япадажыгъымны бильмейим, сенден акъыл танышмагъа кельдим Макъпуле,— деди. Албу исе, онынъ бир шейден хабери ёкъ экен. Настя меселесини айтып анълаттым да,— догъру барып директорнынъ столы устюне къой!— дедим.— О къапыдан чыкъмакъта эди, анавы Зера деген арсыз корип къалды даа.

— Сонъ, коръсе не олгъан?

— Ах, тувгъанчыгъым, янъгъыз къадыннынъ алы белли. Кимсе сенинъ догърулыгъынъа инанмай. Кеченлерде иштен къайткъанда Зера манъа бизини санчып алды.— Омюрлик акъайсыз къалсам, шу матювге бармам,— деди.

Айрие шу арада эснел алды. Озюнинъ эснеленинен озю абдырап утанды. Сонъра Макъпуленинъ юкъусыз козьлерини корип сорады:

— Мурадасыл дей бересинъ, насыл адам шу?

— Адам пашасы, Айрие, инанасынъмы?

Айриенинъ эсневи токътады, юкъусы къачып кетти. Макъпуленинъ гонъюли Мурадасылда олгъаныны сезді.

— Бала-чагъасы ёкъмы?— деди Айрие меракънен.

— Кимсечиги ёкътыр. Берлингедже дженк эткен. Балатон деген бир голь янында агъыр яралангъан. Насылдыр бир маджар къызы джаныны къуртаргъан. Госпиталерде яткъан. Анасы, бабасы эрте ольгенлер. Дженкке кеткенде бекяр экен. Енъиштен сонъ бир йыл къадар шахтада чалышкъан, сонъ Казахстангъа кельген. Арслан киби бир адам. Узун бойлу. Ташны сыкъса, сувуны чыкъараджакъ. Кенардан бакъкъанда асла дженк корьген кишиге бенъземей. Ювашиныъ ювашы. Алладан къоркъмасанъ гедже дагъда къалдырып сабагъа къадар ишлетмеге мумкюн.

— Къызгъанч адам олса керек?— деди Айрие козьлерини уфкъалап.

— Ёкъ, джаным. Паранен асыл иши ёкъ. Не къадар язсанъ оны барып ала. Манъа аз язгъансынъ деген лаф ондан эшитмедим. Къызгъанч адам элли беш бинъ кумюш параны меним эвиме алып келирми, акъыз?

— Макъпуле, бельки о сени севедир? Ойле эркек кишилер ола ки, севгисини бильдирмеге джесарети етмей, ичинден чекип юре.

— Севмей, къозучыгъым, севмей! Амма мени урьмет эте.

— Урьмет? Эвено башлыгъы олгъанынъ ичюнми?

— Гъалиба башкъа шей ичюн... О адам догърулыкъны севе. Сен меним догърулыкъчюн къаядан атмагъа азыр олгъанымны билесинъ.

— Догърусыны айткъан, бабасына ярамагъан,— демек истейсинъми? Адамны урьмет этмек баш меселе. Урьметнинъ артындан севги келе билир, амма, севгининъ артындан урьмет эр вакъыт келе бильмез. Мен кене озъ аятымдан мисаль кетирем. Алиман мени къадын оларакъ бегенген, амма, адам оларакъ урьмет этмеген. Коресинъми, урьметсиз севги олмай экен. О темельсиз бинагъа ошай экен... Сен, не айтсанъ айт. О сени севедир.

— Севмек ичюн адамны бегенмек керек, Айрие. Меним къусурым бар. Анам манъа локъса къалгъанда къара чёюн корьсе керек. Боям къара. Ондан да башкъа, озюнъ билесинъ, акъайымнен учъ ай яшагъан эдим...

— Янълышасынъ, Макъпуле. Эсмери къадынларнынъ озюндже дюльберлиги ола. Якъында мен бир журнал

окъудым. Авропалы зенгиннинъ бириси Занзибардан келип къадын алгъан. Шу къадын онъа бильмем къач миллионгъа отургъан.— Бу къадын сизни не джеэттен озюне джелъп этти, эфендим?— деп сорагъанлар ондан. Бу эфенди бир сѣзнен джевап берген:— Эсмерилиги джеэтинден,— деген. Эсмерилик къусур сайылмай. Эсмерилер ичюн халкъымыз нидже тюркюлер чыкъаргъан. Анавы «Отелло» деген театрни корьген эдинъми? Боясы къара, деп ойле союна айтсанъ ярашыр барем... Акъайымнен учъ ай яшадым, дейсинъ. Учъ ай... Ёкъса меним киби айрылдынъмы? Гъарипнинъ баласы джаныны Ватан ичюн гъайып этти. Сен бу лафны бир айттынъ, бир даа айтма. Башынъны котер де, гъурурланып юрь, анъладынъмы?

— Сагъ ол, Айрие. Эр кес сенинъ киби тюшонсейди...

— Эр кес ойле тюшюне бильмез. Анавы Зера кибилерини эр кеснинъ сырасына къошма. Инсаннынъ къысметни догърулса, Макъпуле, не къарагъа, не де беззгъа бакъар. Анълашылгъанына коре Мурадасыл сенинъ къысметинъ. Къолдан къачырма. Озюнъ бу къадар атик къадынсынъ..

Макъпуле бир сескенип алды. Айриени къуджакълады. Экиси де бала киби баягъы мыдырдашып, сонъра юкълап къалдылар.

Х

Къыш айларында Андрей Андреевичке Алма-Атагъа сыкъ-сыкъ барып кельмек керек олды. Эр шей телефоннен чезильмей. Базы меселелерни Министрликке барып, козь-козьге келип, аль этмек керек олды. Бааръ якъынлашкъан сайын бу меселелер чокълаша берди. Каштанов шеэрге сыкъ-сыкъ келип кеткен сонъ, Катеринагъа, эвельде анълашкъанлары киби, совхозгъа эр сефер бармагъа ёл къалмады. Бу девир ичинде о совхозгъа ялынъыз бир кере кельди. Шу куню къарлы ягъмур ягъа эди. Орталыкъ чамур. Бир эвден дигер эвге бармакъ ичюн аягъынъда чызманъ олмаса, къапыдан чыкъыладжакъ киби дегиль эди. Катерина къыскъа къонучлы, къар киби бем-безз чызмачыкъларынен машинадан тюшти, лякин бир адым атлап етиштирамады. Чызмасынынъ бири балчыкъкъа батып къалды. Бир аягъы устюнде баягъы тургъан сонъ, абынып капрон чорабынен чамургъа басмагъа меджбур олды. Андрей Андреевич онынъ балчыкъ ичинде шашмалап къыбырдангъаныны коръсе де, анъкъастан янына

бармады. Катерина бир кѡлуна чызмасыны алып, озюнинъ тезден кочип келеджек янъы эвининъ азбарына биринджи кере бойле адым баскъан эди.

Андрей Андреевич сонъундан бу мисальни онъа чокъ юзледи.

«Къар астында, ягъмур тюбюнде чалышкъан ишчининъ къадрини эр кес бильмек керек», дей эди о лафчыкъкъанда. Катеринагъа бу келип-кетюв шубесиз буюктесир къалдырды. О эрининъ яшайышыны, турмушыны озъ козюнен коръди. Онынъ ёлбашчылыгъы алтында юзлернен ишчилернинъ тюм-тюз чёлъ ичинде янъы аят къургъанларыны, манълай терини сильмеге вакъыт тапмай чалышкъанларыны корип шаад олды.

Баарьнинъ аджайип кунълери кельди. Андрей Андреевич озюнинъ деген вакъытында Катеринаны кочюрип кетирди. Эшьясынынъ бир къысмыны алмады. Квартирасыны вакъытынджа Валерийге ве онынъ анасына къалдырды.

Кой еринде биринджи вакъытларда Катеринанынъджаны тарсыкъса да, яваш-яваш алышып башлады. Бу ерлернинъ табийй дюльберлиги, чёллернинъ, дагъларнынъ, энъишли-ёкъушлы къырларнынъ бааръ тазелиги ве ниает инсан аяты ичюн багърында нидже тюрлю бет-берекет сакълагъан топракъ къокъусы онынъ къан дамарына синъип башлады.

— Андрюша, раатлыкъ куню къырларгъа чыкъмайыкъмы?— деди Катерина бир кунъ.

— Бакъармыз. Шимди ишнинъ къайнагъан вакъыты.

— Сенде онынъ къайнамагъан вакъыты оладжакъмы, Андрей?

— Бу йыл еди бучукъ гектар тютюн сачамыз, Катя. Къазахстан топрагъында биринджи кере дюбек етиштиреджекмиз. Парниклерни бир чыкъып бакъмайсынъмы? Энди джамларгъа тиейим деп тургъан шу назик фиделернинъ япрачыкълары устюндеки сув тамчылары тыпкъы къызларнынъ кумюш купелери киби йылтырайлар. Эшкъ олсун адамларгъа! Ойле фиде етиштирдилер ки, корьсенъ кубрели тамырлары авучынъа сыгъмай. Озюмизге еткен сонъ, артып да къаладжакъ. Тарлада шимди къызгъын иш кете. Арслановнынъ бригадасы оны бир къач кунъ ичинде абрап ташлар. Яхшы йигит. Танкчы, фронтовик...

— Сен шу танкчынъны кьошмасанъ лаф этамайсынъ, Андрей.

— Катюша, о танклар, топлар, снарядлар олмагъан олса, мен сени къайдан тапып алыр эдим. Дженк нидже инсанларны бири-биринден айырды... Амма бизни къавуштырды, шай дегильми?

Катерина Андрей Андреевичнинъ котеринки рухта олгъаныны корип:

— Ойле олса, мен Алма-Атагъа барып келейим. Сенинъ вакъытынъ олгъанда къырларгъа кетермиз,— деди.

— Бар, Катюша. Лякин, Молдабайны чокъ кыйнама. Оны тюкяндан-тюкянгъа айдама. Керек олса озюнь юрь.

Катерина къувангъанындан Каштановнынъ бетине бакъты да:

— Андрей, сен асыл пек акъыллысынъ да! Акъыллы олмасанъ, эльбет де мен санъа чыкъмаз эдим,— деп озъ шакъасына озю шакъылдап кульди.

Саба тютюн тарласына Андрей Андреевични ташлагъан сонъ, Молдабай Катеринаны алып догъру Алма-Атагъа ёнеп кеттилер. Ёлнынъ эки тарафында ем-ешилъ тазе пиченлик ичинде чешит чечеклер ачкъанлар. Катерина машинаны токътатты. Молдабайнен берабер бир къучакъ чечек джыйдылар. Алма-Атагъа якъынлагъанда ёл кенарында гульгулленип ачкъан «Райка» алмаларындан бир къач пытакъ къопарып, оны да чечек топуна кьоштылар.

Катерина догъру озюнинъ квартирасына кельди. Машинаны азбарда къалдырды ве Молдабайны да эвге давет этти. Къапыны Валерий ачты. Анасы эвде ёкъ эди. Ичери киргенлери киби Катерина оны тувгъан къардашы киби къучакълап опыти. Молдабай четке бурулды. О Валерийнинъ адыны чокъ эшитсе де озюни корьмеген эди. Шуннынъ ичюн бу опюшюв онъа пек чиркин олып корюнди. Стол устюнде анда-мында ташлангъан китаплар тура эди.

— Я бу китапларнынъ не къабааты бар?— деди Катерина кулюмсиреп.

— Башыма бир шей кирмеген сонъ...

— Ананъ къайда?

— Путёвка пешинден юре. Санаториягъа кетеджек.

Мынавы чечеклерни коресинъми, Валерик? Бутюн ёллар чечек ичинде. Къырларда ким бильсин насылдыр. Эх, сен бизге бир кельсенъ де, къырларгъа кетсек...

— Институт меселеси бойле олып чыкъкъан сонъ мен ър шейден кечтим.

— Яныкълама. Сен даа яшсынъ. Эмек стажы олгъанларгъа бираз башкъаджа бакъыла. Бу йыл олмаса йылындан...

— Бильмейим,— деди Валерий башыны саркъытып.

Катерина индемени. Сонъра, арттаки одагъа кирип, озюнинъ къалдыргъан базы-бир шейлерини джыйыштырмагъа башлады. Молдабай бир къуджакъ шей сыкъынып машинагъа алып кетти. Озю де балабан бир богъчаны къолтугъына къыстырды. Энди Валерийнен сагълыкълашайым дегенде Молдабай къайтып кельди. О, Катеринанынъ къолундаки богъчаны алып, тез-тез мердивенлерден тюшип кетти. Катеринада онынъ артындан чыкъты.

— Айды, Валерик, мен кеттим,— деди о.— Ананъа селям айт. Кель, дагъгъа чыкъармыз!

Валерий индемени. Бираз артларындан бакъкъан сонъ, къапыны япты ве столы башына кечип, китапларыны джыйыштырмагъа башлады.

Катерина Молдабайны чокъ къыйнамады. Машинаны анда-мында айдатмады. Андрей Андреевичнинъ тенбилегени ичюнми, ёкъса башкъа бир себебтенми, анъламакъ къыйын эди. Эр алда шеэрге кельген сонъ, бир де-бир тюкянгъа кирмейип къайтмакъ базы къадынлар ичюн ич акъылгъа ятаджакъ шей дегиль. Катерина ялынъыз меркезий Универмагкъа кирди. Кирди амма... Молдабай беклей-беклей безди. Саба ашамай чыкъкъан эди. Ичеклери гъыдырдап башлады.

Не исе, кельди Катерина. Къолунда бир шей ёкъ.

— Алгъан шейинъиз къайда я?— деди Молдабай Катерина машинагъа минеджекте.

— Бир шей тапмадым,— деди о дарылгъан киби.

Молдабай тааджипленип бакъты, лякин агъызыны ачмады. «Анълашылгъанына коре о не къыдыргъаныны озю бильмей, ярым кунъ даа беклемек керек эди гъалиба», деп тюшюнди.

Шеэрнинъ дживарына чыкътылар. Совхоз ёлуна буруладжакъта байыр тёпесинде, дюльбер чечеклер арасында кичкене кафетерий бар.

— Къапынайыкъ,— деди Молдабай машинасыны четке бурып.— Мен ач олсам эр шейге океленем. Сиз де ачтырсыз бельки, чырайынъыз ничюндир, кускюн Катерина апа.

Катерина кирпичлерини котерип Молдабайгъа бакъты. Онынъ айткъанында акъикъат олса керек, экиси сёзсиз

анълашты ве машинадан тюштилер. Эки тарафы чечек-
лернен ярашгырылгъан таш басамакълардан котерильди-
лер. Тик байыр тёпесинде къуш ювасы киби тургъан ка-
фетерийге кирдилер. Ичериде сачлары энъсесинден
баскъан бир къач яш радиола динълеп, коньяк сюзелер.
Олар, де Молдабайгъа, де Катеринагъа бакъып мыдыр-
даштылар.

— Русачка, бизим русачка, севги не демек къазах-
ча?!—деп кульди бириси.

Молдабай отургъан еринден бир силькинди, лякин
Катерина онынъ къолундан тартып ерине отуртты.

— Эмиет берме шу буруны былашыкъларгъа,— деди
о. Сонъра эки сосиска, эки фильджан къара къаве алып
ашамагъа башладылар.

— Русачкагъа тек сосиска олсун!—деп къычырды
кене шу агъызы къычыгъан яш. Янындакилери кульдилер.
Оларнынъ кульгенинден зевкъланып бу яш даа отъкюр
сеснен:

— Азлыкъ этсе мен къошарым!—деп хахылдады.

Молдабай даянамады. Еринден атылып турды. Яшнынъ
диваргъа таяндырып къойгъан гитарасыны илиндирип
алды да:

— Текрарла бир даа!— деди Молдабай яшнынъ ко-
зюне бакъып.

Яш недир айтаджакъ олып агъызыны ачкъан эди,
Катерина:

— Ялварам, керекмей!—деп къычырды.

Молдабай гитараны яшнынъ къолуна туттырды ве
серт-серт сёйленип кафетерийнинъ къапысыны косътерди.
Яшлар эписи омузларыны къысып онынъ артындан турып
чыкътылар. Радиола токътады, кафетерийни тынчлыкъ
басты. Молдабай бираз къапынып озюне кельген сонъ,
эки къаве даа алды. Лякин, Катерина ичмеди.

Елгъа чыкътылар. Бир ерге токътамай кеттилер. Ялы-
нъыз совхозгъа якъынлашкъанда, чёль ортасындаки кич-
кене аулгъа сув ичмеге кирдилер. Беш-он эвден ибарет
бу аулнынъ ортасында тёпеси ачыкъ, тек дёрт дивары
къалгъан бир къаралты бар. Молдабай машинасыны
догъру бу азбаргъа айдап кирди. Мында, терлеп-пишип
янакълары устюнде туз лекелери къатып къалгъан бир
къазах агъач ёнмакъта эди. Молдабайнынъ козю кенарда
тургъан агъачларгъа тюшти.

— Эвнинъ тёпесинеми?— деди о агъачларгъа таба

башыны силькип. Къазах индемени, озъ ишини девам эте берди. Дивар артындан башы эки-учъ тюрю шалгъа сарувлы, тек эки козю корюнген бир къадын чыкъты. О Молдабайгъа якъынджа келип, къолундаки къопкъаны ерге ташлады ве кери къайтты. Молдабай къопкъаны алып, Катеринагъа узатаджакъ олды. О, «ичмек истемейим» манасында башыны салады. Молдабай эки къолунен къопкъанынъ кенарларындан тутып, башынынъ устуне котерди. Дудакълары арасындан чыбырта берип, къангъандже ичти...

Олар совхозгъа келип чыкътылар. Андрей Андреевич эвинде ёкъ эди. Молдабай оны эвинден тапарым деп акъылына биле кетирмеди. Катеринанынъ абур-чубурларыны ичери кирсетти ве аджеле суретте тюрю тарласына догъру ёнеп кетти. Тарлада Каштанов ёкъ эди. Сабадан берли о тарлада не ишлесин?

«Манъа оны мытлакъ тапмакъ керек», деди Молдабай озъ-озуне ве машинасыны къуруджылыкъ объектлерине тараф айдады.

Энди къурулып битмекте олгъан тюрю араны янында Каштановны расткетирди. О, Молдабайдан насыл барып-кельгенини, я да Катерина акъкъында ич бир шей сорамады. Прорабнен акиси янъы темели къойылып башлагъан учюнджи тюрю аранынынъ чертёжларыны бакъып тура эдилер.

— Сиз манъа аджеле керексинъиз,— деди Молдабай директорнынъ янында машинаны токътатып.

Каштанов онынъ джиддийлигини корип, машинагъа таба адымлады. Молдабай ич бир шей айтмадан стартерге басты. Каштанов машинанынъ ачыкъ къапысына башыны сокъты.

— Не олды?— деди о ерлешкен сонъ.

— Олгъан шей ёкъ. Катерина Мануйловна эвде. Яхшы барып кельдик. Кафетерийде къырчангининъ бириси илишеджек олды, козуне бакъкъанымнен сусты.

— Кимге, Катеринагъамы?

— Экимизге де.

Каштанов кульди. Сонъра Молдабайны Алма-Ата ёлуна бурулгъаныны эслеп:

— Сен къайда ашыкъасынъ?— деди.

— Андрей Андреевич иш куню битти, ойлеми? Эр вакъыт мен сизни динълеп юрем, шимди сиз мени динълейджексиз.

— Кене бешбармаккъа алып кетесинъ гъалиба?

Молдабай индемени. Машина топракъ ёлгъа бурулды. Къаршыда деми кирип сув ичкен аулнынъ эвчиклери корюнди. Молдабай ачувлы. Не ичюн аджеба? Буны Каштанов анълап оламай. «Ёкъса, анавы «къырчанги яш» меселесими? Ёкъса, Катерина онынъ зытына токъундымы экен?» Андрей Андреевич бироз хаялланып кетти. Молдабай эп индемей. Машина догъру Алма-Атадан къайткъанда оларнынъ кирип сув ичкен азбарынынъ алдына келип токътады.

Къазах энди экинджи агъачны ёнуп битирмекте эди. Молдабай машинадан тюшти. Каштановны якъын чатъырды ве кенарда обанен тургъан агъачларнынъ янына алып кельди.

— Таныйсызмы?— деди Молдабай агъачларны ерге авдарып.

Андрей Андреевич индемени. Сонъра, Молдабай эки данесини аягъынен тюртип:

— Буларны да таныйсызмы, Андрей Андреевич?— деди.

Каштановнынъ козю ортадаки къалын арчагъа тюшти. Лякин, ич бир шей хатырлап оламады.

— Мынавы агъачны,— деди Молдабай,— илькиде эки-миз берабер пычкъан эдик. Мына тюбюнде сизинъ балта излеринъиз. Ягъмур астына къаладжакъмыз деп, пытакъларыны мен ашыкъып темизлегенде тѣпесини пычмайып балтанен кесип алдым да, атешке ташладым. Мына онынъ уджу.

Молдабай агъачнынъ уджуны айландырып Каштановкъа косьтерди.

— Мынавы агъачларны исе биз кесмедик. Аркъадашларнынъки олса керек...

Каштанов агъачларгъа бакъып бироз тюшюнди ве Молдабайнынъ зеинине шашты. Сонъра бир агъачнынъ устюне отурып, бироз кулюмсиреп къазахнен лаф этип башлады.

— Сатын алдынъмы?— деди Каштанов.

— Дѣрт юз сом,— деп къазах дѣрт пармагъыны косьтерди.

— Секиз агъач... Демек, данеси элли сомдан?

Къазах разы олгъан киби башыны салады.

— Кимден алдынъ?

Къазах къолларынен тариф этип:

— Шофер алчакъ бойлу, онынъ янында отургъан адам узун бойлу, козлюклери бар эди,— деди.

— Мин машинагъа!— деди Каштанов еринден туруп. Къазах минмейджек олды. Молдабайгъа бакъты. Лякин онынъ джиддий юзюни корьген сонъ къазахча бир шейлер айта-айта машинанынъ артына ерлешти.

Андрей Андреевич къазахнен берабер идареде тюшип къалды. Молдабайны исе, Матвей Петровичнен прорабны кетирмеге ёллады. Арадан чокъ кечмеди инженер ве прораб директорнынъ кабинетине келип кирдилер. Селямлашты ве скемлеге ерлештилер. Не прораб, не де инженер четте тургъан къазахкъа эмиет бермедилер.

— Таныйсызмы бу кишини?— деди Каштанов, Матвей Петровичке бакъып.

— Эсимде ёкъ,— деди Матвей Петрович.

Шай дегенде къазах еринден атылып турды.

— Танымайсынъ э? Таныйсынъ!..— деп онъа пармагъыны салады.— Бешбармакъ яхшымы? Яхшы. Танымайсынъ э?— деди онъа текрар къыйыш-къыйыш бакъып.

Андрей Андреевичнинъ къашлары туюкленди. Озюнинъ биринджи ярдымджылары арасындан бойле алчакълыкъкъа къатылгъан адамлар чыкъар деп, о ич бир вакъыт тюшюнмеген эди. «Матвей Петрович инженер. Яшайышы менимкинден эсик дегиль»; деп тюшюнди директор. «Онынъ къолунда ялынъыз агъачмы? Я даа нидже тюрлю къуруджылыкъ материаллары бар. Насыл олды да, Матвей Петровичнинъ бойле шейге къолу барды?..»

Бу тюшюнджелер Андрей Андреевичнинъ мийинден бир ан ичинде йылдырым киби келип кечтилер.

— Къач кумюш алдынъ бу адамдан!— деди Каштанов серт давушнен.

Матвей Петровичке ялан айтмагъа сыра къалмады.

— Дёрт юз, лякин мен дегиль...

— Сус! Чыкъар параны столгъа къой!

— Шимди парам ёкъ Мен онынънен анълашырым.

— Эки саат муддет санъа. Меним козюм алдында бу адамнынъ парасыны къайтарып береджексинъ!

— Бугунъ япамам, Андрей Андреевич!

— Япарсынъ! Директор айттымы, битти! Молдабай, кель бу якъкъа! Сен прорабны алып кет. Кеч олса да, бир эки адам тапып анавы агъачларны юклеп ерине кетирсинлер.

Шай дегенде къазах кене атылып турды.

— Бермем, бермем!— деди о.— Мен пул төледим!

— Пулны санъа берирлер. Эки сааттен!— деди директор эки пармагъыны косътерип.

Матвей Петрович козлюклерини такъты. Пармакъ уджларына басып къапыдан чыкып кетти. Каштанов кабинетинде документлерни, куньделик почтаны къарыштырып къалды.

Бир саат къыркъ беш дакъкъа дегенде Матвей Петрович къайтып кельди.

— Багъышланъыз, Андрей Андреевич,— деп стол устюне дёрт юз кумюш пара ташлады.

— Ал параны стол устюнден!— деди Каштанов онъа бакъмайып.— Базагъа бар, агъачны къабул этип ал ве къартнынъ парасыны прорабнынъ козю алдында къайтарып бер!

Матвей Петрович агъызына сув алгъан адам киби ич бир сёзсиз чыкып кетти.

Эки куньден сонъ, партия тешкиляты Матвей Петровичнинъ меселесини бакъты. Оны этрафлыджа динъледилер. Партия тешкилятынынъ секретары Къурбанбеков къач кере онынъ эвине барды. Бала-чагъасынен, къадыны ве къомшуларынен субетлешти.

— Мен сизинъ эвинъизде олдым,— деди Къурбанбеков.— Аркъадашынъызнен лаф эттим. Яшайышынъыз яхшы. Эвде эр шейинъиз етерлик. Яхшы къадынынъыз, тоз-томалакъ огъланчыгъынъыз бар. Сизге бойле чиркин ёлгъа тюшмеге айле яшайышынъызда ич бир тюрлю себеб ёкъ. Мен анъламайым. Сизни не меджбур этти?

— Мен агъач саткъаным ёкъ, алып кеткеним де ёкъ. Онынъ манъа кереклиги де ёкъ,— деди Матвей Петрович.— Мен шу аулгъа эр вакъыт барам. Къазах достларым мени сая-севелер. Къумыс берелер, кяде бир бешбармакънен сыйлайлар.

— Ички чыкъаралармы?— деп онынъ сёзюни больди Къурбанбеков.

— Онсыз олмай эбет.

— Девам эт, девам эт,— деди Каштанов

— Мен бираз кейф алгъан эдим. Бакъсам азбарда Муртаза машинасындан агъач бошата. Мен онынъ къазахтан акъча алгъанындан хаберим ёкъ. Ашадыкъ, ичтик. Баягъы вакъыт олды. Гедже мени эвге Муртаза кетирди. Экинджи куню, мен ишке чыккъанымнен, Муртазаны чагъырдым. Пек къатты сёгдим. О манъа ялварды,— бир

яптым, бир даа бойле шейге булашмам,— деди. Тюшюндим. Озю пек яхшы йигит. Зенаатынынъ севдасы. Геджекуньдюз къайда ёлласанъ кете, берильген вазифени бир минсиз эда эте. Биринджи кере багъышлайым, эгер бир даа бойле шей япсанъ, манъа джанынъ агъырмасын, джезанъны алырсынъ!— дедим.

— Къарткъа къайтарып берген дёрт юз кумюшни къайдан алдынъ?— деди Къурбанбеков.

— Муртазадан. Меселени анълагъаны киби, бир лаф айтмады. чыкъарды берди.

— Анълашылды,— деди Каштанов.— Биз Муртазанен айрыджа лаф этермиз. Сонъра прорабкъа айланып:

— Биз дагъгъа кеткенде шу Муртаза деген шофер бар эдими?— деди.

— Бар эди, Андрей Андреевич,— деди прораб.— Мен Матвей Петровичнинъ айткъанынен разым,— деп кьошты сонъундан.— Муртаза акъикъатен ишкир йигит. Ойле адамларгъа мукъайт янашмакъ керекмиз. Менимдже онынъле айры лаф этильсин. Бу меселе халкъ арасына чыкъмасын. Эгер онъа яхшы-яхшы айтылса, озъ къабаатыны таныр ве илериде ишке даа зияде сарылыр. Онынъ табиятыны мен билем. Адамлар, кимерде тюшюнмей иш япалар, сонъундан бинъ пешман олалар. Чалыкъ адам. Янъылгъандыр. Иш масхаралыкъкъа чыкъмасын. Эгер о бу меселени анъласа, секиз агъач ерине гедже барып бир машина агъач кетирир.

— Эр алда бойле шейлер ичюн адамнынъ башыны сыйпамайлар,— деди Къурбанбеков.— Агъач бизим ичюн шимди елтындан кыйметли. Озъ хозяйствомызда ишчи кьолу етишмегенине бакъмадан Леспромхозгъа вакъытынджа чалышмагъа адам ёлладыкъ. Намуслы адам эр ерде озюни косътере экен. Мына тюневин Чамлыкътан мектюп алдыкъ. Бизим Мурадасылгъа Леспромхоз дирекциясынынъ тешеккюри бар.

Къурбанбеков мектюпны окъуды ве кене сёзюни девам этти:

— Муртаза меселеси анълашылды — деди о.— Буны Андрей Андреевичке ташлаймыз. Мени Матвей Петрович пек раатсызлай. Сизнинъ айткъанынъызгъа дикъкъат этсек, озюнъизни бир шейде къабаатлы танымайсыз, ойлеми, Матвей Петрович? Амма сиз къабаатлысыз. Сизни о аулгъа бармагъа не меджбур эте? Догърусыны айткъанда, ракъы меджбур эте. Сиз адамларнынъ козю алдында, озъ

ишчилеринъиз алдында бу меселенинъ къолайсызлыгъыны билесиз ве онынъ ичюн озюнъизге тынч кошечик тапкъансыз. Эвге эр вакъыт кейфли келесиз. Эм сиз бу меселеге ничюндир сыкъча урунып башладынынъыз. Бизге бунынъ себеби къаранлыкъ. Сиз муим иште чалышасыз. Озь вазифенъизни яхшы беджересиз. Эгер тамагъынъыз кыытыкълана берсе, бунынъ сонъу яхшылыкънен битмез.

Аркъадашлар эписи озь фикирлерини айттылар. Матвей Петровични бабаджа тенбиледилер ве озюни къолгъа алмасыны теклиф эттилер. Онынъ темиз юректен озь къабаатыны таныгъаныны ве биринджи кере янълышкъаныны козь огюне аларакъ, къатты тазирнен озь ишинде къалдырмагъа къарар бердилер.



I

О туз докъузынджы болюкте медицина пункты ачылды. Макъпуленинъ теклифинен Айрие мында санитарка чалышмагъа башлады.

— Парасы аз олса да, баланъа козь-къулакъ олурсынъ, тамакъ къасеветинден де къуртулырсынъ, ашкъа кетеджек масрафынъ джебинъде къалыр,—деди Макъпуле.

Эльбет де, бу иш Айриеге бир тарафтан келишсе, дигер тарафтан эльвермей эди. Юнус бир озю чалыша. Онынъ къазанына эки тамакъ даа келип къошулды. Айрие яш къадын. Кийинмек керек. Юнус бекяр, әвленмек керек. Буларнынъ әписини Айрие тюшюнип-ташынды, лякин, дагъгъа кетип чалышмакъ ичюн шимдилик онынъ

эли-аягъы багълы. Фидане бираз даа котерильсе, сонъ иш сайламайджакъ амма...

Медицина пунктынынъ эки одасы бар. Айрие саба эрте турып, собаларны якъмакъ, одаларны темиз-пак тутмакъ керек. Къыскъасы, эмширелик вазифеси де онынъ бойнунда. Айлыгъы да дёрт юз элли кумюш. Дагъда чалышкъанлар эки бинъге къадар къазаналар. Эр алда, шимдилик бу иш Айриеге келише. Шунынъ ичюн Макъ-пуленинъ теклифине Айрие разы олды ве бу ишни озюне лайыкъ таныды.

Чебернинъ эли эр шейге яраша, дей тургъанлар. Айрие медпунктнынъ бутюн ишини озъ низамына чекти. Чокъкъа бармадан пенджерелерде чечеклер пейда олдылар. Перделерни озюнинъ орьген чешит орьнекли нагъышларынен яраштырды. Не вакъыт бакъсанъ, поллар темиз, чаршафлар, перделер акъбардакъ киби бем-бездар. Мында онъа энъ къыйын иш — одун парламакъ эди. Дагъдан темеклерни пычып кетирелер, амма ярып бермеге киши ёкъ. Бу иште онъа Юнус ярдым эте. Бир къач кунълик одунынъ парлап бере, сонъ озъ ишине чыкъа кете. Одун керек олгъан сайын Юнусны къайдан тапарсынъ? Истеристемез Айриенинъ озюне парламакъ керек ола. «Хасталарны сувукъта тутмакъ олмаз» дей о лаф чыкъкъанда. Собаларны якъып, бутюн ишини бир сырасына къойгъан сонъ, устюне безаз халатыны кийип, пенджере янындаки курсюге ерлешип отура. Бу онынъ энъ севген ери. Ашханенинъ алдындаки мейдан бу ерден яхшы корюме. Эр кес онынъ козю алдында. Биревлер ишке ашыкъа, биревлер ашханеден абынып-сюрюнип чыкъа, кимиси ракъы будкачыгъынынъ этрафында долана, биревлер иштен къайта, биревлер тюкянгъа келе...

Булар эписи Айриеге адамларны белли бир дередже огренмеге, табиятларыны бильмеге ярдым эте. Энъ яхшысы шу ки, куннинъ кечип кеткенини дуймай къала. Элиндеки оясынынъ бирини ишлеп битиргендже, экин-джисини башлай.

Къыш эр ердё къышлыгъыны эте. Айриенинъ якъаджакъ одунлары къар тюбюнде къалды. Бугунъ онынъ соба тутандырмагъа бир ёнгъасы биле ёкъ. Юнус гедже сме-насында эди. Айрие саба ерге ярыкъ тюшер-тюшмез турмагъа меджбур олды. Фуфайкасыны кийди. Башыны юн шалына сарып багълады. Тек козьлери корюне. Гедже ягъгъан терен къар устюнде излерини къалдырып, мед-

пунктка догъру адымлады. Парланаджакъ одунларгъа къолнен тиймекнинъ чареси ёкъ. Тийсенъ санки пармакъларынь бузлап тюшеджек. Айриенинь пармакълары. Къаркиби беяз, индже, назик пармакълар... О джесаретленип бир темекни къар тюбюнден тартып чыкъарды. Тиклеп отуртты. Балтаны котерейим дегенде, темек йыкъылды. Бир даа алды, къар устюне эки кере котерип урды, темек озъ изи ичинде къадалып къалды. Лякин, балтанынь бузлу сапыны тутмагъа пармакълары чыдамады. Агъызына якъын кетирди. Багърындан чыкъкъан джыллы нефеснен уфледи. Файда бермеди. Сонъра къолларыны фуфайкасынынъ ичине, къойнуна сокъып пармакъларынынъ уджларыны къолтукъларынынъ астына къыстырды. Озь сыджагъынен озюни къыздыргъан сонъ, алель-аджеле балтаны алып темекнинъ ортасына яндырды. Кене ярылмады. Инатланды. Дерсинъ бу яш къадынгъа къылынмакъ истеди. Бутюн къуветини топлап, юкъарыгъа созула берип, бир даа урды. Фуфайкасынынъ ичине сыкъылып къалгъан коюслери сарсылдылар. Бу сефер балта темекке сапланып къалды. Оны чыкъарып алгъандже пармакълары бир даа сызлап башладылар. Кене къойнуна тыкъты. Анда санки соба яна. Соба янмаса да къадын къоюны. Онынъ арарети керек олса демир иритир... Ёлда Мурадасыл пейда олды.

— Олян, дагъны тюшюнде корьдинъми, бу къадар эрте къайда ашыкъасынь?— деди Айрие онъа эришип. Мурадасыл индемени. Кутюкке санчылгъан балтаны эслегенинен, Айриеге тараф адымлады.

— Не джимпийип къалдынъ?— деди о Айриенинь шал астындан янып тургъан козьлерине бакъып.

— Мынавы кутюклерге сёз кечиралмайым,— деди Айрие къар тюбюндеки агъач обагъа тараф башыны саллап.— Сиз манъа дагъдан не расткельсе оны юклеп йибересиз. Ким парлайджагъыны аслы тюшюнмейсинъиз. Деминден берли мынавы кутюкни ярып оламайым.

— Къана, берчи бу якъкъа.

Мурадасыл балтаны авада доландырып бир саллагъан эди, темек эки парча олып, эки тарафкъа атылып кетти. Сонъ бир даа, бир даа. Бойнунда салланып тургъан чантасы кедер этти. Чыкъарып, къар устюне ташлады. Мурадасыл ойле къызышып кетти ки, Айрие ташып етиштирамай. Кесильген одунлар обаланып къалдылар. Мура-

дасыл Айриенинъ къызарып къалгъан пармакъларыны өследи.

— Я къолчакъларынъ къайда?— деди о джиддийликнен.

— Къолчакъкъа даа алышмадым. Кийсем бир одун тутамайым, сыптырыла кете кълумдан,— деди Айрие козь къиясындан кулюмсиреп. Мурадасыл онынъ утансырап лаф өткенинден кълочагъы олмагъаныны анълады.

— Ма, мынавы кълочакъларны, сокъ кълунъны!

Мурадасыл чантасындаң эки янъы кълочакъ чыкъарып кесильген одунларнынъ устюне ташлады. Сонъра, чантасыны алып, озъ ёлуна девам этти.

Айрие собаларны тутандырды. Олар гурюльдеп кеттилер. Чокъкъа бармай одалар кълыздылар. Сонъра фуфайкасыны чыкъарып, устюне халатыны кийди. Кузгю къларшысына келип, сачларыны тюзетти, чырайыны эслеп бакъты. Онынъ янакълары майыс кирези киби кълызаргъан. Козълерининъ тюбюнде азачыкъ сиярынты пейда олгъан. «Юкълусызлыкълтан олса керек», деди о ичинден. Аркъасыны кузгюге чевирип, халатыны сыйпап бакъты. Бол корюнди. Бир парча кълушагъыны сыкътырды. Бели инджерди, кокреклері бираз даа юксельдилер.

Экинджи куню Айрие ишке кельгенде кълапы алдында кене бир оба кесильген одун тура эди.

— Мурадасылнынъ ишидир бу — деди о ве кълуванченен одунларны ичери ташып кирсетти.

Айрие медицина ишине тез алышты ве оны юректен севип башлады. Эким хасталарны кълабул өткенде даима янында отурды, дикълкъатнен бакъты, онъа керек ярдымны япмагъа тырышты. Хасталаргъа язылгъан рецептлер боюнджа илядж бермеге, энъ әйиси шу ки, укол япмагъа пек тез огренди. Илк медицина ярдымы косьтерюв ишлерини бир тамам менимседи. Илядж ичирмек, яра багълamakъ, чезмек ве дигер ишлернинъ бир минсиз япылгъаны ичюн, әким Айриени пек севди ве әр вакълыт янына алып юрди. Хусусан хасталарнынъ әвине бармакъ керек олса, әким Айриени алмагъландже кълапыдан чыкъмады.

— Сенинъ әр шейге әлинъ келишкени киби, тилинъ де келише, Айрие,— дей онъа әким Антонина Алексеевна.— Сен хасталарнынъ тилини анълайсынъ. Сенинъле берабер манъа чалышмакъ енгиль ола. Мен район сагълыкъ сакълав болюгининъ башынен анълашып, сени Таубасыдаки өмширелер курсына кирсетмек истейим. Эгер разы олсанъ, бутюн дерслерни ве амелият кечюв ишлерини озъ бойнума

аладжагъым. Бойле де мен афтада эки кунъ анда барып дерс берем. Секиз ай кечер-кетер, дуймай къалырсынъ. Барып имтиан берирсинъ ве бу ернинъ адамлары айткъаны киби бир «дохтур апа» олур кетерсинъ.

— Мен сизнинъ япкъан эйиликлеринъизни ольгендже унутмам Антонина Алексеевна,— деди Айрие севинчлик козьлеринен онъа бакъып.

— Санъа безъ халат пек яраша, сен бу хызметке лайыкъ адамсынъ, ялынъыз окъума къ ве гъайрет этмек керексинъ. Ишке киргенинъден берли мен ялынъыз хасталарнынъ алгъышыны эшитем. Энди «Рахмет», «савболкъызым» деген сёзлерге алышып къалдым. Санъа эркеклер дегиль, къадынлар да сукъланалар, Айрие. Мен де сукъланам. Сен эм гузельсинъ, эм табиятлысынъ. Мынавы безъ халатны устюнъе кийип, сачларынъны арткъа топласанъ, сенден козюмни аладжагъым кельмей. Мен баягъы вакъыттан берли сынап турам. Мында бир узун бойлу адам бар. Ашагъы баракларда, демирёл тарафта отура. О ашханеге кирип чыкъкъан сайын, мынавы, сен тургъан пенджеренден козюни алмай. Адыны бильмейим, мен онъа санъа корьсетирим.

Айриенинъ тенинден боджеклер юрген киби олды. О, Мурадасыл акъкъында сёз кеткенини анълады. Богъазына бир шей тыкъылып къалгъан адам киби, бир юткъунып алды ве Антонина Алексеевнанынъ фикирини бир керенден урып йыкъмакъ истеди.

— Меним акъайым бар, балам бар, Антонина Алексеевна. Бу акъта, риджа этем, менимле бир даа лаф этменъиз.

— Сен керчектен де эвелькининъ дженюп къадынлары киби лаф этесинъ, Айрие. Озюнъ земане адамысынъ. Сенинъ бир буюк эксиклигинъ бар, о да шу ки, сенде ачыкълыкъ етишмей. Озюнъни тар къафес ичинде тутасынъ. Джанынъ агъырмасын, бойле къадынларны шимди эркеклер чокъ бегенмейлер.

Бу сёзлер Айриеге пек тесир эттилер. Оннынъ козю алдындан Алиманнен яшагъан кунълери келип кечти. «Демек, Алиманнынъ менден сувунмасына озюм къабаатлы экеним», деген фикир доланды оннынъ башында.

Айриенинъ акъайынен бозушкъаныны Макъпуледен башкъа кимсе бильмей. Антонина Алексеевна да, эр кес киби, оннынъ акъайыны арбий хызметте, деп биле. Макъпуле ве Айрие ойле анълашкъан эдилер.

Бугунь Антонина Алексеевнаны динълеген сонъ, Айриенинъ юрегине сувукълыкъ тюшти. «Мурадасылнынъ пенджереге бакъкъаныны эслеген олсалар, я онынъ манъа одун кесип бергенини корьгенлер азмы? Булар эписи бир кунъ Макъпулеге барып етер. Макъпуле меним тувгъаным киби. ...Коресинъми, башыма бир мешакъат даа чыкъа-ята...»

Бу тюшюнджелер Айриенинъ башыны айландырып, өзгелеп-ёруп туралар.

Айрие акъшамны сабырсызлыкънен бекледи. О Макъпулени корьмеге ашыкъа эди. Медпуктнынъ къапыларыны япып, догъру Макъпуленинъ эвине кетти.

— Бугунь иштен кеч къайттым,— деди Макъпуле Айриенинъ кельгенине къуванып.— Даа аш-сув бакъмагъа къолум тиймеди.

— Шимди мен санъа ярдым этейим. Къана къартоп сепетини косътерчи?

Макъпуле элини-бетини ювуп, орталыкъны джыйыштыргъандже Айриенинъ къолтавасында къызартылмакъта олгъан къартоплар чырылдамагъа башладылар.

— Ягъны къызгъанма!— деди Макъпуле кроватинынъ ортыусини тюзетип.— Семичка ягъы къартопнынъ леззетини кетире.

Макъпуленинъ козюне Айриенинъ пенджере ичинде ташлагъан къолчакълары илинди. Къолуна алды, айландырып бакъты. Таныш къолчакълар. Оларны эки кунъ эвельси Мурадасылгъа озю берген эди. «Бу къолчакълар Айриде не ишлей экен?», деп тюшюнди Макъпуле. Кене къайтарып ерине къойды, лякин индемеди.

Айрие таванынъ устюни ачты. Къартоп бувлары ода-нынъ ичини къокъутты...

— Сонъ, ишинънен анълашып оласынъмы?— деди Макъпуле аш башында.

— Антонина Алексеевна мени бегене, курскъа кирседжек ола...

— Тюшюнип отурма, разылыкъ бер,— деди Макъпуле онынъ сёзюни болип.

— Тюневин Мурадасылны корьдим, акъыз,— деди Айрие кулюмсиреп.— Манъа одун кесмеге ярдым этти.

— Къолчакъ да берген санъа,— деп кестирди Макъпуле.

— Оны къайдан билесинъ?— деди Айрие тааджипленип.

— Таныдым. Мен оларны шеэрден кетирткен эдим. Бизим болюкте ойле кьолчакъ кимседе ёкътыр.

— Одун кескен сонъ, ташлады кетти, акъыз, аджыды гъалиба. Мераметли адамгъа бенъзей.

— Мен оны аджыдым, о да сени аджыгъан... Айттым да мен санъа онынъ къызгъанч олмагъаныны. Озь джанынынъ къадирина бильмеген бир адамдыр. Керек олса устюндеки урбасыны да чыкъарып берир. Тек онъа хиянетлик этмейджексинъ. Ойлелерини корьмеге истемей. Тюневин Зерагъа бир иш кескен. Сонъки алты метрликни тыгъыртып вагонеткагъа чыкъаргъан сонъ, тютюн якъмагъа токътагъанлар. Шакъалашкъанлар. Эбет, дагъда шакъасыз олмай. Шакъанен энъ агъыр ишни япып битиргенинъни дуймай къаласынъ. Биреви шакъа этип гонъюль ала, биреви щакъанен джанынъны якъа. Зеранынъ кене тили къашынып башлагъан.

-- Сырыкъ киби боюнънен Макъпуленинъ садакъасына кунюнъ къалдымы?— деген.— Анавы мукъфатны аля даа унутмагъан, акъыз. Мурадасыл кьолуна балтасыны алгъан да:

— Бизим звенодан аягъынъны савуштыр, эгер бир кунъ даа яныма келирсинъ, башынъны мынавы кутюк устюне эгильтип, тилинъни шарт кесип алыр да, кьолунъа туттырырым!— деген.— Артындан даа бильмем нелер кьошкъан... Зера керчектен кьоркъкъан. Кимге шикъет этсин. Манъамы ? Мефодий Пантелеевичке баргъан. Къайда йиберсенъиз-йиберинъ мен о делининъ звеносына бармам,— деген. Кимсе оны озь звеносына алмагъа истемей. Мефодий Пантелеевич шимди о бильмирни къайсы звеногъа тыкъаджагъыны тюшюне. Мен де индемедим. Барсын, тапсын озюне ер. Бельким тежаран дурулыр. Башында акъылы олса анъламакъ керек. Бир звенодан къувула, дигерине къабул этмейлер. Бу не демек? Джемиетте бойлелерине ер тапмакъ зор. Анълы адам ичюн бундан буюк масхаралыкъ олурмы? Джемаат тазирининъ чешит усулларындан бири де, иште будыр.

Айрие, Макъпулени динълей, лякин озю Мурадасылны тюшюне. «Барып да Антонина Алексеевнанынъ айткъаны догъру олса? Шу пенджере янында бир даа отурмайджам. Одун кесмеге кельсе?.. Э, келеджектир даа. Инсан инсангъа ярдым этмейджекми ёкъса? Буны Макъпуле биле. Адамлар корелер. Бир Мурадасыл дегиль, манъа башкъалары да ярдым этелер. Энди адамлар озь

лери сорап башладылар.— Одунынъ бармы, Айрие?—деп жечелер...»

— Не индемей отурасынъ?— деди Макъпуле Айрие-нинъ козюне бакъып.

— Мурадасылгъа шу къолчакъларны къайтарып берейимми экен, деп тюшюнем,— деди Айрие башында долангъан фикирлерини сакълап.

— Энди сен шашмалап башладынъ!— деди Макъпуле сертейип.— Санъа къолчакъ керекмейми ёкъса? Мында къолчакъсыз адым атылмай. Орманда тек къышта дегиль, язда да къолчакънен чалышалар.

О, Айрие ве Мурадасыл ичюн ич бир шей шубеленмей, бакъылына ич бир тюрлю яманлыкъ кетирмей эди. Бираздан сонъ, кене Мурадасылны айтып башлады.

— Тюневин ишнинъ сонъунда барып онынъ деянкасыны бакъайым, дедим. Пытакъларны джыйып оба-оба япкъан ташлагъанлар. Ничюндир, якъмагъанлар. Оларны иш вакътында якъмасанъ сабагъадже къар астында къалалар. Экинджи куню якъмакъ пек къыйын ола. Этрафкъа козь ташласам, эр кес къайткъан. Деянкада кимсе ёкъ. Бир даа бакъсам, яныма чип эттирип къар томары тюшти. Мен элеслендим, лякин бир кереден алдырамадым. Кене бир томар даа. Бу кереси омузларымнынъ ортасына тюшти. Айланып бакъсам, пытакъ обаларынынъ артында Мурадасыл тура.

— Буларны кимге обалап къалдырдынъыз, ничюн якъмадынъыз?— дедим онъа чевирилип. О бир шей айтмай. Тишлерини корьсетип кулебере.

— Дженнетте еринъни корьдинъми? Неге къатып-къатып къаласынъ?— дедим.

— Аселет якъмадыкъ,— деп ырджайды. Сонъ къолундаки къар томарыны сыкъа берип меним яныма кельди. Къолуны омузыма узатаджакъ олды, мен четке бурулдым. Къоркътым, акъыз, этрафым орман. Аз къалдым къычырмагъа. Биз гъарип къадынлар зоргъа къалдыкъмы, къычырып къуртуламыз. Бу ерде авджы киби доланып юргенинъ не? Якъмайджакъ олгъан сонъ, не къайтмадынъ?— дедим.

— Сенинъ бир озюнъни дагъда къалдырмакъ олурмы? Илле келип тешкереджегинъни билип отурам бу ерде. Раатсызланма, Макъпуле, саба ола хайыр ола, айды юрь, кеттик,— деп къолума япышты.

— Сонъуна къалгъан шейге къар ягъа,— деп мына

бунъа айткъанлар. Саба пытакъларны къар тюбюнден тапсанъ ал. Баарьде исе штраф,— дедим.

— Штрафны берабер телермиз,— деди де, ерден бир авуч къар алып меним бетиме септи. Токъта, дедим, шу эрифке бир иш кесейим. Ёл кенарында къаргъа саплангъан курек тура эди. Бир курек къар алып бунынъ энъссине къойгъан эдим, омузларыны къысып токътады да къалды. Сонъ башладым кене къарнен шыбаламагъа. Чаре тапмады, курекке япышты. О тарта, мен тартам... Акъай десенъ де ери бар. Бир силькинген эди, ёл кенарындаки къар куртюги ичине комюльдим кеттим. Сонъ келип къолумдан тартгы. Турдым амма, устюм-башым къар. Къолчакъларынен къакъып темизледи.

— Я сен?

— Мен де онынъ омузларыны, энъссини къакъып, темизледим. Сонъ юкъары складкъа кельдик. Ничюндир бильмем, сонъки вакъытларда о манъа зиядесинен якъынлашып башлады. Сенинъ дегенинъ киби гъалиба, севе, лякин ичинде тута. Бунъа бир ёл тапайыкъ, достчыгъым. Бу эриф мени эджельсиз ерге къояджакъ. Эки йылдан берли тельмирип юрем. Юкъумда да раатлыкъ бермей. Козюмни юмдыммы, тюшюме келе. Сельби киби боюнына сарылам, севем, бетини, сачларыны сыйпайым, эркелейим, озюм эркеленем. Севинчимден абдырап уянам. Янымда кимсе ёкъ. Дёрт диварнынъ ичинде бир озюм ятам. Къоркъам. Турып лампочканы якъам. Юкъум къачып кете. Алайым башымны, чыкъайым кетейим, дейим. Тышта къар. Пек къыйын, достчыгъым. Дюнъяда къадын кишининъ озь оджагъы олмадымы, онынъ бахтлым дегенине инанма. Истесе алтындан туфли кийсин, сарайларда пуфгёшеклерде ятсын, янында севимли омюр аркъадашы олмагъан, эрининъ назынен назланмагъан къадыннынъ менимдже омюри окюнчли кече.

Макъпуле бу лафларнынъ Айриеге тесир этип башлагъаныны эследи. Онынъ вазиятини бираз енгиллештирмек макъсадынен:— Сенинъ янынъда, эр алда, эглендженъ бар, Айрие, сен мени озюнънен бир этме. Фидане санъа омюрлик аркъадаш. Ананъ, къардашынъ бар...

Айрие бираз юрекленди. Макъпуленинъ айткъанлары онъа белли бир дередже токъунгъаныны о яхшы феркълай эди.

— Анам манъа бутюн вакъыт айтып тура,— деди Айрие.— Акъайнынъ чарыкънен кетиргени, балам къадын-

нынъ маджарнен ташыгъанындан хайырлыдыр. Эвде бир джарты акъайынъ олса, юрегинъ эр вакъыт ат башы киби турар, дей. Эбет, къартлар буны омюрден алып айткъанлар. Эвель вакъытларда огюз екип, я да ат екип арман бастыргъанлар. Акъшамгъа къадар айдалгъан арман тюшкен сонъ, богъдайны бешпармакънен ельге савурып темизлегенлер. Бабам да шай, .энди кышлыкъ эрзакъмыз азыр деп, ёрулып-талып эвге къайтып келе де, босагъа устуне отурып аягъындан чарыкъларыны чыкъара экен. Чарыкъларны айландырып къакъкъанда ичинден эр вакъыт богъдай тёкюле экен. Анам оларны да зиян этмеген. О девирден къалгъан бир лаф амма, анъламагъа бильген адам ичюн манасы пек буюк. Мурадасыл киби адам акъикъатен чарыгъынен кетирсе тойдурыр.

Айрие турды, пенджеререгге якъын келип къолчакъларны алды. Къайтарып ерине къояджакъ олды, пешман этти. Сонъра фуфайкасынынъ джебине тыкъты. Тышта курпелеп ягъгъан къар данечиклери Макъпуленинъ пенджересини чертип-чертип алалар. Къар бойле ягъдымы, аванынъ сувутаджагъы бес-белли.

— Къал бу гедже Айрие,— деди Макъпуле.

— Анам къасеветленир. Фидане гедже уяна, кимердс ассызлай. Айды, геджелер хайыр, ярын корюширмиз...

Макъпуле сабагъа къадар айланып чыкъты. Козълерининъ къапакълары шишти, башы дувулдап башлады, лякин юкълап оламады. О Мурадасылнынъ дагъда эткен шакъаларыны, къар ичинде ойнашкъанларыны, бири-бирлерининъ усть-башларыны къакъкъанларыны... Ниает, саба эрте Айриеге барып одун кескенини ве къолчакъ меселесини хатырлады...

II

Бааръ якъынламакъта эди. Мефодий Пантелеевичнинъ болюгинде иш къайнай. Комплекс иш усулына авушув эр тарафтан эльверишли олып чыкъты. Болюкте кичкене звенолар къалмады. Орманкесерлерге ярдымгъа техника кельди. Болюклерде кочюджи электрик станциялар, электрик пычкылар, агъачларнынъ уджларындан илиштирип сюйреп алып кетиджи зынджырлы тракторлар пейда олдылар. Энди ишчилер орманда агъачларны сорт-сорт

этип кесюв ишинден, вагонеткаларгъа юклемектен, батакълыкъ-сазлыкъ ичинде агъач рельслерден ёл ясамакътан къуртулдылар. Адамларнынъ ишине техника ярдымгъа кельгенинен атлар да дагъ ишинден бошадылар. Орман болюгининъ йигирми аты, йигирми вагонеткасы ве ёл ишлеринен огърашкъан махсус бригадасы бар эди. Шимди бу ишни бир тракторджы ве онынъ ярдымджысы япалар. Электрик пычкыылар шимдилик йигирми эки килограммлыкъ агъырлыгъында олгъанына бакъмадан, пычкыыджыларнынъ къол ишини баягъы енгиллештирди. Мурадасыл башта къол пычкыысынен озъ звеносында он-он беш кубометр агъач пычкъан олса, шимди къыркъ кубометр агъачны коръдим демей. Техниканынъ келюви мунасибетинен болюкте иш процесси бир тамам денъишти. Буюльтильген бригадаларнынъ башына теджрибели адамлар къоймакъ керек олды. Макъпулени ве Мурадасылны айры-айры бригадаларгъа ёлбашчы тайин эттилер. Бир чокъ ишчилерни, хусусан яшларны механизаторлар курсына окъумагъа ёлладылар. Бригадада чалышкъанларнынъ эмек акъкыы, энди, дагъда япылгъан ишке коре дегиль де, юкъары складкъа теслим этильген агъачнынъ микъдарына коре тёлене. Мында пычкыыджылар, пытайыджылар, тракторджылар, сортларгъа кесиджилер эписи бир комплекс бригаданы тешкиль этелер ве япкъан ишлерине коре акъалалар. Эгер орман болюги планыны арткъачынен толдурса, эр бир ишчи озъ къазанчына коре бир де къошма паранен мукаяфатлана. Мукаяфат алмакъ ичюн орман болюгинде чалышкъан эр бир адам эм озюнинъ, эм де бутюн болюкнинъ ишинен меракъланмагъа борджлы.

— Мурадасылнынъ къолуна электрик пычкыы кечкенсонъ онъа терек даянамы?— деп кулюше ишчилер. Акъикъатен, юкъары складдан агъачны ташып етиштирамайлар. Эстакадалар оба-тёпе агъач астында къалдылар. Мефодий Пантелеевич «Леспромхоз» идаресинден токътамай къошма эшелон истеп тура.

Эр алда орман ишинде баарь—баарьлигини япа. Алты ай девамында токътамай сепелеп тургъан къар бир ай ичинде ирип, ерге синъип кете. Топракънынъ маддеси балабан. Онъа не берсенъ къабул эте, озъ багърына синъдире. Тыпкыы инсан юреги кйби. Чокъ шейге къатлана, чокъ шейни синъдире. Лякин, онынъ да бир быкъкъандакъикъасы келе, сыгъдыралмай, ярыла ве озю де топракъ олып кете Мында шимди къар ирип башлагъанынен

орталыкъ сувгъа гъаркъ олды. Синъдирип етиштиралмай. Орман ичинде мейдангъа кельген голлерден, батакълыкъ-тан ишчилер кереги киби чалышып оламайлар. Трактор да истеген еринден урдырып кечалмай. Ойле сазлыкъларгъа расткелине ки, адамны тип-тири ютып йибергенинден башкъа, тракторны да тапсанъ ал. Бутюнлей батып кетмеге мумкюн. Бу вакъыт эр ерде ёлсызлыкъ укюм сюре. Бунъа бакъмадан Мефодий Пантелеевичнинъ болюги планыны арткъачынен толдурмакъны козьде тута. Къарнынъ, сувнынъ кедери ишке буюк олса да, бу айнынъ планыны мытлакъ толдурмакъ керек. Чюнки, бу ай кварталгъа екюн чекеджек. Макъпуленинъ бригадасы да Мурадасылдан артта къалмай. Бочюкнинъ «Къызыл тахта»сында экисининъ ады ян-янаша языла. Экиси кунълешелер, лякин аркъадашча, достча. Керек олгъанда бири-бирлерине ярдым этелер. Мурадасыл озъ бригадасына совхоздан кельген бир къач адамны даа алды. Оларнынъ арасында Чеврениди, Бельский, Гурченко ве башкъалары бар эдилер.

— Биринджи кварталнынъ екюнини чыкъарайыкъ да,— деди бир кунъ Макъпуле Айриеге,— меним эвиме бир къач адам чагъырып догъгъан кунюмни къайд этермиз. Отузны таптым. Энди отуз йыл даа яшамам.

— Бельки зияде яшарсынъ, буюк лаф сёйлеме,— деди Айрие.

— Буюги-кучюги белли шей. Инсан къартал дегиль, терек де дегиль. Анавы «таш юрекни» де чагъырырмыз. Бизге джиддий лаф этмек керек. Бала дегильмиз де я?

Айрие сёзнинъ Мурадасыл акъкъында кеткенини анълады ве дикъкъатыны даа зияде арттырып Макъпулени динъледи.

— Онынъ юреги таш олса,— деди Макъпуле текрар сёзюни девам этип,— менимки инсан юреги, къадын юреги. Даянмакънынъ, сабыр деген шейнинъ асыл сонъу бармы? Бойле къартайып кетейикми дагъ ичинде, акъыз? О да тезден къыркъны тападжакъ.

— Эр киши ичюн къыркъ яш,— деди Айрие Макъпуленинъ сёзюни болип,— тамам аятынынъ дер вакъыты, омюрининъ озек девир. Джемааткъа къошулса да яраша, башы да чалыша. Мен сенинъ фикиринънен разым, Макъпуле. Мурадасылны чагъырырмыз, бизим Юнус да келир...

Макъпуле онынъ сёзюни болип:

— Мефодий Пантелеевични де чагъырырмыз,— деди.

— Айса, Антонина Алексеевнагъа да айтырмыз,— деп кьошты Айрие.

— Мурадасыл истесе озюнинъ достларына да айтсын.

— О якъыны онынъ озюне къалдырамыз. Истеген адамыны чагъырсын,— деди Айрие.

Бааръ кимнинъ юрегини тесирлендирмей. Табиат узун, девамлы къышлыкъ юкъусындан уяна. Эр шей джанлана. Боджеклер биле бири-бирининъ артындан къувалашалар. Орманда кунъ тиймеген ерлерде кичкене-кичкене къар обачыкълары сакъланып къалдылар. Оларнынъ кимсеге зарары ёкъ. Аксине, язнынъ ортасына къадар аваны серинлетип, тазертип туралар. Отуз докъузынджы болюкте — ишчилер яшагъан бу посёлкада къарнынъ эсамеси биле къалмады. Кой этрафындаки акъкъайын тереклери япракъ ачып башладылар. Юке чечеклери орталыкъны къокъуттылар. Ава къызып башлады. Айриенинъ иши енгиллешти. Одун парламакъ къааринден къуртулды. Иши енгиллешти амма, бош вакъыты ёкъ. Антонина Алексеевна сёзюнинъ саиби бир къадын экен. Дегени киби япты. Айриени эмширелер курсына кирсетти. Бүтюн дерслерни ве сарф этиледжек вакъытны озъ бойнуна алды. Айриеге адым аттырмай. Бош вакъыт таптымы, янына отурта ве программа боюнджа суаллер бермеге башлай. Джевабыны берамаса, анълата, озъ ишинден мисаллер кетире. Китаплардан окъуладжакъ параграфларны, саифелерни косътере. Дерсликлерни озю алып келе. Айрие айда эки кере Таубасыгъа барып, андаки оджаларнен корюше, суаллерге джевап бере ве дерслерден яхшы ишаретлер алып келе. Антонина Алексеевна онынъ алгъан ишаретлерине къувана.

— Тезден имтиан береджексинъ, Айрие,— деп ташлай.— Имтиангъа учъ ай даа бар, чокъу кетти, азы къалды. Эминим ки, сен меним юзюмни къызартмазсынъ.

Антонина Алексеевнанынъ анаджа къайгъырувыны, онынъ япкъан эйликлерини Айрие насыл ерине кетиреджегини бильмей. Онынъ эр бир сёзюни, риджасыны бир минсиз эда этмеге тырыша.

— Меним бахтыма сиз расткельдинъиз, Антонина Алексеевна,— дей Айрие онъа.— Энъ агъыр кунюмде манъа къол туттынъыз. Зенаат огреттинъиз, бильги бердинъиз, айтынъ сизинъ гонълюнъизни насыл тапайым?

— Инсан озь бахтыны озю тапа ве озю таптай, Айрие. Мен сенинъ кьальбинънинъ темизлигине, намусынъа, инсаниетлигинъе бакъып кыймет кестим. Акъайымнен отуз йыл омюр эттим. Экимиз де эким адик. Экимиз де башындан сонъуна къадар дженкте олдыкъ. Бири-биримизни корьмеген вакъытларымыз чокъ эди. Гонъюллеримизни мектюплернен чездик. Мен насыл бир муитта олмайым, эр вакъыт онъа садыкъ олып къалдым. Оны ашшаламагъа юзюм чыдамады. Эр кеснен аркъадаш олдым, дост олдым, ишиме ве омюр ёлдашыма эр вакъыт садыкъ къалдым. Мен де сенинъ киби яш эдим, дюльбер эдим. Шимди сенинъ пенджеренъе бакъкъанлары киби, меним пенджереме де козь тиккенлер тапыла эди. Экимлигимни, солдатлыгъымны яптым. Вазифемни намуснен ада эттим. Дженкни битирип къуванчнен къайткъанда, бизим...

Бу ерде Антонина Алексеевна токъталды, дудакълары къалтырап башлады. Козьлери яшланды. Бираз нефес алды ве девам этти:

— Бизим ёлумызда минагъа огърагъан бир санитар машинасы тура эди, Машина дарма-дагъын олгъан. Биз аман ичиндеки олюлерни четке чыкъармагъа башладыкъ. Башладыкъ амма, бир даа бакъсам меним майорым... Кечиккенмиз, энди тени сувуп къалгъан... Мына дженкни мен бойле битирип къайттым. Дюнъя ойле экен. Башымсачым агъарып къалды, онынъ кибисини бир даа расткетирамадым. Дженк йыллары манъа язгъан мектюплерини аля даа сакълайым. Олар дерсинъ бир китап оладжакъ. Сен де мектюплеринъни сакъла Айрие, керек олур. Омюрдир, эр шей тюшюнгенинъ киби олып чыкъмай.

Антонина Алексеевна Айриенинъ мектюп алмагъаныны бильмей. Алиманнынъ кеткенине тезден бир йыл толаджакъ. О, Айриенинъ ич бир мектюбине джевап язмады. Энди онъа Айриенинъ ишанчы олмаса да, кене къуртулып чыкъкъандже беклемекни юрегине къойды. Эгер Алиманнынъ эткенлерини Антонина Алексеевна бильмесин, Айриенинъ шу куню лыйыгъыны тапар. Антонина Алексеевананынъ бутюн лакъырдыларындан анълашыла ки, Алиман киби адамларны кореджек козю ёкъ. Айриенинъ аиле меселеси акъкъында юрген бутюн бу лакъырдылар, адамларнынъ тюрлю фикирлери, атта досту Макъпуленинъ къатты бир сёз айтмагъаны кеттикче онъа тесир этип башлады. Лякин, Фиданени козю алдына кетирсе, Али-

маннынъ япкъанларыны хатырлай, ичине атеш тюшкен киби ола.

Бааръ акъшамлары... Онынъ тазе, серин авасы адамларны истер-истемез тышкъа тарта. Яшлар киногъа, оюн мейданына топланалар. Ашханенинъ алдындаки мейданда эр кунъ акъшам жанлылыкъ сезиле. Бириси тюкянгъа кире, дигери ашханеге, бириси агъызыны юмругъынен сюртип ракъы будкачыгъындан чыкъа, дигери исе, ич бир ишсиз вакъыт кечирмеге, эгленмеге келе. Лякин кезинмек ве тазе бааръ авасынен нефес алмакъ ичюн, койнинъ янашасындан кечкен Таубасы ёлуна чыкъаджакъсынъ. Ёлнынъ эки тарафы акъкъайын тереклерининъ хош манзарасынен ярашкъан. Кенаргъа чыкъып, тереклер арасына сокъулайым десенъ, тазе ешилликке безенген сонъсыз орман дерьясына комюлип кеткенинъни дуймай къаласынъ.

Айрие чечекли крепдешинден янъы антер тиктирген эди, даа бир ерге кийип чыкъмады. Бугунъ о да кезинмек, аваланмакъ истеди. Антерини кийди. Онъа пек ярашкъан киби корюнди. Сачларыны тарады, омузлары устюне ташлады, бегенмеди. Сонъра башынынъ артына къаталакълап топлады, уджларына худжурлы инелер кечирип пекитти. Фиданеге де айни шу крепдешинден тикильген снъсиз антерчигини кийдирди. Акъшам устю салкъын олур деп, къолуна баланынъ пальточыгъыны ве озюнинъ юнъ шалыны алды. Фидане якъында аякъ устюне татийлеп башлагъан эди. Айрие онынъ къолундан тута. Не къадар яваш адымласа да, бала о якъкъа, бу якъкъа абына, озъ аякъларына озю сюрюне, лякин йыкъылмай, анасынынъ къолуна асылып къала. Ана ве бала бойле алда баягъы вакъыт домбаллап кетеджек олдылар, бир шей чыкъмады. Айрие Фиданени къуджагъына алды. Ашхане янындаки мейдандан кечип, догъру Таубасы ёлуна чыкъты. Ёл темиз. Мында Фидане истегени киби, абынып-сюрюнип юре биле. Йыкъылса да зарар ёкъ. Ёлнынъ устюне кызыл къум текюльген.

Айриенинъ огюнде, ёл бою бир къач яш ве кыыз кезинмектелер. Яшлар яваш-яваш эп узакълашалар. Баягъы кетип козьден гъайып олгъан сонъ, къувалашып акъкъайындар ичине синъип кеттилер. Ёлда дерсинъ адам къалмады. Чокъкъа бармай акъкъайындар арасындан къолларына ешилъ япракълы пытачыкълар алып, дигер яшлар чыкътылар. Олар Айриеге къаршы адымлап кельмек-

телер. Бйраз якъынлагъан сонъ токъталдылар. Бири-бирине нелердир айтып кулюштилер. Кетеджек олалар, лякин аякълары арткъа тарта, кене токъталып, акъкъайынлар бетке козь этелер. Къызларнынъ чувултылары, кулькюлери эшитильсе де, акъкъайынлар арасындан чыкъмайлар. Анълашылгъанына коре, олар огъланларны озьлерине тараф кельгенлерини истейлер. Эм ойле олып чыкъаджагъына къызлар ич де шубеленмейлер. Олар озьлерини сыкъмайып тереклер арасындан де корюне, де козьден гъайып олып кетелер. Ниает сабыры тюкенген огъланлардан бириси къуш киби сесленип акъкъайынлар арасына сокъулды. Онынъ артындан дигер яшлар сызгъыршып дагъ ичине синъип кеттилер. Сеслер тынды. Къызлар къалын кедралар артына сакъландылар. Огъланларнынъ къыдыргъанларыны корьселер де къызлар ымпыс-тымпыс туралар, сеслерини чыкъармайлар. Къайдандыр, огъланларнынъ алдына пуф къуйрукълы бир сансарчыкъ пейда олды. Сансар урkip къачты ве догъру кедра терегине тараф джувурды. Огъланлар онынъ артындан тюштилер. Сансар терекнинъ тюбюнде отургъан къызларнынъ аякълары арасындан кечип, кедрагъа тырмашмагъа башлагъанда къызлар санки аювдан къоркъкъан киби шаматалап башладылар. Чокъкъа бармадан олар зий-чув олып бири-бири артындан ёлгъа джувурышып чыкътылар.

Айрие оларны корьгенинен;

— Биз янъгъыз дегильмиз, къызым, бакъчы къаршыдан татанълар, агъанълар келелер,— деди Фиданени охшап. Фидане анасынынъ лафларыны динълей, къаршыдан ойнашып кельмекте олгъан яшларгъа тикленип бакъа, сонъ бир шейлер айта. Не айткъаны анълашылмай. Айрие кене лаф къоша, оны сёйлендирмек истей кене анълашылмай. Бала тутукълана ве къулакъкъа терс кельген тюрю давушлар чыкъара. Айриенинъ гонъюлю къырыла, кейфи бозула. Бу анъде бир адым биле атлайджагъы кельмей. «Балам зайыфланды» дей о ичинден. «Пельтекленип сёйленеджек. Не япайым экен? Озю де къыз бала. Къыз баланынъ къусуры онынъ бахтсызлыгъы демектир. Айды, сабыр этейим. Экимлерге инанам. Оськен сайың тили ачылып кетер дегенлерине ишанам. Шайлы къызым, бульбуль киби тильчигинъ сёйленедежекми, къызым?»

Къаршыдаки яшлар келип чыкътылар. Фиданени къолларына алып севдилер. Ешилъ акъкъайын пытачыкъларындан гульчембер ясап, онынъ башына кийдирдилер.

Охшадылар, кене севдилер ве шень-шерамет олып озь ёлларына ёнедилер.

Къаршыдан машина корюнди. Айрие къолундан тутып Фиданени кенаргъа чекти. Машина оларнынъ янындан кечер-кечмез ёл четине бурулып токътады. Кабинанынъ къапысыны ачып Мурадасыл тюшти. О, шофернинъ къолуна ёл парасыны туттырды, машина кочип кетти. Мурадасыл Айриеге тараф адымлады. Къолунда кягъыткъа сарувлы бир шей тута.

— Сен манъа пек керек эдинъ, Айрие,— деди о къуванчлы тарзда.

— Керек олсам, медпунктнынъ не ерде экенини зар бильмейсинъ,— деди Айрие онъа джиддий бакъып.

— Мынавы шейни бегенесинъми, Айрие? Ачып коръчи, Макъпулеге алдым. Тезден онынъ догъгъан куню экен. Бир къадын бригадиримиз бар. Бош къолнен бармакъ айып.

— Вай, Мурадасыл, ярамазчыкъ! Къайдан таптынъ бу парчаны?

— Парча дегиль о, бир бутюн антерлик,— деди Мурадасыл Айриени анъламайып.

— Антерлик олгъаныны корем. Бойле материалны кунъдюз фенер якъып къыдырсанъ да тапмазсынъ.

— Къыдырсанъ не тапылмаз?— деди Мурадасыл кулюмсиреп. Яхшы шей дейсинъ э, Айрие? Ойле олса, Макъпулеге айтмай тур. Эглендже акъшамына бир къач кунъ къалгъанда хайырлап озь къолумнен береджегим.

Айрие къуванчындан не дейджегини бильмеди. Мурадасылны башындан аягъына къадар козьлеринен сюзип чыкъты. Сонъра кулюмсиреп:

— Йигит экенсинъ!— деп ташлады.

— Йигит эдик... Йигитлигимиз фронт ёлларында къалды.

— Ничюн я? Мында косътерген унерлеринъ азмы? Эр кеснинъ агъызында сенсинъ. Макъпуле сенинъ адынъны анъмагъандже бир гедже юкъламагъа ятмай...

Фидане ёл кенарындаки къыртышкъа чыкъты. Мурадасыл Айриенинъ балагъа тараф козь эте бергенини эс-леди.

— Юрь, биз де о якъкъа чыкъайыкъ,— деп Айриенинъ тирсегинден тутты.

— Къайтмакъ керек, кеч олды,— деди Айрие къолуны тартып.

— Къайтырсынъ. Санъа дейджек лафым бар. Юрь, Фиданенинъ янына, мынавы къыртышкъа чёкейик аза-чыкъ.

Айрие Фиданеге тараф бурулды. Эрте баарьнинъ тазе отчыкъларынен безенген, йымшакъ къадифе килимни анъдыргъан къыртышнынъ устюнде чубар акъкъайын тереклерининъ пытакълары саркъып турмакъта. Айрие башыны ешилъ пытакъларнынъ арасына сокъты. Кичкене япрачыкъларны янакъларына, козьлерине тийдирип алды, сонъра бир пытачыкъ къопарып ерге отураджакъ олды, отурмады. «Антерим былашыр» деп тюшюнди. Балабан акъкъайыннынъ янына кельди. Онынъ сют киби безъ къабугъыны элинен сыйпады. Къуджакълады ве аркъасыны айланып терекке таянды. Кенардан бакъкъанда пытакълар арасындан Айриенинъ тек аякълары ве антерсининъ этек уджу корюле эди. Устюнде йылтыравукъ антер ярашып тургъан, бу люльбер къадыннынъ тегиз эндалы мучесини акъкъайыннынъ даллары сакълап туралар. Мурадасыл бир топ пытакъ къопарып астына тёшеди ве Айриенинъ эеджанланып тургъан шенъ козьлерине бакъып, шойле деди:

— Айрие, сен манъа йигитсинъ,— дединъ. Мусааде эт, санъа йигитче бир лаф айтмакъ истейим. Сенсиз бир кунъ даа яшап оламайджагъым, Айрие! Сачынъдан тырнагъынъадаже санъа севдам, Айрие! Къурбанынъ олайым, мени ред этме!

Айриенинъ къолундаки пытачыкъ аякъларынынъ устюне тайып тюшти. Тишлеп тургъан япрачыгъы агъызында къалды. Козьлери яшланды, лякин Мурадасылгъа сездирмедди.

— Санъа бир риджам бар,— деди Айрие эфкъарыны ичине сакълап.— Къолунъдаки антерликни бугунъ барып Макъпулеге бер. Догъгъан кунюни сенинъ берген бахшышынънен къаршыласын. Онынъ севгисини, онынъ юрек аизарыны тутып алмагъа кимсенинъ акъкъы ёкътыр. Онынъ бахты, онынъ келеджеги тек сенсинъ, Мурадасыл!

Айрие пытакъларнынъ арасындан башыны эгильтип чыкъты. Фиданени къуджагъына алып, тез адымларнен койге догъру къайтты. Тёпеден бир сюрю къуш акъкъайыннынъ далларына келип къонды. Мурадасыл еринден къыбырмамай отура эди. Къушлар онынъ башы устюнде чивильдешип къалдылар.

Арадан бир афта кечти. Бугунь Макъпуленинъ догъ-
гъан куню. Мефодий Пантелеевич оны эки кунъ иштен
азат этти. Макъпуленинъ эвинде акъшам отурушув ола-
джакъ. Бунъа азырлыкъ корюльмекте. Макъпуле тикиджи-
ден барып, озюнинъ янъы антерини алып кельди.

— Къана, кийчи бакъайым, ярашаджакъмы?— деди
Айрие утюни четке къойып. Макъпуле къуванчле, алель-
аджеле устюндеки урбаларына япышты. Союнды. Чыкъар-
гъан урбаларыны кроватьнынъ башына салындырып
къойды.

— Баштан аякъ янъы киеджегим бугунь,— деди о эе-
джанланып. Янъы антерини кийгенинен кузгю къаршысына
кельди. Белиндеки зынджырчыкыны тартты. Янбашлары-
ны сыйпады.

— Сонъ, насыл?— деп Айриеге айланды.

— Пек уста терзи экен шу къадын. Бирер антер
тиктирдик, экимизнинъки де устюмизге япышып къала.
Хайырлайым, достчыгъым! Мурадасылнынъ бахшышы
санъа ярашмазмы? Къана, чыкъарчы устюнъден, меним-
дже сенинъ лифчигинъ бираз саркъып тура, мен оны
азгъана тарттырайым.

— Озюнъ де модаджыдан бетерсинъ,— деди Макъпу-
ле аркъасыны айланып. Айрие элине макъас ве ине алып,
бираз огърашты.

— Къана, кий энди бакъайым,— деди о ишини бити-
рип.— Коресинъми? Бир саниелик иш. Эки кичкене тую-
мечикнинъ ери авушкъанынен бутюн къияфетинъ денъиш-
ти. Энди, барсын, Мурадасыл даянсын... Бам-башкъа
олдынъ. Яз-къыш устюнъден фуфайканъны ташламайсынъ.
«Атны эт яраштырыр, инсанны урба» дегенлер, унутма!
Айды, ташлан энди, бурюшмесин, акъшам киерсинъ.

Айрие Макъпуленинъ антерини озюнинъ антери янына
илип къойды.

— Эр шейимиз бар. Ялынъыз бир къач къуту консер-
ва керек,— деди Макъпуле Айриеге айланып.

Айрие ашыкъып тюкян бетке чыкъып кетти.

«Макъпуленинъ къуванчы ичине сыгъмай, деп тюшюнди
о кеткенде. Эгер о Мурадасылнынъ манъа айткъанларыны
эшитсе?.. Екъ, джаным, эшитмесин. Бу меним тарафымдан
буюк джинает олур. Биз, Макъпуленен дюнья-ахрет деген-

дай достмыз. Меним гонълюмде Мурадасыл ичюн севгининъ зерреси олмакъ мумкюн дегиль. Мурадасыл яхшы адам. Узун бойлу, кенъ кевдели, сагълам. Табиаты бол адам. Онынъле аятынъны багъласанъ, севмесенъ де, сонъундан озюни севдиреджек адам амма, я Макъпуле? Вай, мен не тюшюнем шу? Кет шейтан, мени чалылар ичине алып къачма! Я Мурадасыл манъа дарылгъан олса, бугунъ акъшам кельмесе? Келир, илле келир. Кельмейджек олса, антерликни меним дегеним киби япмаз эди. О гъалиба меним фикиримни сынап коръмеге истеди. Эгер менден разылыкъ алгъан олса, Макъпуледен уютини бир тамам узер эди. Мен догъру яптым. О бугунъ акъшам Макъпулеге юректен урулыр. Токъта сен, батыр эриф. Биз эки къадын сени абрармыз. Сен илле Макъпулени аладжакъсынъ...»

Мефодий Пантелеевичнинъ боюги эки кунъден берли девлетке пландан арткъач агъач теслим этмекте.

— Бу не демек билесизми достлар?— деди о склада лаф этип тургъан бригадирлернинъ янына келип.

— Билемиз,— деди агъачларны сортларгъа кесип тургъан ишчи.— Бу эм айлыкъ, эм де кварталлыкъ бахшыш!

Бригадирлер кулюштилер.

— Догъру айтасынъ,— деди Мефодий Пантелеевич лафыны девам эттирип.— Бизим теслим эткен бир кунълик агъачымыздан дёрт ханелик йигирми эв къурмакъ мумкюн. Мына бу акъикъатен бахшыш!

Бригадирлернинъ арасында ялынъыз Макъпуле ёкъ эди. О эвинде азырлыкъ коръмекте. Мефодий Пантелеевич ишчи кунюнинъ яхшы ёкюнленмекте олгъаныны корип, саатына бакъты ве Мурадасылнынъ янына барды. Мурадасыл сонъки агъачларны сортларгъа догърамакъта олгъан пычкъыджыгъа ярдым этип тура эди.

— Мен къайтам,— деди Мефодий Пантелеевич Мурадасылгъа бакъып.— Сиз ишнинъ сонъуны текмилленъиз. Акъшам Макъпуледе корюширмиз.

— ~~Огъур~~ ола, Мефодий Пантелеевич,— деди Мурадасыл беллини догъуртып.— Раатсыз олманъыз, ишлер сырасында. Бугунъ кечикмемеге тырышырым!

Мефодий Пантелеевич фуражкасыны козьлерине басып, атына атланды ве койге тараф ёнеп кетти...

Айриенен Макъпуле столны донатмакъталар. Бугунь Юнус да оларгъа ярдым эте. Макъпуле тосат-тосат сааткъа козь ташлай. О юрегининъ дюкюльдегенини озю эшите.

— Мына бу ерде Мефодий Пантелеевич отурыр,— деди Макъпуле.— Онынъ янында Мурадасыл. Бу ерде Антонина Алексеевна...

— Ёкъ * ёкъ,— деди Айрие онынъ сёзюни болип.— Мурадасылнынъ янына сен отураджакъсынъ. Сизинъ къаршыныызгъа Антонина Алексеевнанен экимиз кечип отурырмыз.

— Разым. Бугунь сен не десенъ, разым,— деди Макъпуле къуванчлы козьлеринен Айриеге бакъып.

— Айды, столны ортейик де кийинип азырланайыкъ. Тезден келип башларлар.

Макъпуле ве Айрие янаша одагъа чыкътылар. Кийиндилер. Бир-бирине бакъып севиндилер. Юнус кошедеки эски патефонны къарыштыра. Макъпуленинъ эскиден къалгъан бир дане пластинкасы бар, онынъ да бир тарафы силинген. Дигер тарафы «Дагъдан энди бир къозу». Саатнынъ кичкене акъреби секизге якъынлашты. Макъпуле тарсыкъып башлады. Баягъы вакъыт олды, мусафирлерден даа кимсе корюнмей. Айрие Макъпуленинъ гонълюни ала. Акъылына кельгенини айта бере. Макъпуле оны динълей, лякин къулагъына бир сёзю кирмей. Сыкъ-сыкъ саатке бакъа. Кене тарсыкъа...

— Акъыз, вакъыт кечти де, къайда къалды бу бизим мусафирлер?— деди Макъпуле ниает.

Айрие де раатсызланып башлады. Лякин Макъпулеге сездирмейджек ола.

— Къойчы шу пластинканы динълейик — деди о Юнускъа.— Етер оны къарыштырып тургъанынъ.

Пластинка гъыйчилдап башлады. Онынъ бир сёзю анълашылмай.

— Сиз эгленип турынъыз, мен Антонина Алексеевнанынъ янъы пластинкаларыны барып кетирейим,— деди Юнус.

— Чап, къардашым, озюни де алып келирсинъ, о да кечке къалды, эсли къадын. Мен демиден берли онъа кетеджек олып тура эдим. Макъпулени янъгъыз къалдырмагъа истемедим,— деди Айрие.

Юнус чыктып кетти. Медпуктнынь алдында бир сюрю адам тура. Оларнынъ эеджанлы лакъырдысы Юнуснынъ къулагъына илишти. «Антонина Алексеевна етишкейди баре» дей бириси. Юнус дикъкъатнен динълей, ляки къарышыкъ лакъырдыларнынъ фаркъына бармай.

Юнус адамларгъа якъын кельди.

— Эгер ольсе, ишлер масал,— дей Зера.— Бахшышны бермезлер.

— Эчки джан дердинде, акъыз, сен де амма лаф тапкъансынъ бу арада,— деп онъа тикленип бакъты дигер къадын.

— Куннинъ сонъунда онъа деянкалар ичинде айланып юрмек не керек?— деди Зера сесини котерип.— Юре-юре, коресинъми анавы пычкъыджы Бельскийнинъ тереги тюбюне баргъан да кирген.

— Ким о?— деди Юнус абдырап.

— Мурадасыл!— дедилер янындаки адамлар.

Юнуснынъ юреги еринден кочип кеткен киби олды. Шу ан меселени анълады. «Демек, Антонина Алексеевна, Мефодий Пантелеевич, эписи аджеле ярдымгъа, дагъгъа кеткенлер... деп тюшюнди о. Макъпуленинъ бир шейден хабери ёкъ. Барып бильдирейим оларгъа».

Макъпуле Юнуснынъ чырайыны корьгенинен отургъан еринден къуршун киби атылып турды.

— Не олды санъа, тез айт!— деди о абдырап.

— Дагъда къаза олгъан. Эр кес анда... Антонина Алексеевна да... Мурадасыл къазалангъан.

— Аتكъа чап!— Макъпуле урбаларыны авуштырмагъа башлады.

Чокъкъа бармай Юнус эки ат эгерлеп кетирди. Макъпуле ве Юнус тоз чанъгъытып, орман болюгининъ юксек чамлары арасына синъип кеттилер...

Омюр, пек аджайип олгъаны киби ве пек де муреккеп-тир. Инсан джан котере дегенлери догъру экен. Яшайышта эр шей керек. Не къадар чапып-чапкъалама, эп бир джанынъ къыл уджунда тура. Бир кунъ узюлип кеткенини дуймай къаласынъ. Хавфсызлыкъ техникасы комиссиясынынъ къарарына коре, пычкъыджынынъ къабааты ёкъ экен. Мурадасыл насылдыр бир ишнен «юрмек ясакъ, терек кесиле!» деген ёлакъкъа кирген. Бельский оны корьмеген. Йыкъылгъан терек де догърудан-догъру онынъ устюне тюшмеген. Мурадасыл шу огъурсыз терекнинъ учьбучукъ метр кенарында урулгъан. Терекнинъ узунлыгъы йигирми

бир метр. Тюбюнден къалынлыгъы къыркъ эки сантиметр. Терек сыкъ орман ичинде шувулдап авдарылгъанда Мурадасыл четке къачкъан. Билек къалынлыгъында бир акъкъайын фиданы терекнинъ кучлю тазйыгъындан четке майышып Мурадасылнынъ энъсесинден ургъан. Антонина Алексеевна кельгенде о даа сагъ экен. Аджеле ярдымдан сонъ машинагъа къойып Таубасыгъа алып кетелер. Лякин барып етишмей, ёлда сонъ эманетини бере...

Раатлыкъ куню эр вакъыт байрам киби ола тургъан эди. Амма, эр вакъыт ойле олмай экен... Бугунъ Отуз докъузынджы болюкте матем куню. Мурадасылнынъ джеседини Таубасыдан алып кельдилер. Дженазеге чыкъмагъан адам къалмады. Чамлыкътан «Леспромхоз»нынъ директоры, совхоздан Къурбанбеков кельдилер.

Нурмамбет къартчыкъ сакъалыны къыбырдатып адет боюнджа озъ вазифесини эда этмекте. Халкъ табутны сарып алды.

— Эй, джемаат муслими! Бу адамны недай билесинъиз?

— Пек яхшы!— деп джевапланды халкъ.

— Якъын тувгъанларындан ким бар, мынякъкъа чыкъсын,— деди Нурмамбет къарт.

Кимсе чыкъмады.

— Якъын достларындан ким бар, чыкъынъыз!— деди къарт текрар.

Джемаат арасындан къолунда козьяшындан джибинген пошусыны тутып Макъпуле чыкъты. Онынъ артындан Айрие, Юнус ве бир къач адам даа чыкътылар.

— Болды!— деди Нурмамбет акъай.

— Бу мевтанынъ фани дюньяда борджы болса, одемекни ким устюне ала?— деди оларгъа бакъып.

— Мен!— деди Макъпуле козълерини сюртип. Сонъра табутны еринден котердилер.

— Алла рамет эйлесин дегене, акъ рамет эйлесин!..

Ёл толусы халкъ мевтанынъ артындан гурюльдешип кетти.

Къабирни Таубасы ёлунынъ кенарында, Мурадасылнынъ даа бир къач кунъ эвельси отургъан акъкъайын терегининъ янындаки къыртышта къаздылар.

Отуз докъузынджы болюкнинъ ёлбашчысы, Мефодий Пантелеевич, партком, «Леспромхознынъ» директоры, Къурбанбеков ве дигер аркъадашлар къабир башына кельдилер. Директор козлюгини къолуна алып, шойле деди:

— Бугунъ арамыздан энъ яхшы, энъ ишкир, энъ на-
муслы адамны сонъки ёлгъа озгъарамыз. Достларынь се-
нинъ яхшы ишлеринъни унутмазлар, Мурадасыл! Яткъан
топрагъынъ йымшакъ олсун, эльвида!..

Сонъра Къурбанбеков сёйледі:

— Мурадасыл! Сен совхозымызгъа биринджи келип,
онынь темель ташыны къойгъанлардан эдинъ. Агъач ке-
рек олгъанда, бу муим ишке кетмеге башта сен разылыкъ
бердинъ. Сени тезден озъ совхозымызгъа беклей эдик.
Сенинь аркъадашларынь къайтыр, сенинь башлагъан
ишинъни намуснен девам эттирирлер. Бу орманда сенинь
ве дигер ишчилернинъ къолунен пычылгъан агъачлардан
совхозымызда къурулгъан эвлерде яшар, тютюн аранла-
рында чалышыр ве сени эр вакъыт анъарлар, эльвида!..

Дюнъяда нелер олмай? Атта энъ якъын достынъа
айтылмайджакъ сырлар ола экен. Айрие бу ерде окюрип
агълайджакъ амма, достынынъ хатири ичюн озюни тута,
ичтен агълай, ичтен яна... «Барсын Макъпуле, Мурадасыл
ичюн къальбинде туткъан буллур киби темиз севгисинен
яшасын. Онынъ сымасыны, муляйим табиятыны юреги-
нинъ терен кошесинде сакъласын».

Айрие бу тюшюнджелернен Макъпулени эвине къадар
озгъарып кельди. Антонина Алексеевна да кечке къадар
оларнынъ янындан айрылмады.

Кунълер тез келип кечелер. Мурадасылнынъ къабири
устюнде тазе отлар ешердилер. Айрие эмширелер курсы-
ны битирди. Антонина Алексеевна къартлыкъ пенсиясына
чыкъты. Орман болюгинде кене шу иш, кене шу агъачлар,
кене шу адамлар. Тек Мурадасыл ёкъ. Макъпулеге онынъ
фаджиалы олюми пек буюк тесир къалдырды.

— Дагълар манъа кийиклешип къалгъан киби олды,
Айрие,— дей о.— Анги делянкагъа кирсем, тереклер ко-
зюме санки Мурадасыл олып корюнелер. Кимерде дагъ
ичинде юрьмеге аягъым бармай. Дерсинъ, къаршыма Му-
радасыл келип чыкъаджакъ. Дюнъягъа козюм ёкъ, Айрие!
Эр шейден тунъюльдим. Чареси олса, алып башымны
козюм корьмеген ерлерге чыккып кетер эдим.

— Вай, Макъпуле сен орман ишинде пек козьдесинъ
де я? Сени мындан йиберирлерми, акъыз? О къадар
озюньни таныткъан сонъ, орман ишинден къачты демез-
лерми?

— Мен иштен бир вакъыт къачмадым, эм къачмам. Иштен къоркъкъанлардан дегилем. Иш менден къоркъсын. Шимди агъыр вакъыт Айрие. Дженктен сонъ анги саада чалышсанъ чалыш, эр ерде ишчи кьоу керек. Истер терек йыкъ, истер экин эк, истер чобанлыкъ эт... Эписи керек. Тек чалышкъан еринъде файда кетир, намуслы эмегинънен умумхалкъ ишине озъ иссенъни кьош. Мен мында озъ истегимнен кельдим. Вазифемни арткъачынен эда эттим беллейим. Энди истесем къалыр, истесем къайта билем совхозгъа. Лякин меселе тек истекке багълы дегиль, Айрие. Не ерде зияде файда кетиреджек олсанъ, о ерде чалышмалысынъ.

— Сен къайда кетсенъ, мен де анда, Макъпуле. Артынъдан къалмам. Истесенъ ярын барып анавы совхоздан кельген вербовщикке язылайым.

— О ялынъыз тютюнджилик ишинден анълагъанларны яза экен, эмиш.

— Тамам яхшы, мен кой хызметини пек севем.

— Эльбет де тютюнде биз чокъ файда кетире билемиз. Къальби темиз адам башта буны козьде тутмакъ керек. Девлет ойле адамларгъа эр вакъыт кьоу узата. Юнуснынъ айткъанына коре, Чамлыкъта ишчилерден язылгъанлар бар экен. Совхоздан келип чалышкъанларнынъ муддети толды. Олар тезден къайтаджакълар. Биз де оларгъа кьошулур кетермиз...

— Эльбет де Макъпуле, кой хозяйствосы ишинде о совхознынъ муим эмиети олмаса, та андан махсус адам келип ишчи кьоу къыдырыр эдими?— деди Айрие.

— Озюни дагъда коьтерген, тютюнде де коьтерир.

Эм арткъачынен. Шубесиз, биз анда керек адамлармыз, Айрие,— деди Макъпуле. Сонъра бироз тютюнди ве:

— Айрие, тувгъаным, меним ишим сыкълет экенини озюнь билесинъ. Вакътым ёкъ. Ярын дрезинагъа мин де, Чамлыкъкъа барып, совхоз векилинден сорап кель. Онъа коре иш тутармыз.

— Дрезинагъа? Алла сакъласын омюрюмде бир даа минмем.

— Айса, Юнусны йиберейик.

Юнускъа да, Айриеге де Чамлыкъкъа кетмеге сыра кельмеди. Бир къач кунъден сонъ, Алсабадан кельген векиль Отуз докъузынджы болюкнинъ конторасында адамларны къабул этип башлады.

Катерина Мануйловна шеэрге къатнавыны кеттикче сыкълаштырды. Оны нелердир къыйнай, эзиетлей. Чокътан берли алышып къалгъан шаматалы шеэр яшайышындан сувунып оламай. Дерсинъ ичеги шеэрде багълы къалгъан

Совхоз посёлкасы кунъ-кунъден осе ве абаданлаша. Ишчилерге ве хусусан яшларгъа раатлыкъ вакъытларыны шенъ кечирмек ичюн акъшамлары кино косътерилип башлады. Меркезий сокъакъта хастахане ачылды, тюкян ве балалар багъчасы къурулып битти. Биринджи тютюнни къабул этмек ве ишлемек ичюн аран, тютюн къурутув ханеси япылды. Къуруджылыкъ иши къызгъын девам эте, сокъакъларны ве объектлерни электрик лампочкалары айдынлатмакъталар.

Совхознынъ этрафындаки такъыр топракълар инсан къолунынъ кучюнден ем-ешилъ олдылар. Мында ишчилер ялынъыз тютюн сачмакънен кифаетленмей, озъ ихтияджларыны темин этмек ичюн себзеджилик бригадасы да тешкиль эттилер. Кимсе язлыкъ себзе, къартоп ве бостан алмакъ ичюн шеэрге я да базаргъа кетмей. Эр шей озълеринде етише.

Я юксек дагъларгъа янтайып кеткен ешилъ къадифе киби къырларны айтмайсынъмы? Бири-бири артындан къуралып кеткен бу джаплар къыш кельгенге къадар ешерип туралар. Язда кунешнинъ атешли шавлелеринден къызгъан аваны тосат-тосат сагъанакълап кельген ягъмурлар салкъынлата. Шунынъ ичюн къырлар даима ешерип, даима тазелик къокъусы сачып туралар. Бу ерде темель къурып яшамагъа кельгенлернинъ энди озъ маллары бар. Совхозда негиз къойылып башлангъанынен бирге мал фермасы да тешкилятландырылды. Булар эписи аз бир вакъыт ичинде ишчилернинъ исрарлы эмеги саесинде мейдангъа кетирильдн.

Каштановнынъ баш къашымагъа вакъыты ёкъ. Кимерде-бир раатлыкъ куню келип-кечкенини дуймай къала. Чокъусы раатлыкъ кунълерини иш башында кечире. Катерина Мануйловна исе, раатлыкъ куню кельдими, шеэрге кетмекни, я да къырларда кезинмекни теклиф эте. Лякин, Каштанов эр кересинде онъа ёлдаш оламай.

— Вакъытым ёкъ, кет озюнь,— деп ташлай о Катерина зорлап башласа.

Бугунь де шай олды. Афтанынъ ортасы эди. Катерина Мануйловна мытлакъ Алма-Атагъа барып Валерийнинъ анасынен корюшмеге ве оларнынъ илеридеки тюшондже-лерини бильмек истеди.

— Шу балагъа пек алышып къалдым, Андрей. О пек мулайым, пек табиятлы бир яш. Эвде дерслерини япкъан сонъ меним эр ишиме ярдым эте. Савут-сабаны кыыз бала киби джувуп ерине кыоя.— Бу йыл институткъа кирип олмасам, окъувгъа крест кыоям. Сизинъ совхозгъа барып тракторгъа минем, тетя Катя,— дей.— Шу баланынъ такъдири мени гъает раатсызлай,— деди Катерина чырайыны мулайымлештирип.

— Мен онынъ «архитектор оладжакъым» деп кестирип айткъаныны бегендим. Сен, эльбетте онъа баягъы эмек кыойдынъ. Бар, ярдым эт, рухтан тюшмесин,— деди Каштанов Катеринанынъ ялварыджы сёзлерини динълеген сонъ.— Мен сени район меркезине къадар озгъарайым, бугунъ анда мушаверемиз бар.

Катерина Мануйловна озъ кыуванчыны ичине сакълап тез-тез джыйышынды ве Каштановнен берабер машинагъа минип ёлгъа чыкътылар. Каштанов район меркезинде тюшип къалды.

Мушавере чокъ девам этмеди. Ярым йыллыкънынъ екюнлери ве базы-бир хозяйстволарнынъ агъымдаки ишлери акъкъында сёз кетти. Каштанов тютюннинъ яхшы япракълагъаныны ве ильк берекетни топлап алмакъ ичюн, корюльмекте олгъан азырлыкъны кыскъадан айтты. Мушавере биткенинен аркъадашлар эписи машиналарына минип, тараф-тараф олып кеттилер. Каштановнынъ машинасы ёкъ. Саатине бакъты. Молдабайнынъ не вакъыт кыайтып келеджеги бельгисиз. Совхоз ёлуна чыкъты. Чакъыл юкю самосвал келе эди. Кыолуны котерди ве минип кетти.

Раатлыкъ куню саба Каштанов кене вакътыны шашырмай уянды. Юкълайджакъ олып не къадар тырышса да, юкълап қламады. Катерина шеэрде. Бираз тюшюнип ятты. Козю огюне бутюн кыуруджылыкъ объектлерини, янъы темели кыойылып башлагъан эвлерни, тютюн аранларыны, Матвей Петровични, Молдабайны ве ниает Катеринаны кетирди. Турды. Софагъа чыкып кыолларыны о якъ, бу якъ саллады. Белини йымшатты. Керильди, бир кыач кере терен нефес алды. Сонъра бетини ювып ашханеге кирди. Чай кыайнатаджакъ олды. Собаны тутандыр-

мады. Эринди. Къайтып кене софагъа чыкъты. Ава яхшы. Кунеш дагълар артындан алтын нурларыны сачмакъта. Кокте къушлар чивильдешелер. Багъласалар эвде отурыладжакъ вакъыт дегиль. Яз авасы адамны тышкъа тарта.

Молдабай да раатлыкъ куню олгъанына бакъмай вакъытында кельди. Машинаны къапынынъ алдына янаштырып токътатты. Ичери кирмеди. Софада Каштановны корип, къолуны саллап селямлашты. Сонъра элине чул алып, машинанынъ джамыны, капотларыны сюртти. Кене софагъа козь этти. Энди Каштанов ёкъ эди. Машинанынъ къапыларыны ачты, отургъычларнынъ устюни, астыны темизлемеге башлады.

Каштанов кишилик, темиз урба кийинип чыкъты.

— Азырсынъмы?— деди Молдабайгъа.

— Къолларымны сюртсем, азыр оладжагъым,— деди Молдабай ве козьлери къысылып кетти.

Онынъ кулюмсирегенини тек бундан танымакъ мумкюн.

Каштанов озюнинъ эр вакъыт отурып алышкъан ерине акъырындан ерлешти.

— Истесенъиз арткъа отурынъ, урбанъыз былашмаз,— деди Молдабай.

— Темизлик севген шофернинъ янында бир вакъыт урба былашмаз. Айдай бер, бугунъ кезинемиз Молдабай, нерваларны бир язып келейик,— деди Каштанов котеринки рухнен.

— Устюнъиздеки урба да шуны косътерип тура! Къайсы якъкъа, къыргъамы? Ёкъса тузлу-гольгеми?

— Радикулиттен шимдилик зорым ёкъ,— деди Каштанов кулюмсиреп.— Айда, шеэрге!

— Шеэрге дегиль, Катерина апагъа!— деп догъуртты Молдабай.

— Эбет, оны да алып къайтырмыз.

Кунеш Алма-Ата сокъакъларынынъ асфальтини ири-теджек дереджеде къыздырмакъта эди. Шеэрде адам къа-лабалыгъы аксильген киби корюне. Дерсинъ эр кес сыджакътач сакълангъан. «Ыссыкъ-куль» ёлунда таксилер вызыр-вызыр къатнашмакъталар. Адамларгъа раатлыкъ керек, гольге ашыкъалар. Таксиджилер исе, бойле кунни къыдырып тапамайлар.

Молдабай машинаны озюнинъ кене шу таныш азбарына кирсетип токътатты. Бу Каштановнынъ шеэрдеки эвининъ азбары эди. Молдабай эвге кирмеге истемеди,

кьолуна кене чул алып, машинанынъ тозуны сюртмеге башлады.

Каштанов мердивенлерден юкъары котерильди. Къапысынынъ алдына келип, чанънынъ дѣгмесине басты. Бираз турды, кене чынъылдатты. Ичериде кимсе ёкъ. Кене дѣгмеге пармагъыны басып, бираз чокъча тутты. Динъленди, ичериден сес-солукъ эшитильмеди. Къайтып, яваш-яваш мердивенлерден ашагъы энди.

Молдабай машинанынъ джамыны энди йылтыратып кьойгъан эди.

— Къана, Катерина апа?— деди о Каштановнынъ кейфи бозулгъаныны эслеп.

— Айда «Ыссыкъ»къа Молдабай! Ёкъса биз башкъалары киби ялдамагъа бильмеймизми?

— О-о... Мен сув астындан балыкъ тута тургъаным,— деди Молдабай къуванып.— Бизим топракъта яшап да, «Ыссыкъ»къа барып кейф чатмагъаннынъ я мында ёкъ, я мында — деп башта башыны, сонъра джеб-бини тюртип косътерди.

Каштанов кульди. «Бир шофер таптым амма, чек яздырып сымарлагъан олсам, бойле сою расткельмез эди», деп тюшюнди.

Ыссыкъ-кульде адамдан ине ташламагъа ер ёкъ. Акъикъатен шеэрде кимсе къалмагъанмы, не? Эр кес баласы-чагъасынен мында. Гольнинъ ялысындаки къумлыкъта бетине газета ортып яткъанны истейсинъми, зонтик тюбюне башыны тыкъып созулгъанны истейсинъми, я да къум тюбюне кокюсине къадар комюлип зевкълангъанны истейсинъми, эр тюрлюсини коръмек мумкюн. Мында мемлекетимизнинъ чешит кошелериндеки фирмаларда тикильген ювунув костюмлерини расткетиресинъ. Машинанен кельгенлер гольнинъ дживарларындаки чименликте чадырлар къургъанлар. Бу алан-алан оськен дюльбер орманчыкъта къурулып кеткен «Чадырлар шеэрининъ» сонъу ёкъ. Пек чокъ аилелер бала-чагъасынен бирликте отпускасыны мында кечирмеге кельгенлер. Чадырларнынъ алдында язлыкъ оджакълар, асма къазанлар, къазанаякълар, букленильген алюмин кроватьлар ве дигер чанакъ-чельмеклер тура.

Молдабай машинаны пляждан узакъча бир чименлик ичинде токътатты. Андрей Андреевичнен берабер союнып, урбаларыны машинада къалдырды ве къапысыны пекиттилер. Экиси бири-бири артындан ачкосьленип сув-

гъа атылдылар. Ялыда, сай ерде ойнашкъан яш балаларнынъ шаматасындан къулакъ тына, кимсе-кимсени танымай. Къаршынъа келип уруналар, астынъдан-устюнъден ялдап кечелер, бунъа эмиет берген олмай. Эр кес озъ зсвкъы, озъ кейфинен мешкъуль. Моторлы ве курекли къайыкъларда адамлар гольнинъ бир башындан дигер башына къадар ялдап зсвкъланалар.

Каштанов ве Молдабай баягъы ювундылар. Сувдан чыкъаджакълары кельмесе де, бираз раатланмакъ ичюн машинанынъ янына келип къумгъа яттылар.

— Молдабай, биз бир янълышлыкъ яптыкъ. Ашыкътыкъ. Ашамагъа бир шей алмадыкъ,— деди Каштанов.

— Зарар ёкъ, Андрей Андреевич! Къасеветленменъиз. Не истесенъиз тапарым. Мында эписи бар. Ялынъыз «бешбармакъ» ышандырмайым,— деп кульди Молдабай.

— Устюнъ саркъкъан сонъ, барып бир шейлер бакъып кель. Кеч олса эписинден къуру къалырмыз. Бу къадар джангъа аш-сув етеми?

Молдабай деръал турып кетти. Устуне япышып къалгъан къумны биле темизлемеди. Каштанов аркъасыны кунешке чевирип ятты ве бираздан юкъусырап башлады. Чокъкъа бармай чапып, талагъы къатып, Молдабай кельди. Къолунда дёрт шише жигули пивосы.

— Андрей Андреевич!— деди о нефесини зорнен тыйып.— Катерина апаны коръдим. Валерийнен экиси къумда яталар. Янларында бир де эслидже къадын бар.

— Узакъталармы?— деди Каштанов яткъан еринден.

— Пиво будкасына якъынлар. Барып чагъырайыммы?

Андрей Андреевич индемеди. Молдабай къолундаки шишелеринен аякъ устюнде къалды.

— Ач бир данесини, не шашып къалдынъ?— деди Каштанов онынъ аякъ устюнде тургъаныны эслеп.

Молдабай эки шишенинъ тенеке къапачыкъларыны бири-бирине илштирип, бир кереден тартты, экиси де пышылдап ачылдылар. Тенеке къапачыкълар къумгъа атылып кеттилер.

Каштанов бир котергенде пивонынъ ярысыны ичип, шишени къумгъа отуртып къойды.

— Сени коръмедилерми?— деди о кекирген сонъ.

— Эслемеселер керек.

-- Кедер этме, раатлансынлар,— деди Каштанов ве кене юзю-къоюн айланып ятты. Молдабай бираз даа аякъ устюнде турды ве сонъки эки шише пивоны чименликнинъ

салкынына ерлештирип, озю адамлар ичинде джоюлып кетти.

Андрей Андреевич башы ве омузлары устуне газета ташлап, юкъусырап башлады. Молдабай бутюн пляжны айланып чыкты. Эки балабан тазе пите, къавурылгъан эт, эки шише алма шырасы, минераль сув, къазах янтыгъы ве даа бир чокъ шей джыйыштырып кельди. Андрей Андреевични татлы юкъуда беллеп, индемей бираз нефес ала ве кене адамлар арасында джойылып кете.

Кунешнинъ атешли зиялары эксилеп башлады. Чименликтен серин ельчик ойнай, ава бираз енгиллешти, салкын тюшкен киби олды. Сыджакъта ювунып ёрулгъан тенлерге тендюристлик кельди. Куннинъ сонъу якъындагъанындан адамлар истемей-истемей кийине ве автобус тарафкъа адымлайлар. Биревлер исе, аля даа башыны котермей къумда яталар. Дигерлери сувны ве серин аваны ташлап къайтмагъа къыймайлар...

Андрей Андреевич терлеп уянды. Молдабайнынъ кетирип къойгъан питесинден къопарып къапты. Манълайынынъ тери сувугъан сонъ, кене ялдамагъа кетти. О сувгъа далар-далмаз, машина янында Молдабай пейда олды. Каштанов сувнынъ темиз еринде чайкъанып чыкты.

— Сувгъа тюшип чыккъан сайын мадденъ ачыла, ашайджагъынъ келе,— деди о. Сонъра Молдабайнынъ узаткъан кемикли эт парчасыны алып, кемирмеге башлады.

— Къайттылармы?— деди Каштанов.

— Андрей Андреевич, оларнынъ чадыры бар. Бизден баягъы узакъта, чименликнинъ юкъары бетинде.

— Янълышмайсынъмы?

— Мен омюримде бир кере янълыштым, о да анамнынъ къарнында экенде,— деп кульди Молдабай.

Андрей Андреевич Молдабайнынъ бойле дегенине ве кульгенине бакъып къалды, лякин индемедди. Онынъ юргенини бир шейлер раатсызлап башлады.

Акъшам салкыны тюшти. Пляжда адамлар сийреклештилер. Лякин, «Чадырлар шеэрчигинде» буюк арекетченлик корюне. Биревлер оджакъларыны тутандыра, биревлер къазан аса, чай къайнаталар. Катеринанынъ чадыры чешит ренкли ресимлер чызылгъан, чубар брезенттен эди. Молдабай чадырларнынъ этрафында айланып юрген ве раатланмакъта олгъан адамлар арасына къарышып, онъайтлы бир ерге ерлешти. Чубар брезентли чадыр

онынъ козю алдындан таш атсанъ барып етеджек къадар месафедѣ тура. Молдабайнынъ бутюн дикъкъаты шунда.

Ерге къаранлыкъ чѣкти. Пляжда экишер-экишер олып, анда-мында ялынъыз яшлар отурып къалдылар. Чадырларнынъ алдындаки кичкене оджакъларда талгъын алевлер липильдей. Къумлыкъ тарафтан Катеринанынъ лафы эшитильди. Молдабай башыны котерди. Катерина, омузлары устуне ташлагъан халатынен чадыргъа келип сокъулды. Валерий чадырнынъ алдында токъталып, оджакъкъа одун ташлады ве сiledжек алып чадыргъа кирди. Шу арада чадырдан эслидже къадын чыкъып, къазанны къарыштырмагъа башлады.

Молдабай еринден атылып турды ве догъру Андрей Андреевичке чапты. Арадан чокъ кечмеди. Каштанов ве Молдабай чадырнынъ янына кельдилер. Каштанов оджакъ башындаки къадынгъа эмиет бермеди. Ичериден Катеринанынъ кулъкюси эшитильди. Молдабай Каштановны къалдырып, озю машинагъа къайтты. Бир къач сание орталыкъны сукюнет къаплады. Каштанов бираз даа сабыр этти. Онынъ къулагъына анълашылмагъан лакъырдылар келе. Чадырнынъ ерге тарттырылып пекитильген ипинден тутты. Огге таба юрди. Къапыгъа эки адым къалды.

— Валерик, тартчы купальнигимнинъ зынджырчыгъыны, къолум етмей,— деди Катерина ичериден.

Каштанов артына айланды. Кенъ адымларнен къумгъа баса берип, кери къайтты.

— Кийин, Молдабай, кеттик!— деди о машинадан урбаларыны чыкъарып. Молдабай онынъ ачувлы экенини корип, индемени.

Ёл узакъ олса да, гедже къайтмагъа сыра кельди. Саба иште олмакъ керек эди.

V

Тютюнлер кемалына кельдилер. Арслановнынъ бригадасы янъы кельген адамлар эсабына эп текмилленмекте. Тютюн къырмагъа башлагъан сонъ, аранда иш чокълашаджакъ. Тютюнни теменлерге тизмек, йиплерге бошатмакъ, къурутмакъ киби бир сыра къол туткъан ишлерде даима чалышып турмакъ ичюн, мытлакъа, къолу ярашыкъ сабырлы, чыдамлы адамлар керек. Бойле адамларны Арс-

ланов озю тапа ве тютюн бригадасына чагъыра. Адетиндже, къадынлар тютюнни нек тез къыралар ве нек уста тизселер. Лякин, эр эки иште де, илле акъай къолу олмакъ керек. Тарлада къырылгъан тютюнни ташымагъа, юклемеге, аранда бошатмагъа, къурутмагъа, араннынъ тѣпесине чыкъарып ильмеге ве саире ишлернинъ эписине акъай къолу керек. Арсланов буларны ольчеди, бичти ве эр кѣснинъ япа биледжек иши башына ерлештирди.

— Мен бойле тюшюнем,— деди Арсланов директорнынъ кабинетинде,— тютюннинъ кейфиетини сакъламакъ ичюн, япракъларыны солмаздан эвель къырып, сепетлерге толдурмакъ керекмиз. Шунынъ ичюн тютюн къырыджылар тарлагъа танъда чыкъып, къушлыкъ маали кунъ къыздырып башлагъан сонъ, эвге къайгып раатлансынлар. Акъшам устю арангъа келип, япкъан ишлерининъ нетиджесини корьген сонъ, салкъын тюшкенинен кене тарлагъа чыкъсынлар. Бойлеликле, къырыджынынъ ишчи куню экиге болюне: акъшам ве сабагъа. Аранда чалышкъанлар исе, бутюн кунъ иш башындалар.

— Не дейсиз, Еремеев аркъадаш?— деди директор баш агрономгъа.

— Шимди бутюн ишлер къолнен аль олуна. Адамларгъа тютюн сепетлерини котермек, юклемек меселелери агъырлыкъ догъурмамасы ичюн менимдже экишер-учер адамлыкъ кичкене звенолар тешкиль этсек яхшы олур,— деди Еремеев.

— Звеноджылыкъкъа мен къаршы дегилим,— деди Арсланов.— Лякин адамлар биринджи кунълери озьлерининъ къуветини ольчеп бакъмакъ истейлер.— Ким не къадар къыра? Ким не къадар тизер?— деген къызгъын лакъырдылар кете. Шунынъ ичюн, меним фикиримдже биринджи кунълери оларнынъ шахсий ынтылышларына тиймейик. Бири-бирлеринен истегенлери киби ярышлашсынлар.

— Мен къаршы дегилим. Шимдилик шу усулнен башланъыз. Илериде корермиз,— деди Каштанов. Сонъра къолуны кокюсине къойды. Ничюндир, бир кереден чырайы сытылды. Яры гедже якъын эди. Кабинетининъ диварында «тютюн ичильмесин» деген илян язылы турса да, кирген адамнынъ агъызындан папиросыны насыл тартып аладжакъсынъ? Каштановкъа тютюн ичмеге олмай. Лякин, кабинет ичинде савурылгъан думанны бутюн кунъ къокълап отурсанъ, тютюн ичкенден бетер олып къала-

сынъ. Буны кимге айтып анълатаджакъсынъ? Каштанов ойле киббарлардан дегиль. О еринден тураджакъ олды. Салланды ве кене скемлеге отурды. Къолуны кокюсинден алмай. Ынъранып башлады. Еремеев якъын келип, къолтугъына кирди. Еринден котерильгенде такъатсызлангъан боюны устюнде башыны туталмады. О якъ, бу якъ салланмагъа ве зияде ынъранмагъа башлады. Еремеев ве Арсланов ярдымлашып, оны дивангъа ерлештирдилер. Яталмай. Озюни анда-мында ташлай, юварлана, бармагъа ер тапмай. Арсланов идаренинъ алдына чапып чыкъты. Молдабай руль башында юкъусырап турмакъта эди. Аман онынъ омузындан къакъытты.

— Етиш медпункткъа! Андрей Андреевич ярамай!

Молдабай, даа якъында чалышып башлагъан совхоз медпунктынынъ къапысыны къаба-къаба тыкъырматып ичери сокъулды. Стол башында ялынъыз невбетчи къадын отура. Эким ёкъ. О район меркезинде яшай.

— Ярдым керек! Аджеле ярдым! Директор агъыр алда.

Невбетчи къадын пенджере ичинде къайнап тургъан иприц къутучыгъына япышты, сонъра къолуна кичкене ящикни алып, машинагъа чапты.

Директорнынъ кабинетине кирер-кирмез:— Форточканы ачынъыз!— деди къадын ве Каштановнынъ къолуны алып набызыны динъледи.

— Не еринъиз агъыра?— деген манада хастагъа бакъты.

Каштанов къолуны кокюси устюне къойды.

— Озюнъизни сербест тутынъ. Агъырынъызны токътатырым,— деди о ящигини къарыштырып. Сонъра эки ампула чыкъарып, адамларнынъ козю огюнде укол ялты. Скемлени диван янына тартып, Каштановнынъ бетине бакъып отурды. Бираз вакъыт кечер-кечмез Андрей Андреевичнинъ ынърануву сакинлеп башлады. Терледи. Къадын, къолундаки памукъ парчасынен онынъ манълайыны сюртти. Приступнынъ зорундан вуджуды зайыфласа керек, аякълары, къоллары йиберильди, ынърануву токътады. Яваштан козюни ачты. Башы уджунда отургъан без халатлы яш къадынны эследи.

— Танымайым сизни,— деди директор такъатсыз дудакъларыны зорнен къыбырдатып.

— Лаф этменъиз, раатланынъыз,— деди къадын.— Даа якъында кельдик. Биз чокъмыз, сиз бир данесиз, эр кесни танымакъ къыйын.

— Сизни бир корьген, бир даа унутмаз. Адынъыз не?— деди директор текрар.

— Айрие.

— Ай-ри-е?! Эшитмеген эдим. Чокъ гузель адлар бар сизде,— деп аякъ устюнде турмакъта олгъан Арслановкъа сёнюк козьлерини гикти.

— Саат бирни кече,— деди Айрие аякъкъа турып.— Багъышланъыз, меним хасталарым бар. Сизни эвге алып кетсинлер, ятынъ, раатланынъ. Саба мытлакъа экимге корюнмек керексиз.

Бу гедже Катерина Мануйловнанынъ эвде олмагъаны Каштановкъа зияде тесир этти. Сонъки эки ай ичинде Катеринанынъ ишлери эп терсине кетти.

Валерий имтианларда йыкъылып, институткъа киралмагъан сонъ, козь алдындан гъайып олды. Онынъ шеэрде олмагъаны белли. Табиаты тутарлы бала, атта, анасына бир мектюп язмай. Анасы хастаджан бир къадынъ. Къасеветлене. Шунынъ ичюн Катерина шеэрге кеткен эди.

Андрей Андреевич дердининъ не экенини яхшы биле. Нефес тарлыгъы оны госпитальден чыкъкъанындан берли къыйнай. Катерина онъа керек иляджларны эвден эксик этмей. Озюнинъ аптекасында не керек олса эписи тапыла. Медпункт даа якъында ачылды. Медицина персоналынен темин этильмеди. Райздрав тарафындан таин этильген эким район меркезинде яшай. Айриенинъ эмшире оларакъ чалышып башлагъаны бир къач кунъ олды. Андрей Андреевич онынъ биринджи пациэнти эди.

Каштанов Валерийнинъ шеэрден кеткенини анълагъан сонъ, Катерина акъкъында тюшюнджелерини бир тамам денъиштирди. О, Катерина Мануйловнанынъ шеэрден узюлип оламагъаныны Валериктен коре эди. «Мен янъыла экеним, деди Каштанов яткъан еринден. Акъсыз ерде озь-озюмни эзиетлегеним. Катеринанынъ Валерикке косътерген мунасибетине гъалиба догъру къиймет кесамадым. Онынъ бу ернинъ шараитына бисинмегенининъ эсас себеби Валерик дегиль де, меним сонъки вакъытта косътерген сувукълыгъым олса керек? Коресинъми, шеэрде Валерик ёкъ, амма о кене къатнавыны токътатмай. Къабаат озюмде экен...»

Каштанов гедже девамында бир къач таблетка юткъан сонъ, къатты юкзугъа кетти.

Танъ маалинде къапы къакъылды. Каштанов бир кереден алдырамады. Динъленип ятты. Къапы кене

къакъылды. Турды, лампочканы якъты. Къапыда Катеринанынъ сеси эшитильди. Каштанов тааджиПЛЕНДИ. «Бу насыл шей я?» деди о ичинден. Къапыны ачты. Бакъса, софада Молдабай ве Катерина туралар. Ичери кирдилер. Катерина энди озюнинъ алышып къалгъан «акърет соравларындан» башлады. «Не вакъыт тутты, къач саат девам этти, не юттынъ, не ичтинъ..» Каштановнынъ эки козю Молдабайда. Онынъ гедже демей япкъан буюк инсаниетлигине не дейджегини бильмеди.

— Молдабай озъ башына шеэрге барып, гедженинъ бир маалинде, сени кетирир, деген шей ич бир вакъыт акъылыма кельмеген эди. Яхшы япмагъансынъ,— деди Каштанов енгильден тишлерини сырытып.— Катерина апанъны геджелернен къыйнамакъ керекмей эдинъ.

— Багъышланъыз, Андрей Андреевич. Сиз де бир даа геджелернен хасталанманъ,— деди Молдабай кулюмсиреп.

Андрей Андреевич бир шейлер даа айтып башлагъан эди, Катерина Мануйловна онынъ сёзюни болюп:

— Андрей, санъа лаф этмеге олмай!— деди яваштан оны тынчландырмакъ истеп.

— Молдабай, тешеккюр санъа! Бар, ят, раатлан,— деди Каштанов текрар.

— Андрей! Сен сусып оладжакъсынъмы, ёкъса?..

Молдабай сагълыкълашып чыкъып кетти.

Бир ай девамында медпункт янында ачылгъан хастаханенинъ иши ёлуна къойылды. Керек кадрларнен ве медикаментлернен темин этильди. Айриеден башкъа анда эки эмшире даа хызмет этип башлады.

Каштановнынъ сагълыгъы тюзелип кетти. Катерина Мануйловна РайОНО тарафындан, янъы ачылгъан «Балалар багъчасына» мудир таин этильди. Хызмет онынъ элягъыны багълап къойды. Керекли-керексиз вакъытта шеэрге къатнавыны вазгечти. Иштен чыкъкъан сонъ, эв ишлеринен огъраша, кимерде бир Молдабайнен районгъа барып келе. Катерина аз бир вакъыт ичинде балаларгъа, ана-бабаларгъа озюни севдирди. Балалар багъчасында нizam ве тербие ишлери биринджи кунъден башлап ёлуна къойылды. Балалар темиз-пак раатлана, эглене ве тербие корелер. Илк вакъытларда баласыны багъчагъа бермеге сакъынгъан ана-бабалар, шимди Катерина Мануйловнаны алгъышлап юрелер. Булар эписи Каштановнынъ гонъюлини котере, севинчине-севинч къошалар.

Раатлыкъ куню эди. Молдабай Катерина Мануйловнаны къырларгъа алып кетти. Баягъы вакъыт кезинди ве бирер къучакъ чечек джыйдылар. Катерина Мануйловна ешилъ къадифе киби къыртышкъа отурып шу чечеклерден топ-топ гульдестелер ясамагъа башлады.

— Буларны ярын багъчагъа алып барырым, балалар корип къуванырлар,— деди Катерина къолундаки чечеклерни къокълап.

Молдабай онынъ яш бала киби эркеленип, чечеклерни дестелегенине бакъып турды ве ичинде чокътан берли сыгъмагъан бир шейни айтмакъ истеди. Бельки айтмаз эди, лякин Андрей Андреевичнинъ сонъки кере хасталанувы Молдабайнынъ сабырыны тюкендирди.

— Сиз, Андрей Андреевични ольдюре яздынъыз,— деди Молдабай Катеринанынъ янашасына кечип.

Шай дегенде Катерина бир шей анъламагъан киби. Молдабайгъа тикилип бакъты.

— Эбет, эбет,— деди Молдабай текрар.— Валерик деген бала Андрей Андреевичнинъ чырт эттирип кесип ташлагъан тырнагъы, Катерина апа, амма сиз...

— Сен не демек истейсинъ шу?— деди Катерина алдындаки чечеклерни чёплеп.

— Сиз оны аякъ тюбюне алдынъыз!

— Молдабай, дамсыз лафларынынъ кес! Андрей Андреевич мени пек яхшы биле.

— Яхшы бильгени ичюн, пек севгени ичюн индемей юре. Амма, юрек деген шей бир кунъ палт этип патлай да токътап къала. Сиз педагог-тербиеджисиз, буны тюшонмединъизми?

— Мен сени анъламайым, Молдабай?

— Меним козюм алдында Валерикни опытинъизми?

Катерина шакъылдап кульди. Сонъра озюни зорнен токътатып:

— Опысем не ола, Валерик меним огълум еринде бир бала,— деди ве кене шакъылдап йиберди.

— Бала... Мен онынъ яшында олгъанда эвленген эдим. Шимди алты балам бар. Меним Баянсулувынынъ тенине озюмден башкъа бир инсан баласы пармакънен тиймеди. Мен онынъ ят адамнен опюшкенини коръсем... Мынавы: машинанен басып кечерим.

— Сизде бу меселеге башкъаджа бакъыла, Молдабай,— деди Катерина тынчланып.— Опымек ве опюшмек бам-башкъа шейдир. Биз Андрей Андреевичнен дженик

атешлери ичинден чыкып кельдик. Бир шинель тюбюнде куджаклашып яткан вакытларымыз да олды. Жан аяметинен чекишип турган солдатнынъ манлайындан, козлеринден опип, гонюлини алмакнынъ кыйметини билесинъми сен?

— Дженк башка. Шимди барышыкъ заманда яшаймыз. Эр кес озь эвинде, озь оджагында севимли яресинен аят зевкы сюре. Намус ичюн сизде, бизде деген шей ёкъ. Намус эр кес ичюн бир. Лякин, сиз, эр алда ярамай яптынъыз. Андрей Андреевични ялынъыз сиз хасталандырдынъыз. Мени насыл анъласанъыз-анъланъыз,— деп еринден турды Молдабай.

Катерина чечеклерни яваш-яваш дестелеп, тюшонджеге далды. «Молдабай пек акыллы ве пек айнеджи адам. Озь башына бу лафларны чыкырып айтмаз эди. Мында бир шей бар. Демесе, Андрей Андреевич мени Валериктен кунълей? Ёкъ, ич олмакъ мумкюн дегиль. Андрей Андреевич мени нидже тюрюю адамлар арасында корьди. Шимди шу баладан кунълейджекми?.. Ким биле, аятта эр шей деъише. Омюр кече, адам кьартая, табиятында чешит худжурлыклар пейда ола. Ёкъса, Молдабай мени пляжда корьдими? Молдабай гьалиба эписини биле. Андрей Андреевичке де айтса керек. Олар экиси де Валерикнинъ анасыны танымайлар. Янымда Флора олгьаныны бильмейлер. Бу меселенинъ алдыны алмасам олмаз. Андрюшам нафиле ерде озь-озюни кыйнап юрмесин».

Каштановка бир кьач кунъ кыбырмамай тешекте ятмакъ керек эди амма, оны тешекте багълап кьойсанъ да тутып оламазсынъ. Катерина Мануйловна онынъ изинсиз турып кеткенине тарсыкып юре.

Бир кунъ акъшам устю эди. Каштанов тюкянга кирди. Парфюмерия болюгинден устюнде «Бахшыш» деп язылган бир кьуту алды. Аз корюнди. Бир чифт чорап алып, кьутунынъ ичине кьойды. Сонъра машинага минип, медпунктнынъ алдына келип токьтадылар. Каштанов кягытка сарулы кьутуны Молдабайнынъ кьолуна туттырды.

— Буны Айриеге бер де, кель!— деди.

Айрие Молдабайнынъ кьолундан бахшышны алмайджакъ олды, утанды. Лякин, Молдабай зорлап берди.

— Сиз, Андрей Андреевичнинъ джаныны кьуртардынъыз. Буны сизге сагъ ол ерине кетирди,— деди.

Катерина Мануйловна чалышып башлагъанындан берли Айриенен якъындан таныш олды. Гедженинъ бир маалинде Андрей Андреевичнинъ хасталанмасы, Айрисининъ онъа аджеле ярдым косьтермеси — Катеринанынъ юрегинде Айрие ичюн самимий дуйгъулар уяндырды. Кой еринде бойле хабер тез джайрап кеге. Анги бригада, не ерде бу акъта лаф ачылса, эписи келип Катерина Мануйловнагъа етише. Катерина исё, бош вакъыт таптымы, Айриеге келё, онынъ козьлерине бакъып, узун сия сачларына сукъланып, чешит тюрлю лакъырдылар ача, бинъ-бир дереден сув кетирип, онынъле юректен сырдашмакъ истей. Катерина онынъ бутюн аятыны, кечмишини сорай. Фиданенинъ бабасынен меракълана. Айрие индемей. Ялынъыз иш акъкъында, Фиданенинъ такъдири акъкъында лаф эте.

— Асыл сенинъ янынъдан кетеджегим кельмей, — дей Катерина онъа эр корюшкенде. — Ишинъни де къальбинъ киби темиз япасынь. Санъа сукъланмамакъ мумкюн дегиль. Яхшы тербие корьгенсинъ. Кельгенимден берли Андрей Андреевич сени агъызындан ташламай...

Бу сёзлер Айриенинъ рухыны котерсе де, гонълюни чезмей. О тюшюнджелер дерьясына далып кете. «Янъы ерге кочип кельмек къолаймы? Янъы шараит, янъы адамлар. Эписине алышмакъ керек», деп тюшюне о. Сонъ озьюзюнинъ гонълюни ала. «Асыл манъа ятсырамагъа, сыкъылмагъа не бар я? Санки мында хырсызлыкъ этип кельгеним? Чешит халкълардан олсакъ да, эпимиз совет адамларымыз. Мында кимсени энъсесинден айдап кетирмедилер. Эпимиз озь истегимиз, озь авеслигимиз иле кельдик. Макъсадымыз да бир. Бизлер инсанмыз, бири-биримизге тез алышырмыз. Эмек ве макъсад инсанларны тез тувгъанлаштыра. Мына, даа якъында кельсек де, энди танышларымыз, достларымыз бар...»

Лякин, Айриени къыйнагъан башкъа шейлер де чокъ. Себиял аптенинъ сагълыгъы кеттикче зайыфлаша. Энди къаве пиширмеге биле къыйнала. Къарт адам. Аванынъ тесири олса керек, нефеске тоймай. «Балам, шу орманда озюмни яхшы дуя эдим» дей. Я Фидане? Айриени эр шейден зияде къыйнагъан о. Энди баягъы къызчыкъ олды. Къапы алдында озю ойнап-чапкъалап юре. Балалар багъчасында оны севелер. Хусусан Катерина Мануйловна оны озь эвляды киби коре. Инсанлар чешит-чешит олалар. Биревлер севе, биревлер аджыналар. Айрие баласынынъ

севгенлерине къувана, аджыгъанларына окюне. Шу огъурсыз дрезина къапакълангъанындан берли Фидане лаф этип оламай. Сёзлерни тутукъланып айта. Дигер тарафтан Алиман меселеси. Ондан якъында мектюп кельди. «Тезден къуртуладжагъым, манъа бир къат урба йибер» деп яза. Айлыкъ алсалар Юнуснен экиси къошулып онъа урба йибереджек олдылар. Бутюн бу къасеветлер онынъ гонъюльсиз юрмесине себеб олалар. Катерина Мануйловна, медпункт ве хастахане хадимлери онъа яхшы мунасибетте олсалар да, Айрие мында чалышмагъа истемей. «Эр кес тарлаларда, тютюн аранларында, къуруджылыкъ мейданларында чалыша. Мен устюме халат кийип отурайыммы? Асыл манъа келишкен шей дегиль. Мен койде догъдым. Кой яшайышы яшлыкътан меним къаныма синъип къалды. Тютюн къырмакъны, тизмекни яхшы билем. Ёкъ, ёкъ, халатымны ташлай да, эр кеснен берабер мен де тарлагъа чыкъам» деп тюшюне о.

Бугунъ Айриенинъ невбетчи куню эди. Акъшам стол башында чешит фикирлер мийини ёруп тургъан вакъытта Еремеевнен, Арсланов кирип кельдилер. Олар, маначыкъ этип, Катерина Мануйловнаны сорадылар.

— Кунъдюз кирип чыкъкъан эди. Эвине къайткъандыр,— деди Айрие отургъан еринден.

— Джанынъыз сыкъылмаймы?— деп ташлады Арсланов.

— Джан сыкъылмагъа вакъыт къалмай. Телефон сыкъ-сыкъ чынъылдап тура. Де эвге чагъыралар, де яра байлатмагъа келелер... Чокъ халкъ ишлеген ерде эр чешити ола.

— Сиз кеченде директоргъа чокъ яхшы ярдым эттинъиз,— деди Еремеев.— Катерина Мануйловна о геджеси эвде, ёкъ эди. Райондан эким беклеген олсакъ, гъалиба директорсыз къалыр эдик.

— Къолунъыз енгиль экен. Бир уколнен адамны тирильттинъиз,— деди Арсланов сол къашыны юкъары жотерип.

— Меним къолум дегиль, медицинанынъ къолу, Самедин агъа,— деди Айрие кулюмсиреп.

— Эр алда, оны керек еринде къуланмагъа бильгенинъизге чокъ машалла! Насыл дерт эди шу?

— Экимнинъ айткъанына коре, мен шу геджеси янъылмагъан экеним. Уколны да догъру япкъаным. Онъа бизде нефес тарлыгъы дейлер, гъалиба. Андрей Андрее-

вичте бронхиаль астма эди. Сиз де мукъайт олунъыз, инсан озь-озюни тутмагъа бильмек керек,— деди Айрие кирпичлерини къыбырдатып.— Сонъ сизге де «адреналин», «эфедрин», «тсофедрин», киби шейлер къыдырмакъ керек олмасын.

— Башынъа тюшсе, не чаре? Айтам да, яшасын медицина!— деди Арсланов.

— Медицина дей бересинъ, медицина хадимлерини унутасынъ,— деп Айриеге бакъты Еремсеев.

— Унутсакъ, бу ерде олмаз эдик даа,— деп кульди Арсланов.

— Сиз о геджеси пек догъру япкъансыз,— деди Айрие оларнынъ шакъасына эмнет бермейип.— Приступ туткъан кишини тез-тез урбаларыны бошап, онъайтлы бир ерге ясландыраджакъсынъ. Пенджерени ачып, оданы аваландыргъанда, хастанынъ устюни орътмек керек. Сонъ биринджи ярдым чарелерини коресинъ. Катерина Мануйловна сабагъа къадар бутюн процедураларны япкъан.

— О эвде ёкъ эди де?

— Сиз беллейсинъиз мен хастанынъ бир озюни ташладым кеттим я ? Ойле шей олмай. Молдабай Катерина Мануйловнаны барып кетиргендже мен Андрей Андреевичке козь-къулакъ олып турдым. Саба ярыкълангъандже медпунктнен оларнынъ эви арасында юрип чыкътым. Я буларны кимге ташлайджакъсынъ,— деп башыны хасталар яткъан одагъа тараф бурды.

— Догъру айтасынъ Айрие, медицина дюнъяда энъ алидженап илимлерден биридир. Эвельси бизим баба-деделеримиз шай яшап, олюп кеткенлер. Шу геджеси меним козюм алдына бабамнынъ сонъки дакъикъалары кельди. О да тыпкъы Андрей Андреевич киби кокюсине япышып вайвалагъан эди. Джемаат чапты-чапкъалады, къартлар джыйылып кельдилер. Эллеринден кельген бутюн ырымларыны яптылар, амма, файдасыз. Гедже эманетини берди. Сонъ кой ичинде айтып юрдилер, эмиш Арслан акъай эвель замандан къалгъан бир къабристан устюнде ятып юкълагъан экен. Юкъу арасында чешит шей ола билир... Оны азиз бабай къабул этмеген. Кокюси шейтан толгъан. Олар бабамны кыйнап, эзгелеп, нефесини токътатып, джаныны алгъанлар. Анам заваллы бу шейлерни эшитип, аз къалды озю де джынлы олмагъа. Гедже-куньдюз дудакъларыны къыбырдатып окъуп юрер эди. Сен де дува эт балам, эвимизге шейтан кирмесин,— дей эди.

Айрие лактырдынынъ узап бараджагъыны анълагъан сонъ, кирип къабулханеден эки отургъыч кетирди. Еремеев ве Арсланов отурдылар. Телефон чынъылдады. Айрие трубкины алды. Кимдир, директорны сорады. Айрие, мында олмагъаныны айтты ве трубкины ерине къойды.

— Дейджегим,— деп башлады кене Арсланов озюнинъ фельсефесини.— Бабам айта эди, койнинъ этрафында «Шейтан дере», «Авдарыл къая», «Къыркъ огюз» деген бир чокъ джынлы ерлер бар экен. Акъшамдан сонъ, о ерлерден кечмеге эр кес къоркъар экен. Эмиш, гунясы олгъангъа илле джын расткеле. Шейтан дередде чокъусы адамлар чипчели тавукъ корелер эмиш. Бу шейлерни эшите-эшите мен де шу чипчели тавукъны корьмеге авес эттим. Бир кунъ чайырдан къайтаяткъанда айды, дедим шу дере тарафтан айланайым. Копюрге беш-он адым къалгъанда элим-аягъым къалтырап башлады. Козюме къаранлыкъ чёкти. О вакъыт олса-олса он экилердедирим даа. Омузымда лескерим бар. Тарс токътадым. Копюрден кечмеге де къоркъам, артыма айланып къачмагъа да. Бакъсам, копюр тюбюнден бир къара тавукъ чыкъты. Артында бир сюрю чипче. Аначыгъым! деп бир пертав къопардым амма, эвге келип киргенде талагъым къаткъан эди. Анам, меним къалтырагъанымны корип:

— Не олды балам?— деди.

— Джын копюрге чипчели тавукъ корьдим!— деп агълап йибердим.

Бу анама етти. Мени гедже-куньдюз къартанайчыкълар окъуп, ырымлап отурдылар.

— Сонъ не эди о корьгенинъиз?— деди Айрие меракъланып.

Арсланов омузларыны къысты.

— О шей къоркъудан корюнген онъа,— деди Еремеев кулюмсиреп.— Сен акъшамдан сонъ, сокъакъта тавукъ юрмсйджегини биле турып, о ерден йырлап кечкен олсанъ, козюнъе бир шей корюнмез эди.

— Шимди мен де ойле тюшюнем. О вакъыт джын-шейтан деп юргенлер. Мезарлыкъ янындан кечкенлер де бинъ тюрлю шей корьгенлерини айтып, адамларнынъ ичине къоркъу синъире экенлер. Бабамны бир азиз къабристан устюнде яткъан да, шунынъ ичюн хасталанып ольдю деп чыкъкъан эдилер. Йыллар кечти. Инсаннынъ анъы инкишаф эткен сайын ойле шейлернинъ уйдурма олгъаныны анълай экен. Шимди инсанларнынъ къолунен, илим

ве техниканынъ кучюнен о «джынлы» ерлер де, адамлар да бир тамам тюрленип кеттилер.

Еремеев кульди.

— Айды, кесинъ шу джын лафыны,— деди Айрие.— Сиз шимди турар кетерсиз, манъа сабагъа къадар мында огурмакъ керек оладжакъ.

— Шимди къайда ойле шей?— деди Арсланов Айриге козюни тикип.— Акъылынъызгъа биле кельмесин. Атта биринджи сыныф баласы энди о шейлерге инанмай. Меним Эскендерим къайдандыр, фантазия деgege огренген. Не айтсам, «Фантазия» деп ташлай. Бойле шейлер баланынъ анъыны токъалландыра. Ана шай, руханийлер, бизим баба-деделеримизнинъ анъыны асыларнен токъалландырып, сокъурлап кельгенлер. Илимден узакълаштыргъанлар. Бугунъки дюньянынъ анахтары—илим. Оны къолуна кереги киби алалмагъан адам, олар киби джын-шейтан лафы этер де юрер. Афу этинъиз, Айрие. Башынъызны баягъы куттик. Багъышланъыз. Айды Панфил Данилович къайтмагъа вакъыт,—деп Еремеевке бакъты.

— Сагъ олынъ, Самедин агъа. Баягъы эглендирдинъиз. Къорантанъызны алып эвге келинъ,— деди Айрие Арсланов чыкъаджакъта. Айрие онынъ айле вазиетини бильмесе де эвге давет этти. Адет ойле.

Катерина Мануйловна бу гедже Андрей Андреевичнен джиддий лаф этмеге къач кере ниетленсе де, неден башлайджагъыны, неде токътайджагъыны тапыштырып оламады. Башынынъ ичинде бинъ-бир тюрлю фикирлер доланып юре. Оларны бир сырасына къойып оламай. «Бутюн къальбимни ачып къойсам, баламыз олмагъаны меним къабаатым экенини бильдирсем Андрей Андреевич насыл къабул этеджек? Бельки, нефрети даа зияде артаджакъ. Бельки, менден бир тамам ред этеджек? Ёкъ, тюшюнипташынмакъ керек. Къаш якъаджакъ олып козь чыкъармайым. Ах, Андрюшам, къийметли шаиним! Меним санъа олгъан севгимни озюнъ яхшы билесинъ. Лякин бир меселени анълап оламайсынъ. Мен къадыным. Ана олмакъ истейим. Озь эвлядым олгъаныны истейим. Шубесиз, сен де баба олмакъ истейдирсинъ. Козълери, къашлары симсия, сачлары къувурчыкъ... Ах, не олыр эди ойле бир эвлядымыз олса? Багърыма басар да, сачларыны сыйпап-сыйпап юкълатыр эдим. Козълерини ачкъанда, «Ана» деп

уянса, артымдан «Ана» деп джувурса... Къадын ичюн ана олмакътан буюк бахт бармы экен? Айриенинъ гуль киби кыызчыгъыны корьгенде эсимни джоя яздым. Эвленигимизге баягъы вакъыт олды. Баламыз ёкъ. Эм олмайджакъ. Бу меним къабаатым. Андрюша буны аля даа бильмей. Озюни къабаатлай, гъалиба. Лякин янъыла... Госпитальде чыкъкъанда манъа бу меселени айткъан эдилер. Лякин, онынъ аля бугунъ хаберы ёкъ. Эм олмасын. Сакъын, сакъын... Эгер дуйса, сонъ меним бу дюньяда яшамагъа акъкъым ёкъ. Андрей Андреевич буны бильмемек керек. О шимди бус-бутюн ишке берильди. Бойле шейлернен онынъ юрегини яраламакъ олмаз. Эм сагълыгъына, эм ишине зарар келир. Манъа деваланмакъ керек. Эвляд саиб олып озюмни де, оны да къувандырмакъ кереким. Мен шай тюшюнем, амма бильмейим, о бельки башкъа фикирдедир. Мен оны эм севем, эм аджыйым. Эгер манъа сонъ вакъытларда косътерген сувукълыгъы девам этеджек олса, мен оны чокъ чекиштирип отурмам, айтырым. Эписини айтырым...»

Каштанов машинасындан къапы алдында тюшти. Молдабайнен экиси аякъ устюнде баягъы лаф этип турдылар. Сонъра, машина кочип кетти. Каштанов ичери кирди. Къолундаки бурумны Катеринагъа узатты. Бир шей айтмады. Къол-бетини ювуп, урбасыны денъиштирди. Залгъа кирди. Стол устюндеки газеталарны алып, дивангъа ясланды. Катерина ашханеден:

— Къаве берейимми, чаймы?— деп кычырды.

— Эписи бир,— деди Каштанов яткъан еринден. Катерина чай кетирди.

— Ташла шу газетаны къолунъдан, ич олмагъанда козьлеринъни аджы.

— Догъру айтасынъ, озь-озюнъни аджымакъ керек. Чюнки, инсан озь-озюни бильгени киби, четтен кимсе билип оламаз. Эр кеснинъ озь юреги, озь къаны, озь джигери бар. Ангисининъ кнопкасы бозулса, башта озюнъ дуясынъ. Джефасыны да озюнъ чекесинъ, сефасыны да. Атта энъ якъын достынъ бу иште ярдымджы оламай экен. Хусусан юрек меселесинде...

Каштанов чайыны къарыштырып тургъан Катеринагъа бакъты. Катерина онъа эр вакъыт дюльбер, назик, муляйим бир апай олып корюне. Хусусан устуне эв урбасыны кийсе. Арыкъ черели, тюз беденли бу къадын онынъ козю алдында яш спортчы кыызгъа бенъзеп тура. Лякин,

сонъ вакъытта онынъ юрегини анълап оламай. Катеринанынъ атешли севгиси, мунасибети Каштановны эр вакъыт зиядесинен къанаатландыра. Лякин, шу пляж меселеси онынъ фикирини шашмалатып юре. Озь козюнэн Катеринаны корьген сонъ, Каштанов бунагъан киби олды. Бойле меселеде фикирлешмеге де аркъадаш тапылмай. Атта, Молдабайнен лаф этмей. Шу куньден берли пляж лафы унутылып кетти. Молдабай исе, тилини агъызы ичинде тутмагъа бильген адамлардан. Катеринанен лаф эткенини де кимсеге айтмады. Олар эр экиси бири-бирини сёзсиз анълайлар ве бу мевзуда бир вакъыт лаф ачмайлар. Эр алда шу куньден сонъ, Каштанов аиле меселесинен зияде меракъланып башлады. Катеринагъа нисбетен ичинде буз парчасы турса да, къадын-ходжа арасында келип чыкъмасы мумкюн олгъан къолайсызлыкънынъ себеблерини къыдырды... Катеринагъа бу себеблер белли. Каштанов бир шей бильмей. Онынъ ичюн юреги зияде эзиле. Озь эвине аягъы тартмай. Оны шимди бу джезадан ялынъыз иш къуртара. Саба чыкъып кете, яры геджеде къайтып келе. Иште исе, бойле меселелер хусусында тюшюнмеге сыра къалмай.

— Андрей, ярын иштен сонъ Молдабайнен къыргъа чыкъып кельмсийкми?— деди Катерина онынъ тюшюнджесини болюп.

— Сен истесенъ бар. Меним вакъытым ёкъ.

Каштанов агъызыны сюртип столдан чекильдй.

— Меним акъайым ёкъмы, ёкъса? Шу кыыр тёпесинде бир озюм эчки киби юрейимми? Сен янымда олсанъ, гонълюм башкъаджа ола. Бутюн чегерликлер, чечсклер манъа кулип бакъалар. Сен олмасанъ эписи башларыны эгильтип сусып туралар. Анда эр шейни хатырлайсынъ. Романтика далгъалары ичинде ялдап кетесинъ. Санъа чокъ шейлер айтырым Андрей, кетейик, риджа этем.

«Чокъ шейлер». Каштанов бу сёзни эшиткенинен кулюмсиреди ве Катеринагъа инамсыз назар ташлады.

— «Чокъ шейлер» акъкъында лаф этмек ичюн къыргъа кетмек шартмы? Меним эвим бар. Дуэльге чагъырылгъаным ёкъ,— деди о сувукълыкънен.

Катеринанынъ эти-тени чимирдеди, санки устюнден къырмыскъалар джувурып кечтилер. О джиддийлешти. Бутюн такъатыны ичине джыйды. «Бу адамны къыйнамагъа не керек? Айтам, эписини айтам» деди о ичинден. «Барсын озю чезсин, озюнинъ истегени киби арекет этсин. Юреги-

нинъ эмирине разым. Мен де инсаным. О мени анъламакъ борджлы. Экимиз де азапланып юремиз. Не ичюн? Бу меселеге нокъта къоймакъ керек».

Катерина диванда созулып ятмакъта олгъан Каштановнынъ янына бу фикирлернен кельди.

— Чекиль, Андрей, янынъа отурайым, санъа дейджегим бар.

Катерина онъайтланып онынъ янында ерлешмекте эди, телефон чынъылдады. Каштанов турды. Трубкины алды, динъледи. Диварда чыкъылдамакъта олгъан балабан пулу сааткъа бакъты. Сонъра трубкины ташлады.

— Кольмегимни алып берчи, тез ол, идареге бармакъ керек,— деди.

Катерина халатыны омузлары устюне ташлап, онынъле берабер софагъа чыкъты. Каштанов гедженинъ къаранлыгъына къарышып, Катеринанынъ козю огюнден джойылып кетти.

VI

Айриенен Макъпуле бир сачакъ тюбюнде яшайлар. Экисининъ къапысы бир софагъа ачыла. Совхозгъа кельгенлери киби Макъпуле тютюнджилик бригадасында, чалышып башлады. Юнус исе, озъ зенаатынынъ ерини шимди тапты. Къуруджылыкъ кеткен ерде электрикке иш тапылмазмы?

Макъпуле саба тютюн сепетлерини машинагъа юклеп йиберди де, догъру эвге къайтып кельди. Элини-бетини ювды, чай ичти ве кроватькъа созулды. Бираз раатлангъан сонъ, Айриеге кирди. О да гедже невбетчилигинден кельген, эвде раатланмакъта эди. Себиля апте азбар ичинде одыр-будыр джыйыштыра. Саба олса ич де эвге киреджеги кельмей. Азбарда озюне илле бир иш тапа. Эр бир шейни ерли-ерине тизиштирип къоя, бир иш тапмаса, азбарны сувлап сипире, базы ерлерини тезекнен сылай, сонъра эчки терисини чыкъарып, оджакъ башына чёке. О, шимди чокъ ишке дянамай. Бираз къыбырдагъан сонъ, нефеси тутулып башлай. Бу вакъыт тез-тез ичери кирип, озюнинъ миндерчигине яслана. «Азбар ичинде олюп къалмайым» деп хаялланып къоркъа. Арасы чокъ кечмей, кене оджакъ башында доланып юре... Къартий даа не япсын? Онынъ бутюн зевкъы шу. Кимерде-бир озюнинъ

акъранлары келе, о вакъыт джан-юректен дертлешип тоялар.

Макъпуле, Каштановнынъ Айриеге берген бахшышыны ачып корьди. Чорапларны чыкъарып, ичине къолуны сокъып бакъты да:— Тюзю пек яхшы экен, эм узун къонучлы, тебриклеим акъыз!— деп кене йылтыравукъ кягъыткъа тыкъып къойды.

— Даа яхшысы озюнъе олсун,— деди Айрие.

— Директоргъа баргъандже санъа бахшыш кетирелер, даа ишинъден кетеджек оласынъ. Ашыкъма Айрие. Менимдже тарла иши къачмаз. Тютюнге не вакъыт чыкъайым десенъ, алдынъа истегенинъ къадар сепет кетирип къоярлар.

Айрие Макъпуленинъ насиатыны эр вакъыт буюк урметнен динълеп кельди. Шимди онынъ дегенине разы олмайджакъ ола.

— Сен чалышасынъ да Макъпуле, меним де белым къырылмаз. Бутюн халкъ чамур демей, аяз демей, чапачапкъалай, иш япалар. Оларнынъ япкъан иши корюне. Бугунъ бакъасынъ эвнинъ негизини къазалар ярын бакъасынъ тѣпесини япалар. Я сен? Мына шимди меним янымда отурасынъ, амма къальбинъ аранда. Къыргъан тютюнинъ тизилип биткенми, тизильген олса къач сырыкъ чыкъкъаныны тюшюнесинъ, догърумы? Япкъан ишинънинъ нетиджесини шу куню билесинъ. Мен адамларнынъ бойле чалышкъанларыны корем де, догърусыны айтам санъа Макъпуле, валлаи утанам. Устюме безаз халат кийип шу бинанынъ ичинде отурмагъа юзюм чыдамай. Керчек, кеченде сенинъ бригадиринъни корьдим. Агрономнен экиси медпункткъа кельдилер. Акъыз, бир де лафазан, фельсефеджи адам экен. Башлады манъа джыннен шейтан лафы этмеге. О айта, мен къоркъып къалтырайым. Пенджерелерге бакъам. О кене айта бере. Бираз къабаджа чыкъса да, даянамадым:

— Токътатынъ шу джын лафыны, мен къоркъуп башладым,— деменге меджбур олдым. Баш агрономнен экиси ойле уйгъанлар. Бири-биринден акъыллы олсалар керек.

— Самедин агъаны пек макътайлар. Оны баш агроном дегиль, директор да бегене. Тютюнджилик ишининъ къурты экен. Бутюн ишлерни онынънен фикирлешип япалар. О меним ишимни эр вакъыт макътай. Къачан яныма кельмесин:

— Темиз иш япасынъ, Макъпуле, чий япракълары узмейсинъ, пишкенлерини де къалдырмайсынъ,— деп кече.— Якъында аранда беш теменджи озъ арамыз ярышлашып тютюн тиздик. Ким озгъандыр беллейсинъ? Экиси башлар-башламаз пармакъларыны теменге санчтылар. Меним теменим эписинден эвель толды. Ипке бошатып тешкердилер. Оларнынъки ерге тѣкюльди кетти, акъыз. Келиши гузель япракъларындан кечирген къойгъанлар. Менимки исе, эр бир япрачыкънынъ дамарчыгъындан кечирильген. Самедин агъа мыйыкъ астындан бакъып-бакъып куле... Зарар ёкъ Айрие, мында ишимиз ярамай оладжакъкъа бенъземей. Тезден Алиман да келир. Сенинъ яшайышынь бир тамам денъишип кетер.

— Алиман манъа кельмез, эм кельсе де керекмей!— деди Айрие кестирип.

Макъпуле Айриенинъ бойле къатты, кесен-кес лаф эткенини биринджи кере эшитти. Алиман акъкъында не вакъыт лаф чыкъса, Айрие эр вакъыт индемей турар эди.

— Мен онынъ алдында, озъ эвлядым алдында, эм аналыкъ, эм къадынлыкъ борджумны намус-ырызымнен эда эттим. Къальбим пак, юзюм акъ,— деди Айрие лафыны девам эттирип.— Онынъ къуртулып чыкъкъанына баягъы вакъыт олды. Юнуснен экимиз пара къошып, кене де инсанлыкъ алы деп онъа посылка йибердик. Атта джевап язмады. Бельки озю келеджектир деп тюшюндим... Етер тюшюнгеним. Мен энди озюмни онынъ тесири алтындан чыкъарам. Онъа ичегим багълы дегиль, борджлы да дегилим! Мына, Макъпуле, мен бу фикирге къатты оларакъ кельдим.

— Фиданени тюшюнесинъми? Менимдже, сен чокъ шейге къатландынъ, лякин озюньни бир тамам сербест саймакъ ичюн бир адым даа атламакъ керексинъ,— деди Макъпуле.

— Ярым адым даа атламам. Онынъ япкъанлары ич багъышладжакъ киби дегиль. Онъа бала керекмесе барып бойнуна илейимми?

— Эр алда бир тюшюнип бакъайыкъ. Бельки Юнусны йиберирмиз. Барсын, корьсин. Эр шейни ачыкъ-айдын билип келир. Эвленмек ичюн де, айрылмакъ ичюн де къанун бар. Суд бар. ЗАГС тен чыкъмагъандже озюньни сербест саямазсынъ...

Айрие индемеди. ЗАГС меселеси онынъ тилини къысты.

Бу ишке, акъикъатен Юнуснынъ ярдымы керек олды. Бир афта ичинде эр шей аль этильди. Меселе мына бойле олып чыкъты: Юнуста Алиманнынъ сонъки адреси бар эди. Шу адреснен онынъ изине тюшти. Чокъ къыдырмагъа сыра кельмеди. Алиман къуртулгъан сонъ, озюнинъ эвельки ерине къайткъан. Эки ай кечер-кечмез башкъа бир къадыннен тутунгъан. Бу къадын да Юнуснынъ баргъанына пек къувангъан. Чюнки ЗАГС меселесинен шубесиз, тек Айрие дегиль, о да меракъланып юре экен. Юнуснынъ келюви бу къадыннынъ аиле мунасибетини пекитмеге де ярдым этти. Юнус Айриенинъ айрылыккъа разылыкъ бергенини тасдикълайыджы къгъытларны чыкъарып косътере. Алиманнен берабер халкъ судына баралар. Эр эки тарафнынъ разылыгъы олгъан сонъ, арадан эки йыл кечкенини козь огюне аларакъ, оларны бири-биринден къануний суретге айыралар. Алимангъа алимент багълайлар. Иш бунынъле бите. Айриенинъ паспорты темизлене.

Бойлеликле, Алиман ве Айрие арасындаки мунасибет бир тамам узюлип кетти. Асыл ойле олып чыкъаджагъы эки йыл эвельси белли эди. Лякин, Айрие бу меселенинъ сонъки дакъикъасынадже даянды. Бутюн акълякъы, къаны ве джанынен озюни тутты. Шунынъ ичюн адамлар Айриени ялынъыз яхшы тарафтан билелер. «Акъикъатен, Айрие, озюнинъ видждан темизлиги ичюн гъурурланып юрсе де яраша» дейлер.

Совхоз биринджи тютюн керваныны юкледи. Керван пек буюк олмаса да, биринджи кере озъ махсулатыны девлет амбарына озгъармакъ ичюн ишчилер идаренинъ алдына топландылар. Огдеки машинанынъ кузовасына пекитильген къырмызы материал устюнде ири арифлернен шойле язылгъан: «Мемлекет! Янъы совхознынъ янъы махсулатыны къабул эт!»

Тютюнни Алма-Атагъа барып теслим этмек керек. Каштановнынъ машинасына Къурбанбеков минди. Баш агроном Еремеев ве бригадир Арсланов тютюн юкю машиналарнынъ кабиналарына ерлештилер. Машиналар еринден кочкенде ишчилер гурюльдешип эль чырптылар.

Алма-Атада оларны буюк урьметнен къаршылап алдылар. Къабул пунктында Республика кой хозяйствосы министрлигинден векиллер, область партия ве хозяйство

ишлерининъ хадимлери, агрономлар ве дигер мутехассыслар бар эдилер.

Тютюн тайлары теразеге къойылмаздан эвель яхшы тешкерильди. Къурулыгъы, дымлыгъы бельгиленди, тайларнынъ орталарындан топ-топ даметлер чыкъарып, теджрибе пунктына алып кеттилер.

— Тебриклеимиз сизни аркъадашлар!— деди Министрликтен кельген векиль.— Къыркъ беш центнер дюбек! Къазахстан дюбеги!.. Бу, сизинъ башлагъан буюк ишинъизнинъ биринджи къарылгъачы. Гектар эсабына алгъанда берекет буюк олмаса да, кейфиет яхшы. Биринджи, экинджи сорт йигирми еди процентни тешкиль эте. Бу мисаль совхознынъ келеджегине буюк ишанч догъура. Биз эминмиз ки, совхоз коллективи дюбекчилик саасында кеттикче усталыгъыны арттырыр...

Векиль Каштановнынъ ве онынъ янындаки дигер аркъадашларнынъ къолуны тутты ве самимий тешеккюрини бильдирди.

Арсланов бугунъ озюнинъ ве бригадасынынъ адресине айтылгъан яхшы сёзлерни эшиткен сонъ, башы кокке тиеджек дереджеде къуванды. Кимерде-бир озъ башына кулип ала, сонъра:— Биревлер корьмегенми экен?— деп этрафына бакъына. Къуванчыны къайда барып тёкеджегини, кимге барып юрегини ачып косътереджегини бильмей юре эди. Ленин сокъагъыны бойлап баягъы доланды. Сонъра Еремеевнинъ эвине кирди. Софада Юнус учъ лампочкалы люстрыны къарыштырып тура эди. Бираз вакъыттан сонъ, прораб Боденеджиев кельди. Юнус люстрыны ерине ильди. Софанынъ диварына мермер ляпек устюнде пекитилип къойылгъан «Ток эсаплайыджынынъ» патронларыны кечиргенинен люстра эвни ярыкълатты. Еремеев мусафирлерни столгъа чагъырды.

— Биринджи кере эвимизде электрик ярыгъы нур сачты. Оны эльбет де ювмакъ керекмиз,— деди о.

Кирдилер. Дёрт киши бир шише ракъы ичтилер. Баягъы вакъыт лаф эттилер. Боденеджиев атик бир йигит. Ойле олмаса къуруджыларнен чалышамаз эди. Эм яхшы чалыша. Оны урьметлейлер. Политехника институтынынъ учюнджи курсында гъиябий окъуй. Эписи озъ иши акъкъында лаф эте. Арсланов тютюнджилек акъкъында, Боденеджиев къуруджылыкъ акъкъында айта. Келишип

оламадылар. Турдылар. Еремеевнен сагълыкълашып кеттилер. Арсланов ве Юнус «Алсаба»гъа догъру ёл алдылар. Олар кельгенлеринден берли «Алсаба» да яшасалар да, бири-бирлеринен якъындан таныш дегиль эдилер. Шимди ёл бою сорашып, билиштилер. Юнус дагъ ишинде чалышкъаныны айтты. Аювлар акъкъында не бильсе, эписини сёйледі. Опынъ янында аюв лафы кочюрмейджексинъ. Кимсени устюне чыкъармаз. Аюв акъкъында лаф этмекни о къадар севе ки, дерсинъ оларнынъ ичинде яшагъан. Озю даа бир кере тири аюв коръмесе де, бу мевзуда лаф ачылса, онынъле дава этмек къыйын. Арсланов исе, тютюнден башлай, ве ниает фельсефеге кече... Экиси бири-биринен пек келиштилер. Юнусларнынъ эви янында бираз токъталдылар.

— Юринъ, эвге кирейик, даа акъшам башы,— деди Юнус. Арсланов ред этмеді. Кирдилер. Арсланов Себия аптенинъ къолуны алды. Айрие эвде ёкъ эди. Юнус Макъпуленинъ одасына кирди. Эр вакъыттаки киби олар кене экиси берабер сырдашып отура эдилер. Юнус эвде мусafir олгъаныны айтты ве экисини де чагъырды.

Айрие къаве кетирди. Табакънынъ ортасындаки кичкене шекерликни Арслановкъа узатып:

— Айып этменъиз,— деди Айрие.— Къавени шимдлик къаймакъсыз ичемиз. Кельгенимизден берли Юнус бир эчки аладжакъ ола, бегенген союны гапамай.

— Эчкини не япаджакъсыз?— деди Арсланов агъызына шекерини ташлап.— Шимди бизде буюк ферма бар. Тезден орталыкъ сютке, къатыкъкъа толып къалыр.

— Анам эчкиге пек алышты. Къартоп къабугъыны чыкъарып тёккен сайын яныкълай. Эчким олса алдына ташлар эдим,— дей.

Шай дегенде эписи кульдилер. Макъпуле кульмеді. Арсланов онъа тараф бакъты.

— Не сусып отурасынъ, Макъпуле? Бугунъ бизим бригадамызнынъ адына насыл сёзлер айтылгъанындан хабаринъ бармы? Министрликтен кельген векиль къолумызны тутып тешеккюръ бильдирди. «Аз олса да, бу сизинъ совхознынъ учургъан биринджи къарылгъачы!» деди.— Къыркъ беш центнер дюбек теслим этип кельдик. Къыркъ беш центнер дюбек не демек олгъаныны билесизми? Бу — дёрт бинъ беш юз килограмм демек. Яни, юзъ кило тютюнге он беш кило дюбек къошкъанда, э-э, бундан девлет чокъ кяр эте. Он учъ бинъ килограмм юксек кейфиетли,

къокъулы тютюн! Мына, Макъпуле бизим бригаданынъ иши. Булар эписи башлангъыч. Я бойле он беш бригада олса? Укюмет буларны козьде тутмаса, бу ерде совхоз къурармы эди? Къурмаз эди, бизлер де мында олмаз эдик. Догърумы?

Юнус шимди лафкъа къошулмай, динълеп тура. Чюнки Арслановнынъ эсаб-къасабындан о чокъ шей анъламай. Итираз этип, оны лафкъа даа пек къызыштырмакъны арткъач таный. Эвге мусафир алып кельген сонъ, онынъ аскъысына даянаджакъсынъ деген къаидеге риает этип, башыны асып сабырнен динълемекте.

— Бу йыл бизде учъ бригада оладжакъ,— деди Арсланов сёзюни девам эттирип.— Эр бригадагъа айры тарла, айры тютюн араны, айры парник хозяйствосы пекитиледжек. Идареде кадрлар меселеси бакъылгъанда мен сени теклиф эттим, Макъпуле. Бизим бригадамыз асылында совхознынъ кадрлар оджагъы оладжакъ. Чюнки тютюнджилер эписи бизде чалышалар, биринджи теджрибени бизде кечелер. Янъы бригадирлер, шубесиз, бизим бригададан чыкъмакъ кереклер.

— Нафиле япкъансыз,— деди Макъпуле.— Меним ишим пек яхшы. Саба эрте кетем, кунъ догъгъандже сепелеримни толдурам, акъшамгъадже аранда юрем. Истесем эвге келип бираз ятып раатланам. Мени бригадир къойсанъыз, гедже-кунъдюз раатсызлайджакъ экенсиз де?

— Эр алда, бригадир олмакъ, тютюн къырмакъ дегиль, Макъпуле. Сен тирнекли бир къадынсынъ. Адамларгъа сёзюнъ кече, озюнъе сайгъы къазансанъ олды. Олар сенинъ юзюнъни бир вакъыт къызартмазлар.

— Мына, бизим Айрие халат кийип юрмектен бездим дей. Тютюнге кетеджек ола. Оны алмайсызмы бригаданъызгъа?— деди Макъпуле кулюмсиреп.

— Айриеними? Оны Андрей Андреевич тарлагъа йибереми? Айриеден башкъа кимсеге укол яптырмай. Къолу енгиль шу къадыннынъ, дей. Эм айткъаны догъру. Эр бир иш озъ устасындан къоркъа, дейлер. Айриенинъ къоллары анджакъ бойле иш ичюн яратылгъанлар.

— Онынъ къоллары даа башкъа шейге де келише, Самедин агъа-а!...— деди Макъпуле созып.

Арадан баягъы вакъыт кечти. Бир кунъ Арсланов Молдабайны токътатып, онынъ къулагъына бир шейлер айтты.

Сонъра джебинден чыкъарып бир топ пара узатты ве озю де машинагъа минди. «Алсаба»гъа кельгенлеринен Арсланов тюшти. Энди кунъ къонгъан эди. Колхозджыларнынъ маллары монърешип отлакътан къайтмакъталар. Мал сюрюсининъ артындан котерильген тоздан чобанны коръмекнинъ чареси ёкъ. Маллар койге киргенлеринен тараф-тараф олып кеттилер. Бираздан сонъ, тоз сакинледи ве ёлнынъ ортасында чобан бала къатайып къалды. Бир къач апакъай онынъ янына барып бир шейлер айттылар. Арсланов сокъакъ кенарындаки къарт тал тереклери артында тоздан сакъланып тура эди. Чобан баланынъ бу ерден кетмейип, токътап тургъаны Арслановны пек меракъландырды. Албу исе, мал саиплери чобан баланен эсап кесмек, акъ тёлемек ве дигер меселелер боюнджа анълашмакъ ичюн ялынъыз бельгиленген ерде корюше экенлер.

Арсланов устюнинъ тозыны къакътып, догъру Айриелерге кетти. Азбарда Себиля апте бар эди. Селямлашты, сонъра къолларыны ювуп ичери кирди. Эвде кимсе ёкъ эди. Арсланов, Айриенинъ бугунъ невбетчи олгъаныны биле-биле кельди.

— Токътап тур балам, шимди бир къаве пиширейим,— деди Себиля апте дудакъларыны къалтыратып.

— Асыл кереклиги ёкъ, раатсызланманъ, мен беш дакъкъагъа кирдим.

Къартий Арслановнынъ лафына къулакъ асмады, озы ишинден къалмады. Чокъкъа бармай джезвесини тютетип кельди.

— Сагъ ол балам, алла разы олсун, сен кимерде-бир бизлерни ёкълап киресинъ. Биз бу ерлерни яхшы бильмеймиз. Юнус Отуз докъузынджыда олгъанда манъа яхшы бир эчки алгъан эди. Торунчыкънен экимизге сте эди. Кочеджекте, сатма балам, дедим. Мен белледим, якъын бир ерге кетемиз. Алла, алла яраббим, бу дюньянынъ чети ёкъ экен даа? Тресинанен кетемиз, поюзнен кетемиз, автанабильнен кетемиз, келип етамаймыз. Анавы Юнус деген хынзыр куле бере. Мени эриштирип ойнай.—Токъта, дей даа тёпеден учкъан шей бар да, не шу балам, а-а, таптым, айруплангъа минсетеджек ола мени. Эй, эй... Меним энди минеджек шейим белли амма, рабби сабырлы балам. Вакъытынъ тамам олмагъандже, бу фани дюньядан къысметинъ котерильмегендже къайда бараджакъсынъ?

Себиля апте кичкене фильджанчыкъларны толдурды.

— Ич, балам, болдурып кельгендирсинъ, къаве ёргъун-

лыкъны тез савуштыра. Мен балаларны асыл алыштырмайым къавеге, оларгъа чай олса еткен. Айрием бинъдебир мусафир хатиричюн иче. Юнус агъызына алмай. Айды, даа яш олар. Къаве ичмекнинъ де вакъыты келир. Сонъ билирлер онынъ леззетини...

— Себиля апте, мен сизге чокътан берли бир шей айтаджакъ олып юрем, бир келишик вакъытыны тапамай эдим.

— Айт балам, айт. Хайырлы шей олсун.

— Айриени истеп кельдим. Мен де бир янъгъыз адамым. Эбет, яш олгъан сонъ...

— Вай, балам, ниетинъ яхшы, амма, шимдикининъ яшлары пек законджылар. Озьлери тапалар, озьлери чыкъалар. Базы бирлери исе, чыкътым дегендже айрыла да келелер. Мен къарышмайым балам. Озю разы олса, ишинъиз онъына кельсин! Алла эр кесни чифт яраткъан. Эбет, онынъ да бардыр бир ерде хысмети. Я сиз, сормакъ айып олмасын, не вакъыт айырылыштынъыз?

— Менимки ольдю. Мен дженкке кеттим, сагъ-селямет къайтып кельдим. О исе койде бомба тюбюнде къалып ольген.

— Алланынъ раметинде олсун. Эбет, балам олды ойле шейлер. Бизим коюмизнинъ устюне де патлагъан эди. Адамларгъа зарар кельмеди, маллар къыйыр-чыйыр олгъан эдилер.

Къапыда Юнус пейда олды.

— Кель балам, ич сен де бир къаве,— деди Себиля апте о селямлашкъан арада. Юнус къаве истемегенини ве къарыны токъ олгъаныны айтты.

— Мына яшлар бойле баштан чыкъалар,— деди Себиля апте дарылып.— Эки куннинъ биринде бу бала мен токъым, деп келе. Ёллар ичинде ким сыйлай оны бильмейим. Къызынъ олса, эль эвинде яттырма, огълунъ олса, эль ашына таттырма,— деп текекель айтмагъанлар. Ёлларда сыйланып юрмекнинъ сонъу быралкъылыкътыр.

— Мени бедава кимсе сыйламай ана. Бир адамнынъ эвине тель тартып, лампочкасыны къоймагъа барсам, о ашатмагъандже эвинден чыкъармай. Бу да деделеримизнинъ кунюнден къалгъан адет дегильми? Мен ниметтен буюк дегилим. Озюнъиз огреттинъиз. Сонъ, не япайым, бираз къапынам, чыкъа да кетем.

— Айды, яхшы, ач олма да балам, токълыкънынъ зарары ёкъ.

— Тек ичмесин,— деп кѳошты Арсланов.

Юнус, Арслановны озгъарып чыкѳты. Тышта кѳаранлыкѳ. Совхознынѳ электрик лампочкалары узакѳтан бакѳкѳанда коктеки йылдызлар киби липильдеп туралар. Арслановны бугунѳ, ничюндир, о якѳкѳа, о ярыкѳларгѳа тараф тарта. Анда, Ленин сокѳагѳында медпункта, Айрие бир озю отура. Сабагѳа кѳадар медпунктынѳ телефонь башында отурып, татлы юкѳусындан марум кѳаладжакѳ. Керек. «Эр кеснинѳ бир хызмети бар. Эр хызметнинѳ джемиет ичюн, халкѳ ичюн эмиети бар. Олар бизим сагѳлыгѳымыз ичюн кѳайгѳыралар. Олар бизге омюр берелер, кучѳ берелер. Биз де онынѳ кѳарувьны тарлаларда озь эмегимизнен кѳайтарамыз. Дюнѳя дегени, аят дегени де шу экен. Эр шей бинѳ-бир алкѳалы кѳавий зынджыр киби бири-бирине кѳуралып, багѳланып кете. Зынджырнынѳ бир ери узюльдими, оны аман кѳурамакѳ керек ола. Айрие де шай, телефон башында отура, амма, бутюн кучи ве гѳайретинен шу зынджырнынѳ узюльмемеси ичюн кѳайгѳыра».

Арсланов бираз даа тюшюнди. Юнус эвге кѳайткѳан сонѳ, о джебинден сигарет чыкѳарып агѳызына кѳапты. Серник чертип якѳаджакѳ олып чекишти, якѳамады. Дагѳлардан эскен ель онѳа кедер этти. Аркѳасыны айланып, авучларынен агѳызыны кѳапагып нейсе тутандырды. Бир чекип алды. Сигарьынѳ уджу кѳызарып кетти. Озюнинѳ адымлап башлагѳаныны дуймай кѳалды. Эвине дегиль. Совхозгѳа тараф, Ленин сокѳагѳына...

О Айриеге барып озь юрегини ачмакѳ истеди. «Мен оны бегенем. Бутюн адети ве эрекетлери манѳа биринджи севгимни хатырлата. Тербиели кѳадын. Озюни тутмагѳа биле. Себиля аптенинѳ айткѳаны пек догѳру. Озюнен корюшип, анѳлашмакѳ керек. Я барып да, меним теклифимни ред этсе? Екѳса, бармайыммы экен? Екѳ барам. Йигит деген йигит, догѳрулгѳан ёлундан кѳайтмаз! О, дюльбер, тербиели олса, мен де ярамай адам дегилим...»

Арсланов бу тюшюнджелеринен медпунктынѳ алдына келип токѳтады. Пенджереде ярыкѳ корюне. Тышта кимсе кѳалмагѳан. Гедженинѳ тынчлыгѳыны ялынѳыз «Тузлы голь» тарафтан арды узюльмеден кѳычырыкѳлап тургѳан бакѳаларнынѳ сеси боза. Айванлар, не керек сизге бу замет? Кѳычырып алып туралар. Екѳса олар бундан бир зевкѳ алалармы? Итимал. Я оларнынѳ шимди

кимге зарары тие, Арслановкъамы? Аксине, онынъ рухыны котерелер. Санки дерсинъ:— Кир, Самедин агъа, тюшюнип отурма!— дейлер онъа.

Айрие медпунктнынъ софасында аякъ давушы дуйды. Еринден туруп къапыны аралыкъ этип бакъты. Арслановны корьгенинен кери къайтып, стол башына отурды. Къолуна расткельген «Ич хасталыкълары» китабыны алды. Эки козюни китапкъа тикип турса да, бутюн дикъкъаты Арслановта эди. «Бу адам манъа кене джын лафы этмеге келе гъалиба»,— деп тюшюнди о.

Арсланов яваштан къапыны ачты:— мумкюнми?— деди ве Айриенинъ джевабыны беклемей ичери кирди.

— Окъуйсызмы?

— Ёкъ, бакъаларнынъ зевкълы йырларыны динълеп тура эдим. Айванчыкълар кученип-кученип къычырышалар. Бир де ошыма кете, олар манъа дерсинъ аркъадашылыкъ этелер.

Арсланов стол устюнден Айриенинъ ташлагъан китабыны алды. Бир къач саифесини ачып бакъты «медицина» экен деп кене столгъа къойды.

— Сизге техникумгъа кирмек керек, Айрие,— деди о лафыны неден башлайджакъыны бильмейип.

— Манъа энди бир шей керекмей,— деди Айрие кестирип.

— Худжур лаф этменъиз. Бу яш чагъынъызда, энди дюньянынъ зевкъыны сюрип яшайджакъта, о насыл лаф?

— Айса, мынавы стол башында чокъ зевкъ корьмеге мумкюн. Эр кес татлы юкъуда, мен отурам бакъаларны динълеп.

— Айткъанынъ бир тарафтан догъру Айрие. Янъгъызылыкъ пек зор экен. Асыл дюньягъа козюнъ ёкъ. Мына, мен де юкълап оламайым, эвге киреджегим кельмей. Доландым, доландым, сизге бардым. Сонъ кене эвге къайталмадым бу якъкъа айландым. Айрие, афу этинъ манъа мен сизнен бирге аиле тизмеге, къадын-ходжа олып яшамакъны теклиф этмеге кельдим. Эгер сиз меним юрегимни анълап, теклифиме разы олсанъыз дюньяда энъ бахтлы кишилерден саяджагъым озюмни. Сиз совхозгъа кочип кельгенинъизден берли мени бу фикир, бу тюшюндже къыйнай. Энди ачыкъ лаф этмеге сыра кельди, деп бугунъ бу якъкъа айландым. Къабаатым олса багъышланъ! Истесенъ сёг, Айрие, истесенъ ур! Бизге бу ерде пенджеренден бакъып тургъан ай ве йылдызлардан башкъа кимсе шаад-

лыкъ эталмаз. Меним бир кѡбаатым бар, о да шу ки, бегенем сизни.

Айрие енгильден кульди де:

— Мен эндиден сонъ эрге чыкъмайджагъым. Чыкъсам да мени бегенген адамгъа дегиль,— деп ташлады.

Айриенинъ бираз эркеленип, йымшакъ джевап кѡйтаргъаныны корьген Арсланов даа зияде джесаретленди.

— Айса, севгенгеми? Бир кереден адамгъа севем демек, кѡыйын шей.

— Не севгенге, не де бегенгенге!— деди Айрие кулюм-сиреп.

— Чыкъаджакъ олсанъ, эм севгенге, эм бегенгенге чыкъмалысынъ!— деди Арсланов ве ерге бакъты. О, Айриенинъ лафларындан озюни бираз кѡлайсыз алда дуйды. Энди айтмагъа сѣз тапмагъан киби сусып кѡалды. Сонъра Айрие джиддий тавурнен Арслановкѡа бакъты да:

— Бир шей айтып оламайым сизге. Мен янъгъыз дегилим. Балам бар,— деди.

— Бала менде де бар, Айрие. Сен оларгъа аналыкъ этип олсанъ, бабалыкъ борджыны мен устюме алам.

Айриенинъ башы ашагъы эгильди. Кирпиклери агъырлашкѡан киби олдулар ве яваштан козьлерининъ устюне саркътылар. Онынъ козьлери юмулгъанда, акъбардакъ киби бетини яраштыргъан сия кѡашлары кѡарылгъач кѡанатлары киби ачылып кеттилер, даа тесирли, даа дюльбер олып корюндилер. Бираз сукюнеттен сонъ, кирпиклерининъ уджларында саба тютюн япракълары устюнде йылытырап тургъан чыкъ данечиклери киби козьаш тамчылары пейда олдулар. Булар — кѡуванч, ёкъса яныкъ козьашымы? Бильмек кѡыйын эди.

VII

Арсланов тютюн аранында ишчи кунюнинъ екюнини эсапламакѡта эди. Кѡайдандыр, Молдабай пейда олды. О руль башындан турмайып Арслановкѡа кѡол саллады.

— Самедин агъа, бу якъкѡа кель, директор чагъыра!— деп кѡычырды.

Каштановнынъ кабинетиде Кѡурбанбеков, Еремеев, Макъпуле ве тютюнджилерден эки киши даа отура эдилер. Арсланов киргенинен директор шойле деди:— Мына, достлар, сиз ярын саба Еремеевнинъ ёлбашчылыгъы алтында ёлгъа чыкъасыз. Он кунъ девамында Озьбекистан-

нынъ Ургут тютюнджилери арасында оладжакъсынъыз. Оларнынъ илери иш усулларынен танышып, озъ теджрибенъизни зенгинлештирип келеджексинъиз. Бизим совхознынъ шараитына уйгъун кельген бутюн янъылыкъларны менимсемеге тырышынъыз. О ернинъ тютюнджи эмекдарларынен фикир алышып-беришинъиз. Эбет, анда баргъан сонъ, къадимий Самаркъанд ве Бухара шеэрлерининъ тарихий абиделерини корерсинъиз. Саба бухгалтериядан документлеринъизни ве паранъызны алып, ёлгъа чыкъарсынъыз. Анълашылдымы?

Арсланов ичюн бу меселе бекленильмеген бир шей олып чыкъты. Онынъ бригадасы даа якъында тютюн къырмагъа башлагъан эди.

— Мумкюн олса, мени къалдырынъыз, Андрей Андреевич, тютюн къырмагъа...

— Мумкюн дегиль. Директор айттымы, битти!

Макъпуле бу йыл биринджи кере бригадир олса да, онынъ тютюнлери пек яхшы бойгъа кеттилер. Арслановнынъ тютюнлери онынъкине коре бираз, зайыфча. Не къадар зайыф олса да, о былтыркинден эксик берекет беклемей. Арслановнынъ бригадасында еди гектарлыкъ бир тарла бар. Ничюндир, шу тарланынъ тютюнлери Арслановнынъ юрегине ятмай. Япракъларынынъ туюсуни ве осювини бегенмей. Бунынъ себебини бильмек ичюн, о акъшам-саба шу тарладан чыкъмай. Шимди он кунге кетеджек. Он кун тарлада олмайджакъ. Он кунь бригада азаларынен корюшмейджек, япкъан ишлерини бильмейджек!

Каштановнынъ кабинетинден чыкъкъанлары киби, Арсланов догъру озюнинъ ярдымджысына ашыкъты. Эмирвели эвинде ёкъ эди. Къайда олгъаныны да бильмейлер. Айланып Ленин сокъагъына чыкъты. Медпунктнынъ янына кельди. Токъталды. Ёкъ, бугунь Айрие невбетчи дегиль. Куньдюз чалышты, эвинде олса керек. Адымларыны тезлештирди. Шакъамы санъа, ярын Озбекистангъа кетеджек. Гедже озъ бригадасынынъ адамларынен, ич олмагъанда ярдымджысынен корюшмейип, оларны бираз тенбилемегендже ёлгъа чыкъмакъ мумкюнми? Арсланов буны ольсе япмаз. О бутюн гедже юкъламаса-юкъламаз, лякин, ишини бир сырагъа къоймагъандже ёлгъа чыкъмаз.

Макъпуле де ойле. Директорнынъ кабинетинден чыкъкъанынен козьден гъайып олып кетти. Онынъ бахтындан ярдымджысы Теслиме эвинде эди.

— Тютюн кырувны чабиклештирмек керек,— деди Макъпуле онъа.— Тарлада тютюн чокъ. Аранда тютюн ятып къалмасын. Чыкъарув, къурутув ишлерине, джаным, Теслиме мукъайт ол. Кырылгъан тютюн шу куню теменлерге тизилип битирильсин. Экинджи куньге къалгъан тютюн кейфиетини джойгъандан башкъа, тарладаки адамларны да иштен сувундыра. Буны сен яхшы билесинъ. Баягъы тютюн зифири къокълагъан адамсынъ. Анълаштыкъмы, Теслиме? Айды, сагълыкънен къал. Не кетирейим санъа?

— Эгер, кыйын олмаса, бир махарнелик джевиз кетир. Огъурлы ёллар олсун!

Макъпуле догъру эвге къайтты. Онъа азырланмакъ, джыйшырмакъ керек эди.

Арслановнынъ Айриеге япкъан теклифинден Макъпуленинъ хабири бар эди. Себия апте ве Юнус бу меселеге къарышмайлар. Эписини Айриенинъ озюне ташлайлар. Не ичюнدير, Макъпуле де индемей юре. О достынынъ бахтыны истемейми? Ёкъса, оларнынъ келеджегине ишанмаймы? Буны анъламакъ кыйын. Къадын деген къадын, индемей юрдими, биль ки, онда бир гизли шей бар. Умютсиз ерден бир патлакъ чыкъарыр. Бойле къадыннынъ къальби кыйыш олса, яманлыгъыны бекле, темиз олса, яхшылыгъыны. Я онынъ къальбини къайдан биледжексинъ? Иш, иштен кечкен сонъмы? Айрие Макъпуледен бир вакъыт яманлыкъ беклемей. Онъа бутюн вакъыт ишанып кельди, эм ольгендже ишанаджагъыны айтып тура. Мурадасылнынъ эляк олувы онъа къарардан зияде тесир этти. Макъпуле бусь-бутюн денъишти. Рухтан тюшти. Ондан себеб бу якъкъа кочип кельди. Унутмакъ истей. Унутамай. Къанынъ ве джанынънен севген адамынъны кьолайлыкънен унутып оламай экенсинъ.

Бир умютим, бир ишанчым бар эди, о да кетти элимден,— дей о Айриенен сырдашкъанда. Акъикъатен, шай олып чыкъты. Мурадасыл сагъ олгъан олса, шубесиз Макъпулени аладжакъ эди. Эм бири-бирине ляйыкъ эдилер. Айрие буны яхшы биле ве анълай эди. Онынъ ичюн де Мурадасылнынъ фикирини бир кереден кесип ташлады. Бу сыр Айриенинъ ичинде омюрлик къалды. Оны ялынъыз Айрие ве Таубасы ёлунынъ кенарындаки акъкъайын береги биле. Айрие, бу сырны достунынъ хатири ичюн, онынъ Мурадасылгъа олгъан темиз къальбини яраламакъ ичюн сакълай. Шимди Макъпуленинъ индемей юр-

генине Айрие бираз чийленип башлады. Айрие Арслановны бегене. Онынъ акъылына, бильгисине, ишкирлигине сукълана. Онынъ эльде эткен мувафакъиетлерине къувана. Себия апте исе, онынъ сыра бильгенини, инсаниетлигини айтып битирамай. Лякин, Айрие, онъа даа сёз бермеди. О тюшюне. Меселеге сабырнен янаша. Агъызы сюттен бир кере пишти, бир даа янъылмакъ истемей. Къадын олмакътан башкъа, мында ана олмакъ, эм огей баланынъ анасы олмакъ керек. Я Фидане? Онъа да бабалыкъ япа биледжек акъикъый инсанны тапмакъ керек. Айриенинъ къулагъында Арслановнынъ сёзлери гедже-кунъдюз чынъламакъта. «Сен аналыкъ япып олсанъ, мен бабалыкъны устюме алам». Не къадар буюк, не къадар тесирли ве инсаниетли сёзлер! Эгер бу сёзлер акъикъатен юректен чыкъкъан олсалар, о вакъыт, Айрие озюнинъ бахт къапысы ачылгъанына шубеленмейджек. Айриенинъ Арслановкъа бир кереден разылыкъ бермегенининъ эсас себеблеринден бири де, мына шу эди.

Макъпуле эвге кельгенинен ярын саба он кунъге кетеджеклерини айтты ве азырланмагъа башлады. Юнус аш ашап отура эди.

— О-о, энъиштем мени де алмазмы экен янына?— деп эришти о.

Азбарда машина пейда олды. «Алсаба» колхозынынъ машинасы. Рульде Молдабай отура. Янында Арсланов. Олар аулгъа барып кельгенлер. Молдабайны анда танымагъан адамы ёкъ. Бир эвнинъ янында эчкилер ве къойлар тура экен. Молдабай шу ерде машинаны токътата.

— Ангисини бегенесинъ?— дей Арслановкъа. Сонъра малларнынъ ортасына кире, башында кичкене къашкъасы олгъан эчкининъ елинини тутып бакъа.

— Мынавы эчкини бегенесинъми?— дей.

— Сен бегенсенъ олгъан,— дей Арсланов.

Молдабай эвге кире, саибини чагъырып тышкъа чыкъара. Онъа къазахча бир шейлер айта ве Арслановнынъ къач кунъ эвельси берген парасыны чыкъарып къазахнынъ къолуна туттыра. Къазах параны саймайып къоюн джебинен тыкъа. Сонъра Молдабайнен экиси ярдымлашып эчкининъ аякъларыны багълап машинанынъ кузовасына ташлайлар. Молдабай ярын Арслановнынъ кетеджегини билип бу меселени бир къач саат ичинде япа...

Олар эчкини машинадан тюшюрп, Себия аптенинъ оджагъы янындаки къазыкъкъа байладылар.

— Хайырлы олсун! Мынавы мал сизинъки,— деди Арсланов Себиля аптеге — Юнус, кель бакъ, бегенсинъми?

— Корюниши зиянсыз, елини яхшы экен. Къачкъа отурды?— деди Юнус эчкининъ къашкъа башыны сыйпап.

— Парасы къолай. Шимдилик ананъ къаймакълы къавени ичип турсын. О якъыны мен къайтып кельген сонъ бакъармыз. Айды, сагълыкънен къалынъ. Саба бельки корюшип оламам.

Себиля апте оларны йибермейджек олды.

— Кирынъ ичери, бираз къапынынъыз. Борджюмек шорбасы пиширген эдим,— деп зорлады.

— Сагъ олунъыз, вакъытым ёкъ.

Арсланов машинагъа минмекте эди. Айрие онынъ янына келип:— Мынавыны ёлгъа алырсыз,— деп къолуна къагъыткъа сарувлы бир шей туттырды.— Хайырлы ёллар олсун!...

Машина совхозгъа тараф бурулды. Арсланов ярдымджысыны корьмеге ашыкъа эди. Анълашылгъанына коре Эмирвелининъ эвине кеттилер...

Саба идаренинъ алдына Еремеев, Арсланов, Макъпуле, Семенюк ве парник хозяйствосында чалышкъан рум къадыны Чеврениди топландылар. Олар, алель-аджеле ишлерини битирип, биринджи-автобуснен Алма-Ата аэропортына ёлландылар.

Партбюрода иши бакъылгъан сонъ, Матвей Петрович озюни пек худжур алып барды. Каштановтан эп четлеп юрди, Молдабайны иссе корьмеге истемей. Озь къабаатыны танып, ишине даа яхшы сарылдажагъы ве озюни акъламагъа тырышаджагъы ерине, аксине арекет этип башлады. Даа догърусы озюнинъ не япкъанындан хабери ёкъ. Бетерден-бетер олды. Иштен бир тамам къол чекти. Лякин, къуруджылыкъта онынъ зерре къадар тесири дуомай. Иш — озь ёлу, озь къызгъынлыгъынен кетмекте. Къайнакъ омюр девам этмекте. Къуруджылыкъ объектеринде гедже-куньдюз арекет, буюк джанлылыкъ ве энтузиазм укъом сюрмекте. Бригадирлер, ишчилер, механизаторлар, эписи, насылдыр-бир къыйынлыкъ чыкъып къалса, эр вакъыт Боденеджиевке мураджаатта булуналар, эр бир ишни онынъ ярдымынен аль этелер. Боденеджиевни кунь бою ялынъыз къуруджылыкъ объектеринде тапмакъ мум-

кюн. Онынъ бутюн иши, эгленджеси, зевкты, даа догърусыны айткъанда бутюн аяты къуруджылыккъа берильген. Бу яш тезден инженер дипломы аладжакъ. Лякин, о тек инженерлик зенаатынен къанаатленеджек йигитке бенъземей. Оны шимдиден аспирантура меракъландыра. Истидатлы адам ичюн эр ерде ёл ачыкъ. Онынъ алдына кимсе чыктып сед чекалмаз. Истидат — ташны тешип чыккъан, осюмлик киби, насыл бир шараитта олмасын, илле озь ерини тапар, кетиреджек файдасыны кетирир.

Матвей Петрович, озь прорабы Боденеджиевнинъ табиятыны яхшы огренди. Онынъ эр вакъыт кенди вазифесине намуснен янашаджагъыны биле. Боденеджиев иш адамы. Бош-богъазлыкъ севмей. О эр вакъыт бирде-бир шейнен мешгъуль. Матвей Петровични де яхшы, теджрибели инженер оларакъ сая ве урьметлей. Матвей Петрович буны анълай. Анълагъаны ичюн олса керек, ишке кельгенде ичтен янмай-куймей чалыша. О, эльбет де Боденеджиевке ишана. Ишангъаны яхшы амма, тамакъ сылатып юргени ярамай. Ишчилер Матвей Петровични бу меселеде зайыф олгъаныны билип къалдылар. Лякин о, озюни къолгъа аладжагъы ерине ичкиджиликке кеттикче зиядесинен берилип башлады. Патта-сатта эвине кельмеген геджелери де ола. Дирекциягъа энди бир-къач кере чагъырып тенбиледилер. Тенбилев файда бермеди. Тазирлеп башладылар. Хайыр, бир шей файда бермеди. Вазieti кунь-куньден бетерлешти. Эгер иште бир зарур меселе чыктып къалса, Боденеджиев оны кыдырып юрге ме меджбур олды. Кыдыргъанына коре, эвде тапса яхшы амма, кимерде эвде олмагъан сонъ, посёлкада да тапылмай...

Совхоз озь келири эсабына Медениет сарайы къурмагъа къарар чыкъарды. Проект музакере олунгъанда Матвей Петрович бу ишке къаршы чыкты.

— Совхозда даа пек чокъ япыладжакъ ишлер бар. Аранлар япылып битмеди, ишчилерге яшамакъ ичюн даа чокъ эв къурмакъ керек, гараж керек, устахане керек... Шимди Медениет сарайынынъ не кереклиги бар? Эви олмагъангъа медениет керекми? Мен бу меселеге къаршым,— деди о.

Идаре азалары чувулдаштылар. Матвей Петровичнинъ айткъанынен разы олгъанлар да чыкты. Лякин, эксериет къаршы эди. Боденеджиев сёз алды. Эр кеснинъ къулагъы онда эди.

— Матвей Петровичнинъ айткъанына бакъаджакъ ол-
сакъ,— деди о,— бизге яшларгъа ятып ашагъы олъмск
керек. Медениет сарайы ялынъыз яшларгъа дегиль, бутюн
халкъ ичюн къурула. Бизлер, бир куннен, бир йылнен
яшамаймыз. Илери догъру адымлаймыз. Аранлар сов-
хознынъ проекти ве планы боюнджа муддетинден эвель
къурулмакъта. Эвлерге кочюрильмеген, ерлештирильмеген
бир къач къоранта къалды. Тезден оларны да «Алсабадан»
кочюрип ерлештиреджекмиз! Бунынъле, биз къол къа-
вушып отурмайджакъмыз. Йыл-йылдан совхоз кенишлей-
джек. Медениет сарайы бир йылда къурулып битеджеги
ёкъ. Онынъ кимсеге, шу джумледен шимди къурулмакъта
олгъан объектлерге де зарары тиеджеги ёкъ. Медениет
сарайы ичюн айырылгъан махсус пара бар, онынъ ичюн
Леспромхоздан айрыджа материал кетириледжек, онынъ
озь ишчилери, озь усталары оладжакъ. Бир къач йыл
ичинде бутюн объектлернен берабер, совхозымызда Меде-
ниет сарайы да яратыладжакъ! Буны кимге зарары бар?
Мен совхоз идаресининъ бу къарарыны джан-юректен се-
лямлайым!

Каштанов эр кеснинъ фикирини дикъкъатнен динъледи
ве озь сёзюни къыскадан битирди.

— Биз совхоз эмекдарларынынъ медений аяты ичюн
къайгъырмакъ борджлымыз. Оларнынъ эмегинен бу сов-
хознынъ негизи къойылды, оларнынъ манълай теринен
тарлалар ешерди, оларнынъ кучю ве гъайретинен эвлер
котерильди, аранлар, гаражлар тикленди. Оларнынъ мын-
да яшамагъа, бу топракъта гъурурнен юрмеге ве меде-
ний омюр кечирмеге акъкъы бар. Медениет сарайы да бу
адамларнынъ къойгъан эмеги нетиджесинде къуруладжакъ
ве оларгъа хызмет этеджек. Совет адамы яхшы чалыша ве
яхшы да раатланмакъ борджлы. Мен сизинъ тсклифлеринъ-
изге къошулам. Проект кене бир даа къайта баштан бакъ-
ылсын. Совхозымызнынъ ерли шарайты, онынъ базы-бир
табий хусусиетлери ве ресурс меселелери козьде тутул-
сын.

Тарлада тютюн къырувнынъ къызгъын маали эди.
Ава бирден булутланып кетти. Булутлар пек тез арекет
этелер, эм могурьдекленип, сиярып дагъларгъа тараф
якъынлашалар. Тютюнджилер абдырашып сонъки десте-
лерини сепетлерге толдурдылар.

— Бурчакъ олмагъайды баре,— деди Теслиме тѣнеге бакъып.

Чокъкъа бармадан кучьлю ель эсти, онынъ артындан ири ягъмур данелери тюшип башлады. Кок сим-сия. Ягъмур кетѣикче кучьлешти, элекнен къуйып башлады. Эм, ойле тез токътайджакъкъа бенъземей. Тютюнджилер анда-мында даркъалып, сакъландылар. Сагъанакъдап ягъгъан ягъмурдан ёлакъ аралары голленип башладылар. Япракълар ювулып ашагъы саркътылар. Къырлардан, дерелерден сель ташты. Бираз сакинлеген сонъ, сачын-дан тырнагъына къадар джибинген тютюнджилер таш ёлгъа чыкъып машинагъа толуштылар. Ягъмурнынъ бурчакъсыз кечкенине къуванып эвге къайттылар. Ишчи кунюнинъ сонъу ягъмурнен нетиджеленди. Ялынъыз тютюнджилер дегиль, бутюн объектлерде бир къач саат эвель иш токътатылды.

Акъшам, Каштанов ве Къурбанбековны Молдабай аулга давет этти. Анда оларны бешбармакъ беклей эди. Тамам вакъытында етип кельдилер. Къонакъбай балабан чёюн къазандан кевгирнен эт чыкъармакъта эди. Тёгерек сини устюнде тютеп тургъан обанен этни мусафирлернинъ алдына кетирип къойдылар. Адет боюнджа къойнынъ башыны энъ урьметли мусафирге буюра экенлер. Каштанов оны бир-эки чимчикледи, сонъра Къурбанбековкъа узатты.

— Сиз эт ашамагъа бильмей экенсиз, Андрей Андреевич,— деди Къурбанбеков ве къолундаки къой башыны парча-кесек этип кене Каштановнынъ алдына къойды. Софра башында эписи беш адам. Каштанов сини устюнде бувланып тургъан къой баджакъларыны, къабургъаларыны эследи де, даа келеджек мусафирлер олса керек, деп туюшюнди. Хайыр, башкъа кимсе кельгени ёкъ. Каштанов тоюп кенаргъа чекильди. Онъа аякъ къатлап отурмакъ къыйын. Бир аягъыны узатып, ястыкъкъа таянды ве элине пияласыны алып чай ичмеге тутунды. Къонакъбайлар эп зорлайлар.

— Неге емейсиз? Бу къой эти. Буны емей боладымы? Каштанов «тойдым» деген манада къурсагъыны сыйпап кулюмсиреди. Молдабайгъа янындаки къазакъ козюни къымып бакъты да:

— Биз къазакъдар эт джесенъ тисинъге киремен, тисинъге кирмесем тусинъге киремен, деп оны джалмай береди,— деп шахылдап кульди.

Арадан бираз вакъыт кечти, сини устюндеки эт обасы өп әксильди. Сонъра сорпасы ичильди. Къонакъбайлар да агъызларыны-бурунларыны сюртип янбашлап яттылар. Къазахча бир шейлер айтып, шакъалашып, чай сюзмеге башладылар. Сини устюнде къалгъан бир къач кесек этнинъ ягъы сувуп къатып къалмасын деп алып чыкътылар. Каштанов лакъырдыгъа къошулмаса да, оларнынъ кульгенине бакъып, куле. Чырайлары сытылгъаныны коръсе, онынъ да чырайы джиддийлеше. Ашагъан бир кесек этини азм эттирмек ичюн эп чайгъа зорлай. Лякин, къурсагъы уфюрильген къой киби тартылып къалгъанындан, о да аякъларыны узатып янбашламагъа меджбур олды. Къызгъын лакъырды, шакъа-кулькю, чай сюзюв ярым саат къадар девам этти. Каштанов Молдабайгъа бакъып, къайтмакъ керекмиз манасында ышмар этти. Къонакъбайнынъ бириси Каштановкъа къыйыш-къыйыш назар ташлады. Онынъ бети Молдабайнынъкинден бираз даа ялпакъча эди.

— Не дейсиз, мийман? Даа сапсем эт джегенмиз джокъ къу, къайтув да джокъ! Эт джеймиз, сонъ къайтабыз, тюшюндинъ би?—деди о.

Каштанов лафнынъ фаркъына бармагъан киби олып, индемени ве кене ястыгъына ясланды. Молдабайнен дигер къонакъбай ортагъа кене шу синиге эт толдурып кетирдилер. Къурбанбеков ястыгъындан котерилип турды, къонакъбайлар ве Молдабай эвельки ерлерине ерлештилер. Эписи Каштановны беклеп туралар. Шимди онынъ алдына къойнынъ тешюни айландырып къойдылар.

— Къана, алынъ, алынъ...

Чаре ёкъ. Къурсагъында ер олмаса да, Каштанов бираз даа къапынмагъа меджбур олды. Сонъра, кене чай пияласына япышты. Онъа зорлап башладылармы, о аман пияласыны косътерип, чай ичкенини айтып къуртула.

Сини устюндеки эт обасы экинджи кере ашалып темизленди. Артындан бирер чанакъ эт суву даа ичерек, агъызларыны сюртип, софраны алдылар.

Каштанов ве Къурбанбеков авагъа чыкътылар. Ягъмур орталыкъны кереги киби джибиткен эди. Ава зияде салкъынлашты. Тазе авада бираз нефес алгъан сонъ, къонакъбайларнен сагълыкълашып ёлгъа чыкътылар. Аулынъ четинде топракътан къалангъан кичкене тюкян бар. Онынъ алдында балалар топлангъанлар, недир сейир этелер. Янашадаки чукъур ерде баягъы ягъмур суву тыйналгъан.

Балалар бу кичкене гольчикнинъ этрафында ойнашалар. Машинаны корьгенлеринен ёлгъа таба джувурыштылар. Эписи къолларыны саллап бир шей косътерелер. Молдабай ерли халкънынъ, бала-чагъанынъ адетлерини яхшы билъгенинден машинаны токътатты ве топнен тургъан балаларгъа тараф кетти. Бакъса, сув ичинде эли-аягъы йиберильген бир адам ята. Молдабай онынъ омузларындан тартып сувдан чыкъарды.— Тур, аякъкъа!— деп бир къач кере силькитти. О козьлерини ачты ве кене айланyp сувгъа тюшти.

— Мен денъизджим, денъизджи сувдан къоркъмай,— деди о агъызы-тилини курмеклендирип. Молдабайнынъ чеккелешип тургъаныны корьген Каштанов ве Къурбанбеков онъа якъын кельдилер. Къурбанбеков къолундаки электрик фенерчигини якъып, сувдаки адамнынъ бетини айдынлатты. Оларнынъ козю алдында Матвей Петрович ята эди.

— Мен денъизджим, огълумны тапынъыз айдутлар!— деди о текрар. Каштанов, Къурбанбеков, Молдабай бир ан аякъ устюнде шашып къалдылар.

— Тез-тез машинагъа алып къойынъ!— деди Каштанов.

Молдабай онынъ къолтукълары астындан тутып, бар къуветинен котерип алды.

— Манъа тийменъиз, огълумны тапынъ желлятлар!— деп къычырыкълады о Молдабайнынъ кучлю къоллары астында чапаланып.

Совхозгъа кельгендже учеви де индемедилер. Оларгъа лаф этмеге сыра къалмады. Ёл бою резильнинъ зырылтысыны ве кимерде бир созып йиберген дамсыз макъамыны динълеп кельдилер.

Эртеси куню Матвей Петровични Алма-Атагъа деваланмагъа ёлладылар. Онынъ вазифеси прораб Боденеджиевке авале этильди.

Саба ава ачылды. Кунеш атешин шавлелерини ешилъ далгъалы тютюн тарлаларынынъ устюнден сепмекте. Топракъ тез къызып кетти. Бутюн осюмликлер, пиченликлер, къыр чечеклери къайта баштан джанландылар. Орталыкъ тазерди. Топракъ къокъусы, дерсинъ, бурнунъны йыртаджакъ...

Тютюнлер бир къач кунъ ичинде бир тамам пиштилер. Тарлаларда, аранларда иш кечке къадар девам эте.

Къырылгъан тютюнни шу куню тизип битирмек ичюн, къызгъын куреш кете. Орталыкъ тазерип кеткенине бакъмадан, ничюндир, Арслановнынъ еди гектарлыкъ тарласында тютюнлер солгъун корюнелер. Ягъмурдан сонъ эр бир тют тириледжеги ерине, тютюнден тепесине баргъандже солды ве япракълары жансызланып, ашагъы саркътылар. Эмирвели чапкъалай. Башкъа бригадирлерни чагъыра, субетлеше, лякин файдасы ёкъ. Тарланы мантар ургъан. Ягъмурдан сонъ мантарлар къуветленип, тютюннинъ «къан дамарыны» сувурмагъа башладылар.

«Не япмалы?» деди Эмирвели озь-озюне. «Самедин агъа да мында ёкътыр. Бу паразитлер санки онынъ кеткенини билип, бир геджеде тюртип чыкътылар».

О, тютюнджилернинъ бугунъ къырып толдургъан сонъки сепетлерини машинагъа юклеп йиберди. Озю бир даа тарланы айланып чыкъты. Саба къайсы тарлагъа тюшмек кереклигини белгиледи ве яваш адымларнен эвге догъру джёнеди. Энди акъшамнынъ къайнар вакъыты эди. «Алсаба» нен совхоз посёлкасынынъ арасындаки ёлнынъ эки тарафында ишчилернинъ къолунен яратылгъан яш ормандан серин ельчик эсмекте. Орман ёлагъынынъ аркъасында тютюн тарлалары узанып кетелер. Ёлнынъ кенарындан номай сувлу арыкъ акъмакъта. Арыкънынъ устюни чешит отлар, кампалар, бакъа япракълары, пане ве индже тал фиданлары къаплагъан. Ёлда кимсе корюнмей, сийрек-сепелек машиналар кечелер. Арыкънынъ кенарындаки ешилъ джап къаршысында бир бала ята. Эмирвели онынъ янына кельди. Къалпагъы тыгъырып джапнынъ ашагъысына тюшкен. Янында мектеп чантасы тура. Бала ойле татлы юкбугъа далгъан ки, дюнья янса къасыры ёкъ. Эмирвели оны тюртип уянтты. Бала абдырап чантасына япышты, сонъра къалпагъыны къыдырды.

— Бу ерде не япасынъ, Эскендер?— деди Эмирвели.— Къана, тур еринъден! Бакъчы сен онъа, бабам эвде ёкъ, деп ёллар ичинде юресинъми?!

Арсланов кеткенинден берли, Эскендер эр кунъ мектептен кечикип къайта. Битасы оны къапы алдына чыкъып беклей, сонъра къомшу балалардан сораштыра. Къыдырып тапмагъандже эвге кирмей. Заваллы, энди озюни зорнен алып юре. Бала артындан чапкъаламагъа чареси олмаса да не япсын? Эвляд, торун. Озю де бир дане. Оны бу яшына кетиргендже нелер чекти, нелер коръди... Шимди козюнинъ бебеги киби сакълап юргеге ыдырына.

Эмирвели онынъ къолундан тутып, эвлерине тараф алып кетти. «Алсаба»гъа якъынлагъанда къаршысына Айрие расткельди. Эмирвели, Эскендерни арыкъ янында юкълап яткъаныны, Айрие исе, оны къыдырып чыкъкъаныны айтыштылар. Эмирвели къайтты. Айрие баланынъ усть-башыны къакъты, къулакъларынынъ устюнден басып тургъан къыйыш къалпагъыны тюзетти, чантасыны омузларына кечирди ве лаф эте-эте эвге догъру адымладылар.

— Сен ничюн битанъны динълемейсинъ? О гъарип сени къыдырып бизим эвге кельди,—деди Айрие яваштан.

— Я сиз бизге не вакъыт келеджексиз? Бабам ойле деген эди. Мени алдатып кетти гъалиба. Буюклерге ялан айтмагъа оламы ёкъса? Эвде кимсе ёкъ. Бабам да, анам да. Битам сёге, къолларымны чимчий, агъырта...

— Ярамазланадырсынъ. Ярамаз балаларны кошеге отурталар.

— О-го! Мен энди балабаным. Кошеде Фидане отурсун. Сиз бизге кочип кельсенъиз Фидане де келеджекми?

— Сен оны севсенъ, агълатмасанъ, келир. Кошеде отуртсанъ кельмез.

— Биз экимиз берабер ойнармыз, берабер кошеде отурырмыз.

Айрие кульди. Эскендер козьлерини онъа тикти. Бакъты, бакъты, козьлерини Айриенинъ бетинден алмады. Аягъы томаргъа илишти, сюрюнди.

— Огюнъе бакъмай юрсенъ башынъны тешерсинъ,—деди Айрие.

— Сиз, Фиданеге ошайсыз. Кульгенде онынъ да абу ерчиклери оюла,—деди Эскендер ве пармагъынен янакъларыны косътерди.

— Я сен кимге ошайсынъ?

— Бильмейим.

— Сенинъ козьлеринъ бабанънынъ козьлери киби, сим-сия.

— Битамнынъ козьлери де ойле. О мени озюне ошата.

— Тыпкъы бабанънынъ озюсинъ.

Эскендер кульди. Онынъ къуванчлы кулькюсинден Айрие де пек мемнюн къалды.

— Мен ёлда сизни бекледим,—деди Эскендер кулькюси токътагъан сонъ.—Бекледим, бекледим... Юкълагъан къалгъаным.

— Ничюн беклединъ?

— Я эвге кельмейсиз де? Озюм алып кетеджек эдим,

— Мен сизге бугунъ бармам. Сен бизде ятарсынъ. Сени яхшы ювундырайым; урбаларынъны темизлейим, коресинъми, дѣгмелеринъ тюшип кеткен. Алдынъ ачыкъ, енълеринъ саркъкъап, бойле мектеп талебеси оламы?

— Сиз мени севсизми?

— Сен Фиданени севсенъ, мен де сени северим.

Олар догъру Айрисенинъ эвине кельдилер. Азбарда эки къартий. Эскендернинъ битасынен Себиля апте отура эдилер.

— Мына коресинъми бу баланынъ алыны-чулыны,— деди Месюде къартанай торуныны коръгенинен.— Олян, сен къайда юресинъ?!

Айрие онынъ элини-бетини ювуп эвге алып кирди. Фидане тышкъа джувурып чыкъты.

— Джаным, Себиля, сабийлернинъ бахты ичюн шуларнынъ баш къошмасына ярдым этейик. Экиси бири-бирине пек лаякъ. Экиси де окъумыш, экиси де культурныйлер. Той-мой деген шей керекмей. Олар яш дегиллер. Бир къач къарт топланайыкъ, никяхларыны къыяйыкъ, къавуштырайыкъ шуларны битсин, кетсин.

— Озьлери билирлер, Месюде. Мен Самединни пек бегенем. Мынавы эчкини кетиргенинден берли раат олдыкъ кеттик. Сютли экен. Озюмизден артып къала. Сагъ олсун, дюнья тургъандже турсын, таш тутса алтын олсун. Мен Айриенинъ мийини чокъуй-чокъуй бир олдым. Не созуп отуралар бильмем. Не къадар даа янъгъыз яшайджакъ булар? Йыллар тез кечип кете экенъ Коръчи бизим башымызны. Бармы ичинде бир къара сач? Къыналап да бакътыкъ, амма, кене агъарды. Яш олгъанда бильмей экенсинъ яшавнынъ къадирини. Санки дюньягъа дирек оладжакъсынъ. Лаяыгъынъ чыкътымы, бара къой. Яшагъанынъ янынъда къалыр. Кимге айтасынъ да, кимге анълатасынъ.

— Шимди эр кес чокъ биле, Себиля. Сенинъ айткъанынъ оларгъа бир капик. Эр кес гузельден-гузелини, яхшыдац-яхшысыны къыдыра. Бизим вакъытымызда эди о бет сакълап юрмеклер. Мен Самединнинъ бабасыны той олып кечкен сонъ коръдим, акъыз. Анам, бабам оны яхшы адам дедилер. Мен башымны астым да къалдым. Коръмеге пек авес эте эдим, амма, насыл коресинъ. Айып дедилер, масхаралыкъ дедилер, коръмеге ёл бермедилер. Бир кунъ анама ялвардым: «Ресимини тапып кельсенъиз, корейим», дедим. Анам гъарип сораштыргъан амма, о за-

валлынынъ ресими де ёкъ экен. Нейсе той эттилер. Алектет, шамата чыкъарып мени алып кеттилер. Бир кошеге къапаттылар. Сабагъа якъын юзюни корьдим, не япарсынъ. Талийим экен, деп алыштым. Козюнъни ачып ильк корьген адамынъа да алыша ве сарыла экенсинъ. Ана о вакъыт акъикъий севги сени бийлеп ала. Бири-биринъе тувгъандан да якъын олып къаласынъ. Бутюн омюримиз кечтикетти, бир керечик мен онъа сенсинъ, демедим.

— Акъыз, Месюде, о вакъыт акъайгъа сенсинъ, демек къайда? Айриенинъ бабасы мени алгъанда он еди яшында эдим. Омюримнинъ сонъунадже мен онъа «сенсинъ» демеген сонъ, бир кере не акъайым дедим, не де адыны айттым. «Эв, не айтасынъыз», «эв, бакъсанъыз бу якъкъа», мына бутюн вакъыт бойле чагъыра эдим. О софрада олмаса тамагъымдан аш кетмез эди. Не пиширсем онъа къаптырмагъандже джаным раат олмай эди. Эй, эй, Месюде, сен айтасынъ амма шимди заман башкъа, адамлар да башкъа. Сен озъ балалыкъ девиринъни шимдики яшлыкънен бир этмек истейсинъми? О вакъыт сенинъ неге акъкъынъ бар эди, гъарип? Устюнъдеки устюнъде, башынъдаки башынъда, ананънынъ этегинден тута да юре эдинъ. Шимди яшлар сербестлер, аятлары да гуръ кече. Истеген зенаатларына кетип окъуйлар, севген адамларына эрге чыкъалар. Сен айтасынъ амма Месюде, мен оларгъа пек сукъланам...

— Себиля, джаным, сенинъ айткъанларынъа мен де къанам. Лякин бойле бир заманда да ёл сипиркилерининъ тапылгъанына янам. О куню Семенюкнынъ буюк огълуны расткетирсем, гуллер арасында тегенек корьген киби олдым. О арсызнынъ анасынынъ башына кетирмеген белясы къалмады. Ашай, кийине, лякин кимнинъ ниметинен, кимнинъ эмегинен тамакъ сыйлагъаныны, кийинип-къушангъаныны тюшюнмей. Элеми де келеминден чокъ ола. Амма, сорагы, богъдайнынъ къайда оськенини билеми экен?

— Ойле сойынынъ олуге де файдасы ёкъ, тириге де. О тыпкъы бир акъ терек. Ичтен къувуш олса да, тыштан шувулдай бере. Инсаниетликтен хабери олмагъан, тек озюни бегенип юрген махлюкъны да ер котере даа, Месюде. Ойле тенбель, арамтамакъ ич кимсеге керекмей. Мына шунынъ ичюн де Семенюкнинъ, Къуртвелишанынъ огъланлары мында озъ ерлерини тапмай юрелер.

— Ер мераметли, Себиля. О эр кесни котере. Эр шейи де озъ багърына сыгъдыра. Бизде ойлелерине патта-

сатта расткелине, лякин яхшы адамлар пек чокълар. Яхшы адам этрафтакине эр даим яхшы козьнен бакъа. Бу мельунлар исе шундан файдаланалар. Олар алидженап адамларнынъ алдына бир такъым зорлукълар кетирип чыкъларалар. Олюге итибары олмагъандан тириге сайгъы кыдырма. Бу совхознынъ янъы къурулып башлагъан вакъыты эди. Этраф чыр-чыплакъ. Не эв, не терек. Мынавы бизим отургъан йылгъа бою исе, ташлы, чакъыллы бир ер эди. Адамларымыз шу ташлы-чакъыллы ерде эвлер тиклеп, тереклер отуртып, аят къурмагъа башладылар. Бизден бираз авлакъта, койнинъ юкълары башындаки яхшы ерде исе, мезарлыкъ япкъанлар, акъыз. Мен шаштым. Бир кунъ огълума дейим: бу ташлы ерден кечиниш кыдыргъандже анавы яхшыджа ерге бир шейлер эксенъиз олмаймы? Билесинъми о манъа не деди? «Бизим джанымыз сагъ. Сагъ адам исе, эринмесе, тенбеллик этмесе таш устюнде де кечиниш къурар. Амма, олюлеримиз бу дюньядан кеткенлер, оларгъа башкъа бир шей керекмей, барсын яхшы, йымшакъ топракъта ятсынлар.» Мына бизде ойле адамлар да бар.

— Дюньяда яхшылыкъкъа етер не бар я? Мен акъ айымней къыркъ йыл омюр эттим. Бир кунъ мени ынджытмады. Урьметиме урьметнен джевап къайтарыр эди. Къыркъ йылда мен онъа бир кере джики-джикине сыйпалып букленмеген, я да онъ тарафы чевирильмеген чамашыр бермедим. Иштен къайткъанда исе, чаресини тапсам, эр кунъ къапы алдына чыкъып оны къаршылар эдим.

— О да акъылгъа ятаджакъ шей дегиль эди. О заманынъ худжур адетлерини макътама манъа, Месюде. Мен сенден бираз яш олсам да, анамнынъ тѣккен козьашларыны аля даа хатырлайым. Биз энди ашымызны ашадыкъ, яшымызны яшадыкъ. Балаларымызнынъ бугунъки бахтыны коресинъми? Оларнынъ къуванчы, бизим де къуванчымыз...

Фидане кенарда ойнай эди. Бир эвчик ясагъан. Ичинде къокъласыны ерлештиргъен. Эвчикнинъ янында аювчыгъы тура.

— Не ясадынъ къызым?— деди Месюде апте.

— Мынавы аюв эвге кирип къокъламны хырсызлап кетеджек ола,— деди Фидане.

— Хырсызламаз о. Кель къызым бу якъкъа.

— Масал айтырсызмы?

— Айтырым, кель.

Фидане келип Месюде къартанайнынъ тизине ятты. Козьлерини сюзип масал динълемеге азырланды.

— Бир заманда бар экен, бир заманда ёкъ экен. Балабан бир дагънынъ четинде кичкене бир койчик бар экен. О койчикте бир къадын яшай экен. Эки кызы бар экен. Бир огей экен.

— Ойле дегенинъ не?

— Озюнинъ кызы дегиль, башкъа ананынъ кызы экен. Оны ич де севмей экен. Бир кунъ алдатып дагъгъа алып кеткен. Къолунда эки дане къурып-къаткъан къабакъ бар экен. Дагънынъ тёпесине чыкъкъан. О къабакъларны бир терекке илип къойгъан.

— Мына, кызым сен бу къабакъларгъа бакъып тур, мен барып одун джыйяйым. Олар тыкъыр-тыкъыр эткенде мен келирим, деген. Кеткен амма, бир даа къайтып кельмеген. Бу оксюз кыызчыкъ беклеген-беклеген, ушюген. Энди къаранлыкълашып башлагъан. Кыызчыкъ къоркъкъан ве агълагъан: «Тыкъыр-тыкъыр эткен къабачыгъым, мени быракъып кеткен аначыгъым» деп агълагъан. Бир даа бакъса бир узун сачлы къартанай кельген.

— Не агъдайсынъ, кызым,?— деген онъа.

— Анам мени ташлап кетти, онъа агълайым,— деген кыызчыкъ.

— Башымны бакъасынъмы кызым?

— Ятынъ тизиме бакъайым.

Шу ерден къартанай бу кыызчыкъны алып кеткен. Балабан бир падиша сарайына кетирген. Падишанынъ огълу оны пек бегенген. Кыызчыкъны кийиндиргенлер, сачларыны индже-индже орьгенлер, уджларына алтынлар такъкъанлар, башына алтын фес кийдиргенлер. Сонъра падишанынъ огълуна эвлendirгенлер.

Огей кызыны бойле ташлап кеткен анасы бу шейлерни эшиткен.

— Токътачы сен,— деген о,— барып озъ кызымны да шу дагъгъа ташлайым. О да шай алтынларгъа гъаркъ олып яшасын.

Туткъан кызынынъ къолундан, догъру шу къабакъларнынъ янына алып баргъан.— Бу ерде мени беклеп тур кызым. Къабакълар тыкъыр-тыкъыр эткенде мен келирим, деген. Кеткен, амма бир даа къайтып кельмеген. Кыызчыкъ ушюп, къоркъуп башлагъан. «Тыкъыр-тыкъыр эткен къабачыгъым, мени быракъып кеткен аначыгъым» деп агълагъан. Бакъса, бир узун сачлы къартанай кельген.

— Кене шу къартанаймы?— деди Фидане козьлерини тегереклендирип.

— Эбет, эбет кене шу къартанай. Не агълайсынъ къызым?— деген онъа.

— Анам мени ташлап къачты, онынъчюн агълайым,— деп джеваплангъан къызчыкъ.

— Башымны бакъасынъмы?— деген къартанай.

— Къурт тюшсин башынъа!

Къыз ойле дегенинен бу къартанай оны панджаларынен урып ашамагъа башлагъан. О къартанай дагъ анасы экен. Къызчыкъны ашагъан да, кемиклерини бир ерге обалап къойгъан.

Бир къач вакъытлардан сонъ, къызнынъ анасы, барып бакъайым, балама не олгъан экен деп дагъгъа кельген. Бакъса, къабакълар тыкъырдап туралар, амма къызчыгъынынъ тек кемиклери къалгъан. Агълай-агълай эвге къайткъан да кельген.

— Битtimi? Я оны ничюн ашагъан къартанай?

— Тербиесиз экен, тенбель экен, балам. Башыны бакъмагъан.

— Ятынъ сизинъ башынъызны бакъайым,— деди Фидане. Месюде апте кульди.

— Айса, бир масал даа айтынъ.

— Энди къайтайыкъ балам, кеч олды. Эскендер, кель бу якъкъа! Эвден Айрие чыкъты.

— Мен оны джувундырып яткъыздым. Къалсын бизде. Урбаларыны темизлеп къояйым, саба мындан турып мектепке кетер.

— Айды, яхшы. Къалсын балам,— деди Месюде къартанай. Сонъра Фиданенинъ козьлеринден опип, эвине къайтты.

VIII

Кунъдюз ава булутлап, кене бир къач сагъанакъ ягъмур кечти. Ишчи кунюнинъ сонъу. Тютюнджилерге онынъ чокъ зарары олмады. Энди эписининъ сепетлери толгъан эди. Эгер гедже ягъмаса, саба кене эрте ишке чыктып, ёлакъ араларында истегенинъ киби чалышмагъа мумкюн. Гедже ягъмур ягъса, чаре ёкъ, эртеси кун ирлер саркъкъандже беклемек керек ола.

Эмирвели аранда сепетлерни бошатып къайтмакъта эди. Сокъакъларда хусусан идаренинъ янында адамлар бири-бирине къарышып юрмектелер. Эр кимнинъ бир иши бар. Кимиси бухгалтериягъа кире, кимиси директорны беклей, кимиси ягъмурдан сонъ, серин авада кезинмеге чыкъкъан. Автобус токътагъан ерде беш-он адам сонъки рейсни беклеп турмакъта. Олар сабырсызланалар. Базылары сыкъ-сыкъ саатке бакъалар, базылары шакъанен вакъыт кечирслер. Автобус озъ вакъытындан ярым саат кечикип кельди. Ягъмурунынъ онъа да тесири олса керек.

Ёлджулар бири-бири артындан тюшип башладылар. Огде, аякъ устюнде тургъанлар тюшкен сонъ, къапыдан Еремеевнинъ башы корюнди. Онынъ артындан Арсланов, Семенюк, Чеврениди, Макъпуле ве бир къач ёлджу даа тюштилер. Республикаларара он кунълик теджрибе бригадасы къайтып кельди. Автобуснынъ кельгенини корип, ёл кенарында токъталып тургъан Эмирвелининъ козюне Арсланов илишти. Арсланов автобустан тюшкенинен чемоданыны ерге къойып папирос якъаджакъ олып къармаланды.

— Олян, хош кельдинъ акъай! Чырайынъ янгъан, дженюптен кельгенинъ корюлип тура, даа зияде къараргъансынъ,— деди Эмирвели.

Олар агъа-къардашлар киби къуджакълаштылар. Бири-бирлерининъ бетине бакъып, бираз индемей турдылар. Сонъра, Эмирвели чемоданны алып, Арслановнынъ эвине таба адымладылар. Ёлда Эмирвели ишлернинъ кетишаты акъкъында, къырылгъан тютюннинъ аранда ятып къалмагъаныны ве нязет мантар меселесини айтты. Мантар лафы чыкъкъанынен Арсланов тарс токътады. Агъызындаки папиросыны чыкъарып атты ве енгильден сёгюнип алды.

— Юрь, кеттик тарлагъа!— деди о сертейип.

— Шимди тарлада не япаджакъмыз, Самедин агъа? Балчыкъкъа батар къайтырмыз. Ёкъса, сиз баргъанда тютюнлер тириледжекми? Саба ола, хайыр ола.

Арсланов шубели козьлерини Эмирвелиге тикти. Индемеди, джебинден бир папирос даа чыкъарып, окесинден силекийленип къалгъан дудакълары арасына къыстырды ве джеплерини къарыштырып башлады.

— Не къыдырасыз я?— деди Эмирвели онынъ шашмалагъаныны корип.

— Берчи, сернигинъни, керчек сен чекмейсинъ де.

— Я серник кьолуньызда да?

— Эй, анасыны, бу кьадар матювлик ола экен даа.

Арсланов кьолундаки серник кьутусыны саллап бакьты, ичинде бир шей ёкъ эди. Кенаргъа фырландырып ишберди. Даа деми агъызындан чыкьарып ташлагъан папиросынынъ тюбю ерде тютеп турмакьта эди. Эмирвели узанып алды ве Арслановнынъ кьолуна туттырды.

— Айды, кеттик,— деди Арсланов папиросыны тутандыргъан сонъ.— Сен догъру айтасынъ. Иш ишлигинден кечкен сонъ, истесенъ озюни кьаядан ташла. Еди гектар... Энъ аздан етмиш центнер! Бу бизим бригада ичюн буюк гъайып. Гъайыбы турсын, я масхаралыгъыны айтмайсынъмы?

— Эр шейде масхаралыкьны ортагъа чыкьарып кьойманъыз, Самедин агъа. Тютюнде мантардан башкьа даа чешит хасталыкълар ола. Чокъ шукюр, бизим тарлаларда шу еди гектар ерден башкьа бир тюрлю заразиха корюнмей. Ялынъыз шу кьыр бетни... Амма о мантар деген арам шей тамам рак хасталыгъы киби экен. Рак адамнынъ ичинде яратылып яваш-яваш джаныны сувурып алгъаны киби, мантар да тютюннинъ тамырындан япышып, бутюн къаныны-шырасыны эмип ала экен. Олян, козюм алдында дерья киби толкьунланып тургъан ем-ешил тарла бир кьач кунъ ичинде солды, джансызланды кетти.

— Онынъ огюни алмакъ мумкюн эди,— деди Арсланов.

— Ич мумкюн дегиль эди. Рак хасталыгъы шимдилек...

— Мумкюн эди,— деди о текрар Эмирвелининъ сёзюни кестирип.— Эки гедже юкьламамакъ керек эдинъиз. Эр алда, мантар рак дегиль. Онынъ дердине чешит дерманлар бар бизде. Вакътында ве ериндже кьуланмагъа биледжексинъ. Кечке кьалгъан шейге кьар ягъа, дегенлер. Энди башынъны ташкьа урсанъ да, файдасы ёкъ.

— Сиз кьабаатны манъа кьалдырмакъ истейсизми шу, Самедин агъа?

— Меселе бирде-бир адамгъа кьабаат юклемекте дегиль. Бунынъ себебини догъру анълап, озь янълышымызны озюмиз догъуртмакъ керекмиз. Илериде бунъа ёл бермек керекмиз. Сен не тюшюнесинъ, Эмирвели, ичюн тек шу ерни мантар ургъандыр беллейсинъ?

— Менимдже, о джап ер, кузьде терен сюрюльмегендир.

— Ондан да гъайры, былтыр о джапта не экильгенини билесинъми?

— Бостан. Керчек, бираз да памидор бар эди. Къарпызлары къолтукъкъа сыгъмады. Асыл озю бостан ери экен.

— Бутюн меселе ана шунда, Эмирвели. Бостандан сонъ тютюн сачмайджакъ экенсинъ. Мына бизим барып коръген ерлеримизде де ойле япалар. Экин, я да мысырбогъдай сачылгъан тарлаларда экинджи йылы тютюн яхшы яратыла. Бостан, себзе экильген ерде тютюн илле бир хасталыкъкъа огърай. Шимди онынъ огюни ялынъыз химикатларнен алмакъ мумкюн. Бизим шу еди гектарлыкъ тарламызда былтыр себзе экильгенининден башкъа, не къадар химикат сепкен олсакъ эписини ягъмур селлери ювды. Топракъ кучьсизленди, заразиханынъ пейда олмасына ёл ачылды. Юкъламамакъ керек эдинъиз дегениминъ себеби шу ки, мантар баш косътердими, чечекленмезден эвель эписини сувурып алмакъ керек эди. О вакъыт тютюннинъ ич олмагъанда ярысыны къуртармакъ мумкюн олур эди.

— Оны биз дуймай къалдыкъ, Самедин агъа. Ягъмур ягъды, бир кунъ ишке чыкъмадыкъ. Экинджи куню ава пек яхшы къыздырды. Биз кене шу эски тарлагъа — Мойсабурун бетке тюштик. Учюнджи куню барып бакъсам, шаштым. Тютюнлер ягъмурдан сонъ гурьленип кетеджеги ерине солып башлагъан. Мына меним къабаатым шунда олса керек. Адамларны алель-аджеле тарлагъа тюшюрип, мантарны тамырындан сувурып алмакъ керек экенмиз. Мен, къабакъбаш, бунъа акъыл еткизамадым.

— Меселе де шунда. Амма, мантар юкъламай. О зиянкяр паразит. Гъафлет къалдынъмы, онынъ панджасындан къуртулмакъ пек зор. Ана шу сенинъ айткъан ракинъ да шай, адамларны гъафлет къалдыра. Онынъ ичюн о шимдилик ат ойната. Лякин инсанлар онынъ да чаресини тапарлар. Рак хасталыгъы да озюнинъ сонъки асырында яшай... Олян, лафкъа алданып чемоданны унутып кеткеним, къолунъ талгъандыр, бер бу якъкъа.

— Зарар ёкъ, Самедин агъа. Сиз меракълы лафлар айтасыз. Эм урасыз, эм тойдурасыз. Чемодан агъыр дегиль. Сиз, Озъбекистан хаберлери айтынъ. Тютюнден башкъа бир шей коръмединъизми?

— Самаркъандны коръдик. Аджайип шеэр экен. Тарихий абиделери аля бугунъ туюни джоймагъан. Улугъ

бекнинъ дюрбесинде, Шах-Зинданда олдыкъ. Къайткъанда Ташкентни де доландыкъ.

— Макъпуле сизинъле берабер эдими?

— Я кимнен оладжакъ? Эпимиз берабер юрдик. Тарлаларда, колхозларда, аранларда, экскурсияда — эр ерде озь группамызнен эдик. Ургъутлылар мусафирчен халкъ экен. Пек яхшы къаршылап алдылар. Бизимле озь тувгъанлары киби фикир алышып-бериштилер. Къазанчларыны да, эксикликлерини де айттылар. Бир афта ичинде даа не кореджексинъ? Корьгенимизни озюмизнен берабер алып кельдик. Раатлыкъ куню Аман-Къотан дагъларына чыкътыкъ. Ойле джевизликлер бар ки, корьсенъ шашарсынъ. Макъпуленен экимиз балалыкъ чагъымызны хатырлап, баягъы джевиз къакътыкъ.

— Халкъ мында сизни ур-патласын эвлendirе, Самедин агъа, сиз исе анда джевиз къакътып юргенсиз.

— Кимге эвлendirелер?

— Макъпулеге. Эки бригадир анда анълашып келирлер, дейлер.

— Халкъ дейсинъ, амма Эмирвели, янъыласынъ. Айры адамлар айта билирлер. Мунафыкълыкънен халкъ огърашмай, айры адамлар оны зенаат этип юре де, халкънынъ адыны кирлейлер. Дюнъяда ондан да буюк алчакълыкъ бармы? Мунафыкъ — эв бозар, мунафыкъ — достны душман этер, мунафыкъ — намуслы адамнынъ омюрини ашар, мунафыкъ — инсангъа хастлыкъ этер-этер де, ахыры сонъу озюнинъ башына етер. Менимдже, мунафыкъ адам халкънынъ душманы олгъанындан башкъа, озь девлетининъ де хайнидир. Риджа этем санъа, ойле лафлар эшиткенде «халкъ айта» деп янълыш тюшюнме.

— Багъышланъыз, Самедин агъа. Дюнъяда эр кес къошакъ олып яратылгъан дейлер. Я эвлensenъиз не олгъан?

— Эбет, «янъгъызылыкъ тек аллагъа ярашыр» деген лаф да бар.

Лякин, эр кес озь къошагъыны тапмакъ керек. Мен он секизде дегилим, корьгениме уруламайым.

— Догъру айтасыз. Макъпуле де акъылсыз къадын дегиль. О да корьген сакъаллысына баба деп япышмаз беллейим. Айтмасам да оладжакъ эди амма, даянамадым. Самедин агъа, афу этинъиз, мен сизнинъ бахтлы олгъанынъызны, озь оджагъынъызнынъ кулюни озюнъиз къарыштырып яшагъанынъызны истейим. Берабер чалыш-

къандан сонъ, бири-биримизни яхшы огренип къалдыкъ, базнам отъкенинден айттым.

— Сагъ ол, Эмирвели. Дост-достнен эр вакъыт ачыкъ къальбли олмакъ керек. Дегенинъ пек догъру. Къошакъ керек амма...» Инсан сорашыр, айван къокълашыр» дегенлер. Меним бу куньге кельгендже сорашмагъа вакътым олмады. Даа барот къокъусы бурнумдан кетмей. Энди бу меселе акъкъында тюшюнмеге вакъыт кельди, бакъайыкъ, къысметим ким олыр. Тютюнлерни къырып алайыкъ, devlet алдындаки борджумызны одейик, сонъ корермиз...

Елнынъ эки тарафыны къаплап алгъан къарагъач ве курюч тереклерининъ арасындан «Алсаба» нынъ алчачыкъ эвлери корюнди. Арсланов адымларыны сыкълаштырды. Эмирвели артта къалып башлагъанынен Арсланов онынъ къолундаки чемоданны алды ве кене экисц ян-янаша олып адымладылар.

— Мантар ургъан тютюнлерни къырып алдынъызмы?— деди Арсланов бираз сукюнеттен сонъ.

— Мен о тарлагъа кимсени тюшюрмедим. Эки-учь куньден сизинъ къайтып келеджегинъизни билем, озюнъиз чыктып корерсинъиз дедим. Оны къырып алмакъ къолай. Истесенъиз ярын саба о тарлагъа тюше билемиз. Эм ягъмурдан сонъ яхшы олур, япракълары бираз тирилешкендир.

— Башкъа тарлалар насыл, оларны да «Чубарлыкъ» урмадымы?— деди Арсланов козь къиясындан шубели бакъып.

— О бир тарлаларда тютюн адам боюнджа. Берекет пек буюк. Мен беллесем шу еди гектарнынъ устюни бу якътаки берекет орьтер. Планны бир сёзсиз толдурырмыз.

Эмирвели Арслановны эвине къадар оздурып кельди. Оларнынъ лаф этип кечкенлерини Айрие пенджеренден корип къалды. О алель-аджеле къапы алдына чыкты. Азбарда Юнус эчкини къапатаджакъ олып тура эди. Айриенинъ аякълары кери тартты. Къайтып эвге кирди, пенджеренинъ алдына кельди. Сокъакъта энди кимсе ёкъ эди. Даянамады, башына шалыны ташлап ёлгъа джувурды. Совхоз бетке козь ташлады, ёлда адам корюнмей: «Яваш-яваш кетейим, бельки Макъпуле къаршыма расткелир», деген умятнен ёл бою адымлады. Ягъмурдан сонъ эскен аджджы ельчик онынъ янакъларыны, чорапсыз балдырларыны чертип алды. «Акъшам салкъынында кийимейип ёлгъа чыктылырмы?» деди о озь-озюне ве юбка-

сынынъ этегини бираз ашагъы тартып, энди къызарып башлагъан тизлерини къапатмакъ истеди. Баягъы вакъыт кечти, ёлда кимсе расткельмеди. Бир къач кунъ эвельси мектептен къайткъанда Эскендернинъ юкълап къалгъан арыгъы янына кельди. Токъталды. Бир адым даа атмады. Энди къаранлыкъ чёкип башлагъан эди. Бираз вакъыт бекледи. Ёлда кене кимсе корюнемей. Узакътан машина сеси эшитильди. Эки тарафтан ёлнынъ устюне саркъып тургъан талларнынъ къаранлыкъ пердеси астындан Молдабайнынъ машинасы корюнди. О догъру Айриенинъ янына келип токътады. Машинанынъ къапысы ачылыр-ачылмаз Айрие Макъпуленинъ бойнуна сарылды.

— Вай, достчыгъым!

— Вай, кяфирчик!..

Экиси къучакълашып, опюштилер. Молдабай оларны къапыларынынъ алдына кетирип ташлады. Айрие чемодангъа япышты.

— Вай, пек агъыр экен. Ичине топракъ толдурдынъмы шу акъыз?

Эписи зий-чув олып Макъпуленинъ эвине кирдилер. Ал-хатир сораштылар. Макъпуле чемоданны ачып, Фиданенинъ къолуна бир шейлер туттурды. Сонъра бир саан джевиз толдуруп, устюне эки дане бера армуты къойып, Себиля аптеге узатты.

— Алла разы олсун, балам, пек сагъынгъан эдим, ярын бир джевизли макъарне. сюзерим,— деди Себиля апте козьлерини яшландырып.

— Сонъ, не яптынъыз, достчыгъым, яхшы-яхшы барып кельдинъизми?— деди Айрие сабырсызланып. Лякин джевап аламады. Шу арада Себиля апте Фиданени алып чыкъты. Макъпуле элини-бетини ювуп, урбаларыны денъиштирген сонъ, кроватькъа ясланып бутюн ёлджулыкъ вакъиаларыны Айриеге икяе этмеге башлады:

— Асыл озъ тёшегинъе етер ёкъ экен. Не къадар урьметлеселер де, ашатып-ичирселер де, озъ эвинъдеки киби раатлыкъны къайдан аласынъ? Ёлджулыкъ адамны пек эзе экен. Акъыз, инанасынъмы, эгер Арсланов олмагъан олса, мен не япар эдим бильмейим. Самолёт башымны тутты. Къусып башладым. Арсланов янымда отура эди. Эр киши. Мен эм охшуйым, эм утанам. Я къайда бараджакъсынъ? Сонъундан утанувдан да вазгечтим. Самедин агъа менден асыл чекинмеди. Манъа кягъыт торбачыкъны узата, мен къусам. Не исе, эзилип къалгъан

сонъ, юкъугъа далгъаным. Башым онынъ омузына бурулып тюшкен...

Бу ерде, ничюндир, Айриенинъ узун кирпичкери коте-рильди. Чырайы денъишмеди, лякин эки козюни Макъ-пулеге тикти. Макъпуле яткъан еринден лафыны девам этти:

— Мен уянгъандже давуш чыкъармай, еринде кыбырдамай отургъан, акъыз. О шай япкъан сонъ, акъылы-ма чешит шейлер кельди. Бутюн вакъыт оны сынап юрдим. Сенинъ онъа бир кереден разылыкъ бермегенинъ пек яхшы олды. Адамларны ойле сынап кореджек экенсинъ. Хусусан аят къурмакъ истеген адамынъны.

Айриенинъ чырайы тюрленип кетти. Юреги зияде урып башласа керек, янакълары бенъ тюшип башлагъан майыс кирезине ошады. О, Макъпуленинъ не демек истегенини анълап оламай Тез-тез айта къойса экен. Тамтиминен эзгелей тура. Айриенинъ юреги кокус къафесини тешип чыкъаджакъ киби чапалана. Озь юрегининъ дюкюльдисини озю эшите амма, индемей, бутюн дикъкъатынен Макъпулени динълемекте. Макъпуле исе, ашыкъмай. О хаял далгълары ичинде ялдай. Озь сеяатындан алгъан леззетли теэссуратыны энъ якъын достуна бирлей-бирлей айтып бермеге истей.

Айрие тюшюнджеге далды. Бир ан ичинде онынъ козю огюнден Отуз докъузынджы болюкнинъ кечильмез орманлары, Таубасы ёлунынъ кенарындаки къарт акъкъайын тереги ве ниает Мурадасыл келип кечтилер. «Демесе Макъпуле кене де...»

Макъпуленинъ эеджанлы лакъырдысы Айриенинъ хаялыны больди. О дикъкъатнен динълеп, юрегини кытыкълап башлагъан икяенинъ сонъуны эшитмек истей.

— Сонъ бизни «Танъ атар» колхозына алып кеттилер,— деди Макъпуле лафыны девам эттирип.— Тарларны юрип чыкъкъан сонъ, зияфетке чагъырдылар. Яхшы сыйландыкъ. Акъыз, озьбеклер пилявны пек леззетли пишире экенлер. Корьсенъ, пармагъынъны яларсынъ. Бизим къамыр ашкъа ошатып манти деген шей япалар. Беш данеси адамны тойдура. Аштан сонъ чай ичтик. Кок чай. Мында, ничюндир, къара чай ичелер.

— Эр шей ерине коре, ким неге алышкъан олса оны япа. Мына, анамны корьмейсинъми, онъа къаведен башкъа бир шей кечмей. Сонъ даа къайда бардынъыз, айта къойса шуны,— деди Айрие тарсыкъып.

— Акъшам устю колхознынъ янашасындаки дагъгъа кезинмеге чыкътыкъ. Арсланов асыл менден айырылмай. Балабан бир джевизлик ичинде токъталдыкъ. Шу адамгъа бираз назланып бакъайым, дедим. Таш исаргъа къаршы сарылып, чытырманлашып кеткен бурюльгеннинъ арасына къолумны сокъып, вай-валап башлады. Акъыз... Акъай демектен акъай экен. Ана о вакъыт анълады...

Макъпуле бу сонъки сёзюни зорнен айтты. Козълерин юмулып кеткенини дуймай къалды.

— Не анъладынь?— деди Айрие абдырап. О Макъпуленинъ юкъугъа кеткенини эслемеген эди. Эеджанлы суали джевапсыз къалды. Макъпуленинъ артыкъ бир сёз айтмагъа меджалы ёкъ эди. Ёлджулыкъ—ёргъунлыкътыр. О татлы юкъугъа далды. Айриенинъ гульгюлленген янакълары энди агъарып башлады. Юрегининъ сыкъынтысы сакинлешсе керек. О яваштан турды, Макъпуленинъ устюне ёргъанны тартты ве пармакъ уджларына басып, одадан чыкъып кетти.

Себиля аптенинъ энди яры геджеси олгъан. О, Фиданени къойнуна алып, терен юкъугъа далгъан. Юнус эвде ёкъ эди. Эр вакъыттаки киби, бугунъ де кечке къадар чалышып, къуруджылыкъ болюгининъ ятакъханесинде ятып къалса керек. «Онъа коре шам ёлу тюм-тюз», деди Айрие озъ-озюне бош кроватьны корип. «Бекярлыкъ беласы. Кечке къадар ишлеп юрем, дей амма, бильмейим, сонъ вакъытта эвге кельмемекни адет этти. Не ишлеп юре, алла бильсин. Меним такъдирим бойле олгъаны-олгъан, о да эвленип анамны бир кунъчик кульдюрсе экен. Биревлер къысметим чыкъса, козюне бакъмай эвленир эдим, деп юрелер, бунынъ киби сою исе, къысметинден къачып юре. Асыл анъламасы къыйын экен бу дюньяны. Ягъмур эп ягъгъан ерине ягъа бере. Сенинъ араретленип юргенинъ онъа къач капик? О сепеджек ерини озю биле».

Айрие лампочканы якъмады. Анасы ве Фиданени уятмагъа истемеди. Озюнинъ кровати янына келип, ташланмагъа башлады. Антерини чыкъаргъанынен пенджерен ургъан ярыкъ онынъ без аз омузларыны айдынлатты. Чып-лакъ аякълары къатты бир шейлерге токъунды. Эгилип аладжакъ олды, сонъ токътады, алмады. Фиданенинъ къолундан тюшип къалгъан джевиз олгъаныны анълады. Озюни кроватька котерип атты. Ёргъанны башынынъ устюне тартты. Козълерини юмды амма, юкъу къайда? О Макъпуленинъ янындан эфкярланып кельди. Арсланов

акъкъында айтылган сёзлер онынъ юрегине ятмады. Акъылына чешит шейлер кетирди. «Демесе, Макъпуленинъ Арслановкъа козю бар?» деп тюшюнди о. «Хайыр ола. Мен бу шейден къоркъам. Бунынъ сонъу да Мурадасыл меселеси киби олып чыкъмасын. О заваллы олип кетти, лякин юрегининъ сырыны тек манъа ачкъан эди. «Мен сени севем Айрие,» деген эди. Онынъ севгисине мен джевап бермедем. Анълы оларакъ, биле-биле джевап бермедим. Оны алдамагъа истемедим. Макъпуленинъ алдына чыкъмадым, къысметини кесмедим. Оларнынъ бахты — меним де бахтымдыр, деген фикирнен яшадым. Макъпуле оны севе эди. Эм аля даа унутмай. Юрегинде онынъ ичюн унутылмаз хатирелер сакълай. Шунинъле озюни бахтлы сая. Мурадасылнынъ манъа айткъанларыны мен ичимде сакъламагъан олсам, буларнынъ эписини санъа айткъан олсам, о вакъыт алынъ не олыр эди, Макъпуле? Достым, деп сен мени козюме бир даа бакъар эдинъми? Бугунъге къадар юрегинъде ифтихарнен яшатып кельген Мурадасылнынънынъ адыны асыл бир даа анъар эдинъми? Ана, достлыкъ бойле олмакъ керек. Мен оларнынъ бахгы ичюн бу сырны ичимде къалдырдым. Темиз къальбим иле, акъикъый инсаниетлик дуйгъусы иле элимден кельген бутюн чарелерни коръдим. Экисининъ арасына буз къоймагъа дегиль де, севги алеви якъмагъа тырыштым. Макъпуле буны анъламакъ керек...»

Айрие аркъасы устюне айланды. Ёргъаныны кокюслеринден ашагъы тюшюрди. Бетини пенджереге тараф чевирди. Онынъ акъбардакъ киби муляйим, назик юзюнде сачларындан да къара, узун къою кирпичлерининъ талдачыкълары пейда олдылар. Козьлерини юмды, юкълап къалмагъа, эр шейни унутмагъа истеди. Юкълап оламады. Козьлерини ачмадан кене терен тюшюнджелерге далды...

Экинджи куню акъшам Каштанов тютюн бригадирлерини, баш агрономны ве республикалар ара теджрибе бригадасынынъ дигер азаларыны чагъырды. Олар топланып кельгенде Каштанов озь кабинетинде къурбанбековнен субетлешип отура эдилер. Еремеев теджрибе бригадасынынъ барып кельгени акъкъында къыскъадан чыкъышта булунды:

— Шу ери дикъкъаткъа лаяйыкъ ки, — деди о сёзю-

нинъ сонъунда,— ургутлылар тютюнни къырып алгъан сонъ, бир я да эки ай даа сыджакъ, кунешли авалар девам эте. Тютюнни асрамакъ ве къурутмакъ ичюн бойле келишикли куньлерден пек яхшы файдаланалар. Эсас берекетни къырып алгъан сонъ, кунешли авалардан файдаланып, тютюннинъ тюбюнде яратылгъан филислерни осьтюрелер. Ургутлылар бу усулны шойле япалар: тютюн къорайыны ерден он беш сантиметр юксекликте чалып ташлайлар. Сонъра суваралар. Чокъкъа бармай тютюннинъ тюбюнде тазе филислер пейда олалар. Эр бир тюпте бир, я да эки дане яхшы филис къалдырып, къалгъаныны къопарып аталар. Суварув ве культивация ишини девам эттирелер. Бу ишни кимерде эсас берекет джыйылып битмезден эвель башлап япалар. Филислер устюнде он секиз-йигирми япракъ пейда олгъан сонъ, тёпесини къопарып ташлайлар. Тез ве ири япракълы олмасы ичюн, чокъусы филислерде он-он беш япракъ къалдыралар. Филислернинъ тёпе тарафтан бир даа филис аткъан сойларында да дёрт-секиз япракъ къалдыралар. Бу ерде шуны къайд этмек керек ки, тёпе филислернинъ кейфисти ашагъы филислернинъ кейфетинден эр вакъыт устюн ола.

Ургут тютюнджилери, хусусан илери бригадалар бунъа буюк эмиет берелер. Базылары эсас берекетни тымар эткен сонъ, филислерден гектар башына алтышар-едишер центнер даа кьошма берекет алалар. Тютюнни не къадар эрте отуртсанъ, о къадар тез тымар этип аласынъ, филис берекети етиштирмек ичюн де вакъыт къазанасынъ.

Мына, мен къыскъадан шуны къайд этмек истедим. Бизим шарантымызда кимерде-бир сыджакъ, кунешли кузь айлары девам эте. Бельки бу усулдан файдаланув бизим ичюн де уйгъун келир. Буны илериде огренмек керек олур беллейим,— деп Еремеев сёзюни кести.

Кабинеттеки аркъадашлар бир къач сание индемей турдылар. Олар Каштановкъа бакъалар. Еремеевнинъ чыктышы Каштановны тюшюнджеге далдырды. Лякин кимсе онынъ не тюшюнгенини анълап оламады. Онынъ сол къашы де юкъары котериле, де ашагъы эне. Озю бир шей айтмай, адамларгъа да котерилип бакъмай.

— Мумкюнми манъа?— деди Чеврениди сюкюнетни бозып.

Каштанов индемени.

— Айтынъ, айта беринъ,— деди Къурбанбеков директорнынъ индемегенини корип.

— Менимдже, бизге шимдилик филис берекети акъкъында лаф юрютмеге аджет ёкътыр. Бизим топракъларнен Ургут районынынъ арасында дагъларнен-ташлар бар. Ава да башкъа. Биз етиштирилген берекетни сувукъларгъа къалдырмай, бузлатмай тымар этип, къурутып, вакътында аранларгъа етиштирип къоймакъны тюшюнмек керекмиз. Ургутлылар октябрь айында филис осьтюрелер, бизде исе япалакълап къар ягъгъан вакъытлар ола. Ургутлыларда топракъ къыт. Корьдинъизми дагъ этеклеринде, йылгъалар ичинде сыкъылып къалгъан о кичкене тарлаарны? Шунынъ ичюн олар пек догъру япалар. Аванынъ догъургъан шарайтындан файдаланалар. Меним айтаджагъым бу дегиль. Мен Ургут тютюнджилерининъ кубре ишини пек бегендим. Олар кубрелевни юксек кейфиетте ве керек микъдарда япалар. Азоттан ойле файдаланалар ки, эр бир осюмликке хаста баланынъ башында отурып къашыкънен илядж ичирген киби доза берелер. Эпимизге малюм ки, тютюн отуртылгъан ерде азот етишмесе берекет аз ола, къарардан зияде азот берсенъ, ондан да файда ерине зарар коресинъ. Тютюннинъ япракълары сертлеше, ешиллиги къоюра, вакътында пишмей, белок ве никотин чокълаша, углевод азлаша, къокъусы эксик ола. Эгер тютюн пиченлик ерге отуртылса, я да ерли кубре чокъл олса, о вакъыт тарлагъа азот сепмейлер. Къыскъадан айткъанда ерли ве минераль кубрелерден файдаланувда Ургут тютюнджилерининъ теджрибеси буюк. Биз Максим Горький адына колхозда олдыкъ. Анда Халбековнынъ звеносы тютюн сачылгъан сонъ, он кунъ кечтими, гектар башына къыркъ килограмм аммиак селитрасы сепе, бир айдан сонъ, учюнджи кере суvara ве кене йигирми беш килограммдан селитра бере. Эр кересинде он экишер килограмм азот къоша. Нетиджеде, онынъ звеносы гектардан йигирми беш центнер тютюн ала. Мына меним айтаджагъым бу эди.

— Сагъ олынъ Чеврениди аркъадаш,— деди директор башыны котерип.— Пек догъру къайд эттинъиз. Химикатны билип такъсим этмек керекмиз. Бу меселеде шаблон кечмез. Къана, даа айтаджакълар бармы?

— Энди Арслановтан эки агъыз лаф эшитайик,— деди Къурбанбеков.

Арсланов кимсеге бакъмайып чыкъышта булунгъанларны дикъкъатнен динълемекте эди. Озь адыны эшиткенинен стол устюнде енгильден тыкъырдап тургъан пар-

макълары токъталдылар. Башы бир кереден силькинип кеткенини озю сезмей къалды. Эки къара къашы юкъары котерильди, оракъ шеклинде алкъаланып бири-бирине къошулдылар.

— Мен ялынъыз бир илери бригаданынъ иш теджрибесини къыскъадан айтып бермек истейим,— деди о къашларыны озъ алына кетирип. Чеврениди аркъадаш филис берекетине къаршы, амма, онынъ икътисадий тарафыны ойланмаса керек. Ургутлылар бу меселеде буюк къазанч эльде этелер. Дейджегим, шу бригадада элли гектар тютюн экиле. Ерни кузде терен сюрелер, сонъра ерли кубре ташып тѣкелер. Сюрюльген йымшакъ топракъкъа бираз да фосфор кубреси сепелер. Эрте бааръде топракъны тырнайлар. Бутюн вакъыт йымшакъ ве темиз туталар. Къатып къалмасына, отланмасына ёл бермейлер. Яхшы оськен сагълам фидени апрельнинъ йигирмисинден, майыснынъ он бешине къадар отурталар. Сонъра яш баланы бакъкъан киби, эр бир фиденинъ осюви ичюн къайгъырув башлай. Фидени отуртмаздан алдын ве пекинюв вакътында суварылгъанындан башкъа, беш-алты кере даа сув берелер. Эки кере селитра сепелер. Эр кереси сексен-юз килограммдан. Дѣрт, беш кеос культивация япалар, кетменнен де чапалап чыкъалар. Ёлакъ араларында бир кийик от корьмезсинъ. Тютюн кемалына кельдими, къырмагъа башлайлар. Чий япракъларгъа тиймек къатнен ясакъ. Тютюнни вакътында къырып алалар, къышкъа къалдырмайлар. Иплерге кечирип ачыкъ авада бир къач кунъ ичинде къуруталар. Бу бригадада тѣпе къопарув, филис асрав киби ишлерге эмиет аз бериле. Бунъа бакъмадан, агротсхника къаиделерининъ бу комплексине риает этип иш корьген бригада азалары гектар башына пландан арткъач элли-алтмыш процент берекет етиштирелер. Меним дейджегим мына шу эди, аркъадашлар,— деп токъталды Арсланов.

— Сенинъ бригаданъда илериде докъсан гектар тютюн экмек къарарлаштырыла,— деди директор Арслановкъа козь ташлап.— Яхшы теджрибелер, усуллар корин кельгенсинъ. Умют этемиз ки, барып кельгенинъиз бош кетмез. Онынъ файдасыны озъ хозяйствомызда корермиз. Даа айтаджакълар бармы?

Къурбанбеков, республикалар ара теджрибе бригадасынынъ корип кельген янъылыкъларыны, юксек берекет огърунда куреште ургутлыларнынъ илери теджрибелерини

совхоз тютюнджилери арасында кениш таркыатылмасыны теклиф этти.

Чыкышлардан сонъ, дирекция бойле къараргъа кельди. Теджрибе бригадасынынъ азалары невбетнен тютюн бригадаларында топланып, корип кельген янъылыкълары ве теджрибелеринен бутюн тютюнджилерни таныш этеджеклер.

Ойле де япылды. Тютюнджилер эр кунъ акъшам устю тарлагъа кетмезден эвель эписи арангъа топланалар. Топлашувларны тамам бу вакъытта откормеге башладылар. Бригада азалары бу топлашувларгъа меракънен къатнаштылар. Къайсы бригадада топланмасынлар, эр ерде, теджрибе бригадасынынъ азалары чыкышта булундылар. Къызгъын субетлер откерильдиди, суаллерге джеваплар берильди. Каштанов ве Къурбанбеков бутюн топлашувларда иштиряк эттилер. Бригададарда невбетнен откерильген бу топлашувлар пек джанлы кечтилер ве санки дерсинъ юксек берекет етиштирюв огърунда алынып барылгъан амелият тегерегине айланды. Тютюнджилер озъ векиллерининъ чыкышларыны дйкъкъатнен динълеген сонъ, пек чокъ файдалы теклифлер бердилер. Иш. вакътында расткельген кыйынлыкълар ве эксикликлернинъ устюни ачтылар. Бойле топлашувлар ве корюшювлер тамам бир афта девам этти. Бундан ишчи кунюне ич бир тюрлю кедер кельмеди, аксине, ишчилернинъ бош вакъыты файдалы ишнен текмилленди.

Айрие бутюн гедже юкъламады. Макъпуленинъ Арсланов акъкъында эткен лафлары онынъ юрегини бир тамам тельчеледи. Айрие ойле анълады ки, Макъпуле гуя онынъ кысметине аякъ чала. Арслановнынъ Айриеге нисбетен фикирини ве мунасибетини Макъпуле яхшы биле эди. Айрие ондан бир шей гизлемей. Тувгъан анасына, къардашына айтмагъан сырыны Макъпулеге ачып къояр эди. «Насыл ола да,— деп тюшюне о, Макъпуле бу джан меселеде меним алдыма чыкмагъа ниет этти? Бу ич умют этиледжек шей дегиль. Олмасы да мумкюн дегиль. Эки дюнья бир олса, Макъпуле буны япмаз. Япмаз, дейим амма севгиси билир. Арсланов онынъ юрегинде севги атеши якъса керек. Асыл бу меселеде къатты сёзде тургъан бир акъай баласы бар экенми? Эркек киши не къадар акъайым, деп юрсе де озюне келишкен бир этекли

расткельдими, туз киби ирий кете. Бойле бакъкъанда Арсланов да акъайгъа бенъзей. Амма, джеviz багъчасында бир-эки шахылды-хихилды эшиткенинен джибинген ше-кер киби мортлашкъан кеткен. Ёкъ, акъай деген шей ойле олмамакъ керек. Олар къадынлар акъкъында шай тюшюнелер, лякин янълышалар. Намус меселесинде, менимдже, кене къадынлар устюн туралар. Мына, меним Фиданем тезден алты яшыны толдураджакъ. Алимандан айрылгъан сонъ, мен акъай корьмедим. Ёкъса, баллы-шекерли сёзлер манъа айтылмадымы? Ёкъса, меним юрегимни эсир аладжакъ киби акъайлар манъа расткельмедими? Инсан дженкте ватанпервер олгъаны киби аятта да озъ намусынынъ намуспервери олмакъ керек... Дженк мейданында адамлар дёгюшке чыкъып, йигитче куреш алып баралар. Джснкчининъ вуджудында ватанперверлик къаны къайнай — Олерим дей о, — душман къолуна эсир тюшмем! Эм ойле де япа. Керек олса куреш мейданында йигитче татлыджанындан айрыла. Шаныны аякъ астына таптатмай. Намус ве севги меселесинде де ойле олмакъ мумкюн дегильми, аджеба? Бу куреш мейданына эльбетте, къылыч алып чыкъмайсынъ. Мында куреш мейданы — къальбинъдир, къылыч исе — тилинъдир. Инсаннынъ къальбини анъламакъ ичюн къылыч кечмей. Оны кузгю де акс эттирмей. Оны ялынъыз вакъыт, омюр адиселери ве сабырлы сынаветиджесинде белли бир дереджеде коре ве анълай билесинъ. Эки къальбнинъ ичтен алып баргъан гизли курешинде янъылмасанъ, севгинънинъ къурбаны олмазсынъ, эсир тюшмезсинъ, омюрбилля намуспервер олып яшарсынъ. Мен Арслановны ялынъыз бойле адамлардан беллейим. Бакъайыкъ, не олыр. Вакъыт эр шейни косътерир...»

Экинджи куню Макъпуле иштен кеч къайтты. Ёргъун олгъанындан чай биле ичмейип ятты. Пек татлы юкълады. Саба еринден тургъанынен Айриеге чапты, къапысыны ачты ве ичери джувурып кирди. Айрие кроватинда созулгъан ята эди.

— Тюневин кунюмиз пек зевкълы кечти, — деди Макъпуле нефесини зорнен тыйып. — Бригадамда топлашув отькердик. Озъбекстан тютюнджилерининъ илери иш усуллары акъкъында къыскъадан эсап бердик. Арсланов пек ошлы адам. Ойле мисаллер кетире, шакъалар эте акъыз, корьсенъ озюнъ де даянамазсынъ, эм кульдире, эм аксиклигинъни бетинъе шыпырта. Сонъ, Андрей Андреевич чыкъып, бригадамыз акъкъында чокъ яхшы сёзлер айтты.

— Шунинъ ичюн къуванып талагъынъ къаткъан экен де?— деди Айрие сүвукълыкънен яткъан еринден кыбырдамайып.

— Акъыз, сен хастасынъмы шу?— деп ташлады Макъпуле бир кереден чырайыны тюрлендирип.

— Шукюрлер олсын сагълыгъым еринде.

— Я бу маальгедже тѣшек ичинде не ишлейсинъ?

— Сен, Макъпуле, Озъбекстангъа барып кельгенинъиз акъкъында айтып-айтып аля даа битиралмайсынъ. Бир кере кезинтиге баргъанынънен тюрленип кельдинъ. Башлагъан лафынъны биле сонъуна чыкъмайсынъ.

— Во первых, биз кезинтиге кетмедик, ишнен кеттик. Во вторых...

— Коресинъми, энди русчаны да къарыштырып башладынъ,— деди Айрие онынъ сѣзюни болюп.

— Акъыз, сенде сабыр деген шей бармы? Лафнынъ сонъуна къадар динълемейсинъ, озюнъ дарылып юресинъ?

— Айтыладжакъ шейинъни сен чокъ созгъалап турмай эдинъ, Макъпуле. Лякин, бу сефер лафны пек эзгелеп башладынъ. Демек, эписини манъа ачыкъ айтмакъ истемейсинъ. Шу кельген кунюнъ акъшам эки къулагъымны санъа тикип тура эдим, Арсланов ойле этти, Арсланов бойле этти, мен оны пек яхшы анъладым, дединъ, козълеринъни юмдынъ, весселям. Мен гъарип агъызымны ачып къалдым. Ана, сенинъ барып келювинъден менде шу къадар теэссурат бар. Я мен сенинъ энъ якъын достынъ олсам, сен насыл ола да бир афтадан берли менден озъ сырынъны гизлейсинъ?

— Акъыз, Айрие, о насыл сыр? Санъа не ола шу? Сен неге шай худжур лафлар этип башлайсынъ? Сен кормейсинъми акъыз, кельгенимизден берли меним нефес алмагъа вакътым олмагъаныны? Он кунъ ишимде ѳкъ эдим. Он кунъ тарлада, тютюнлер янында, адамларым арасында олмадым. Танъда чыкып кетем, яры геджеде келем. Сенинъ янынъда отурып Арсланов акъкъында тамтиминен лаф этмеге меним вакътым олмагъаныны кормейсинъми, акъыз?

— Айды, яхшы, пек яхшы. Манъа онынъ лафы да керекмей, озю де. Айрие еринден турды. Уджлары къувурчыкъланып, кокюслери устюне саркъкъан сачларыны эки къолунен алып, без омузлары устюне ташлады. Кровать башында бурюшип, орьселенип къалгъан индже, тар антерини кийди, кузгю къаршысына барып, онынъ

бурюшиклерини сыйпалап бираз тегизледи. Бенъзи солгъаныны, козьлерининъ усть къапакълары азгъана шишкенини эследи. Къапыгъа тараф адымлагъанда оны Макъпуле токътатты.

— Кель, отур яныма, лафымнынъ сонъуна чыкъайым,— деди о.

— Шимди, бетимни ювуп келейим.

Айрие азбаргъа чыкъкъанынен къапы алдындан кечип кетмекте олгъан Арслановны коръди. Онъа сёз къошмайджакъ олып, аркъасыны айланды. Башынынъ устюнден къайнакъ сув тёкюльген киби олды. Бир адым даа атлап оламады. Санки аякълары жансызланды.

— Айрие, мераба!— деди Арсланов токъталып. Сонъра, Айриенинъ селям алгъаныны беклемеден:

— Макъпуле эвдеми?— деп къошты.

— Эвде. Киринъиз,— деди Айрие зорнен тилини айландырып.

— Кирмеге вакътым ёкъ, айтсанъыз чыкъсын, бир агъыз лафым бар онъа.

Айрие бетини сюрте-сюрте ичери кирди, Макъпулеге бакъмайып:

— Сени тышта Арсланов беклей,— деди. Макъпуленинъ чыкъмасынен къайтып кельмеси бир олды. Арсланов онъа ярын топлашувнынъ къайсы бригадада оладжагъыны айтты ве озъ ёлуна девам этти.

— Айтаджагъым шу эди Айрие,— деп лафкъа башлады Макъпуле.— Арслановкъа мен ойле якъынлаштым ки, бутюн ичининъ сырыны манъа ачты да къойды. Ана акъайларны ойле сынайджакъ экенсинъ. Мен онынъ юрегини, къальбини пек яхшы анъладым.

— Кене анъладым, сынадым, бильдим,— деп башлады Макъпуле.— Несини анъладынынъ? Шуны айтып ташласа экенсинъ.

— Сени акъикъатен севгенини анъладым!

Айриенинъ кирпичклери тез-тез къыбырдап алдылар. Онынъ вуджудындан электрик токъ кечкен киби олды. Ятагъыны джыйыштырып тургъан еринден бир кереден Макъпулеге айланып бакъты да, кровати устуне отура къойды.

— Онынъ юреги сенинъ ичюн мермер таш киби къавий ве темиз экен, Айрие,— деп лафыны девам этти Макъпуле.— Къайткъанда тюкянларгъа кирдик. Санъа бир чемодан шей алдыкъ. Озю не аладжагъыны бильмей

өкен. Менден сорады. Санъа не керек олгъаныны мен яхшы билем даа, акъыз. Не косътерсем оны алды. Сагъ олсакъ корерсинъ, чемоданыны шыплап толдурды. Мына, энди мен санъа озюмнинъ достча, ачыкъ фикиримни айтайым. Бир дакъкъа даа бургъучлап отурма. Разылыкъ бер. Сенинъ бахтынъ о адамнынъ къолунда. Онынъ бахты да сенинъ къолунда. Экинъизде де бирер бала бар. Теразенинъ бир козюнде о, дигеринде сен. Экинъиз де бир басарсыз. Эр бир джеэттен бири-биринъизге лыйкъсыз. Къуту юварлангъан да къапагъыны булгъан. Меним сонъки сёзюм шудыр санъа, Айрие.

IX

Арсланов мантар баскъан тарлагъа Еремеевнен берабер кетти. Кельгенинден берли Арслановны бу меселе раатсызлай эди. Совхоз лабораториясында япылгъан теджрибе акъикъатен Арслановнынъ къосътерген себеблерининъ догъру олгъаныны тасдикълады. «Бу тарлагъа гербицид керек микъдарда сепильмеген. Эгер сепильген олса биле, джапер олгъанындан, ихтимал ягъмур сели оны топракъкъа синъдирмезден эвель ювып алып кеткендир».

— Бу меселени илериде козьде тутмакъ керексинъ,— деди Еремеев тарланынъ ортасында токъталып.

Ава ачыкъ эди. Кокте сийрек-сепелек йылдызлар пейда олдылар. Эппейи вакъыт олса да, тарлада кимсе ишини быракъмай. Серин ельчик Ала-Тау тарафтан эсип тура. Кунъдюз сыджакътан къатырнынъ къулакълары киби ашагъы саркъып тургъан тютюн япракълары салкъын тюшкенинен тазерди ве котерильдилер. Ишчилер тютюн ёлакълары арасында гъайып олып кеттилер. Кимсе корюнмей. Этраф чым-чырт. Ялынъыз къырылгъан япракъларнынъ шытырдысы эшитиле. Тютюнджилернинъ пармакълары астындан чыкъкъан бу шытырды динъленип бакъсанъ, къаранлыкъ гедженинъ тынчлыгъыны боза. Эр кес даврана. Сонъки сепетлерини толдырмагъа ашыкъалар. Оларнынъ ишине ярын аранда тютюн тизиджилерскюн чскеджеклер. Кимсе-кимседен артта къалмагъа истемей.

Еремеев кечке къадар тарлада, тютюнджилер арасында олды. Тютюнджилер машинагъа сонъки сепетлерини юклеп башлагъанларынен, Арслановнен экиси ёлгъа чыкъ-

тылар. Кузь геджеси. Эр ерде къызгъын эмек арекети сезиле. Ишчилер къышкъа азырлыкъ корелер. Янъы къурулгъан эвлернинъ азбарларында емиш тереклери отурталар. Къапысында мал туткъанлар пичен пешинден юрелер. Иштен къайткъан сонъ биле, кечке къадар чайырларда къырларда, сокъакъларда адамларнынъ арекети токътамай. Еремеев, совхознынъ иши бу йыл яхшы кеткенини, тютюн планыны арткъачынен эда олунаджагъыны севинчнен икяе этип кете.

— Бир хавфлы меселе бар,—дей о.— Эгер ава эрте бозулса, тарлада чокъ тютюн ягъмур тубюнде къаладжакъ. Планны толдурырмыз амма, биринджи, экинджи сорт меселесине кельгенде зарар этеджекмиз. Шимди тарладаки тютюннинъ эксериети пишти. Авалар яхшы олгъанда менимдже, тарлагъа къошма къувет чыкъармакъ керек. Насыл дейсинъ, Самедин?

— Меним бригадама четтен адам керекмей. Озь къуветимизнен аль этермиз. Бир япрачыкъкъа къырав тюшюрмей, теменлерге тизип алырмыз. Бойле де еди гектар тютюнден марум къалдыкъ. Мен аля даа онъа яныкълап юрем. Бугунъ арангъа барып етиштирамадыкъ. Шу еди гектардан не къадар тютюн алынгъаныны бильмек керек эди.

— Онынъ эписини тизип битиралмагъандырлар. Солукъ тютюн агъыр тизиле. Тарлада къалгъаны да, къырып алмакъ ичюн бир сабагъа даа етеджек. Кене яхшы ки, мантар оны кеч ургъан. Тютюн баягъы бойгъа кетип, япракъ йиберген сонъ абрагъан.

— Ягъмур ярдым эткен,—деди Арсланов.— Бригадамыз умумий берекетте чокъ зарар кормейджек. Сорт меселесинде исе мени бу йыл озарлар. Хусусан, Макъпулекинъ бригадасы. Онынъ тютюнлери дешет! Эм онъа мытлакъ сизинъ банаки айткъан къошма къуветинъиз керек олур. Джаным-джаным берекет ягъмур, балчыкъ астына, я да сувукъкъа къалып, озь кейфиетини джоймасын. Аранларгъа къырылып кельсе, анда тизмеге адам тапылыр. Акъшамлары сепетлерни бошатып, ачып, сувлап ташлармыз, саба тарладан тазе тютюн кельгендже олар иплерде салланыр.

Еремеев ве Арсланов лаф эте-эте буюк ёлгъа келип чыкътылар. Сагълыкълашаджакъта Еремеев къолуны узатты ве кулюмсиреп:

— Тойны не вакъыт япаджакъмыз?—деди.

— Къартлар тойгъа къаршылар. Айрие де истемей. Отургъан эвлеримиз де сизге белли. Биз той чагъындан кечкенмиз. Тойны сагъ олсакъ балаларымызгъа япармыз...

Арадан эки кунъ кечти. Директор Арслановны чагъырды. Кабинетте Еремеев, Къурбанбеков, Боденеджиев ве совхоз ерли комитетининъ реиси отура эдилер. Арсланов директорнынъ кабинетине не вакъыт чагъырылмасын, эр вакъыт Каштановнынъ сагъ тарафындаки пенджере тюбюнде тургъан кичкене скемледе отура эди. Бунынъ манасыны Арсланов озюнинъ чокъ тютюн ичкенинден себеб деп анълатыр эди. Бу сефер де о озюнинъ ерине кечелжек олып адымлады. Лякин, Каштанов къарышты.

— Отур, Арсланов,— деди о къаршысындаки креслоны косътерип.— Сонъ, ишлер насыл Львов?— деп ташлады о шакъанен.— Биз бу ерде сен кельмезден эвель шуны айтышып отура эдик. Санъа эндиден сонъ Львов дейджек олдыкъ. Боденеджиевке исе, Перепёлкин,— деп шакъылдап кульди Каштанов.

— Ишлер, менимдже ярамай дегиль, Андрей Андреевич,— деди Арсланов кульмейип.

— Львов меселесине мен къаршы дегилим, ялынъыз бир шартнен. Мен Львов олайым, сиз исе Кестансеев!

Кабинетте отургъанлар бир кереден шахылдап йибердилер.

— Бирге ноль!— деди Къурбанбеков кулькюсине богъулып.

— Юкълайсынъ, чокъ юкълайсынъ Арсланов,— деди Каштанов бираз тынчлангъан сонъ.— Мантарлар сени гедже юкъусында алдаттылар.

— Паразит деген шей, Андрей Андреевич,— деди Арсланов къашларыны оракъландырып,— озюнинъ хиянетлигини эр вакъыт халкъ корьмегенде япа. О умютсиз ерден тюртип чыкъа экен. Догъру айттынъыз. Гъафлет къалдынъмы, ишинъ битти. Паразитке кереги де о.

Адамлар кене кулюмсиредилер. Арслановнынъ кульмейип, джиддий отургъаныны эслеген Каштанов, лафны йымшатмакъ истеди.

— Зарар ёкъ, Самедин,— деди о.— Биз ойле чокъ паразитлер корьдик. Буны да тамырындан къурутырмыз. Олар, дегиль сенинъ тарланъда, эндиден сонъ, совхозымызнынъ бутюн топрагъында бир даа баш котермеге ер тапмазлар! Мен сени мына не ичюн чагъыргъан эдим.

Бир айдан Боденеджиев медпунктнынъ юкъарысындаки дёрт ханели эвни теслим этеджек. Биз о эвни санъа бермеге къарар чыкъардыкъ. Ойле шартнен ки, шу эвде той япаджакъсынъ,— деди Каштанов джиддийлешип.

— Айриенен экинъиз бир тарафына, Юнуснен къайнананъ экинджи тарафына кочип ерлеширсинъиз. Айриеге де ярамай олмаз. Медпункт янында. Къаршы дегильсинъми?

— Бойле къуванчлы хаберге ким къаршы олур? Сагъ олунъ, Андрей Андреевич. Сагъ олунъ аркъадашлар!

Арсланов аякъ устуне турып эписине озъ тешеккюрини билъдирди. Сонъра, Каштановкъа айланып:—Бир шартынъызнен разы оламайым,— деди.

Каштанов къашларыны манълайынынъ ярысына къа-дар котерип, къулакъларым сенде деген киби динъленип турды.

— Бир айдан эвленип оламайджагъым. Тютюнлерни тымар этип алайыкъ да...

— Бир айдан орталыкъта тютюн къаламы?— деди Каштанов онынъ сёзюни болип.

— Даа башкъа себеплер бар, Андрей Андреевич. Тойнынъ бизге кереги ёкъ...

— Башкъа себеплернинъ бир кысымыны дирекция озъ устуне ала. Местком да ярдым этер. Эвленирсинъ. Етер бекяр юргенинъ. Мантар меселесине ошап чокъ эхмаллыкъ этип юрсенъ, Айриени де эльден учурырсынъ. Анълаштыкъмы? Ана, шай, директор айттымы, битти!

Каштанов бу ибареден сонъ, ич де кульмей тургъан эди. Шимди озюнинъ айткъанына озю ошланып кульди.

Арсланов кабинеттен буюк къуванч иле чыкъты. Еремеевнен экиси идаренинъ алдында баягъы субетлешип отурдылар. Бу эки тютюн устасы арасында шимди биринджи кере тютюн акъкъында лаф олмады. Олар янъы аиле тизюв, бахтлы аят къурып яшамакъ акъкъында, Фиданейинъ ве Эскендернинъ келеджеги акъкъында лаф эттилер. Эвлениув акъшамыны насыл отъкермек, кимлерни давет этмек, аш-сув ве дигер меселелерни айтыштылар...

— Айды, саба корюшкендже,— деп къолуны узатты Еремеев.

— Бу сенинъ къайгъырувынънынъ нетиджеси олса керек Еремей, мен оны яхшы билем,— деди Арсланов.

— Ёкъ, джаным Самедин, бутюн идаренинъ, бутюн джемиетимизнинъ къайгъырувы. Айды, корюшкендже!

Ятсы маали эди. Нейсе, Каштановнынъ кабинети бираз тынчланды. Лякин кабинетнинъ ичинде отурмакънынъ чареси ёкъ эди. Тютюн думанындан таван корюнмей. Адамларнынъ къызгъын лакъырдысы, субетлешюв, документлерге имза этюв, бригадирлернинъ бинъ-бир тюрлю талабларыны динълеп, оларгъа керек косътеришлер япув киби бир сыра меселелер Каштановны яры геджеге къадар кабинетте тутмагъа меджбур этелер. Саатларнен кабинетнинъ ичинде котерильген тютюнни юткъунып отургъаныны озю сезмей къала.

Эр кес чыкъып кеткен сонъ, о бираз тынчланды. Стол устюндеки кягъытларны джыйыштырды. Сонъра туруп форточканы ачаджакъ олды. Ахмады. Пенджерени аралыкъландырды. Озю исе бираз башыны тазертмек ичюн азбаргъа чыкъты. Идаренинъ алдында кимсе ёкъ эди. Ешилъ клумбаларнынъ арасындаки скемлеге отурды. Къолларыны эки тарафкъа джайып, аркъасыны таяндырды. Тёпеге бакъты. Кокте бир йылдыз корюнмей. Бу ерде базан ойле ола. Кок сим-сия, гуя къаранлыкъ перденен орътюльген киби олып корюне. Кимерде исе йылдызлар ойле айдын, ойле сыкъ олалар ки, дерсинъ тёпенъде буюк бир шеэрнинъ миллионларнен электрик лампочкалары янып туралар.

Каштанов бираз нефес алгъан сонъ, ушип башлады. Тышта ава салкъын. Кеч олгъанына бакъмадан, ничюндир онынъ аягъы эвге тартмай эди. Катеринанынъ сонъ вакъытларда онъа косътерген сайгъы ве урьмети, атта, атешли севгиси сунъий, афы олып корюне. О, тена ерлерде четлеп юргеке истей. Афталарнен эвге бармайджагъы келе. Джаны тарсыкъа. Санки, дагълар, къырлар онынъ омузларындан басып туралар. Кимерде юреги ойле чапалана ки, дерсинъ кокус къафесини парлап чыкъаджакъ. Катерина Мануйловна онынъ бутюн бу вазиятини эки сёзнен анълата: «Сен ёрулдынъ, санъа раатлыкъ керек». Каштанов озь дердининъ дерманы не экенини яхшы анълап оламай. «Манъа санаториягъа я да раатлыкъ эвине кетмеге керек-мей. Манъа Катеринанынъ пак. къальби, ачыкъ юреги керек» деп, Каштанов негедир шубелене. Лякин меселенинъ асылына етип озюни къолгъа аламай. Катерина Мануйловна исе, онынъ алдында озюни къабаатлы саймай. Каштановкъа олгъан темиз-пак севгисини юрегининъ энъ терен

кошесинде сакълай. Шунунъ ичюн эр эки къальбнинъ арасында юрген къара мышыкъны тутып юлкъмагъа, эр эки юректе топлангъан шубелерни ювуп ташламагъа себеп керек эди...

Каштанов турды ве кене кабинетине келип кирди. Ичериде ава бираз енгиллешкен, чешит тюрлю къокъулар эксильген. О пенджерени япты, форточканы азгъана ачыкъ къалдырды. Стол устюнде тургъан бугуньки почтаны къарыштырды. Газеталарны четке айырды ве мектюплерни бакъмагъа башлады. Конвертлернинъ бир данеси онынъ дикъкъатыны джелъп этти. Устюнде кери адреси ёкъ эди. Башкъа мектюплерни йыгъыштырып, газеталарнынъ янына къойды. Бу мектюпни ачып окъумагъа башлады. Кягъытнынъ ялынъыз бир бетине язылгъан бу къыскъа мектюпнинъ тюбюнде Валерийнинъ адыны коръди. Каштановнынъ къашлары туюмленди. Сабырнен мектюпни окъуп чыкъты. Имзасыны бакъты. Сонъра, кягъытнынъ артыны айландырды Тер-темиз эди. Кене бир даа окъумагъа башлады. Экинджи кере окъуп чыкъкъан сонъ, Каштановнынъ туюмли къашлары язылдылар, сёнюк, ёргъун козьлери бираз нурлангъан киби олдылар. Мектюпни конверт ичине къойды ве ортасындан къатлап, къоюн джебине тыкъты. Фуражкасыны алып, эр вакъыттаки киби козьлерине къадар басты ве кабинетнинъ къапысыны ашыкъып килитледи. Аралыкъларда къаранлыкъ эди. О, «Яшлыкъ» сокъагъына чыкъып, янъы къойылгъан лампочкаларнынъ ярыгъында тюшюне-тюшюне ёл бойлап кетти.

«Энди меселе анълашылгъангъа бенъзей. Катеринанынъ къальби эр вакъыт темиз эди, эм ойле де къала. Барсын, бакъайым, манъа сырыны ачмасын. О озюнинъ не ичюн къыйналгъаныны бирлей-бирлей манъа айтмакъ борджлу. Я айтмаса? О вакъыт арамызда муаббетлик олмакъ мумкюн дегиль. Акъикъый севги буны талап эте. Темиз севги инсаннынъ омюрини безете, сагълыгъыны арттыра, яшайышыны зевкъландыра. Эркек киши башыны асып юрдими, онынъ юреги къурт киби кемирильгенини биль отур. Базы адамлар бу фаджиалы сукюнеттен тез къуртулалар. Биревлери тамакъ сылатып, биревлери исе, баштакълыкъкъа урунып къуртулалар. Сонъра, эр экисининъ де аяты балталана, омюрнинъ зевкъындан озъ-озълерини марум этелер. Бунынъ баш себеби бири-биринъни анъламаювда ве бири-биринъе темиз юректен садыкъ олмаювдадыр. Ёкъ, манъа ойле омюр керекмей. Меним

сайлап алгъан аят ёлдашым, озъ къальбим киби темиз, озъ севгим киби къавий. Яшагъанымыздан берли, Катеринанынъ бу табиятыны мен коре ве бегене эдим. Онынъ севгисине инанам. Иште де, эвде де, тек онынъ эшкъынен яшайым».

Бу тюшюнджелернен азбаргъа келип киргенини дуймай къалды. Софанынъ къапысы артынадже ачыкъ эди. Лампочка ярыгъы бутюн азбарны айдынлата. Къапыны тартып бакъты. Бекли дегиль экен, ачылды. Эвге кирди, фуражкасыны чюйге ильди. Катеринанынъ давушы эшитильмей. Санки дерсинъ эвде адам ёкъ. Ашханеге кирди. Кичкене алюмин къазаннынъ къапагъыны ачып бакъты. Шорба сувуп къалгъан. Сонъра, янаша одагъа кирди. Мында ярыкъ янмай, лякин, софадаки лампочканынъ ярыгъы кровать устюнде юкъламакъта олгъан Катеринанынъ бетини айдынлатмакъта. Каштанов токъталды. Бельки Катерина юкъламайдыр? Динъленип бакъты. Юкъу ичинде нефес ала. Уятмады. Яваштан артына къайтып, ашханеге кирди. Газны тутандырды. Шорбаны къыздырмады. Чай къайнатты. Бир пияла чайгъа эки къашыкъ смородина татлысы къойды. Балабан шекерлик ичинде эвде пиширильген къазах бавурсагъы ве тюкяндан алынган татлы пексиметлер бар эди. Бир пексимет алып тишледи, къопаралмады. Чайгъа джибитип ашады. Бегенди. Эки дане даа алып джибитти. Пияланынъ тюбюне сморбдинанынъ чёпреси сюзюлип къалды. Чайкъап ташлайджакъ олды савут тысырдысы чыкъарып Катеринанынъ юкъусыны больмеге истемеди. «Яры геджеден сонъ эвге кельген акъайны бойле къаршыларлар» деп тюшюнди. Ятакъханеге кирди. Катеринанынъ ёргъаны ерге саркъкъан. Шимди уянса биле, юкъу арасында лаф олмайджакъ. Шунынъ ичюн яваштан урбаларыны ташлады. Ёргъанынъ бир четини котерип, озюнинъ ястыгъына ясланды. Катерина ынъранды. Козълерини ачмайып бир шейлер мыдырдады, къолуны котерип акъайынынъ устюне ташлады. Чокъкъа бармадан Каштановнынъ козълери де юмулып кеттилер.

Х

Себиля апте къуванчындан бармагъа ер тапмай. Янъы эвге кочтюлер.

— Эв ичинде чешмем, эв ичинде одунсыз янгъан

оджагъым, балам! Дюнъяда бундан да яхшы раатлыкъ олурмы? — дей о эв хайырлап кельгенлерге. Шимди онынъ нефес алмагъа вакъыты ёкъ. Бутюн гедже къаве къавурып чыкъты. Озьбекистандан кельген мусафирлер де бош отурмайлар. Невбетнен къаве дегирменини айландыралар. Бугунъ биревлерге раатлыкъ, биревлерге чапкъаламакъ куню. Ниает, Айриенинъ ве Арслановнынъ эвленюви мунасибетинен отъкериледжек эглендже акъшамынынъ куню кельди. Эр эки тараф той япмагъа истемеселер де, сой-соплар, эш-достлар, ганыш-билишлер йыгъылышып кельген сонъ, акъшамнынъ тойгъа айланып кетеджеги белли эди. Арслановнынъ сойлары Ташкенттен трубаджы Шемшединни, аккордеонджы ве дареджини де алып кельгенлер. Макъпуле эки куньден берли ишке чыкъмай. Айриеге ярдым эте. Еремеев, Боденеджиев, Эмирвели, Теслиме, Юнус ве даа бир чокъ къолум-къомшулар сабадан берли той азбарында айланып юрелер. Юнус озъ вазифесинен огъраша. Онъа эвлерни ве азбарнынъ ичини ярыкъландырув иши авале олунды. Буюк оданынъ ортасына узун стол ерлештирильди. Оданынъ къапысы софагъа ачылгъанындан анда эм къонушмагъа, эм ойнамагъа ер къалдырылды.

Кузь кунешининъ алтын шавлелери къаршыдаки юксек дагъларнынъ къарлы тёпелерини кумюш киби айдынлатмакъта. Совхознынъ сокъакъларында ешилликтен кунъ шавлеси корюнмей. Сини киби тёгерек кунеш, яваш-яваш ал ренкке боялып, сынъырсыз чёллернинъ къойнуна синъип кетти. Дагълар ве юксек тёпелер де кунешнинъ сонъки нурларынен сагълыкълаштылар. Посёлок шаматалы куньден сонъ сукюнетке далды. Лякин, онынъ къызгъын аяты бир дакъикъа токътамады. Бутюн сокъакъларны электрик лампочкалары айдынлаттылар. Янъы совхоз посёлогынынъ устюне инсанларнынъ кучюнен яратылгъан акъшам кунешин догъды.

— Къана, ничюн башламаймыз? — деди Шемшединни тюртип Ташкенттен кельген эслидже мусафир. Шемшедин трубасыны къолуна алды, бир уфюрди ве ашагъы айландырып клапанларыны шакъырдатты. Сонъра аркъадашларынен берабер азбаргъа чыкъты. Адети узъре той азбарында эр вакъыт къалабалыкъ ола. Балалар бир кенаргъа топлангъанлар, эписи чалгъыджыларгъа бакъып козьлерини сюзип отуралар. Четте сипирилип, темизленген ерде тёшельген миндерлер устюнде Себия ве Месюде аптелернен берабер бир чокъ марамалы къартанайлар отуралар.

Чалгъыджылар аякъ устюне турып буюк эшкъ ве зевкънен хайырлав авасыны чалмагъа башладылар. Чалгъы сеси бутюн «Алсаба»ны, юксек къаяларны, къырларны янъгъыратты. Себиля апте даянамады, явлугъыны чыкъарып козьлерини сюртти. Ава чалынып биткен сонъ, трубаджы:

— Эйилигинъиз хайырлы олсун!— деди. Бутюн мусафирлер бири-бирине эйлик хайырладылар. Къартанайларнынъ козьлери яшкъа толдулар. Той башлады. Чалгъыджылар токътамай мусафирлерни марш чалып къаршылап алалар. Марш токътагъанынен, учеви де бир кереден шенъ-шерамет олып, йырайлар:

Той башлады мааллемизде,
Эки гузель эвлене...

Дареджининъ дареси къоллары устюнде фырлана. Къапы алдына топ-топ адам топлана. Шоферлер машиналарыны токътатып динълейлер. Чалгъы сеслери эр кеснинъ гонълюни охшай, шенълендире, джоштура, эфкъарыны къозгъай. Бойле эеджанлы, этинъни-тенинъни чимирдеткен хош аэнкли эзгилер бу ернинъ тарихында биринджи кере янъгъырады. Асырларнен бош яткъан тюм-тюз чельге къач йыллар эвельси аят кетирильди. Шимди бу аятнынъ зевкъы, эшкъынен янъгъырамакъта олгъан чалгъы сеслерини эмекчи адамларнен берабер ешилъ тарлалар, багъча-багълар, мал фермалары, атта, къаршыдаки къар тёпели дагълар да динълейлер...

Чагъырылгъан мусафирлер бахшышларыны къонакъбайнынъ къолуна берип, озъ ерлерине ерлешелер. Боденеджиев аякъчылыкъ япа. Мусафирлерни къабул этип, ерлерине отурта.

Къапы алдында Молдабайнынъ машинасы келип токътады. Боденеджиев чалгъыджыларгъа къолуны салады. Шемшединнинъ трубасы гурь давушнен бир ава алып кочъти, амма, къулакъларынънынъ зары патлайджакъ. Машинадан Каштанов, Къурбанбеков, Катерина тюштилер. Оларны къаршылап Макъпуле, Еремеев ве Арсланов чыкътылар. Катерина Мануйловна къучакъ толусы бахшышынен Айриенинъ янына кетти. Каштанов, Къурбанбеков чалгъыджыларгъа баш салап селямлашты ве одагъа кирдилер. Бекленильген мусафирлер эписи кельдилер. Еремеев, Катерина ве Макъпуле келиннен киевни чалгъы ве гурьдели къол шапылдылары алтында столгъа алып

кельдилер. Айрие ве Самедин озьлери ичюн айырылгъан ерге кечтилер. Оларнынъ янында Каштанов, Къурбанбеков, Еремеев, Макъпуле ве дигер эш-достлары ерлештилер. Акъшамны ачмакъ ичюн сёз Андрей Андреевичке берильди:

— Урьметли достлар, сайгъылы мусафирлер!— деди о,— Совет халкъы муджизелер ярата. Аятсыз, бош топракъларгъа аят кетире. Биз де сизлернен берабер муджизе яратыджылардан биримиз. Бизим къургъан эвлеримиз, тютюн аранларымыз, тюкянлар, бала багъчасы, хастахане, амам, идаре, ашхане, турмуш комбинаты ве дигер объектлеримиз, хусусан бу йыл тютюнден алгъан юксек береке-тимиз бунъа мисаль ола билирлео. Куню келир, бизлер даа буюк къазанчларнынъ шаады олурмыз. Бизим совхоз бугунькинден он дередже даа арткъачынен девлетке тютюн етиштирип береджек. Тютюнджиликнен берабер багъ-багъча ве дигер махсулатлар да етиштиреджекмиз. Тютюн ашаламай аркъадашлар. Емишни, ве дигер зарзаватларны къомшу колхозлардан ташып юреджекмизми? Эписи озюмизде олмакъ керек. Бизлер яхшы чалышмагъа бильгенимиз киби, севмеге де билемиз. Намуслы, эмексезер аркъадашларымыз Айрие ве Самединнинъ эйилигини джан юректен тебриклеимиз! Сизлерге узун омюр, бахтлы аят истейим! Омюринъиз, бугуньки акъшамны башымыз устюнден сейир этип тургъан Ала-Таунынъ омюри киби узун олсын, севгинъиз, онынъ мермер ташлары киби къавий олсын!

Эль чырпмаларынен берабер, орталыкъны долу сеси янгъгъыратты. Къаделер котерильди, анда-мында шампан шишелерининъ тапалары атылып кеттилер. Артта отургъанлардан бириси «Аджджы!» деп къычырды. Янындаки адам онынъ къулагъына эгилип бир шейлер айтты. О сус-ты. Боденеджиев авучларыны окъалап:

— Акъайлар, алдынъызда аш, сув.—Ашанъыз, ичинъиз! Керек шейлерни манъа айтынъыз!— деди ве козьден гъайып олып кетти. Чалгъыджылар сымарыш беклеп турмайлар. Олар мында эйилик яраштырмагъа кельдилер. Тойда чешит халкъларнынъ векиллеринден бар. Усталар эм русча, эм къазахча, эм булгъарджа чала ве йырлайлар. Эр кеснинъ гонъюни-хатрини тапалар. Дареджи даресини кокюсине таяндырып, келиннен киевге бакъа да, озюнинъ уйдургъан шакъа йырыны айта:

Кулькю ве шакъаларнен къаделер толып-толып бошалалар. Боденеджиев къайда бош къаде корьмесин, шу ерге етишип келе де эр кеснинъ хатирини тапа, эксиклигини текмиллей. Софада оюн башлады. Марамалы эки къадын «Къыналы пармакъ, джез тырнакъ»ны чалдырып ортагъа тюштюлер. Оларнынъ белъ бурып ойнагъанлары Каштановнынъ дикъкъатыны джелъп этти. Оюннынъ сонъуна къадар козьлерини олардан алмады. Катерина бутюн вакъыт Айриенинъ бетине бакъа. Бугунъ Айрие онъа даа дюльбер, даа назик ве муляйим олып корюне. О Айриени пек бахтлы сая. Озю де гуя онынъ киби келин олмагъа истей. Тосат-тосат онъа сарыла, нелердир айтып-айтып куле. Дареджи даресини дырылдатып алды, софада хайтарма авасы янгъырады. Кольмеклерини сыйпап, къушакъларынынъ арасына къыстырып ортагъа эки яш тюшти. Оларнынъ чабик арекетлерини, фырлангъанларыны корьгенде Каштановнынъ омузлары да еринден къыбырдап башлады. Оюн токътагъанынен аккордеонджы кошеде отургъан беяз сачлы адамнынъ янына барды. Башыны эгильтип аккордеоныны тарткъанда, онынъ гурь перчеми козьлерине авдарылып тюшти. Софада аякъ устюнде онъа дикъкъатнен козь этип тургъан къызлар юткъунып алдылар. Беяз сачлы адам козьлерини азгъана юмып, «Бени де гъамдан азат эйле»ни созгъанынен той азбарындаки гъалягъуля бир кереден тынчланып кетти.

Йыр битер-битмез мусафирлернинъ арасында орта бойлу, устюнде иш урбасы олгъан бир яш къыз пейда олды. О бираз ашыкъып юрсе керек, сачлары терли манълайына япышкъан. Адамларны итеклеп бу къыз эп Айриеге тараф ынтыла. Каштанов онынъ адамлар арасына сокъулгъаныны эслегенинен:

— Чеврениди, санъа не олды?— деп ташлады. Бу Чевренидининъ къызы эди.

— Манъа Айрие керек,— деди о нефесини зорнен тыйып.

— Айрие бугунъ кимсеге керекмей, ялынъыз бир адамгъа керек,— деп кулюштилер ода ичинде кейфленмекте олгъанлар.

— Айрие апа, чыкъсанъыз бу якъкъа!— деди къыз вөджанланып.

Айрие Арслановкѡа бакъты, сонъра Катерина Мануйловнанен экиси котерилип софагѡа чыкътылар. Шу кѡыз Айриенинѡ кѡулагѡына эгилип бир шейлер айтты. Айриенинѡ чырайы тюрленип кетти. Даа меселенинѡ асылына етмеген Катеринагѡа чевирилип:

— Молдабайны тез-тез чагъырынѡ, машина керек!— деди.

— Не олды я?

Айрие Катеринанынѡ кѡулагѡына эгилип:

— Аптеси догъурамай экен,— деп пысылдады.

Экимни чагъырсынлар,— деди Катерина дудакъларыны бурюштирип.

— Ёкъ, Катерина Мануйловна, район еринден эким кельгендже эки джан бир кереден элякъ ола билир. Чагъырынѡ Молдабайны!

— Той геджеси меѡ сени бу фасонда янѡгъыз йиберем, айса мен де кетем. Молдабай!..

Катерина, софанынѡ кошесинде кѡысылып чалгъыджыларгѡа бакъып кѡалгъан Молдабайгѡа башыны саллады. Молдабай машинасынынѡ анахтарыны зынджырчыгъындан саллай-саллай Катеринанынѡ янына кельди. Арадан беш-он дакъикѡа кечер-кечмез Катерина ве Айрие медпункттан бирер беяз халат кийип чыкътылар. Айриенинѡ кѡолундаки кичкене чемоданчыкѡны Чеврениди алды. Машина той эвининѡ шаматасындан, чалгъыларнынѡ гурь давушындан узакълашып, яры геджеден сонѡ, кѡою кѡаранлыкѡ баскѡан совхоз посѡлогынынѡ эвлери арасына синѡип кетти...

— Мен элимден кельген ярдымны япарым, сиз эр алда экимге хабер этинѡиз,— деди Айрие машинадан тюшкенде.

Локъсанынѡ башы уджунда бир сюрю адам топлангъан. Акъайы да, балалары да, кѡартанайлар да, эписи онынѡ этрафында доланмакъталар.

— Одада кимсе кѡалмасын!— деди Айрие локъсанынѡ янына кельгенинен.— Катерина Мануйловна сиз манѡа ярдым этинѡиз, келинѡ бу якъкъа... .

Айрие кѡолуны кѡойгъанынен баланынѡ терс кельгенини анѡлады. Лякин буны кимсеге бильдирмеди. Озюнинѡ бильген усулларынен локъсагѡа ярдым этмеге башлады.

— Катерина, кетир манѡа бир чаршаф,— деди о кѡолларыны локъсанынѡ кѡарыны устюнден алмайып.

Айрие чаршафны бир къач кере букледи, яваштан локъсанынъ бели астына тыкъты. Сонъра къурсагъы устю-не хачлап алды да, бир уджуны Катеринагъа туттырды, дигер уджуны озю авучлады.

— Динъле мени Катериѝа, — деди о. — Мен тарткъанда — тартарсынъ, бошагъанда бошарсынъ анъладынъмы?..

Локъса даа зияде вайвалап башлады. Катерина къадыннынъ бойле аджыныкълы вазияетте догъургъаныны шимдиге къадар озъ козюнен коръмеген эди. Локъсанынъ бетинден чыбыргъан тер тамчылары дерсинъ онынъ юрегини ирителер. Озюнинъ манълайы да терден джибинди. Аджынгъанындан къолу-аягъы йибериле, лякин Айриенинъ эмирине табий олмамакъ мумкюн дегиль эди. Бутюн ишанч Айриде. Катерина онынъ джесюране арекетини корип, озъ-озюнинъ гонъюлини ала. «Бельки ольмез бичаре... Даянса эди... Ах, аначыгъым, тувгъанчыгъым, сабыр эт...»

Той озъ зевкъы ве шадлыгъынен девам этмекте. Дюнъя дегенинъ ойле шей экен. Бир эвде джан меселеси аль олуна, дигер эвде кейф чатыла. Шай олып кельген, шай олып кетеджек. Табиат къануны. Даимий бир шей ёкъ дюнъяда. Эр шей денъишип, тюрленип тура. Эскилер оле, янъылар догъа. Ёкъ, бу гедже олюм деген къоркъунчлы, титис шей олмамакъ борджлы. Айрие совхозымызнынъ ярашыгъы. Озю дюльбер, къоллары чебер. Онынъ тою да ярашыкъ олмакъ керек. Шунынъ ичюн той азбарындан бир сание шенълик-шераметлик эксильмей. Шунынъ ичюн бу эки къырджыманнынъ эйилиги бутюн совхоз кишилерининъ зевкълы байрамына айланды. Софада кейфленмекте олгъан къазах яшлары хорнен йырлап башладылар:

«Айттым салом, Къаламкъас,
Сагъан къурбан малмен бас.
Сагъынгъаннан сени ойлап,
Келер козъге ыстыкъ джас...»

Олар йырлап токътагъанларынен, орта яшларында бир къадын, янында отургъан къадындан:

— Акъыз, бу бизим «Растарандан сархош чыкътым» деген тюркюмиз дегильми? — деп сорады.

— Шу тюркю эльбет. Корьмейсинъми, сѣзлерини къа-
захчагъа денъиштирип йырлайлар.

— Ёкъ, енгепче, о къазах тюркюси. Сѣзлери Абай-
нынъ. Абай оны домбра чалып йырлай экен,— деди яш-
лардан бири.

— О якъыны алла биле. Мен учёный дегилим. Ола
билир орус тюркюсидир. Яшлыгъымда мен оны ур-патла-
сын айтып юре эдим. Мен о вакъыт Абайнынъ адыны
да эшитмеген эдим. Не олса да пек яхшы макъамы бар,—
деди къадын.

Софада кене тюркю янъгъырады. Бу сефер йыргъа
джошкъан уйгъур яшы эди:

«Асмандаки ай болуп,
Джеми алемни тенъ корьсем.
Пияланъда чай болуп,
Леблеринъни куйдирсем...»

Аферин усталаргъа! Санарсынъ эписи дюнъя халкъ-
ларынынъ махсус музыка мектебини битиргенлер. Ким не
сымарласа, оны чалалар. Микис Теодоракиснинъ аэнкли
эзгилери янъгъырап башлагъанынен софадаки яшлар
арасында отургъан къара козьлю эки къыз аякъкъа турып
онынъ «Сен джумерт ве назик эдинъ» тюркюсини созып
йибердилер.

Кошеде деми йырлап токътагъан къарт даянамады.
О аккордеонджыны озюнинъ янына чагъырды ве козьле-
рини юмып, агъырдан, буюк джошкъунлыкънен йырлама-
гъа башлады. Къарт эр кеснинъ дикъкъатыны джелып
этти:

«Селям версем, селям алмаз,
Селямларым тутсын сени.
Бени ич де сезмез олдынъ,
Гунияларым ютсын сени...»

Шенълик озь невбетинен девам этмекте. Каштанов,
Къурбанбеков, тосат-тосат Арслановкъа бакъып кулюмси-
рейлер. Лякин, Арслановнынъ джаны тарсыкъып башла-
гъаныны эслемейлер. Айрие ве Катерина чыкып кеткен
сонъ, Арсланов озюни тикенлер устюнде отургъан киби
дуя. Каштанов бунъа эмиет бермей. Тюрлю оюнлар ве
йырларнен кечмекте олгъан акъшамнынъ зевкъы оны бусь-
бутюн эсир алды.

Директор эр ерде озюнинъ тешкиятчы къабилиетини косьтере. Бугунъ, бу ерде шеньленмекте олгъан адамлар, бир айледе яшагъан чешит халкъларнынъ векиллери, онынъ ёлбашчылыгъы алтында муджизелер яраттылар. Нидже къыйынлыкъларгъа къатландылар. Огюз арабасынен таш-топракъ ташыдылар, къазма-курекнен негиз къаздылар, балтанен агъач ёнып, дагъ йыктып тюм-тюз чёльде янъы совхоз къурдылар. О не ичюн шеньленмесин, о не ичюн гъурурланмасын- Бугунъ халкънен берабер о да шеньлене, о да зевкълана. Онынъ бунъа акъкъы бар.

— Аркъадашлар! Менде бир теклиф бар,— деди аякъкъа туруп кошеде акъшамдан берли индемей тургъан Эмирвели.— Севимли директорымыз Андрей Андреевичнинъ сагълыгъына эпинъизининъ бирер къаде котерменъизни истейим!

Бири-бирине урулгъан къаделернинъ чынъылтысы энди ёрулып башлагъан чалгъыджыларгъа кене бир долу даа чалмагъа меджбур этти.

Айриенинъ ве Катеринанынъ къайда кеткенинден хабердар олгъан къадынлар, Молдабайнынъ машинасыны азбаргъа кирер-кирмез сарып алдылар. Эр кес козь айдын хаберине ашыкъа. Лякин не олды, не къалды, кимсе бильмей. Айрие ве Катерина халатларыны ташламакъ ичюн янаша одагъа кирдилер. Къадынлар бир шей анъламай оларнынъ артындан сюзюлип къалдылар. Молдабай той одасына киргенинен Арслановкъа козь къыпты да:

— Джемаат, бугунъ совхозымызда бир тютюнджи даа артты, Чевренидининъ къызы догъды! Сагъ олсын, Айрие Арсланова! Эки джанны олюмден къуртарды!— деп къычырды.

Молдабай сёзюни битирир-битирмез, без антерлерини балкъылдатып ичери Айрие ве Катерина келип кирдилер. Одада «Урра!» сеслери янгъырады. Усталар да бакъып отурмайлар. Айрие ве Катерина озь ерлерине барып ерлешкендже ёл авасы чалдылар.

Каштанов, Къурбанбеков, Арсланов энди меселенинъ аслына еттилер. Олар бири-бирининъ къулагъына эгилип бир шейлер пысылдашкъан сонъ, Къурбанбеков къолуна къадесини алып, аякъкъа турды.

— Ортакълар!— деди о.— Молдабай пек догъру айтты. Совхозымызда бир тютюнджи даа артты. Тютюнджилер аилеси арта берсин. Совхозымызнынъ келеджеги буюк. Биз онынъ темелини къурдыкъ, келир бир кунъ бизлер

къартайырмыз. О вакъыт бизге совхознынъ ветеранлары дерлер. Эстафетаны огъул-къызларымызгъа берирмиз. Биз оларнынъ келеджеги ичюн къайгъырайыкъ, медениет оджакъларыны кенишлетейик, окъутайыкъ, бугунъ бизим къолнен япкъан ишлеримизни олар машиналарнен япарлар, бизим юзюмизни къызартмазлар, къартлыгъымызны къайгъырырлар. Бизим несиль къараманджа ишлер япмагъа алышты. Эм бир вакъыт бурун котермез, япкъан ишини кимсеге юзлемез. Мына, бугунъ акъшам козюмиз алдында олып кечкен вакъна бунъа мисальдир. Биз Айриенинъ тоюны кечиремиз, о исе озъ теджрибесини, озъ кучюни ортагъа къойып, Чевренидининъ къорантасына бахт кетирди. Сизинъ киби чебер инсанлар чокъ яшасын! Ортакълар! тютюн устасы Арслановнынъ, чебер къоллу Айриенинъ бахты ичюн бирер къаде котерменъизни теклиф этем!

Тойнынъ бутюн агъырлыгъы, аскъысы, низам-тертиб ишлери адетиндже аякъчынынъ бойнунда дейлер. Бу тойда да аякъчылыкъ вазифесини Боденеджиевнен Макъпуле алып баралар. Каштанов Макъпулени ве Боденеджиевни оюнгъа давет этти. Макъпуле «Он секиздир меним яшым»ны сымарлап, ортагъа тюшти. Онынъ устюнде Мурадасылнынъ алып берген парчадан тикильген антери балкъылдай эди. Оларнынъ оюны эр кесни эеджанландырды. Себия апте козьлерини сюрте-сюрте келип акъча япыштырды. Макъпуленинъ оюны Айриенинъ юрегини де чимирдетти. Козьлерини достундан алмаса да, озю терен хаялларгъа далып кетти. Оюн биткенинен Макъпуле Айриенинъ янына кельди. Онынъ бетинден, козюнден опыти. Сонъра, Катеринанен экисининъ арасына ерлешти...

Той сабагъа квадар шенълик ве шераметликнен дезам этти. Оюнны — йыр денъиштирди, йырны — оюн. Оюнгъа чыкъмагъан адам къалмады деменге мумкюн. Лякин, эр кеснинъ дикъкъаты Айрие ве Самединде эди.

— Келин, киев ойнамагъандже къайтмайджакъмыз! — деген сеслер янъгъырады. Чаре ёкъ. Самедин еринден турды, онынъ артындан Айрие котерильди. Олар экиси де дженктен сонъ, бу кунъге кельгендже биринджи кере къол котерип оюнгъа тюштилер. Самединнинъ устюнде жилеткалы къара костюм. Костюмнинъ алдындаки сол жебинде Айриенинъ нагъышлап берген явлугъынынъ чечекли уджлары корюне. Арыкъ черели, узун бойлу Арслановнынъ устюнде шу костюм дерсинъ къатып къалгъан.

Айриенинъ устюнде безъ антер, безъ шербенти, безъ туф-
лиер. Бети де, урбасы да бааръде ачкъан акъбардакъ киби
бем-безъ.

Шемшедин трубасыны тёпеге котерип, агъыр аваны
янъгъыратты. Айрие, гольде ялдагъан безъ папий киби
сюзюлип-сюзюлип ойнамагъа башлады. Олар оюнгъа
тюшер-тюшмез адамлар арасында «Безъ келин» ойнай де-
ген фысылды даркъап кетти. Оюн мейданында келин ве
киев. Эки дост, эки аркъадаш, эки юрек бир олып ойна-
макъта. Олар озъ аяты, озъ аналары, озъ балаларынынъ,
бутюн джемаатнынъ бахты ичюн ойнайлар. Эшкъ олсун
оларгъа!



I

Поезд келип Ташкент вокзалына токътады. Ава сувукъ эди. Ташкентке кетемиз, деп енгиль кийинген ёлджылар кенъ вокзал мейданына чыкъкъанлары киби янълышкъанларыны сезип башладылар.

Чырчыкъ беттен эскен аджджы ель ве къарлы ягъмур адамларнынъ бетине урула, къулакъларыны, бурунларыны къыджырткъан киби ашлап, чертип ала.

Троллейбус токътагъан ерде топлангъан адамларнынъ арасында эки къыз тура. Бириси сарышын, дигерининъ сачы исе мысырбогъдай пускюлини анъдыра. Сачларынынъ уджларындан саркъкъан къарлы ягъмур тамчылары энъселеринде ве къулакъларынынъ артында ёлакъ къалдырып акъмакъта. Устьлеринде къыскъа юбка ве индже

кофтачыкълар. Балдырларына япышып кълалгъан чильтер чорапларынынъ ичинден шафран алмасы киби кълызаргъан тиз кълапакълары корюне. Энди лаф этмеге ме-джалы кълалмагъан бу кълызларгъа эки яш эришип башлады:

— Шималь кълызлары, Ташкентке исинмеге кельдинъ-изми?— деди олардан бириси мыскъылнен.

— Энди исиндик. Етиштирип олсакъ, кельген поездымызнен кълайтыр эдик,— деди тишлерини шатырдатып пускюль сач кълыз.

— Я бу къладар юфкъл кийинип кимге корюнмек истединъиз? Чокъ языкъ ки, къларшылап чыкълмагъанлар.

— Даа шуба кълазанамадыкъ,— деди дигер кълыз кулюмсиреп.

— Телеграмма бермеге унуттыкъ,— деди пускюль сач сою.

— Айса юринъ чайханеге. Чай эр шейнинъ башыдыр. Бираз ичинъизге джанынъыз кельсин.

Кълызлар бири-бирине бакълыштылар. Сълзсюз анълашсалар керек, кетмедилер. Яшлар троллейбускъл минип кеттилер. Экинджи троллейбусны беклемеге чареси кълалмагъан кълызлар, такси невбетини беклеп тургъанлар янына авуштылар. Устюнде тери якълалы бой пальтосы, башында мешин кълулакълы кълалпагъл олгъан адамнынъ артындан невбет алдылар.— Эмдже, пальтонъызнынъ бир кошесини бизге бермейсизми?— деди кулюмсиреп бириси.

— Берир эдим амма, бир этек тубюнде учъ кълыз сыгълдырамам,— деди бу адам. Сонъра пальтосынынъ астында сакъланып тургъан тос-томалакъ ири козълю кълызчыкълны косълтерди.

— Багълышланъыз, шакъл этемиз эмдже.

— Мен санъл билир-бильмез адамгъл илишме демеген эдимми?— деп тазирледи достуны пускюль сач кълыз.

— Эркек кишиге мукълайт олып илиш. Истесенъ, шимди пальтосынынъ тубюнден апайы да чыкълар.

Адамлар кулюштилер.

— Зарар ёкъ, тезден кунеш догълар, кълызарсыз. Озълбекстан джыллы ер,— деп бу адам кълызларнынъ энди когерип башлагълан аякъларына бакълты.— Вай-вай,— деди о сонъра аджынып.— Сиз нафиле такси беклейсиз. Кунеш чыкълкъландже барып вокзалда отурмайсызми?

— Ёкъ, эмдже. Кетеджек еримиз узакъ. Автобускъа етишмек керек. Шу арада такси келип къалды. Пальтолы адам къызчыгъыны котерип таксиге сокъулды. Онынъ артындан бу эки къыз да минди.

— Сиз не якъкъа кетесиз?— деди таксиджи пальтолы адамгъа.

— Психобольницагъа.

Шай дегенде къызлар экиси де пальтолы адамгъа тикилип бакътылар ве бири-бири артындан таксиден секирип тюштилер.

Такси психиатрик поликлиника алдына келип токътады. Пальтолы адам къызынынъ къолундан тутып тюшюрди. Балабан кемер къапылардан кечип, кенъ мейдан азбаргъа кирдилер. Азбарнынъ ичинде безъ халатлы адамлар о якъ-бу якъ ашыкъып юрелер. Олар экимлер, эмширелер олса керек. Базада бир исе, чалышып юрген адамларгъа расткелесинъ. Юксек чинарлардан тѣкюльген япракълар ешилъ клумбалар устюнде асылып къалгъан. Цементленген арыкълардан ташып къарлы сувлар акъмакъта. Арыкъларнынъ базы ерлеринде кестане ве эмен тереклеринден тѣкюльген япракълар йыгъылып къалгъан. Бу ерде сув тыйналгъан ве клумбалар арасына ташып кеткен. Тереклернинъ чокълугъы, клумбалар ве ерге бастырылып къойылгъан чокътан-чокъ гуль тюблери язда бу кениш азбарнынъ ярашыкъ бир гульбагъча шекилине киргенини тасдикълап туралар. Кунеш шавлелери тереклер арасындан сепилип башлагъанынен азбарда сипиртки ве курек алып чыкъкъан адамлар пейда олдылар.

Таксинен кельген бу пальтолы адам къызынынъ къолундан тутып, азбарнынъ ортасында ерлешкен биринджи корпуснынъ басамакъларындан котерильди. Софагъа киргенинен онынъ алдына безъ халатлы семиз бир къадын чыкъты.

— Гражданин, сиз къайда кетесиз?— деди о къаба сеснен.

— Манъа баш эким керек.

Къадын онъа шубели бакъты.

— Баш эким шимди хасталарны тешкере. Бельки башкъасы керектир? Адыны, фамилиясыны айтынъ, мен чагъырырым.

— Манъа кимсе керекмей. Мен хастанен корюшмеге кельмедим. Меним баш экимге эки лафым бар.

— Ойле олса, мына бу корюшюв одасына кирынъиз.

Баш эким хасталарнынъ арасында олмаса, оданынъ экин-
джи кѡапысындан орта аяткѡа чыкѡарсынъыз. Сагъ та-
рафта баш экимнинъ кабинетини корерсиз.

Пальтолы адам корюшюв одасына кирди амма, озю-
нинъ неге огѡрагѡаныны бильмей кѡалды. Мында хаста-
лар озъ адамларынен, тувгѡанларынен корюше, ал-хатир
сораща экенлер. Узун столнынъ бир тарафында хасталар
отура, дигер тарафында исе оларгѡа хатиръ сорап кельген
сой-акѡрабалары отуралар. Хасталарнынъ арасында че-
шит тюрлю сойлары бар... Кимиси куле, кимиси индемей
козюнѡе бакъып тура. Кимиси исе газета окъуп, сонѡра
кѡолуны котерип, янындакине анѡлата.

Корюшюв одасында эким ѡкъъ эди. Пальтолы адам
кѡаршыдаки кѡапыны ачып ортадаки узун аяткѡа чыкѡты.
Баш экимнинъ кабинетини тапып, кѡапысыны аралыкъ
этип бакъты. Ичериде, стол башында козѡлюкли, чал сач
бир кѡадын отура эди.

— Киринаъиз,— деди о пальтолы адамнынъ янында
тургѡан кѡызчыкѡны корьген сонѡ.

— Мен Кѡазахстандан кельдим,— деди о скемлеге ер-
лешип.— Адым Самедин Арсланов. Башкѡа бир шейде
шубеленменъиз, акѡылымыз еринде. Бу меним кѡызым.
Фидане. Бизге ялынъыз тутукѡларны сѡйлендирген эким
керек. Ярдымда булунманъызны риджа этем.

— Сизни мында ким йиберди? Озюнѡизде эким ѡкъ-
мы? Алма-Атада пек яхшы экимлер бар. Тутукѡлыкѡ са-
асында ишлеген логопедлер, алимлер бар. Кѡыш куню ба-
ланы заметке кѡойып, андан мында кельмеге аджет бар
эдимиз?

Баш эким бу сѡзлерини айткѡанынен дикѡкѡатнен
онынъ козѡлерине бакъты. «Асыл эким-психиатрларнынъ
адамгѡа бакъышлары бам-башкѡа ола экен» деб тюшюнди
Арсланов.

— Бар эди, доктор. Багѡышланъыз, экимнинъ экимден
фаркѡы ола экен. Шимдики заманда месафенинъ узакѡ-
лыгѡы якѡынлыгѡы чокѡ белли олмай. Ёлгѡа чыкѡкѡан
сонѡ, истесенъ Алма-Атагѡа, истесенъ Ташкентке кет, эми-
ети ѡкъ. Самолѡт истеген еринѡе етиштире. Дердинѡе дер-
ман тапмакъ ичюн энъ узакѡ экимге энъ якъып адамынъ
деп келесинъ. Эбет, сааткѡа бакъып хаста кѡабул эткен,
экимлер де ола. Ойле союна бир кере баргѡан бир даа бар-
макъ истемей. Яхшы экимнинъ намы узакѡ кете экен. Мына

бизге бойле эким керек,—деп кѳоюн джебинден чыкѳарып бир кягѳыт узатты.

— А-а, Земине Гафаровна Чешмеджиева?! Ойле эким бизде бар. Лякин бильмейим, о сизни кѳабул этип олурмы? Онѳа бир кѳач ай эвельси невбетке язылалар. Я бу адресни сизге ким берди?

— Башынѳа бея тюшсе доктор, эр ерден сораштырасынѳ. Мынавы гуль киби кѳызчыгѳым тутукѳланды. Кѳаз-агѳа огѳрады. Онынѳ бахты сизинѳ кѳолунѳызда, ярдым этинѳ доктор.

Эким телефонгѳа кѳолуны узатты, трубканы алды, номерлерини бир кѳач кере айландыргѳан сонѳ:

— Сусанна, бу сенсинѳми?— деди.— Земине Гафаровнаны чагѳыр телефонгѳа.

Трубканы кѳолундан ташламай, бираз беклеген сонѳ, кене лаф этмеге башлады:

— Селям, ишлер насыл?.. Ёкѳ, ёкѳ, сен онѳа айт, нizam эр кес ичюн кѳанундыр. Ава ярамай олса да, хасталар бир вакѳыт кечикмей, экимнинѳ де кечикмеге акѳкѳы ёкѳ. Земине, мында сени корѳмек ичюн та Кѳазахстандан кельгенлер. Бабасы ве кѳызы. Кѳабул эт. Зарар ёкѳ, эр бир кѳануннынѳ ихтары да ола биле.

Баш эким трубканы ташлады, яры акѳ, яры кѳара сачларыны юксек кѳаснакѳлы такѳиеси арасына кѳыстырып аякѳкѳа турды.

— Юринѳ, сизге кѳапыны ачайым,— деп алкѳагѳа кечирильген бир топ анахтарны кѳолуна алды.

Эким, кене шу, банаки хасталарнен корюшюв одасынынѳ кѳапысыны ачты ве Арслановнынѳ агѳызындан арды-сыра текрарланып чыкѳкѳан алгѳышларгѳа эмиет бергенини бильдирген киби башыны саллады ве кѳапыны килитлеп озѳ кабинетине кѳайтты.

Корюшюв одасында энди кимсе ёкѳ эди. Анѳлашылгѳанына коре демики хасталарны озѳ палаталарына алып кеткенлер. Бугунѳ ава сувукѳ ве ягѳмурлы олгѳанындан хатир сорап кельгенлер де аз олса керек. Арсланов кѳаршыдаки кѳапыны тартты, ачылмады. Бир даа кѳуветлидже тартты, кене ачылмады.

— Ой, анасыны,— деди о.— Бу кѳапыны да килитлегенлер. Кери кѳайтты. Баш экимнинѳ тарафына чыкѳкѳан кѳапыгѳа кельди. Бар кѳуветинен итеди, озюне табачекти, о да ачылмады. Эки тарафта, эки кѳапы, экиси де килитли. Баш экимни кѳычырып чагѳыраджакѳ олды, ка-

бинети узакъта. Коридорнынъ энъ сонъунда, кычырсанъ да эшитильмейджек.

— Коресинъми, къалдыкъ мынавы хасталар одасында,— деп ташлады о къаарленип.

— Я о-ойле дегенинъ не?— деди Фидане бабасына бакъып.

Арсланов шу ан агъызындан янълыш лаф чыкъкъаныны анълады ве сёзюни бурып:

— Зарар ёкъ, кызым, шимди эким апанълар келип къапыны ачарлар,— деди амма, озю къайсы къапыгъа барып уруладжагъыны бильмей. Пенджереге бакъты. Пек юксек, пармакъ уджуна турып созулсанъ биле боюнъ етмейджек. Бираз вакъыт кечкен сонъ, азбар тарафкъа чыкъкъан коридорда къопкъа тасырдысы эшитильди. Арсланов къапынынъ анахтар делигинден эгилип бакъты. Коридорнынъ полыны ювмагъа кельген къадынны эследи.

— Гражданка, гражданка!— деди о анахтар тешигинден козюни алмайып.— Къапыны ачынъыз, бизге чыкъмакъ керек!

— Мен ачарым санъа шимди!— деп сомурданды къадын пол ювгъан таягъынынъ уджундаки чулны къопкъагъа далдырып.

— Апа, мени динъленъиз, къулакъ салып динъленъиз! Мен хаста дегилим, баш экимге кельген эдим, къалдым мынавы оданынъ ичинде. Апа ялварам, ачынъыз къапыны!

— Чокъ зырылдай берме!— деди къадын сылакъ чулны къопкъадан чыкъарып.

— Апа, инанмасанъыз, барып баш экимден соранъыз. Мен акъылым еринде бир адамым, шукюр даа бу дертке огърагъаным ёкъ. Мына янымда кызым да бар.

Шай дегенде бу къадын токъталды, пол ювгъан таягъыны къопкъанынъ устюне къойып, къапыгъа кельди. О да эгилип бир козюни анахтар тешигине якъын кетирди. Арсланов кенаргъа чекильди ве Фиданенинъ къолтукъларындан котерип косътерди.

— Шимди, токътап тур,— деди къадын Фиданени корьген сонъ. Арсланов нейсе, озюне келип башлады. Полгъа демир болтларнен пекитильген отургъычкъа отурды, джебинден явлугъыны чыкъарып, тер баскъан манълайыны, энъсесини сюртти. «Булар адамгъа акъылыны ойнаткъан деп бакып алышкъанлар»— деди о ичинден. «Даа мында мий хасталыгъына огърап тюшсенъ не япа-

джакъсынъ? Айды, сабыр этейик, анавы пол ювгъан къадын энди манъа инанса керек. О биревге илле къапыны ачтырыр. Уф, мынавы пальто да сыджакълыкъ этти. Саба вокзалда тентиреп тургъан пускюль башны мында кетиреджек экенсинъ. Къалтырамаз эди ченъгеси амма...» Арсланов пальтосыны чыкъарып, къолуна алды. Сабыры тюкенгенинден еринден турып къапыгъа таба адымлады. Коридорда кене къадын давушлары эшитильди. Пол ювгъан къадыннынъ артындан анахтарларыны чынъгъылда тып беяз халатлы семиз бир къадын кельди. О къапыны ачты да, Арслановнынъ козьлерине шубели-шубели бакъты. Сонъра эки метр къадар кери чекилип:

— Гражданин, сиз мында не япасынъыз?— деди.

— Оны сизден сорамакъ керек!— деди Арсланов ачувланып.

— Гражданин, сиз мында не ишлеп юресинъиз!?— деди о текрар.

— Мен сизге айттым да, гражданка!— деди Арсланов сесини котерип.

— Мен санъа «гражданка»—нынъ не экенини анълатырым. Бу кимнинъ баласы? Оны мында ким къалдырып кеткен экен? Дежурный!!!

Арсланов къапыдан чыктып етиштиралмады. Беяз халатлы къадын тез-тез къапыны япып, килитледи. Лякин озю кетмеди. Невбетчи етишип кельди. О, анахтарджы къадынгъа саба ишке кельгенинен бир къызчыкънынъ къолундан тутып корюшюв одасына кирген пальтолы адамны корьгенини айтты. Бундан сонъ къадын бир даа къапыны ачып:

— Айды, чыктынъыз гражданин, бизим ишимизде чешит худжур шейлерге расткелине. Шунынъ ичюн пек мукъайт ишлемек керек ола. Сизни де анъламай бираз ратсызладыкъ, афу этинъиз,— деди.

— Арсланов бу кереси индемени. Фиданенинъ къолундан тутып коридор бою адымлады.

— Сиз кимге кельдинъиз?— деди онынъ янашасындан озгъарып чыкъмакъта олгъан анахтарджы къадын.

Арсланов кене индемени. Дерсинъ агъызына сув алгъан.

— Гражданин, сизден сорайым, сиз кимге кельген эдинъиз?— деди о текрар.

— Сорай бергенинъиз не я? Сабадан берли баягъы терлеттинъиз, етер!,— деди Арсланов сертейип.

— Гражданин, мен сизге ярдым этмек истейим, сизде тѡалиба, шизофрения!

Арсланов индемени. Клумбалар арасындан бурулып кеткен сокѡакъ бою тез-тез адымлады. Онѡа баш эким кѡайсы корпускѡа бараджагѡыны анѡлаткѡан эди. Энди кимседен бир шей сорамай, бир тарафында юксек дивар кѡалангѡан тар ѳлчѡкъ бою кетти. Бу ѳл оларны япракѡлары сарарып кѡалгѡан шефтали багѡчасына алып кельди. Багѡчанынѡ ичинде семиз бетли озѡбек йигити кебаб кѡызартмакѡта.

— Юр, кѡызым, санѡа кебаб алайым,— деди Арсланов бурунына кѡокѡу ургѡанынен.

Олар кебабчынынѡ янѡна кельдилер. Арсланов онѡа дѳрт пармагѡыны юкѡары котерип косѡтерди ве кенаргѡа чекильди. Тютюнге богѡулгѡан кебабчы дѳрт теменни авуштырып, хорлы ерге айландырып кѡойды.

— Тез оладжакѡмы?— деди Арсланов бираз беклеген сонѡ.

— Ашыкѡманѡ, эмдже,— деди кебабчы оксюригине богѡулып.— Ашыкѡсанѡыз шашмаларсыз, шашмаласанѡыз анавы бинагѡа тюшерсиз,— деп башыны оларнынѡ янѡы чыкѡып кельген корпусына тараф кѡакѡты.

— Мен анда тюшип чыкѡтым энди,— деди Арсланов чырайыны сытып.

— Ойлеми?— деди кебабчы абдырап.— Мына шимдик сизинѡ кебаб азыр олур. Бир минут сабыр этинѡ. Ай-са, энди тюзелип чыкѡтынѡызмы? Шукюр савлукѡкѡа. Кѡызынѡыз да кѡаршылап кельдими? Я анасы кѡайда? Онѡа кебаб сымарламайсызмы?— деп кебабчы бир чокѡ шашма лафлар сачып башлады.

Арсланов сусты. О энди агѡызыны ачып кимсеге лаф айтмайджакѡ олды. Чюнки не айтса, онѡа мында шубеленип бакѡалар. «Бу хызметте ишлеген адамлар ойелер. Ёкѡса, мен оларгѡа худжур олып корюнемми? Анѡламайым, деди Арсланов озѡ-озюне. «Ал, кѡызым, аша. Бунѡа кебаб дейлер».

— Кѡартанам бойле пиширмей,— деди Фидане кебабны тишлегенинен.

— Кѡартананѡнынѡ кебаб кѡызарткѡан тавасы башкѡа кѡызым. Аша, аша, тоймасанѡ даа алырым.

Чешмеджиеванынѡ кабинети алдындаки скемлелерде Фиданеден буюкче бир кѡач бала даа беклеп тура эди.

Эписининъ янында анасы, я да бабасы бар. Эписининъ чырайы кускюн. Бири-биринен лаф этмей, индемей туралар. Я эвлядынынъ бахтсызлыгъыны истеген ана-баба олурмы? Эбет, олар да Фидане киби бирде-бир себептен дерт тапкъандырлар.

Пельтеклик инсан ичюн буюк хусур ве эксикликтир. Бала осе, окъуй, зенаат огрене, бильги саиби ола, лякин пельтеклиги ичюн бутюн омюри бою азап чеке. О эвеля озь-озюни азаплай, утана. Адамлар арасына кирмеге чекине. Эр кес шеньленгенде о сусып отура. Сёзге чыкъмакътан, нуткъ айтмакътан марум олып яшай. Къыз бала ичюн тутукълыкъ азабы эки кере зияде. О севген яшынен ачылып лаф эталмай. Озь къысметинден озю къачып юре. Булар эписи бала оськен сайын онынъ психикасына тесир этип башлай. Яваш-яваш нерва системасыны зайыфлата. Эр шейге ачувнен бакъа, къуванчы эксик ола. Бу дертке огърагъан балаларны деваламакъ ичюн, оларнынъ тюзгюн лаф этмелери, бахтлы олмалары ичюн, совет экимлери, совет педагоглары гедже-кунъдюз къайгъырып туралар, бу агъыр ишке буюк чыдам ве сабырнен янашалар. Баланынъ психикасы ве нерва системасынен багълы олгъан бу кучъ вазифеде белли бир дереджеде мувафакъиет къазанмакъ ичюн эким-логопеднинъ шахсий истидаты, терен бильгиси ве теджрибеси олмакъ керек. Бу иште эр бир эким мусбет нетидже эльде эталмай. Оны къазанмакъ ичюн баланы этрафлыджа огренмек керек. Айни вакъытта ана-бабасыны, онынъ турмушыны, кадияларынынъ ойнагъан достларыны, къомшуларыны да огренмек керек ола. Тутукъны девалагъан, сёйлендирген эким, онынъ экинджи анасы олып къала.

Арсланов сабырнен невбетини беклеп тура. Чешмеджи-евагъа баш эким телефон этсе де, о бу ерде акъсызлыкъ япып, шамата чыкъармагъа истемей. Уйле маали якъынлап къалды. Невбетте кене эки бала даа бар. Олардан сонъ, невбет Фиданенинъ.

«Манъа ашыкъмагъа бир шей ёкъ. Эп бир Къазахстангъа бир къач кунъсиз къайталмайджакъмыз. Ташкент мусафирпервер бир шеэр. Бизге де къонмагъа бир коше тапылыр, тек Фиданемнинъ иши онъына кеткейди. О къадар ерден мында замет этип кельген сонъ, баланынъ бахты юргеиди बारे». Арсланов шимди ялынъыз бойле тюшюнджелернен яшай.

Тойнынъ олып кечкенине даа эки ай толмай. Къула-

гъында аля даа чалгъы сеслери янъгъырай. Я Айриенинъ сыджакъ севгисини, къартийлернинъ къуванчлы козьяшларыны айтмайсынъмы? Арслановнынъ юреги, шимди, ат башы киби. Онынъ севинчи де ичине сыгъмай. Эвленинининъ ильк кунюнден Фиданеге бабалыкъ дуйгъусы ашламагъа тырыша. Айни шу мунасибетни Айриеден озъ эвлядына — Эскендерине беклей. Шунунъ ичюн о ашыкъмай. Туткъан ишининъ сонъуна чыкъмагъа истей. Тарлада иш къалмады. Тютюнлер къурутылып таванларгъа илинди. Деметлев иши яхшы кете. Алтын киби сары, темиз тютюн тейларыны машиналаргъа юклеп, девлетке теслим этелер. Онынъ башында шимди Арслановнынъ олмасы шарт дегиль. Арангъа кирген берекет бир вакъыт ятып къалмай. Онынъ ери тез тапыла. Тек даа олгъайды. «Сагъ олсын трубаджы Шемшедин, бу адресни манъа бермеген олса, бир бучукъ миллионлыкъ Ташкент ичинден Чешмеджиеваны къайдан тапар эдим...» деп тюшюне о.

Ниает, Арслановнынъ невбети кельди. Яш, дюльбер бир къыз къапыны ачып, Арслановкъа бакъты да:

— Сиз, Чешмеджиевагъа кирмек истейсизми? — деп сорады. Сонъра къапыны япты ве бир дакъкъа кечер-кечмез кене ачып:

— Хаста, киринъиз! — деп Арслановны давет этти.

Арсланов Фиданенинъ къолундан тутып яваш адымларнен ичери кирди. Къыз тургъан одадан кечип, экинджи къапыны ачты. Онынъ алдында, кенъ стол башында элли яшларында, орта бойлу, сачлары агъарып башлагъан, бяз бетли, ири козлю къадын отура. Иште бу тутукъларны сейлендирген эким-логопед Чешмеджиева Земине Гъафаровна эди.

О баягъы яшларында олгъанына бакъмадан еринден турды, кулюмсиреп Арслановнынъ янына кельди, Фиданени къучагъына алып опыти де, кене ерине къайтып отурды. Бираз вакъыт индемей турды. Бу арада Арслановны экимге давет эткен къыз келип Фиданени охшап-алдатып янаша одагъа алып чыкъты. Эким башта баланынъ бабасынен лаф этмек истей экен. О ничюндир, бутюн вакъыт кулюмсиреп, бир шейлер язды, язды, кене индемени. Бу сукюнетли кулюмсиревде гизли сыр олгъаныны, эким энди Фиданени озюне джелъп этип башлагъаныны Арсланов альбет де анъламады. Кулюмсирегенде агъызындаки алтын тишлерининъ уджлары корюне, сонъ кене гъайып олып кетелер. Манълайы ве янакъларында йымшакъ бу-

рюшиклер асыл олалар. Кечмишининъ хатиреси олгъан бу терен ёлакълар, онынъ беяз бетини даа зияде яраштыра, къальбинъде эким ичюн ишанч ве урьмет ислери уяндыралар. Кимерде бир башыны котерип юзюнъе бакъса, ири тегерек козьлери сени бир кереден эсир ала. Эгер о тылсымлы козьлер санъа бир къач дакъикъа бакъып турмасын, озюнъни гуй башынъ айлангъан киби дуясынъ.

«Бу экимнинъ бутюн сыры козьлеринде олса керек» — деп тюшюнди Арсланов.

— Къазахстандан кельдинъизми? — деди эким онынъ тюшюнджесини болюп.

— Эбет, Алма-Ата областындан, — деп джевапланды Арсланов.

— Къызынъызми?

— Къызым.

— Анасы сагъ-селяметми?

— Сагъ. Якъында эвлендик.

Арсланов, агъызындан бойле сёз чыкъып кеткенине пешман этти.

— Насыл ола я? А-а, анълашылды, — деди эким онынъ шашмалагъаныны корип.

— Тутукълангъаны чокътанмы?

— Тили чыкъкъанындан берли. Энди беш йыл.

— Неден олгъаныны билесизми?

— Къоркъудан олды. Анасынен берабер, дрезина къапакълангъанда огърагъанлар.

Бу суаллерден сонъ, эким Арслановкъа янаша одагъа чыкъмасыны риджа этти ве: — Сусанна! — деп яваштан озъ ярдымджысыны чагъырды.

Сусанна Фиданени алып кельди.

— Къана, къызым, кельчи бу якъкъа!

Фидане сакъына-сакъына бир-эки адым атлады, янаша одагъа чыкъкъан бабасына бакъты, кери къайтаджакъ олды, сонъ токъталды.

— Кель, кель къызым. Бакъчы меним столымда насыл ресимлер бар. Кель, санъа косътерейим.

Фидане юрекленип якъын кельди. Эким оны кене къучагъына алды. Чекмеджени ачып, махсус япылгъан ресимлерни бирлей-бирлей стол устуне къойды.

— Сен пек яхшы къызчыкъ экенсинъ. Эм козьлеринъ де тоз-тегерек. Менимкилерине бенъзей. Догърумы?

Ойле дегенде Фидане экимнинъ козьлерине бакъты.

— Ана, шай, аферин къызыма. Биз экимиз ойле дост

олайыкъ ки, сенинъ бутюн достларынь бизге сукълансылар. Меним деген шейимни япаджакъсынъ къызым, не сорасам айтаджакъсынъ, яхшымы? Къана бакъайым, сен озъ адынъны билесинъми?

— Би-билем.

— Недир сенинъ адынъ?

— Фи-фи-Фидане.

— Я ананънынъ ады не?

— Ай-ай-Айрие.

— Аферин къызыма. Эр шейни биле экенсинъ. Мына-вы ресимни таныйсынъмы? Недир бу?

— Эчки.

— Я бу не?

— Бу да эчки.

— Я бу эчкилер не япалар?

— Тюртюшелер.

Эким китапнынъ ичиндеки бутюн ресимлерни косътерип, сорап чыкъты. Фидане тутукъланса да, эписине догъру джевап берди.

— Яхшы, къызым. Айды, бар энди бабанъа. Коресинъми насыл достлаштыкъ сеннен? Акъыллы къызлар ойле олмакъ кереклер.

Фидане джувурып Сусаннанынъ янына барды. Баба-сыны кене эким чагъырды.

— Баланъызда хавфлы бир шей корюнмей. Девалав курсындан кечсе тили тюзелип кетер. Акъылы еринде, табияты яхшы, сёзге де пек келе. Энъ эсасы шу ки, адамны дикъкъатнен динълей. Бойле балалар деваланув-гъа яхшы берилелер ве тез тюзелип кетелер.

— Сиз меним омюримни узаттынъыз, эким. Сагъ олынъ. Мен анджакъ бойле уютнен ёлгъа чыкъкъан эдим. Уютим бош кетмеди. Деми лафымдан сезип къалдынъыз ки, биз онынъ анасынен якъында эвлендик. Эв-ленюв мунасибетинен кечирген акъшаммызны яраштырмагъа Ташкент усталары кельген эдилер. Олар Фиданени корьгенлеринен меним къулагъыма сизинъ адынъызны айттылар. Трубаджы Шемшедин деген адам сизни пек яхшы биле экен. Адресинъизни ондан алдым.

— Я мен оны бильмейим де, о мени къайдан биле экен?

— О сизни пек яхшы биле. Сизинъ акъкъынъызда газета ве журналларда язылгъан макъалелерни кесип кесип джеп блокнотына къойгъан. Йигит озъ лагъабынен

анъылыр, дегенлери киби халкъ арасында адынъыз «тукъларны сѣйлендирген эким» деп джайрагъан.

— Айды, чокъ макътаманъ мени. Юзлернен совет экимлери киби мен де озъ хызметимни япып келем. Ишимде кимседен устюнлик коръмейим. Элимден кельгенине коре тырышам. Фиданенинъ озъ акъранларындан бир группа топлап, сонъ девалав курсына кечермиз. Лякин меселе шунда ки, сиз Ташкентли дегильсиз, узакътан кельдинъиз. Бу ерини озюнъиз чезеджексинъиз.

— Къач кунъ керек олур экен беклемеге?

— Энъ аздан бир ай,— деди эким.

Арсланов юткъунды. Бир ай Ташкентте яшамакъ онъа мумкюн дегиль. Баланы ташлап кетмеге де ишанчлы адам керек, эв керек. Я бунъа Айрие разы оладжакъмы?

— Айса, бизге эвге къайтмакъ керек оладжакъ,— деди Арсланов ынджынып.— Чокъ языкъ. Мен ойле тюшюнмеген эдим. Янълышкъаным. Афу этинъиз. Тюф, тюф...

— Ташкентте кимсенъиз ёкъмы?— деди эким.

— Таныш-билишлер бар амма, баланы кимге ишанырсынъ?

— Сизнинъ къач кунъ къалмагъа вакътынъыз бар?

— Эки афтагъа рухсет алдым.

— Ойле олса, озюнъизни пек къыйнаманъыз. Бизим мусафиримиз олурсыз. Меним де Фидане киби бир торунчыгъым бар. Экиси аркъадаш олур, эгленирлер. Девалав курсуна озюнъиз алып кетер, алып къайтырсыз, разысызмы?

— Бинъ бир кере тешеккюр сизге Земине Гъафаровна! Тевекель ерде халкъ арасында адынъыз айтылмай экен.

Чешмеджиева Сусаннаны чагъырды ве Фиданени кичкене балалар группасына язып къоймасыны буюрды. Сонъра Арслановкъа бакъып:

— Саат алтыгъа къадар сиз бошсыз, кетип Ташкентнен таныш олунъыз. Истесенъиз Фиданени айванат багъчасына алып барынъыз. Мени трамвай токътагъан ерде беклерсинъиз.

Арсланов Фиданени алып чыкъты. Къапы янында бир къач адам даа беклеп тура эди. Сусанна чай кетирди. Экимнен экиси уйлелик аш вакътында бир тыныш нефес алдылар...

Хасталарны кѣбул этиов акѣшамгѣа кѣадар девам этти. Чешмеджиева саат алты олгѣаныны эслемей кѣалды. Пек кѣалабалыкѣ кунѣ эди. Пациентлернен лаф эте-ете онынѣ агѣызы талды, тамагѣы кѣуруды. Озюнинѣ кѣарардан зияде ёрулгѣаныны башынынѣ агѣырлашкѣанындан ве кѣулакѣларынынѣ дувулдап башлагѣанындан дуйды.

— Сусанна, айды джыйыштыр столынѣны, кѣбул битти. Энди чарем ёкѣ, кѣайтмагѣа вакѣыт.

— Кене яхшы акѣылынѣызгѣа кельди Земине Гѣафаровна, мен бугунѣ сизни мында геджелейджексиз беллей эдим. Чокѣ шукюр, кѣапыда беклеген ёкѣ,— деп кулюмсиреди Сусанна.

Чешмеджиева халатыны чыкѣарып ильди, пальтосыны кийип пенджереге кельди. Тышта серин кузѣ авасы. Саба ишке кельгенде орталыкѣ титис, кѣарлы ягѣмур бетинѣе шыпыра эди. Шимди бакѣ сен, чинарларнынѣ кербар тюз япракѣларында кузѣ кунеши йылтырап тура. Чешмеджиева пенджере кѣаршысында саатлернен отурып нефес алмагѣа, ёргѣунлыгѣыны савуштырмагѣа истеди. Лякин, эвге кѣайтмакѣ керек. Онынѣ эвде де иши бар, акѣайы, кѣызы, севимли торунчыгѣы бар.

О пенджерени япып чыкѣты ве узун коридор бою адымлап башлады. Коридорда ве кабинетлерде кимсе ёкѣ эди. Эр кес ишини битирип кѣайткѣан. Бир кѣач дакѣ-икѣадан Чешмеджиева трамвай токѣтагѣан ерге келип етти. Мында оны кестане тюсте «Волга» беклеп тура эди. Экимнинѣ бундан хабери ёкѣ. Арслановнен берабер кенѣ омузлы, кесментик бир йигит оны кѣаршылап чыкѣты. Бу йигит экимге якѣын келерек:

— Земине Гѣафаровна, сизни эвинѣызге, я да истеген еринѣызге алып кете билемиз. Машина бизимки, эмир сизинѣки,— деди утансырап.

— Теклифинѣиз ичюн чокѣ сагѣ олунѣ. Эгер сиз бильсенѣиз меним не кѣадар узакѣта яшагѣанымны теклифинѣизге бельки пешман этерсиз,— деп кулюмсиреди эким.

— Машина ичюн месафенинѣ эмиети ёкѣ,— деди йигит руль башына ерлешкенинен.

Земине Гѣафаровна машинагѣа сокѣулгѣанынен Фида-нени сорады. Арсланов оны Шемшединнинѣ эвине ташлагѣаныны ве бу машинанынѣ саиби, руль башында отургѣан йигит Шемшедин олгѣаныны анѣлатты.

— А-а, меним адымны халкѣ арасында даркѣаткѣан

сиз экенсиз де, энди бильдим баш кѡбаат кимде олгѡаныны,—деди Чешмеджиева .

— Афѡ этинѡиз, Земине Гѡафаровна, сизинѡ киби адамлар бизим гѡурурымыз. Сизде олгѡан севапнынѡ ярысы менде олсайды, дженнетке бир сѡзсиз тюшеджегимни биле-биле яшар эдим,—деди Шемшедин ша-кѡанен.

— Сенде де севап баягѡы бардыр, чокѡ ынджынма. Коресинѡми, та Алма-Атагѡ барып той чалгѡансынѡ.

— Алма-Атадан о якѡта даа эки юз километр,—деп догѡуртты Арсланов.

— Севап кѡазандыкѡмы, гуня кѡазандыкѡмы, оны бизге бильмек кѡыйын. Ничюн десенѡиз, бизим зенаатнынѡ уджунда пара бар. Адамлар тойгѡа келелер, кѡызышып башлагѡан сонѡ, трубанѡа параны кетире-кетире тыкѡалар. Тойдан сонѡ эсини джыйып, джеплерини кѡарыштырып бакѡсалар бир ша кѡалмагѡан. Сонѡ, «ой анасыны, эписини Шемшединнинѡ трубасына тыкѡкѡаным»—деп сени бир де сѡгюп алалар. Ана санѡа севап...

— Ёкѡ, ёкѡ, сен ойле деме. Чалгѡыджы эки яш омюрнинѡ эйилигини яраштыра. Яшлыкѡта шу ферахлы гедженинѡ зевкѡыны корьген адам омюрининѡ сонѡуна кѡадар унутмай. Озюнинѡ тоюны ольгендже хатырлай, балачагѡасына, дост-эшине икѡе эте. Бу севап иш,—деди Чешмеджиева.

Шемшедин лаф ичюн джепке киреджек йигит дегиль экен. О машинасыны Ташкентнинѡ вокзал районынынѡ кѡалабалыкѡ сокѡакѡларындагѡ айландырып, кенѡ ве узун Навой проспектине чыкѡты. Бутюн дикѡкѡаты рульде олса да, Чешмеджиеванен кѡызгѡын-кѡызгѡын лаф этеджеги келе. Сабанынѡ кѡарлы ягѡмурундан сонѡ, кѡурып етишмеген сокѡакѡ бою машина сувда ялдагѡан кѡайыкѡ киби акѡып кетмекте.

— Эвлendirмек севап иш амма,—деди Шемшедин бираз сукюнеттен сонѡ,—вай онынѡ айрылыгѡы олмаса. Эвленгенде бизни алгѡышлайлар, айрылыкѡ чыкѡса, кѡудасыны да, еди эждадыны да, аякѡчысыны да, чалгѡыджысыны да кѡаргѡайлар. Ана санѡа севап.

— Я, бизни кѡаргѡамайлар беллейсизми?—деди Чешмеджиева кулюмсиреп.

— Ёкѡ. Сизни кѡаргѡагѡаннынѡ тили тутулыр. Сиз инсанларгѡа ялынѡыз яхшылыкѡ япасыз. Адамгѡа сагѡлыкѡ багѡышлайсыз, эксиклигини тамамлайсыз. Мен бал-

ларыма гедже-куньдюз экимлик зенаатыны макътайым. Дюнъяда онъа етер зенаат ёкътыр.

— Бу сизинъ шахсий фикиринъиз, эльбетте,— деди Чешмеджиева.— Лякин, эр кес эким оламай. Даа догърусы эр бир зенаатнынъ экими олмакъ керек. Мына сиз той чалгъанда эр кеснинъ гонълюни тапмагъа тырышасыз, дегильми? Бу ерде пара меселесини четке быракъайыкъ. Эгер сиз акъикъий уста олсанъыз, тек парагъа хызмет этмейдирсинъиз беллейим. Сиз биревни кульдиресиз, биревнинъ козюнден яш тамлатасыз. Мына бу да экимликтир. Бизим зенаатымыз да ойле. Адамны кульдирмек ичюн, онъа башта сагълыкъ бермек керек. Экимнинъ ярдымынен адам озъ-озюне сагълыкъ къазана, онынъ огреткен чешит васталарынен омюрини узата.

— Эр алда, мен чокъ ерлерде, чокъ адамлар арасында олдым. сизни ялынъыз алгъышлагъанларыны эшиттим. Сизде экимликтен башкъа, инсаниетлик де буюк. Буны халкъ анълай ве унутмай. Мына, Самедин агъа сизинъ инсаниетлигинъизге йшанмагъан олса, бу серт авада ёлгъа чыкъмаз эди.

— Догъру айтасынъ, Шемшедин,— деди индемей тургъан Арсланов.— Инсан олып яшаган сонъ, юрегинъде мерамет олмалы. Мераметсиз олып дюнъяда яшамакъ мумкюн дегиль. Мерамет олмаса адамлар бири-бирине къашкъыр киби бакъар эдилер. Мен догърусыны айтсам, Ташкентте бойле эким яшагъаныны бильмей эдим. Амма сен Фиданени корип, мерамет эттинъ. Мени ёлгъа алып чыкъмагъа себебчи олдынъ.

— Айды, хайырыны корюнъ. Бельки Земине апге онынъ дердине дерман тапар.

— Мен эм сизни динълейим, эм де терен тюшюнджеге далам,— деди Чешмеджиева.— Ничюн десенъиз, кимерде мен устюме буюк, месулиетли иш алам. Бу хусусан тутукълыкъ меселесинде. Чюнки, эр бир хаста ве онынъ тувгъанлары да экимден озъ баласынынъ тюзелип кетмесини беклеп туралар. Амма, хастанынъ девалануву я да дева-ланмаюву ялынъыз экимге багълымы, аджеба? Тутукълыкъ башкъа хасталыкълар киби дегиль. Мында хастанынъ якъынлары ве шахсен озю буюк роль ойнай. Бир ай девамында баланы сабырнен, ачувландырмай, вакъытлы-вакътында экимге кетирмек керек ола. Кимерде, дева-лав курсуны бир къач айдан сонъ, текрарламагъа меджбурсынъ. Базы ана-бабалар бу шартны кереги киби сонъ-

уна чыкъмайлар. Баланы вакътында алып кельмейлер, невбетни къачыралар. Сонъра, «бир файдасы олмады» деп баланынъ янында лаф этелер.

Чешмеджиева бу сёзлерни Арслановнынъ дикъкъатыны джелъп этмек ичюн айтты. Яхшы ки, янында Фидане ёкъ. Бала олмагъанда бабасына айт шейлернинъ эписини айтып къалмагъа истеди. О эм лаф эте, эм де Арслановкъа козь ташлай. Бабанынъ анъы ве табиятыны огрене. Эким бунынъле энди озюнинъ вазифесине киришкенини кимсеге сездирмей. О Арслановнынъ юрегини ачып корьмеге истей. Акъикъатен бу балагъа ярдым этмек истегенини, онынъ келеджеги ичюн бабаджа къайгъыргъаныны анъламагъа тырыша.

Арслановнынъ къайгъылы ве тюшюнджели чырайы Чешмеджиеванынъ къальбинде ишанч догъура.

Машина эски шеэрнинъ айланмалы тар ёлларындан кечип, эки тарафында вишне тереклери отуртылгъан сокъакъкъа бурулды.

— Мына, бу бизим маалле,— деди Чешмеджиева. Сонъра Арслановкъа назар ташлап:— Фиданени не вакъыт алып келеджексинъиз?— деди.

— Земине Гъафаровна,— деди Шемшедин омузыны бурып.— Фидане бизде отурсын. Самедин агъанен экисине бир ода тапармыз. Истесе барып яресини де кетирсин.

— Мен къаршы дегилим. Бизде яшамагъаны даа яхшы, деваланувнынъ эффекти къачмаз. Мына, бизим эвимиз. Тюшюнъиз, бир къаве пиширейим,— деди Чешмеджиева.

— Сагъ олунъыз, башкъа вакъыт кирермиз.

Эртеси куню саба ягъмурдан кене козь ачмакънынъ чареси ёкъ эди Чешмеджиева зонтигини ачып, аджеле адымларнен трамвайгъа ашыкъты. Трамвай токътагъан ерге кельгендже плащынынъ этеклери сылангъан, аягъындаки къыскъа къонучлы, беяз резина ботилер ерден сачрагъан быланчыкъ сувлардан лекеленген эди. Эр кес ишке ашыкъа. Трамвайгъа сокъулып етиштирген кете, етиштиралмагъан невбеттски трамвайны беклей. Чешмеджиева бу ёлдан къатнай-къатнай энди чокътан эр бир шейни огренип къалды. Омюрининъ йигирми еди йылынъ бу ишке багъышлады. Ишке кечикип кельмек онынъ омюринде олмады. Ава не къадар бозукъ олса да, транспорт токътап къалса биле о бир вакъыт ишке кечикмей.

Сусанна яш логопед. Якъында институт битиреджек:

Шимди Чешмеджиеванынъ янында амелият кечмекте. Устазындан не корьсе, оны огренеджек, онъа итаат этеджек, теджрибели экимден алгъаныны халкъкъа багъышлайджакъ. Чешмеджиева буны яхшы биле ве Сусаннанынъ алдында озюни эр вакъыт нумюнели тутмагъа тырыша. Энди озюнинъ баягъы яшларда олгъанына бакъмадан, кимерде бир Сусаннанен акъранджа лаф эте, яшлыгъыны хатырлай. Онынъ яхшы кийинип юргенине сукълана.

Бугунъ Сусанна ишке кечикип кельди. Эвден зонтик алмайып чыкъкъан. Плащ киймеген. Башынынъ тёпесиндеки ясама сач обасы сувгъа шищельген. О ягъмурдан джибинген тавукъ киби къапыдан келип кирди де:

— Багъышланъыз, кечиктим, Земине Гъафаровна,— деп перде артына кечип ташланмагъа башлады.

Шу арада къапы къакъылды ве джевап беклемейип ичери он учъ яшларында бир къызчыкъ кирди.

— А, Наташа? Кир, кир, отур къызым, шимди мен ишимни битиририм,— деди Чешмеджиева.

Наташанынъ мында деваланып къайткъаны энди бир йыл олгъан эди. О баягъы денъишкен, оськен. Бираз утансырап къапы янындаки бош скемлеге отурды. Чешмеджиева янъы кельген хастанынъ анасынен лакъырды этмекте эди. О сорав ве анълатувларыны битирген сонъ, шу баланынъ анасы экимге суаль артындан суаль берип башлады.

— Тутукълыкъ хасталыгъыны бир тамам деваламагъа мумкюнми?— деди о экимге шубели козьлерини тикип.

Чешмеджиева онынъ бакъышындан ойле анълады ки, онъа не айтсанъ, эп бир инанмайджакъ. Оны къандырмакъ ичюн мытлакъ козюне бир шей косътермек керек. Чешмеджиева бираз индемей турды ве Наташагъа бакъып кулюмсиреди де:

— Мына сизге джанлы мисаль,— деди.— Бу къызчыкънен лаф этип бакъынъыз, тутукълыкътан къуртулмакъ мумкюнми-ёкъмы, о сизге анълатыр.

Наташанынъ бу дерттен къуртулгъанына энди бир къач йыл олды. Бу йыллар ичинде о учъ кере озъ лакъырдысыны тешкертмеге кельди. Шимди Наташа тешкерювге дегиль де, озюнинъ эски досту — оны бу дерттен къуртаргъан экимни корьмеге, сагълыгъыны бильмеге кельди. Чюнки онъа энди тилини тешкертмеге аджет ёкъ. О бир къач йыл ичинде озюнинъ тутукълангъаныны унутып башлады. Тутукълыкъны, бу аджиз азапны бир тамам ба-

шындан аткъарды. Ташкентке кельген сайын Чешмеджиеваны корьмегендже къайтмай.

— Наташа, кельчи бу якъкъа,— деди Чешмеджиева гъурурлы тавурнен.— Айт, къызым, мына бу къадынъга, сен насыл тутукълана эдинъ ве о дерттен насыл къуртулдынъ. Мен сизни бир озюнъизни къалдырайым,— деп эким еринден турып кетеджек олды.

— Отурынъыз, кетменъиз, Земине Гъафаровна. Мен сизинъ янынъызда лаф этмеге сыкъылмайым, манъа тиль берген сиз олдынъыз, сизден утанмакъ манъа айып дегильми?— деди Наташа тюзгюн ве татлы тилинен.

Наташанен олып кечкен субеттен сонъ, Чешмеджиева шу къадындан сорады:

— Эгер сиз берген суалинъизге къанаатлы джевап алгъан олсанъыз, бизге инансанъыз, ярын саба саат докъузда баланъызны бу кабинетке гипноз сеансына алып келинъиз,— деди.

Къадын къуванчлы козьлерини яшландырып:

— Сагъ олунъ, эким, мытлакъ келирим,— деп чыкъып кетти.

— Ана шай, Сусанна,— деди Чешмеджиева онынъ халат кийген сонъ да джюнчюп отургъаныны корип.— Баласындан эвель, ана-бабасыны да деваламагъа сыра келе. Сусанна, сен пек ушюгенсинъ. Бир, чай кетир, ичинъе джанынъ кельсин. Эм бир даа бойле делилик япма. Бунъа яшлыкъ беясы дейлер. Тышта боран, сен исе язлыкъ форсанъны денъиштирмей юресинъ.

Сусанна къапыны ачкъанынен ичери орта яшларда бир къадын кирди. Чешмеджиева бир шейлер язып отура эди. Къадын столгъа якъын келип:

— Селям, Земине Гафаровна!— деди. Чешмеджиева башыны котерди, селямны алды ве кене язмагъа тутунды.

— Танымадынъызмы?— деди къадын.

— Бир корьгениме ошатам, лякин хатырлап оламайым.

— Шимди танырсынъыз,— деп къадын къапыны ачты. Ичери тыпкъы озюне бенъзеген къырмызы янакълы яш бир къыз кирди. Чешмеджиева оны корьгенинен:

— Галочка, Галя! Меним дюльберим, тувгъанчыгъым! Сен энди таныладжакъ киби олмагъансынъ, къайдан бойле?— деп эеджанланды.

Къыз Чешмеджиеванынъ бойнуна сарылды. Козьлерини сюртип озю акъкъында икяе этип башлады...

Галя, биринджи кере анасынен Чешмеджиевагъа кельгенде он эки яшында эди. Арадан алты йыл кечти. Шубесиз, къыз баланы алты йылдан сонъ танымакъ зор. Лякин о Чешмеджиевагъа эр йыл келип кете. Алты йыл эвельси онынъ тутукълангъаныны корьген адам аджынып кетер эди. Базы сёзлерни ич де айтып оламай эди. Он эки яшында, дюльбер, сюзме козлю бу къызчыкынынъ тилини тюзетмек ичюн Чешмеджиевагъа баягъы чекишмек, баягъы терлемек керек олды. Онынъ деваланувгъа агъыр берильгенине нервасы чыдамаса да, озюне бакъып ачувланыр. козюне бакъып аджыныр эди. Бир сёзни догъру айттырмакъ ичюн афталарнен огърашмакъ керек олды. Галя бутюн кучюни ортагъа къойып кученир эди, боюны созулыр. дамарлары къабарып чыкъар, бети къып-къырмазы олур, сеси инджечик чыкъар, лякин сёзю анълашылмаз эди. О къадар чекишип сёзни догъру айталмагъан сонъ окюрип агълай эди. Бу алдан къызны къуртармакъ ичюн Чешмеджиева онъа чешит усулларнен якълашты. Башта илядж берди, сонъра гипноз япты, тилини ачмагъа ярдым эткен чешит амелиятлар кечти. Буны эм кабинетте, эм эвде анасынынъ ярдымынен кечирди. Биринджи девалав курсы бойле кечти, тутукълыгъы къалмады. Бир йылдан сонъ кене кельди. Бу сефер азгъана файдаланып къайтты. Эки йылдан сонъ учюнджи кере девалав курсыны кечти. Бир тамам тюзелип кетти.

Мына шимди Галя кене Чешмеджиеванынъ алдында отура. Кабинетте Сусанна ве озъ невбетини беклеп кирген эки ана-баба даа бар. Чешмеджиева индемей. О таныматъан, бильмеген адамлары янында Галя насыл лаф этеджегини динълеп тура.

— Педагогика институтынынъ биринджи курсында окъуйым, Земине апа,— деди о азачыкъ къызарып. Диплом алсам сизни эвге чагъыраджагъым, мытлакъ келирсинъиз.

Чешмеджиева онынъ тюзгюн лакъырдысына къувангъанындан даянамай еринден турды да:

— Сагъ-селямет олсам мытлакъ барырым Галя, даветинъ ичюн сагъ ол,— деп къырмазы янагъындан опыти.

Бу къыз къач йыллар эвельси тутукъланып лаф эталмайдыр, деген фикир кабинетте отургъанларнынъ акъылына биле кельмеди. Ялынъыз анасынынъ козълеринде къуванч нурлары янмакъта эди. Кимге-кимге, онынъ насыл тутукълангъаны эр кестен зияде анасына малюм эди.

— Мен сизге риджа этем, мени бир кере даа девалав курсындан кечирсенъиз, Земина апа,— деди о сагълыкъ-лашкъанда.

— Галя, сен пек яхшы ве пек темиз лаф этесинъ, санъа даа не керек?

— Эки йылдан берли озюмни яхшы дуям, лякин инанып оламайым, акъылыма тюшкенде этим-теним къалтырай, къоркъам. Тутукълыгъым къайтып келир, деп къоркъам...

Чешмеджиева онынъ неден къоркъкъаныны эльбетте козюне бакъкъанда анълады. Галя озъ бахтына аля даа инаналмай. О тутукълыкъ дердине насыл огърагъаныны, насыл чекишкенини, юреги чыдаялмайджакъ азаплар чеккенини унуталмай. Янъы адамлар, янъы достлар арасында бахт тапкъанына инаналмай. «Оны бу сонъки азаптан къуртармакъ къолай, онъа гипноз керек» деп тюшюнди Чешмеджиева.

— Яхшы... Барсын сенинъ истегенинъ киби олсын, Галя. Язлыкъ имтиандан сонъ бир келип кетерсинъ...

— Сусанна, кельчи бу якъкъа,— деди Чешмеджиева Галяны озгъаргъан сонъ.— Отур, Сусанна, дикъкъатнен динъле мени. Сен тюневин бизге кельген хасталарны козюнъ алдына кетирип оласынъмы?

Сусанна козьлерини доландырып бир ан тюшюнген сонъ:

— Хатырлайым,— деген манада башыны эгильтти.

— Энъ зияде санъа тесир къалдыргъан ангиси эди?— деди Чешмеджиева карточкаларыны къарыштырып.

— Федянен, Фидане. Экиси де.

— Олар экиси бир группада оладжакълар, дегильми?— деди Чешмеджиева онынъ сёзюни болюп.

— Эбет. Ойле яздырдынъыз. Яшлары ве хасталыкъ хусусиетлери бир группада олмагъа келише.

— Шу группаны экимиз берабер тедавийлейджекмиз. Мына оларнынъ карточкалары. Мында эр шей язылгъан. Окъу, таныш ол ве озюнъни азырла. Бу агъыр группа Олар даа кичкенелер. Мында къуру сёзлерден башкъа анаджа къайгъырув ве яш балаларнынъ психологиясына аит бутюн усуллардан файдаланмакъ керек оладжакъ.

— Яхшы, Земина Гъафаровна. Мен озюм де сизден шу группаны истейджек олып юре эдим. Анавы Фиданкачыкъны пек аджыдым. Бабасы да къызындан зияде раатсызлана. Башкъа баласы олмаса керек.

— Мына, хусусан шу ерине зияде эмиет берип иш алып бармакъ лязимдир. Фиданенинъ тилини тюзетеджек олып, юрегини яраламайыкъ. Меселе шундаки, Арсланов онынъ озъ бабасы дегиль...

Сусаннанынъ козьлери ирилешти, агъызыны азачыкъ къыйыштырып, инджи киби тишлеринен дудагъынынъ уджуны тишледи.

— Акъылыма биле кельмеди Земине апа,— деди о тааджипленип.

— Сенинъ акъылынъа кельмегени, шу адамнынъ акъ-икъатен Фидане ичюн озъ баласы киби къайгъырувыны ве инсаниетлигини косътере. Лякин, сен, бугунъден сонъ, бир дакъикъа акъылынъдан чыкъарма. Бу назик меселеде янълышмагъа олмай. Буны яхшы билъ!

II

Катерина Мануйловна бугунъ иштен къуванып къайтты. Айриеге кирип укол алгъан сонъ, экиси баягъы сырдашып отурдылар.

— Фидане кеткенинден берли балалар багъчасында бир шей эксильген киби келе манъа,— деди Катерина.— Мен онъа пек алышып къалдым. Онынъ тутукъланып лакъырды эткенини динълеп-динълеп тоялмай эдим. Асыл озюни пек севдирген бала, сыджакъ къанлы. Мен онынъ кроватины джыйыштырып къойдым. Балалар юкъламагъа ятсалар, онынъ кровати бош къалгъанына джаным тарсыкъа. Озю къайтып кельгендже ерини кимсеге бермейджегим. Бабасындан мектюп кельмедими?

— Кельди,— деди Айрие терен кокюс чекип.— Он беш кунге даа рухсет сорай. Андрей Андреевичнинъ адына ариза язгъан. Бир ай отураджакъ Ташкентте.

— Демек, ойле керек. Сен онъа раатсызланма. Арсланов темелли адам. Туткъан ишини де темелли япмагъа севе.

— Эгер эвинъде лаф чыкъса, Андрей Андреевичке айтып къой шуны Катя, Арсланов анда он беш кун даа отурса, совхоз йыкъылмаз беллейим. Иши джиддий олса керек. Ондан башкъа байласалар да къалмаз эди,— деди Айрие.

...Катерина яваштан, тыныкъ сеснен насылдыр бир тюркю йырлап эвининъ босагъасындан атлады. Туфлиле-

рини аягындан силькип-силькип чыкъарып атты, пальтосыны ташламай ичери кирип, креслода газета окъуп отургъан Каштановнынъ бойнуна сарылды.

— Андрюша, мен ана оладжагъым!— деди о къуванчыны ичине тутамагъан бала киби.— Эшитесинъми, тугъаным, эки айлыкъ юкюм бар!

Каштанов козлюклерини стол устюне ташлады. Креслогъа таянып Катеринанынъ козлерине бакъып къалды. Индемеди ве отургъан еринден турмайып, алдында яш кыыз бала киби эркелсип тургъан Катеринаны озюне тартып, онынъ азгъана морарып башлагъан дудакъларындан опыти.

Катерина кене шу демики макъамыны созып, пальтосыны чыкъарды ве чабик адымларнен папичлерини тысырдатып ашханеге кирди. Каштанов ерге тюшкен газетаны котерди, лякин окъумады. Креслодан котерилип турды ве оданынъ ичинде юрип насылдыр бир хаялгъа далды, «Бугунъ Катерина къуванчлы хабер кетирди. Онынъ кейфини бозмакъ олмаз,— деп тюшюнди о.— Мен сонъки вакъытта онъа дикъкъатымны аксильттим. Катерина буны, ичтен чексе де, манъа сездирмей. Амма мен янъылам гъалиба. Эписи къабаатымны ишке ташлайым. Бош вакъытым ёкъ, деп оны баштан аткъарам. Алдайым, догърудан-догъру алдайым. Ишнинъ мында не алып береджеги бар. Я шимди? Энди тарлада тютюн ёкъ. Демет иши де сонъуна чыкъмакъта. Девлет планы арткъачынен эда этильди. Катюша санки буны анъламай. О эписини анълай, лякин даяна, сабыр эте. Къадын ишини бизге эркеклерге анъламакъ пек кыйын. Мына санъа, чапты-чапкъалады, Алма-Атагъа къатнады, консультациялар алды, энди ана оладжагъым деп кельди. Эм къадынлыгъыны япа, эм ишини беджере. Амма биз эркеклер ишке сылтап, акъайлыгъымызны унутамыз. Ёкъ, мен бугунъге къадар озюмни нафиле ерде кыйнап кельген экеним. Буны онъа айтып анълатмагъа вакъыт кельди. Юкю агъырлашкъан сонъ кеч олур, сагълыгъына зарар келе билир. Айтыладжакъ шейни шимди айтмалы».

Каштанов бу тюшюнджелернен келип креслогъа ясланды. Бираздан сонъ еринден котерилип турды, козлюгини ве газетаны стол устюнден алды, лампочканы якъып, перделерни тартып тюшюрди де кене ерине къайтып отурды.

Катерина чай кетирди. Каштановнынъ къаршысындаки креслогъа отурып:

— Аш пишкендже чайнен эгленейик,— деп кулюмси-реди. Каштанов кене онынъ козьлерине бакъты. Кулюм-сиреп тургъан шу дюльбер козьлер, муляйим янакълар, вишне тюс дудакълар Каштановны магнит киби тарттылар. Лякин о еринден турмады. Катеринагъа севда киби назар ташлады. Дерсинъ оны йылларнен корьмеген. Озь-озюнден къызгъангъандай ачкозьленип баштан аякъ сюзип чыкъты.

Катерина башта Андрей Андреевичнинъ, сонъра озюнинъ фильджанына чай тѣкти. Ипек халатынынъ этеклерини кенаргъа ташлады ве аякъларыны хачлап креслогъа ясланды.

— Айрие аджайип къадын экен,— деди о фильджаныны дудакъларына кетирип.— Мен онынънен лакъырды этип уколгъа къатнап башлагъандан берли озюмни бамбашкъа дуям. Гинекологнынъ айткъанына коре, бала энди гузель оседжек. Онынъ ичюн бир тюрлю хавф ѳкътыр. «Эгер климат авуштырмагъан олсанъыз, емишни чокъ ашамагъан олсанъыз, ихтимал бунъа да чокъ инам олмаз эди», дей. Мен бойле оладжагъыны эвельден бильген олсам, сенинъ артынъдан шеэрде бир кунъ къалмаз эдим. Не вакъыт Айриенен сырдашып башладым, сонъ бу шейлернинъ фаркъына бардым. Шимди манъа режим, ялынъыз режим керек.

— Айрие эким дегиль. Адий бир эмшире. Лякин теджрибели эким киби чокъ шей биле. Бильгиси де, теджрибеси де бар. Бу чокъ окъугъанындан олса керек. Онынъ бу совхозда адамларнынъ сагълыгъыны сакълавда къойгъан эмегине, япкъан алидженап ишине къиймет кесмемек мумкюн дегиль,— деди Каштанов фильджанына Болгариядан кельген инджир татлысы къойгъан сонъ.— Табиаты да ойле, инсан озеги. Гузеллигине сѣз ѳкъ. Дюнъяда эки бахтлы адам бар ки, онынъ бириси менимдже Арсланов олса керек.

— Бегенесинъми шу татарочканы?— деп джильвеленди Катерина.

— Бегенем.

— Я сен бахтсызсынъмы?

— Бахтаым.

— Айса, ничюн, оны бегенем дейсинъ?

— Бегениледжек адамны бегенирлер,— деди Кашта-

нов къашларыны туйип.— Ёкъса сен менден башкъа кимсени бегенмейсинъми?

— Менимчюн дюньяда тек сенсинъ, санъа баш къошкъанымдан берли ялынъыз шу фикирнен яшайым,— деди Катерина козьлерини сюзип.

Каштанов еринден турды. Быджагъынынъ къоюн джебінде орьселенип къалгъан къагъытны Катеринагъа узатты.

— Ма, окъу, Катя! Къычырып окъу, мен де эштейим!

Катерина мектюпнинъ астында Валерийнинъ имзасыны корьгенинен озюни сербест, эеджансыз тутмагъа тырышты. Лякин вишне тюз дудакълары агъарып башлагъанындан хаберли олмады. О фильджаныны тепсиге къойды. Кене чай тѣкти. Сонъра аягъыны дигер аягъы устюне алмаштырып креслогъа таянды. Тартылып къалгъан капрон чорабынынъ астындан дане сакъыз тюсте санлары корюнди.

— Окъу-окъу,— деди Каштанов Катеринанынъ янына келип.

— Сен окъумадынъмы, ёкъса?

— Окъудым... Яныма алгъан эдим, унуткъаным санъа бермеге.

Катерина онынъ не демек истегенини бир кереден дуйса да, индемени ве яваштан окъумагъа башлады:

«Къыйметли Андрей Андреевич! Имтианлардан кечалмадым, йыкъылдым. Шеэрде достларнынъ козюне корюнге утанам. Сизге, совхозгъа барыр эдим, Катерина Мануйловнадан айып. О меним ичюн чокъ къайгъырды, чокъ ярдым этти, амма мен онынъ юзюни къызарттым. Мен онъа алыштым, анама айтмагъан сырларымны онъа айттым. О манъа пек сыджакъ, пек мераметли янашты. Ола билир, о да мени хатырлайдыр. Омюримнинъ сонъуна къадар онынъ манъа къосътерген ярдымыны ве къайгъырувыны унутып оламайджагъым. Тешеккюр сизлерге! Валерий»

— Мен санъа айттыммы?— деди Катерина мектюпни окъуп чыкъкъанынен.— Бу балада намус бар, эдеп бар. Утангъанындан чыктып кеткен, коресинъми?

— Неден утана? Манъа корюнгегеми?— деди Каштанов сувукълыкънен.

— Андрей, санъа айып дегильми? Бу сенинъ дегенинъ не?

— Я санъа айып дегильми эди?

— Мен сени анъламайым, Андрей. Мени неде айып-ламакъ истейсинъ?

— Я пляж, чалаш?! Унуттынъмы? Мен хатырлап берейим ойле олса.

Каштанов ачувуны сездирмемек ичюн еринден коте-рилип турды.

— Сенинъ башынъ айланды бу совхоз ишинден Андрей,— деди Катерина йымшакъ сеснен.— Санъа раатлыкъ керек. Кунъджиликнинъ сагълыкъкъа зарары олгъаныны унутма. Сен чалашны корьген олсанъ, Валерикнинъ ана-сыны да эслемек керек эдинъ. Ойлеми? Я чалашнынъ алдында асма къазанда аш пиширген къадын ким эди? Акъай ойле олмакъ керек, эр шейни билип, эслеп, сонъ лаф этер. Ходжаман бир совхознынъ директорысынъ шунъа акъылынъ етмеген. Валерикни мен севем, огълум киби севем. Сен о баланынъ кечмишини бильмейсинъ...

«Чалашнынъ алдында, асма къазанда аш пиширген къадын» деген сёзлер Каштановнынъ мийине ине киби сан-чылдылар. «Акъикъатен о ерде къадын бар эди. Я Вале-рикнинъ анасы олгъаныны мен къайдан билейим. Къызма-табанлыкъ эттим. Молдабай да мени бираз шашмалатты» деп тюшюнди Каштанов.

— Валерикнинъ анасы дженк йыллары эляк олгъан,— деп онынъ тюшюнджесини больди Катерина. Флора оны балалар эвинден алгъан. О вакъыт Валерик яш бала экен. Фашист айдутлары насылдыр бир эмирни ерине кетирмек макъсадынен койни сарып алгъанлар. Бир сюрю къадынны бала-чагъасынен эвлеринден айдап чыкъаргъан-лар. Койнинъ бир башындан дигер башына баргъандже атешке туткъанлар. Украина койлерини озюнь билесинъ, эвлернинъ тёпелери къамыштан олса керек, алев къара тютюнге къарышып, кок юзюне котерильген. Сонъра о къадынларны айван киби айдап кетелер. Сюрюнип йы-къылгъанны шу ерде атып ольдюргенлер. Къалгъанны бир магъазгъа зыкъарлап кирсетелер. Атеш ичинде къалгъан бу адамлар джан аляметинен къапыгъа атылалар. Башыны къапыдан косътергенни шу ерде къуршуннен серип къал-дыргъанлар. Эписи бири-бирине япышып, магърашып, тютюнге богъулып янмагъа башлагъанда бир фашист къа-пыны ача. Джан аляметинен къапыгъа тырмашмакъта олгъан бир къач баланен берабер Валерикни де чыкъа-рып, машинагъа юклеп кете. Сонъра, оларны насылдыр

бир демирёл станциясына кетирип, вагонларгъа итеклеп юклейлер. Бутюн гедже къайдаларгъадыр алып кетелер.

— Къайда олгъаны белли, эсирликкедир эбет,— деди Каштанов баягъы йымшап.

— Танъ вакъыты, бир тав этегинден кеткенде бизимкилер уджюм этелер,— деди Катерина сёзюни девам эттирип.— Партизанлар олса керек. Айдалгъан халкъны къуртаралар. Сонъра, насылдыр бир ерден балаларны самолёткъа юклеп Буюк топракъкъа йиберелер. Дсй-джегим, Валерик шеэр-шеэрден, къол-къолдан кечип, Къазахстангъа келип чыкъа. Озю бу шейлерни зорнен хатырлай. Ялынъыз анасынынъ чекишип, джан аляметинен къычыргъаныны, сес-седаларыны унутмагъан. Аля даа къулагъымда чынълай, дей.

— Ойле шей унутулмай, Катя,— деди Каштанов сёзге киришип.— Балалыкъта олып кечкен вакъиа баланынъ зеининде эбедий синъип къала. Озю де насыл вакъиа!

— Вакъиа дегиль, Андрей, фаджиа!— деди Катерина козьлерини сюртип.— Дюнъяда олюмнинъ енгиль-къолай сою олмай дейлер, амма, менимдже тип-тири адамгъа яныкъ адджысы чекип ольмектен мушкюль шей ёкътыр.

— Эбет, инсан балыкъ дегиль къолтава ичине къойып къызартмагъа. Амма шу мельунлар инсанны балыкъ ерине корьмедилер. Олар нидже адамларны магъазларда тип-тири къавурдылар. Фронтта меним бир достым бар эди. Онъа азат этильген койлерден биринде тыпкъы бойле бир фаджианынъ шаады олмагъа сыра кельген. Магъаз ичинде янып куль обасына чевирильген адамларны озь къолунен чыкъарып къардаш къабирине комген. Онынъ бир хатырлавыны ич унутмайым. Магъазнынъ къапысыны парлап киргенлеринен яныкъ-куюк къокъусундан нефеслери тутулып къала. Базыларынынъ пармакълары, тырнакълары, базыларынынъ исе вуджудындан айры бир къысыллары янып битмеген. Бир къадын джеседининъ янында куль обасына чевирильген бир къызчыкъ тура экен. Экисининъ де орюльген бирер къулач сачы бар экен. Яныкъ сач тири адамнынъ сачы киби тура экен. «Къолнен тиймесенъ янгъан сач олгъаны билинмей» деген эди. Ерли халкълар бу эки къадыннынъ кимлер экенини сачларындан танып бильгенлер. Анасы озюнинъ он яшында къызчыгъынен экен. Анълашылгъанына коре бичарелер бири-бирине сыгъынып джан берселер керек. Аджыныкълы олюм... Дюнъяда энъ къолай

олюм бузлап ольмек, энъ зор олюм янып ольмектир,— деп токътады Каштанов.

— Андрей, сен ойле лаф этесинъ ки, санки бир кере олип тирильгенсинъ. Онынъ енъгиллигини, кыйынлыгъыны ялынъыз адджысыны чеккен биле. Биз этрафтаки адамлар ойле чешит фикирлерни озъ гонъюлимизни алмакъ ичюн юрютемиз. Башына тюшкен дерт, бея къолай олса, адам ольмез эди. Адам онынъ адджысына даянамагъан сонъ джаныны теслим эте. Биз сагъ экенде бунынъ фаркъына бармаймыз. Хусусан яш экенде. Озюмизни дюньяда эбедий яшаджакъмыз беллеймиз. Ялынъыз шунинъ нетиджесинде янълышлыкълар япамыз, бири-биримизнинъ багъчасына таш атамыз. Бу эльбет де, башкъа меселе, энди психологиягъа кечейтырым. Дейджегим о дегиль. Бир йыл къадар вакъыт кечкен сонъ, бир кунъ балалар эвинде, мына шу къадын, Валерикнинъ аналыгъы Флора пейда ола. Оны эвлядыкъкъа ала. Энди озюнъ тюшюн Андрей, эльбет де онынъ юреги яралы, тюшюнджеси буюк. Чокъ языкъ ки, шу койлренинъ бир данесининъ адыны бильмей бутюн вакъыт бабасыны тюшюне.

— Бабасы эр кес киби дженкке кеткендир эбет,— деди Каштанов.

— О ерини яхшы хатырлап оламай. Бет сымасыны да унуткъан. Ялынъыз лаф эткенде «Р» арифини айтып олмагъаныны биле. Бабасы оны къучагъына алып, омузлары устюне котергенде «Мой кгъолик, мой соколик» деп севе экен.

— Бизим Матвей Петрович киби пельтеклене экен де,— деди Каштанов.— Ойле олса, о эсир тюшмегендир. Немселер оны бинъ эсирнинъ ичинден тапып, чуфут деп гъайып эгер эдилер. Ким биле, бельки де сагъдыр. Адамлар шу шейтан боранындан чевре-этрафкъа сачылдылар. Сагъ-селямет олгъанлар бир кунъ илле тапышалар. Чокъ языкъ ки, оларнынъ кою ернен эксан олгъан. Адамлары ким биле къайдаларгъа сепильгендир. Бу шейлер энди кечип кетти. Валерикке бу меселелер акъкъында тюшюнге, раатсызланмагъа аджет ёкъ. О яш. Онъа яшайыш къурмакъ керек. Кельсин бизге, окъутыр, механизатор этермиз. Яшлар ичюн къапымыз ачыкъ.

Каштановнынъ сёзлерини юрегине якъын алып, индемей динълеп тургъан Катеринанынъ узун, къара кирпичлерининъ уджлары джибинип башлады. Каштанов онынъ бетине бакъты. Катерина эр вакъыттаки киби муляйим,

дюльбер, мераметли бир къадын олып корюнди. Озюнинъ юреги де атешке тюшкен къуршун киби йымшап кетти.

— Еди йыл омюр эткенимиз, бала корьмедик. Меним бала делиси олып, юргенимни билесинъ Андрей,— деди Катерина.— Сонъ вакъыткъа къадар къабаат сендедир беллей эдим. Госпитальден чыкъкъанынъдан берли шубеленип юрдим. Матювлик озюмде экен. Бармадым, бакъылмадым. Мен де дженк йыллары озюмни сакъатлагъаным. Ичимде яратылгъан баланынъ осип оламагъаныны бильмедим. Бала ятагъында асыл олгъан тельнинъ сакъланып къалмасы ичюн баягъы чарелер корьмек кереклигини анълагъан сонъ, эсимни джыйып башладым. Шунунъ ичюн де Алма-Атагъа сыкъ-сыкъ къатнап экимлерге корюндим. Амма сен мени шу эвлядым ерине корьген баламдан — Валериктен куньлегенсинъ, айып дегильми санъа, Андрей? Екъса, сен энди къартайып башладынъмы?

— Багъышла, Катюша. Инсан чий сют эмген дейлер. Меним де башым айланса керек, афу эт.

Катерина явлугъыны чыкъарып, яшлангъан козьлерини сюртти ве индемени.

— Зарар ёкъ, Катя,— деди Каштанов еринден турып.— Сен Валерикнинъ якъасыны быракъма, о яхшы бала экен, язгъан мектюбинден де корюлип тура. Чагъыр, кельсин бизим совхозгъа.

— Чагъыр дейсинъ, санки о адресини ташлап кеткен.

— О къайда олгъаныны анасына бильдиредир. Бельки къайтып да кельгендир. Башынъны алып, эвден чыккып кетмекнинъ эки уджу бар. Бир уджу парада, экинжиси айледе.

— Яш адам онынъ уджуны тюшюнип отурмай, Андрей. Акъылына тюшсе, чыкъа да кете.

— Онынъ киби яшларнынъ парасы битсе, форсасы да бите. Кене озюнинъ арман дирегине келип багъланыр.

III

Къурбанбековнынъ кабинетинде совхоз партия тешкилятынынъ меджлиси кете. Матвей Петровичнинъ меселеси бакъыла. Онынъ хастаханеден деваланып кельгенине баягъы вакъыт олды. Анда оны яхшы тедавийлеселер керек. Ракъыны агъызына алмагъан сонъ, кьокъусыны да

кѡабул ѳтмей. Тѳюкянгѡа сигарет алмагѡа биле кирмей. Кимерде бир буфет алдында топлангѡан ѳски достларыны корѡсе, кенардан ѳйланып кете. Башыны котерип бакѡмай. Каштанов онынѡ бойле худжур алда юргенини де бегенмей. Ичмегенине исе, вакѡтынджа «антракт» деп бакѡа. Матвей Петрович аризасында, кѡартлыкѡ себебинден, баш инжсер вазифесинден азат олунмасыны, совхозда прораб оларакѡ кѡалдырылмасыны риджа ѳтип яза. Бюро азалары энди бу аризанен чокѡтан таныш олгѡанлар. ѳписининѡ башы ашагѡыда. Агѡызларына сув алгѡан киби сусып отуралар. Тек Боденеджиев тосат-тосат Кѡурбанбековкѡа козѡ ташлай.

— Кѡана, аркѡадашлар, бойле пысып отураджакѡмызмы? Матвей Петрович янымызда. ѳйтаджакѡ лафымызны бу ерде, козюне бакѡып ѳйтайыкѡ. Кѡалдыраджакѡмызмы оны озѡ вазифесинде, ѳкѡса?..

Биринджи сѳзни Боденеджиев алды.

— Матвей Петрович яхшы инженер, аркѡадашлар!— деди о.— Биз бу совхозгѡа кельгенде, мында шейтан бораны ѳйнай ѳди. Онынѡ ѳлбашчылыгѡы алтында кѡуруджылыкѡ ишине кириштик. Козюмиз алдындаки ѳвлер дагѡда оськен мантарлар киби бири-бири артындан котерильдилер. Бу ишлерде Матвей Петровичнинѡ иссеси буюк. ѳксиклигине кельгенде, о энди олуджы шейлер, буны озю анѡлагѡандыр беллейим. Менимдже озѡ вазифесинде кѡалып ишлей берсин.

— Матвей Петрович, санѡа бир суалим бар,— деди Кѡурбанбеков онынѡ туманлы козѡлерине бакѡып.— Мен сизинѡ ѳвинѡизде бир кѡач кере олдым. Аркѡадашынѡызнен, бала-чагѡанѡызнен субетлештим. ѳр алда сизни ичмеге не меджбур ѳткенини анѡлап оламайым?

— Сен яшсынѡ, дженкте олмадынѡ...

Матвей Петрович бу сѳзлерден сонѡ, бир тыныш токталды, сонѡра лафыны бурып:— Мында анѡламамагѡа не бар? Ичеджегим келе, ичем!— деди, афакѡанланып.

Адамлар кулюштилер. Ялынѡыз Каштанов кульмеди. Кѡурбанбеков суалини девам ѳттирди:

— ѳр алда мен догѡрусыны бильмек истейим. Сен не ичюн ичесинѡ?

— Базы шейлерни унутмакѡ ичюн.

— Насыл шейлерни?

— Дженк фелякетини.

— Ойле олып чыкѡа ки, санки сен бир озюнь дженк эткенсинь,— дедилер кенардан.

— Айды, яхшы. Эндиден сонъ не тюшюнесинь, ичеджексиньми?— деди Къурбанбеков сертейип.

— Мен коммунистим. Эм бу адны къараламакъны бир вакъыт озъ шаныма сыгъдырмадым. Дженкте де онынъ иле яшадым, онынъ иле джесаретленип душманнен курештим, онынъ иле енъдим, онынъ иле гъурурланып къайттым. Къайттым амма... аилемнинъ фаджиалы олюмин эшиткенде мийим бузлады. Шу куньден сонъ, озюмни къолгъа аламайым. Асыл манъа не олды озюм бильмейим. Мен бу шейни истекнен япмайым. Кимерде ойле башым айлана ки, сонъ не япкъанымдан озюмнинъ хаберим олмай. Бу тедавийленювден сонъ, шубесиз озюмни яхшы тутмагъа тырышырым.

— Озюме ишанмайым демеге тилинь бармаймы?— деди Каштанов океленип. Сонъра еринден турып девам этти.

— Матвей Петрович меселесине биз даа къач кере къайтаджакъмыз? Бизим башкъа ишимиз ёкъмы? Дженк, дей, фелякет, дей бильмем даа не демек истей. Сен чокъ баш кутьме, Матвей Петрович! Бизлер де дженк корьген адамлармыз. Сиз къан тёккенде биз де къуш сюти ичип юрмедик. Инсан олып озюмни къолгъа алмакъ керексинь. Дженк эткенлер эписи сенинь киби балчыкъта булгъаланып ятаджакъ олса, халкъ хозяйствосыны ким аякъкъа турсатаджакъ? Бир мунасибет чыкъып къалгъанда эр кес киби сен де ич. Кеченде, мына Арслановнынъ тоюнда эпимиз кейфлендик. Бунъа кимсе итираз этмей. Резиллик — масхаралыкъ, алчакълыкътыр. Бир вакъыт резиль олма, озъ шанынъны сакъла. Коммунистсинь, инженерсинь! Айып дегильми? Санъа айып олмаса, бизге айып. Партия сафында сенинь кибилерине ер ёкъ! Аркъадашлар, мен онынъ риджасыны ерине кетирильмесини, яни прораблыкъкъа авуштырылмасыны теклиф этем...

Матвей Петрович меджлистен чыкъып догъру медпункткъа кельди. Процедура кабинетинде Катерина Айриенен лаф этип тура эди. О Айриенинь къолуна эки ампула туттырып, перде артына кирди. Матвей Петрович хастаханеден деваланып чыкъса да эки куньде бир уколгъа къатнай. Иляджларны онъа хастахане янындаки аптекадан алып кетмесини тевсие эткен эдилер. Айрие ёлектрик собачыгъы устюнде бакълалы къабакъ боткъасы

киби фыктырдап къайнамакътa олгъан шприц къутучыгъыны ачты, элине машачыгъыны алып, инелериниъ эиъ къалын союны сайлап чыкъарды. Матвей Петрович энди тедарикленип Айриенинъ кирмесини беклеп турмакътa эди. Айрие лимонъ тюсте илядж толу балабан шприцни юкъары котерип, перденинъ артына киргенинен, Матвей Петрович чырайыны экшитип, чантыр янбашларыны ачты...

Къушагъыны арыкъ белине сыкътырып перде артындан чыкъкъанда Матвей Петровичнинъ чырайы, богъазында чий мишмолла къалгъан адамны анъдыра эди.

Катерина Матвей Петровични пек сийрек коръсе де, онынъ акъкъында чокъ эшиткен эди.

— Мен сизинъ еринъизде олсам, бойле агъыр уколлардан сонъ, ракъы ерине ялынъыз шербет ичер эдим,— деди о Матвей Петровичнинъ бетине бакъып.

— Шербет ичмек эр кеснинъ элинден кельмей, мен бала тападажам ёкъ, Катерина Мануйловна,— деди Матвей Петрович пельтекленип ве ачувнен бир якъына къыйышып чыкъып кетти.

«Катерина... Валерик де тыпкъы бойле пельтекленип айта эди».

Катерина Мануйловнанынъ акъылына кене Валерик тюшти. О къолунда тутып тургъан без ташлы кичкене редикулини ачып, Айриеге акъшамки мектюпни узатты. Айрие сабырнен окъуп чыкъты ве индемени.

— Сонъ, не бар мында?— деди Катерина тюп дудагъыны къыйыштырып.— Андрей Андреевич бу мектюпни жебинде ким бильсин не къадар вакъыт ташып юрген. Чокъ языкъ ки, куню язылмагъан. Айрие, мен санъа Валерик ве онынъ анасы Флора акъкъында чокъ айткъан эдим. Сен бу меселени эр кестен яхшы билесинъ. Лякин, Андрей Андреевичтен мен бу шейни беклемей эдим. Мени кунълей экен, акъыз. Бизни «Ыссыкъ» та коръген. Лякин меним янымда Валерикнинъ анасы Флора да олгъаныны бильмеген. Бакъ сен онынъ ярамазлыгъына. Анълашылгъанына коре шу кунъден берли озъ юрегини кемирип кельди. Валерикке мен озъ балам киби алышып къалдым. Анасынен де тувгъан кибимиз. Экисини де эм аджыйым, эм севем. Валерик акъыллы, тербиели, асыл севильмейджек бала дегиль. Мында кельсе корерсинъ, Айрие. Озюнъ де бегенирсинъ.

— Келеджекми ёкъса?— деди Айрие Катеринанынъ козьлерине шубели бакъып.

— Андрей Андреевич акъшам мени динълеген сонъ, «Кельсин бизим совхозгъа, механизатор этермиз оны», деди. Шимди адресини бильмейим. Анасыны корип къалсам, мытлакъ чагъыртырым.

— Катя, эгер Валерик келеджек олса, мытлакъ анасынен кельсин. Мында онъа да иш тапылыр,— деди Айрие.

Катерина кене дудагъыны тишлеп алды. Узун кирпич-лери озъ-озълюгинден бир къач керё юмулып ачылдылар. Маникюрли, индже пармакъларынен мектюпни ортасындан къатлап редикулине къойды.

— Эр алда сен тюшюнип бакъ, Катя,— деди Айрие онынъ сускъаныны эслеп.— Акъайлар чешит-чешит олар, Хусусан Андрей Андреевич кибиси. О сыджакъны, сувукъны корьген, омюрнинъ энъ агъыр сынавларындан кечкен, арбий урба кийген, джиддий табиятлы бир адам. Сен оны нафиле ерде севмегенсинъ, къафирчик.

— Сенинъ Андрей Андреевич акъкъында бойле фикирде олгъанынъны бильмей эдим, Айрие.

— Тек мен олса эдим? Бутюн ишчилер бу фикирделер. Шунунъ ичюн де совхознынъ иши огге кете. Ишчи сыныфы озъ ёлбашчысыны урьметледими, битти. Керек олса мынавы дагъны тешип о бир четине чыкъарлар.

Катерина саатке бакъты ве «манъа вакъыт» деп къапыгъа догърулды.

— Санъа шимди отуракъ иш, ятакъ режими керек олгъаныны унутма, Катя!— деп Айрие онынъ артындан къычырып къалды. Катерина къаверенкли шубасынынъ якъасыны котерип, къаверенкли чызмаларынен къар устюнде кичкене излер къалдырып кетти.

О кимсеге котерилип бакъмай. Кимседе иши ёкъ. Шимди онынъ бутюн тюшюнджеси Андрей Андреевич ве къарнындаки баласы эди... Лякин Айриенен лаф эткен сонъ, ёл бою хаялланып кетти. «Асыл мен шу Валерикни не айта берем, бильмейим. Матювлик этем гъалиба,— деп тюшюнди о.— Санки онъа ичегим багълы. Мераметтен дерт асыл олур дегенлери мына бойле шей олса керек. Ёкъ, Андрей Андреевич мени анъламакъ керек. Еди йыл бала тапмадым. Омюрим бойле кечип-кетер белледим. Балагъа олгъан асретлигимни шу Валерикнинъ устюне къойгъан эдим. Анасыз, бабасыз къалгъан бир етим. О да мераметсиз дженкнинъ бир къурбаны. Озюм о кунълерни корьмеген олса эдим, бугунъки базы яшлар киби бельки мен де гъамсыз-къасеветсиз юрер эдим. Я о фелякетлерни

озюм корьдим де. Андрюшамны о вакъыт расткетирдим. Мени умятсиз дюньянынъ батакълыкъ аяты ичинден алып чыкъты. Онъа расткельмеген олсам, бельки мен де эляк олур эдим. Бугунъ директорша олып юрем. Онынъ адына кир кетирмек меним ичюн буюк джинаеттир. Ай-риенинъ айткъанына разым. Ола билир, онынъ ичинде куньджилик фикири яшайдыр. Бельки мен де янълыш-къандырым. Флора зорламагъан олса, асыл о пляжгъа бараджагъым ёкъ эди. Инсан къальбининъ индже дуйгъулы тельчиклери ола. Олар эр бир адамда башкъа-башкъа чалышалар. Бу Валерик меселесине Молдабай да бурун сокъты гъалиба. Къырда чечек джыйгъанда онынъ манъа айткъан лафлары мына шимди келип чыкътылар. Андрей Андреевич онъа къарардан зияде ишанса керек. Ёкъ, ёкъ, бойле ич мумкюн дегиль. Манъа Валерикини тапмакъ керек. Андрей Андреевичке къальбимнинъ темизлигини исбат этип косътермек керек...»

Ала-Тау дагъларынынъ тёпесинден къуртулгъан къарданечиклери дерсинъ ерге тюшмей де, келип Катеринанынъ бетине урулалар. О юзюни не къадар сакъламагъа тырышса да, къайдандыр учып кельген къар йылдызчыкълары онынъ индже къашларына, назик янакъларына салжъын-салжъын тиелер.

Балалар багъчасынынъ азбарында тынчлыкъ. Язлыкъ салынджакълар, оюн мейданчыкълары, чешит тюрлю кедиклер къар астында яталар. Ялынъыз гольдеки «алтын» балыкълар къуйручыкъларыны къакъып ялдамакъталар. Оларнынъ ич бир шейден зоры ёкъ. Язда да, къышта да. Лякин, къыш кельгенини пек яхшы сезелер. Чюнки, гольнинъ этрафында шимди балалар тизилип оларгъа отъмек уфатып ташламайлар.

Катерина багъчанынъ азбарына киргенинен бу шейлерге назар ташлады ве балалар ойнап тургъан балабан залгъа кирди.

— Катерина Мануйловна, Катерина Мануйловна! Селям! Селям! Селям! деген хор сеслери залны янъгъыраттылар...

IV

Айрие невбетчилик япкъан куню медпункттан адам ёксик олмай. Бирини уколгъа, бирини иляджгъа, бирини яра байлатмагъа... Токътамай къапылар ачылып япылмакъта.

О куннинъ кечип кеткенини дуймай къала. Кимерде бир уйлелик ашамагъа да вакъыты олмай. Кой ери. Биреви алызландымы, шу дакъкъасы медпункткъа чапа. Вакъыт, саат деген шей мында кимсени меракъландырмай. Бу ишлерде Айрие озю къабаатлы олса керек. Эр ерде, эр иште низам, тертип деген шей ола. Эр шей вакъытнен ольчене. Лякин Айрие бунъа озюндже янаша.

— Къапыда хаста беклеп турып да, меним тамагъымдан аш кечеджекми?— дей о лаф чыкъкъанда. Илк вакъытларда Айрие бунъа чокъ эмиет бермесе де, эвленген сонъ кунъ-кунъден эвге зияде тартып башлады. Онынъ чокъ шейден мерагъы кечти. Иштен чыкъса тюкянларны долашып нелердир акътарып юрер эди. Хусусан санайы маллары тюкянына кирсе, «Талантерия» болюгинден чыкъмакъ бильмез эди. Шимди о бам-башкъа олды. Медпунктнынъ азбарындан чыкътымы, Айриени тапсанъ ал, оны бир ерде корьмезсинъ. О эвине ашыкъа. Анда оны омюр аркъадашы, эки бала, эки къартий, къардашы ве досты Макъпуле беклей. Яз кунълери Макъпулени эвде корьмезсинъ. Онынъ иши тарлада, тютюн аранларында. Шимди о эвде. Бир якъкъа чыкъмай. Айриени корьсе, онъа даа башкъа бир шей керекмей.

— Бир озюм дёрт дивар ичинде патлап олейимми?— дей о Себиля аптеге.— Кене яхшы сизге къомшу тюштим. Акъылыма не вакъыт кельсенъиз, сизге джувурам.

— Догъру япасынъ, балам. Сенинъ ананъ да, меним анамнен ойле яшагъанлар. Етмиш йыл бири-бирининъ къапысыны ачкъанлар. Юрек сырларыны тёккенлер. Къызлыкъларында бай хызметине де бирликте къатнагъанлар. О мельуннынъ ады Къыр-Къыр Мамут экен. Юкълагъанда къырылдагъаны ичюн ыргъатлары онъа шу лагъабны такъкъанлар. Яз кельдими, Краинадан араба-араба къыз кетирип багъчасында ишлете экен. Шимди не о? Ишлейсиз, айда эки кере акъкъынъызны аласыз. Эбет о къызлар озь башына арабагъа толушып кельмейдирлер. Яшагъан ерлеринде пек татлы олмаса керек. Макъпуле, сабыр эт азгъана. Джебземни атешке къойгъан эдим,— деп Себиля апте эки къолунен ерге таянып турды. Бираз дан сонъ джебзесини тютетип кельди ве кене озюнинъ эчки териси устюнде ерлешип отурды.

— Девам этинъ Себиля апте, динълейим,— деди Макъпуле къолундаки ишлеген ип томалагъыны полгъа тыгъырытып.

— Не оресинъ я, акъызъ?

— Фиданеге кышлыкъ чорап,— деди Макъпуле инелерини шытырдатып.

— Дейджегим, вай, не эди шу?— деп башлады Себия апте фильджанларгъа къаве тѣккен сонъ.— Ана, шай, шу Кыр-Кыр деген бай ишлетир, ишлетир де, акъларыны озю истегенде тѣлер эди. Бир кунъ уйлелик аш вакъытында ыргъатларнынъ янына келе. Шорба даркъатыджысы бираз яш олса керек, кызыларгъа отъмекни къалынджа кесип берген. Ташлы, чакъыллы бир чайырда ишлей экенлер. Кыр-Кыр Мамут кельгенинен ерге джайылып, аякларыны узатып ашап тургъан кызыларны коре де нервасы къозгъала.

— Ич олмаса, ашагъанда отургъан еринъиздеки ташларны сайланъыз даа тенбеллер!— деп кычыра. Сонъра ашчы йигитни кенаргъа чагъырып:

— Отъмекни ойле тильмек керексинъ ки, ахмакъ, адам эки кѣолунен тутып ашасын!— деп айкыра. Бунынъ фаркъына бармагъан ишчилер ашчыны къабаатлайлар. Албу исе, онынъ дегени бам-башкъа манада.

— Я ойле дегени не экен, Себия апте?

— Демек, отъмекни ойле индже тильмек керек ки, эки кѣолунен тутып ашамаса узюлип ерге тюшеджек, анъладынъмы? Эй, эй, балам, дюньянынъ делиси дагънынъ чалысындан чокъ дегенлер. Амма о вакъыт байларнынъ акъкъындан кельгенлер де олгъан. Чешит тюрлю ёлларнен олардан озъ акътыманларыны алгъанлар. Байнынъ кызы ѳвленгенде пан Хайбула деген бир йигит яшларнен кѣоношмагъа отура. Той эвининъ бир одасында яшлар, дигер одасында кызылар ерлешкенлер. Ортада бир дивар. О вакъыт яшларнен кызыларгъа бир ерде отурмакъ къайда? Бираз кейфленип башлагъан сонъ, яшдар кызыларгъа эришмек истейлер. Лякин янларына бармакънынъ чаресини тапмайлар. Пан Хайбула яшларны аякъкъа турсата да эписи бир кереден диварны итемеге башлайлар. Итейтей диварны авдаралар, кызыларнынъ одасына кирелер. Орталыкъ зий-чув ола. Меселе байгъа барып ете. Яшларны кѣувалап, дарма-дагъын этелер. Пан Хайбула исе, гедже кѣаранлыгъында абынып-сюрюнип зорнен озъ коюне келип ете, амма, такъаттан кесилип балчыкъ ичинде серилип къала. Гуръ перчеми сувукъ аяздан чамургъа япышып бузлай. Саба еринден тураджакъ амма, башыны тарта-

тарта аламай. Адамлар топланалар, эвден къазма кетирип оны ерден кочюрип алаалар.

— Сагълам адам экен, чыдагъанына бакъ сен оны.— деди Макъпуле.— Эй, эй, ойле делидже ичкенлерге шимди де расткелине. Денъиз сувунынъ тузуны бильмек ичюн, бутюн денъизни ичмейлер. Базылары онынъ дадыны тек ойле анъламакъ истейлер сонъ чомулып, батып кеткенлеринден хаберлери олмай.

— Догъру айтасынъ, балам. Айни бир сой чечектен йылан зеэр ала, балкъурт бал ала. Лякин пан Хайбула буны ичип зевкъланмакъ ичюн япмагъан. Байдан ахт алмакъ ичюн, элинден кельсе эвини де йыкъар эди.

Къапыда Айрие пейда олды. Онынъ козьлери яшлы эди. Макъпуле абдырады.

— Не олды санъа?— деди о Айриенинъ къолундан чильтерини алып.

— Къаршыма Семенюкнинъ апайы чанкильдеп чыкты,— деди Айрие пальтосыны илип.

— Сонъ, не олгъан экен?

— Эскендер онынъ баласына тийген. Айтмагъан шейи къалмады манъа. Озюнькини Ташкентке йибердинъ, онынъкине къулакъ асмай юресинъ. Арсланов кельсе айтаджагъым. Ахмакъ олып юрмесин. Эскендерни ёллар ичинде быракъып кетмесин!— деп къычырыкълады.

— Чанкильдесе, чанкильдей берсин, мен онынъ агъызыны тыярым,— деди Макъпуле.

— Манъа не десе разы эдим. Лякин мектепке барып Эскендерни балалар алдында ынджыткъаны акъылгъа зарар. «Меним балама тийгендже, барып огей ананънынъ артындан къаравулла. О тапкъаныны кызына тыкыштыра. Бабанъ къазанып кетире, о савура. Сен корьдинъми Фиданенинъ устюндеки пальтосыны, я къана сенинъки?» деген о балагъа. Бунъа даянмакъ олурмы, Макъпуле? Огълан бала, сёз тутмай. Саба пальтосыны кийдирген эдим. Меним артымдан чыкъарып ташлагъан. Лякин, Эскендер де онъа яхшы джевап къайтаргъан. «Фиданеге пальтоны меним бабам кетирди» деген.

— Сен эр шейге озюньни сыкъма Айрие. Ойле алчакъ адамлар не десенъ айтырлар. Ойлелери кимсенинъ онъгъаныны истемез, о манъа да бир къач кере илишкен эди. Биз Семенюкнен Ургутде олгъанда, мусафирханеде онынъ быджагъына туюме тиктим. Семенюк яманлыкъсыз адам, келип апайына айтса керек. Бир кунъ аранда мени раст-

кетирди. Не селям, не келям. Кечип кетятыр.—Токътачы,—дедим бунъа,—бурунынъ неге шишти?

— Сен башта озюнье акъай тап да сонъ тюймесини тикерсинъ!—демесинми акъыз. Адамлар бири-бирине бакъыштылар. Индемесем оладжакъ эди, даянамадым.—Мен тюйме тикмеге огренген сонъ, акъайгъа чыкъаджакъым!—дедим. Ачувындан нефеси тыйылды. Корьсенъ, бир кетиш кете. Адамлар мени анъладылар, оны кульдилер. Алды пайыны, озъ башына манъа илишмесин. Ондан сонъ акъайыны корьдим. «Яхшы айткъансынъ, шу куньден сонъ мен де урбаларымда саллангъан тюйме корьмедим» деп кульди. Лякин сен Айрие, индемей юрь. Фидане ве Эскендер меселеси онъа къалмагъан. Бу аиле ве тербие меселеси. Мында эвеля анъ керек, ахлякъ керек. Тербие меселесининъ инджеликлерини атта эр бир ана-баба кереги киби анълап оламай. Кимерде оджанынъ айткъанына эмиет бермейлер. Оджа бир шей огрете, эвде башкъа шей. Айни шу меселени эки тюрлю анълатув баланы баштан чыкъара. Бу меселеде, Айрие, санъа пек сакът олмакъ керек. Чюнки, эки баланынъ бахты, келеджеги сенинъ къолунъда. «Ананен къалгъан оксюз дегильдир, бабанен къалгъан оксюздир», дегенлер. Эскендер сенден буны сезмек керек. Эгер сен бир уфакъ шейде янъылып, баланы ынджытырсынъ, бир даа о янълышны омюрининъ сонъуна къадар догъуртып оламазсынъ. Фидане ве Эскендернинъ арасында эбедий достлыкъ копюри къурмакъ керек. Буны япаджакъ сенсинъ, Айрие. Катерина Мануйловна тербиеджи-педагог. Балаларны ондан зияде анълагъан мында ёкътыр. О Фиданени энди чокътан бу рухта тербиелеп башлады. Сен къоркъма, бу иште янъгъыз къалмазсынъ. Семенюк киби бешаретлернинъ агъызыны тыкъатмагъа адамлар тапылыр. Биз эвель заманда яшамаймыз. Тербие ишинен эр кес огъраша, бутюн джемиетимиз огъраша. Мына янъычыкъ манъа ананъ айтып отура эди эвельки акъсызлыкъны. Шимди ойле Къыр-Къырларнынъ, Семенюклернинъ марифети кечмей. Сагълам аиледе, сагълам несиль етишир. Эр бир ана-баба келеджек несиль алдында бунъа джевапкъардыр. Къазангъа не ташласанъ, къашыгъынъа оны алырсынъ, дегенлер.

— Катерина Мануйловна бу меселелер акъкъында манъа чокъ айтты, Макъпуле. О ана-бабалар комитетининъ реиси. Менимдже Семенюк киби миш-мишчилерге къошулып да, озъ-озюмни ашалатып юрмеге аджет ёкъ.

Бойлелерининъ тилини бир кереден кесмек керекмиз. Мен бу меселени онъа анълатайым. Ана-бабаларнынъ эписини топлап тербие меселелери акъкъында лаф этейик. Джемаат кескен пармакъ агъыртмаз дегенлер. Анджакъ бойле меселелерде пармакъны джемааткъа кестиреджексинъ, агъырмаса да ольгендже унутмаз. Мен онъа шимди бир шей айтмам. Самедин кельсин де лаф этип корермиз.

Айрие пенджерере козь ташлады. Тышта къаранлыкъ эди. Яз ве къыш инсаннынъ козю алдында агъарып тургъан юксек къарлы тёпелер шимди корюнмей эди. Дагъларны къою туман баскъан.

— Коресинъми?— деди Айрие пенджерен козюни алмайып.— Энди Эскендер эвде олмакъ керек эди. Вакъыты кечти, аля даа корюнмей.

— Балаларнен чана таядыр. Къышта оларны эвге кирсетип оласынъмы? Къар балаларнынъ зевкъы.

— Эр алда эвге вакъытында келе тургъан эди,— деди Айрие къасеветленип.

Ашханеде чанакъ-чельмек шалтыратып отургъан Себиля апте оглюгининъ уджуна къолларыны сюрте берип:

— Софра къояйыммы?— деп сорады.

— Сабыр этинъ, ана, ничюндир Эскендер даа корюнмей,— деди Айрие, пенджерере козьлерини тикип.

Себиля апте къазаннынъ къапагъыны аралыкъ этип, Месюде къартийнинъ янына кирди. Онынъ алы бираз агъыр эди. Сонъ вакъытта къулакълары бир тамам тынды, козьлери зайыфлады. Язда азбаргъа чыкъып, бираз къыбырдана тургъан, шимди бир тамам бастырылып къалды. Отургъан еринден турмайып, къавесини иче, дудакъларыны къыбырдатып бутюн кунъ теспи чеке. Себиля апте оны бир дакъкъа бош быракъмай, онсыз къаве ичмей. Акъшам Айрие тёшегини къоя, саба кирип джыя, одасыны аваландыра, ашыны-сувуны анасына авале этип кете.

Айрие даянамады. Азбаргъа чыкъты. Эскендер корюнмей. Къомшуларгъа кетти. Онынъ сыныфдашлары эписи эвлеринделер. Кене къайтып азбаргъа кельди, лякин эвге кирмеди. Ильмектен пальтосыны алып, безъ юнъ шалыны башына ташлады да, мектепке тараф адымлады. Мектепке барып кельмек ичюн аман-аман бир саат вакъыт керек.

— Айрие, ашагъан сонъ кеткейдинъ баре!— деп къычырды артындан Макъпуле. Лякин Айрие къулакъ асмады, кетти. Сонъра Макъпуле кене отургъан ерине ясланып чорабыны орьмеге башлады.

Ерлер акъшам башындан къатты. Сувукъ кеткен сайын арта. Къар пек кучлю ягъмаса да токътамай сепелеп тура. Мектеп азбарында кимсе ёкъ эди. Айриенинъ тизлери къалтырап башлады. Сувукътанмы, къасеветтенми, озю бильмей. Кой балаларынынъ чана тайгъан ерине таба адымлап башлады. Къаршысына бир къач бала расткельди, олар анда Эскендернинъ олмагъаныны айттылар. Инанмады.— Козюмнен барып корейим,— деди. Байыр койнинъ четинде, дагъ тарафта. Балаларнынъ къатнакъ ёлу ойле тайгъакълангъан ки, Айриеге резина потиклер устюнде турмакънынъ чареси ёкъ. Абына-абына не исе, джапкъа якъынлашты. Ачыкъ ерде эскен аджджы ельден янакъларынъ чатлайджакъ. Балалар куньдюз тайгъанлар, акъшам сувугъына даянамай эвлерине даркъашкъанлар. Байырнынъ тёпесинде бир къач бала долана. «Олар тайып тюшкендже отурайым»,— деди Айрие ичинден ве аркъасыны ельге чевирип, бетини сувукътан сакълады. Къулакълы къалпакълары ве якъалы пальтоларына сарынгъан бу балалар Айриенинъ янындан вызлы-вызлы тайып кечтилер.

— Эскендерни корьмединъизми?!— деди Айрие дудакъларыны къалтыратып.

— Мында онынъ не иши бар,— деп джевапланды къаршыда тургъан бала козьлерини къыйыштырып. Сонъра чапа тишлерини ырджайтып:

— Эскендер бугунъ дерстен къачты, меним анам онъа корьсетеджек!— деди.

— Сен кимнинъ огълусынъ?

— Семенюкнынъ.

— Сиз бугунъ къавгъа эттинъиз я? Сен онынъ къайда экенини биледирсинъ, юрь огълум, косьтер манъа,— деди Айрие оны оплап.

— Бир кумюш берсенъ барырым!

— Вай балам,— деди Айрие.— Сен мектеп талебеси олсанъ, Эскендернен бир сыныфта окъусанъ, утанмайсынъмы ойле демерге. О насыл шей? Мектеп баласы ойле оламы?

— Шимди балалар дели дегиллер, бермесенъ айтмам— деди де, чанасыны сюйреп къыргъа тырмашып башлады.

— Ялан айта! О Эскендерни корьмеди! Ялан айта!— деп къычырыштылар янындаки балалар. Айрие башыны асып тюшюне-тюшюне эвге къайтты.

«Шу ананынъ, шу баласы, деди озь-озюне. Мына санъа тербие. Онынъ янында отургъан бала не яхшылыкъ кореджекъ? Яхшы ки, бала озюнинъ акъыл-идирагинен бойлесини енъип чыкъса? Амма, аятта, базан аксине ола. Бала енгиллике алыша, кет-кете баштакълана ве ич бир тюрлю огютке-насиаткъа табий олмай. Мен шимди Фиданеден зияде Эскендерни ойланам. Онъа аналыкъ эталмайджакъ олсам...»

Айриени къапы алдында Макъпуле беклеп тура эди. Янында Эскендер олмагъаныны корьгинен Макъпуле тез-тез пальтосыны кийип чыкъты.

— Юрь, берабер кетейик!— деди Макъпуле Айриенинъ башы асылып къалгъаныны эслегенинен.

— Къайда бараджагъымны бильмейим. Не япмалы, аджеба? Корьдинъми, сен, дубараны? Эскендерге бир шей олды. Бабасы да ёкъ мында.

Айрие Макъпуленинъ янашасындан индемей адымлай ве озюнинъ къайда кеткенини бильмей. О энди ушюмек дегиль, терлеп башлады. Козю алдында чешит тюрлю мешакъатлар пейда олалар. Аякълары талды, эзильди, потиклери тарлашкъан киби олды. Лякин къызгъынлыкънен агъры дуймайып эп адымлай берди.

— Клубтадыр о,— деди Макъпуле бираз индемей кеткен сонъ.

Кинонынъ битмесине ярым саат даа бар эди. Макъпуле Айриенинъ чаресизленип башлагъаныны корип, оны клубнынъ алдында къалдырды да, озю оджанынъ эвине джувурды.

Оджанынъ айткъанына коре, Эскендер дерснинъ сонъуна къадар отургъан. Лякин Семенюкнынъ анасы онъа не айткъаныны оджа эшитмеген. Макъпуле кинодан адамлар чыкъаяткъанда къайтып кельди. Къапынынъ бир четинде Айрие, дигер якъында Макъпуле турып, адамлары сонъуна къадар озь козьлеринен сюзип чыкътылар, Эскендер ёкъ. Бу Айриенинъ сонъки умюти эди. О энди къычырып агълайджакъ олды. Сеси чыкъмады. Юткъунды. Нефеси богъазына келип тыкъылды.— Эскендер гъайып!— деди о къарыкъ сеснен. Онынъ башында топлангъан адамлары Молдабай корип къалды. О да шимди кинодан чыкъкъан эди. Меселенинъ асылыны анълагъанынен:

— Мининъиз машинанен кетип къыдырайыкъ,— деди Молдабай.

Олар Андрей Андреевичнинъ къапысы янында токъта-

дылар. Молдабай эвге киргенинен Катерина Мануйловна джувурып чыкъты.

— Не тюшмейсиз?— деди о машинанынъ кѡапысындан башыны ичери сокътып.

Не Айрие, не де Макѡпуле ерлеринден кѡыбырдамадылар.

— Кѡатып кѡалдынѡызмы шу? Не тюшмейсиз? Молдабай барып араштырсын, сиз эвге кирип отурынѡыз.

Макѡпуле Айриени зорлап тюшюрди.

— Элинѡден, аягѡынѡдан айрылдынѡ, сен тюш, бираз кѡапынырсынѡ. Мен Молдабайнен койни айланып келейим,— деди онѡа.

Андрей Андреевич эвде ёкъ эди. Катерина чай кетирди, татлы чыкѡарды. Бираз ичи кѡызгѡан сонѡ, Айрие озюне келип башлады. Катерина онѡа эп озюнинѡ ишлери акѡкъында икѡе эте. Кунни насыл кечиргенини, Андрей Андреевични сабадан берли корѡмегенини, Валерикке мектюп язып азырлагѡаныны айта. Лякин, Айриенинѡ кѡулагѡына онынѡ бир сёзю кирмей. Джаны тарсыкѡа, юреги сыкѡлетлене. Эскендернинѡ бугунѡ бойле шей эткенини аналыкѡ шанына сыгѡдырмай. «Инсанлар чешит тюрлю олалар,— деп тюшюне о. Ярын Семенюк киби сойлары янѡы бир ошек даа айтып чыкѡарырлар. Арсланов кеткенинен Айрие гедже-кунѡдюз чапкѡалап юре, санки иптен, зынджырдан кѡуртулгѡан, дейджеклерине ич шубе ёкъ».

Янѡы эвленген яш аилеге бош лакѡырдыларнынѡ чокѡ тесири олмаса да, бу аиле ичюн онынѡ эмиети буюк. Чюнки, арада огейлик бар...

— Эскендерге биревлернинѡ тесири олса керек,— деди Катерина Айриенинѡ тюшюнджесини болюп.— Ярын мектепке барып, бу меселени сорап билерим. Якѡында анабаба топлашувы чагѡырмадыкѡ. Кѡабаат балаларда дегиль, озюмизде. Эскендер ойле баштакѡ бала дегиль. Онѡа четтен зарарлы тесирлер олса керек. Сен тюшюнме, Айрие, биз бу меселени аль этермиз.

— Энди озю тапылгѡайды...

Айрие шай дер экеч, Молдабайнынѡ машинасы корюнди. Катеринанен экиси бир кереден кѡапыгѡа атылдылар. Макѡпуле машинадан тюшкенинен эки кѡолуны джайып оларгѡа таба адымлады.

— Ёкѡтыр, акѡыз,— деди о чырайыны сытып.

Айрие арт-артына кетип, къар устюне серилип къалды. Макъпуле ве Катерина оны къолтукълап ичери кирсеттилер.

— Молдабай! Манъа Андрей Андреевични тапып кель!— деп кычырды Катерина Айриени дивангъа яткызып. Молдабай козъдсн гъайып олып кетти, Катерина озюнинъ аптекасыны алель-аджеле къарыштырмагъа башлады...

Яры гедже авгъан эди. Андрей Андреевичнинъ эвинде ярыкълар сёнмей. Айрие диван устюнде кейфсиз бир алда ята. Катерина Мануйловна, Макъпуле онынъ башы уджунда отуралар. Каштанов ог одада Лев Толстойнынъ «Крейцера сонатасыны» окъуп эглене.

— Молдабайны къайтармагъан олсанъ яхшы этер эдинъ, Андрей,— деди Катерина къасеветленип.— Айрие бизим эр бир дердимизге дерман тапып, гедже-куньдюз джувурып юрген бир къадын. Оны бойле къалдырмакъ олмаз. Арсланов да мында ёкъ.

— Бутюн меселе балада. Оны тапмакъ керск. Бала тапылса эр шей кечер. Ойле олса мен раймилициягъа хабер этейим,— деп Каштанов телефонгъа узанды.

Катерина кене Айриенинъ гонълюни алып башлады. Эскендерни энди милиция кыдыргъаныны айтып, аякъларыны одеялнен орытти...

Тышта машина гурюльтиси эшитильди.— Ана, милиция кельди,— деди Катерина пенджереге догърулып. Лякин, азбар къапыны милиция дегиль де, Молдабай ачты. О догъру ичери кирип, Андрей Андреевичнинъ янында токъталды. Энди Эскендерден умютини кескен Макъпуле еринден кыбырдамады. Катерина Молдабайнынъ къолундан тартып Айриенинъ янына кирди.

— Бу адамдан кимсе къачып къуртуламаз!— деди о къуванчлы тавурнен.

— Ер астында сакълансанъ, тапып чыкъарыр! Эскендер машинада достчыкъларым!

Молдабайгъа бир сёз айтмагъа сыра къалмады. Фуфайкасынынъ садефлерини илиштирип, джелъкесини къапаткъан сыджакъ юнли къазах къалпагъыны башына ташлап, азбаргъа чыкъты ве Эскендерни къуджагъына алып кельди.

Бала анасынынъ созулып яткъаныны коръди. Янына кельди. Бир шей айтмайып башыны ашагъы эгильтип турды. Айриенинъ джам киби йылтырап тургъан козъле-

ринден эки тамчы яш тыгырып чыкты. Макъпуле олары тез-тез сюртип алды.

— Чай ичесинъми, огълум?— деди Катерина.

— Екъ.

— Не истейсинъ ашамагъа?

— Бир шей истемейим.

— Къайда эдинъ огълум?

Бала индемени. Онынъ ерине джевапны Молдабай берди.

— «Алсаба»даки къазах достларында эди. Мектептен чыктып догъру анда кеткен. Мен эвге баргъанымнен онынъ «Алсаба»да олгъаныны балаларым айттылар. Ёлда экимиз пек достлаштыкъ. Ничюн эвге бармагъаныны айтты.

— Къана, айт огълум, биз де эштейик,— деди онъа Катерина. Эскендер индемени.

— Айг, огълум,— деп ялварды Айрие яткъан еринден.— Айт, менден сакъынма.

Эскендер кене индемени. Катерина онынъ къолундан тутып ашханеге алып кирди. Анда бираз оплады, пиязлады. Джеплерине конфет толдурды, къолуна балабан, къырмазы Наманган нары туттурды.

— Бабам кельмегендже мектепке бармайджагъым,— деди Эскендер нары столгъа ташлап.— Мени анда эриштирелер. Семенюк манъа «Огей» деп къычыра. Башына бир чанта яндыргъан эдим, анасы келип мынавы ерлеримни чимчип алды.

Эскендер кольмегини котерди. Онынъ къабыргъасында къара тамгъалар бар эди. Айрие артыкъ даянамады Сонъки кучюни топлап, котерильди ве дивангъа таянып ёргъун козьлерини Эскендерге тикти. Эскендер девам этти:

— Чимчигени, чимчиген, даа чокъ къычырыкълады. Мен сенинъ огей ананъа барырым, о бабанъны алдатып юрмесин, ялынъыз озъ къызы ичюн къайгъырмасын, сенинъчюн де тюшюнсин,— деди.— Эвге бармагъа къоркътым. Меним Алсабада чокъ достларым бар, олар косътерирлер Семенюкке,— деди о ве джошып агъламагъа башлады.

— Андрей Андреевич! Кельсе бу якъкъа! Динълесе мынавы баланынъ айткъанларыны!— деп сесленди Катерина шашкъанындан. Каштанов китап окъуп отурса да, оларнынъ лакъырдысыны эшите эди.

— Оны сиз динъленъиз, Катерина Мануйловна!— деп джевапланды Каштанов.— Сиз тербиеджисиз, оджасыз, ана-бабалар комитетининъ де сабыкъ реиси оласыз...

Арадан бир афта кечти. Катерина баягъы ишлер япты. Ана-бабалар топлашувында Семенюклернинъ иши бакъылды. Онынъ баласыны Эскендернинъ янындан авуштырдылар. Эр экисининъ устюнде ана-бабалар тарафындан даима козь этип туруджы адамлар сайланды.

Бир къач кунъ кечкен сонъ, Мария Семенюкны Къурбанбеков чагъырды. Кабинетте бир озю эди.

— Мына алдымда эки шахсий иш папкасы тура,— деди Къурбанбеков.— Бири Арсланов Самединнинъки, дигери Семенюк Мария дегиль де Семенюк Марианнанынъки, догърумы? Арсланов Улу Ватан дженкиннинъ иштиракчиси, эки ордени, беш медали бар. Марианна... Бу ерде Къурбанбеков токъталды. Башыны котерип Семенюкнынъ бетине бакъты. Семенюк онынъ алдында богъазына кемик тыкълалгъан киби тура эди.

— Эр алда, экинъиз де совет топрагъында догъып, осип, тербиеленгенсиз,— деди Къурбанбеков папкаларны къапатып.— Эр экинъиз де ана-баба олгъансыз. Эвляд корьгенсиз. Насыл ола да сиз Семенюк аркъадаш, башкъасынынъ бахтына аякъ чаласыз? Озюнъиз ана олып, анасыз сабийнинъ юрегини яраламагъа насыл тилинъиз айлана?

Семенюк башыны котерип, бир шейлер айтаджакъ олып агъызыны ачкъан эди, лякин Къурбанбеков оны токътатты.

— Бизим джемиетимизде «оксюз», «огей» деген шей ёкътыр! Сиз буны чокътан бильмек керексинъиз. Эр кес киби сиз де дженк йылларынынъ фелякетини козюнъизнен корьдинъиз. Нидже яш сабийлер анасындан, бабасындан марум къалдылар. О вакъыт юзлернен совет адамлары о сабийлерге аналыкъ, бабалыкъ къуджагъы ачтылар. Инсаннынъ башына эр шей келе билир. Яхшы ки, сенинъ айленъде ойле шей олмагъан. Сен бунъа къуванмакъ керексинъ. Амма сен аксине арекет этесинъ. Озюнъ бир етимнинъ къадирина етмегенден сонъ, башкъасынынъ аятыны да балталайсынъ. Анълашылгъанына коре сизинъ тилинъизнинъ уджу тикенли. Эгер о тикенли тилинъизни тыймасанъыз, биз оны джемаатнен берабер кесер де ташлармыз. Огълунъыз озюнъизден тербие алгъан.

Оны да янълыш ёлгъа къойгъансыз. Сизден не эшиткен олса, балалар арасында оны текрарлай.

Бош вакъытынъыз олгъанда, китап окъунъыз. Мектеп китабханесинде чалышкъан Зенифе аптеге барып, Макаренконынъ, Медынскийнынъ, Гайдарнынъ китапларынны окъунъыз. Баланъызгъа да окъутынъыз. Меним сизге дейджегим шу эди. Башкъасынынъ бостанына бир вакъыт таш атманъыз. Ана-бабалар топлашувында япкъан чыкъышынъыздан хабердарым. Шунынъ ичюн узун лафнынъ бу ерде кереклиги ёкъ. Анълаштыкъмы? Анълашмагъан олсакъ, исгесенъиз даа девам эттирейик,— деди Къурбанбеков.

— Етер, етер! Бир афтадан берли буны эшите-эшите абу еримден олдым,— деп Марианна кълунен тамагъыннынъ тюбюни косътерди.

— Ойле олгъанда тур, къайтынъыз. Умют этем ки, эвге баргъандже озъ янълышынъызнынъ акъибети къайда барып чыкъкъаныны озюнъыз тюшюнип тапарсыз.

V

Къыш къатты олса да, баарь эрте кельди. Къыбла елинден топракъ бир кереден джиберилип кетти. Къар суву эр ерни джибитти. Аралыкъларда балчыкътан юрюльмей. Къалдырымдан аягъынъ тайдымы, къарлы сувгъа батып къалырсынъ. Сувгъа щишелип, гъаркъ олгъан аралыкъларда акъшам-саба чамур ёгъурып туварлар юрелер. Тарлалар даа къышнынъ без чаршафынен орътюли. Кузьде сюрюльген топракълар яваш-яваш ирикте олгъан къарнынъ шырасыны сюзип гъыдаланмакъталар. Ялынъыз юксек дагъларда баарь кълкъусы дуюлмай. Анда аля даа къыш укюм сюре. Койлерде баарь ишлери башлагъанда дагъларда аля даа къл иримей. Бутюн къыш къл астында яткъан энъишли-ёкъушлы кълрларнынъ баари де, къышы киби пек аджайип ола. Башта кълрларнынъ сюйрю тёпелери корюне. Яваш-яваш къл чаршафы инджере, кичкене адачыкълар пейда олар. Ахыр сонъу терен йылгъалар ичинде, кунъ тиймеген ерлерде къл куртлюклери сакъланып къала. Ава кълзып башлагъан сайын кълрлар къыш юкъусындан уянып,

ешилъ къадифеге бурюнелер. Бу вакъыт джаплар къаршысында къой сюрюлери пейда олалар.

Бааръ кельдими, койлюнинъ иши белли. Эр кес озъ хызметининъ башында. Янъы берекет асрамакъ, етиш-тирмек керек. Эм номай берекет. Совхоз ишчилери буны яхшы билелер. Мында кимсени эв-эвден юрип ишке чагъырмайлар. Совхоз тешкиль олунгъанынынъ биринджи кунюнден башлап, дирекция бунъа ёл бермеди. Адет ойле. Адамлар озъ вазифесине анълы янашалар. Эр кес озъ иши ичюн джевапкъар. Парниклерде фиделер ешерип башладымы от чёплеп алмагъа чыкъаджакъ адамлар чагъыртув беклеп турмайлар. Парниклерни ачмакъ, кубрелемек, сувармакъ киби ишлернинъ башында эвельден таинленген уста тютюнджилер туралар. Олар эписи дерсинъ бирер агроном. Фиденинъ чырайы къачтымы, оны эким киби тедавийлемеге башлайлар.

Хозяйствонынъ эр бир саасында ишлер бойле тертипке къойылгъан. Эксикликке ёл берильдими, оны коллектив къуветинен енъелер...

Арслановнынъ чырайы куле, кейфи яхшы. Я о не ичюн яхшы олмасын? Ташкенттен буюк къуванч кетирди. Фидане бульбуль киби сёйленип башлады. Азгъана тутукълыгъы даа бар, амма яваш-яваш онынъ бир тамам тюзеледжегине эмин олып къайтты. Баланынъ тутукълыгъыны башта корьмеген, бильмеген адам, шимди оны ич абайлап оламай. Бильгенлер исе, экимнинъ бу алидженап ишине муджизе деп бакъалар. Акъикъатен муджизе. Буны Арсланов озъ козюнен корип кельди. Фиданеден бинъ кере бетер балаларнынъ тюзелип кеткенине шашып къалды.

— Мына дюньяда насыл аджайип адамлар бар экен,— дей о лаф чыкъкъанда гъурурнен.— Сагъ олсакъ мен сизни о адамнен корюштирим. Язда отпуска вакъты бизим тарафкъа келеджек олды. Даа Алма-Атаны корьмеген экен. Мен онъа отургъан еримизни, дагъларны, къырларны, гютюн тарлаларыны косътермеге сёз бердим. Эп бир Фиданени бир даа козьден кечирмек керек, мытлакъ барырым, деп ишандырды.

— Кельсе не олгъан, ёкъса бизде отпуска кечирмеге ер ёкъмы?— деди Айрие. Бу фикирге Макъпуле де жан-юректен къошулды.

— Шимди яшайышымыз эвелькиси киби дегиль. Отурмагъа тёрюмиз бар, соймагъа къоюмыз,— деп къошты Себиля апте.

Фиданенинъ дюрюст сёйленип башлагъанына, дерсинъ, анасындан зияде Катерина севинди. О Эскендер меселесинден сонъ Айриеге даима ярдым этип тура. Фиданени сыкъ-сыкъ эвге алып келе. Кимерде бир Эскендернен экисине бир тюсте бахшышлар кетире, ана-бабаларны даима тенбилеп юре.

Лякин Катерина энди агъырлашып къалды. Эв хызметини де кереги киби япалмай. Базы кунълери аякъ язайым, деп медпункткъа бара. Ал-хатир сорашып къайта. Эр кресеи Айрие оны яры ёлгъадже озгъарып кете. Бош кунълери исе, эвине барып, чамашыр ювмагъа, орталыгъыны джыйыштырмагъа ярдым эте.

Бугунъ Айрие Эскендернинъ къолундан тутып, мектепке къадар озгъаргъан сонъ, Катерина Мануйловнанынъ эвине айланды.

— Сенинъ келеджегинъни джаным дуйгъан экен, Айрие,— деди о къуванып.— Андрей Андреевични шимди эвде тутмакънынъ чареси ёкъ. Бааръ, сачув вакъты. Танъда турып кете, яры геджеден сонъ келе. Заваллы сабалыкъ чайыны да унута. Бильмейим не къадаргъа даа даянаджакъ? Энди савлугъы баштаки киби дегиль.

— Амма, табнаты, шакъасы кене денъишмей,— деди Айрие онынъ сёзюни кесип.— Бир кере янынъдан шакъа этмейип кечмей шу адам.

— Шакъаны о ялынъыз джаны севген, базнасы отъкен адамгъа япар. Бири-биримизни бильгенден берли адети ойледир.

— Самедин ойлелерден дегиль. О шакъанынъ не экенини бильмей. Шакъа этселер, шу дакъкъасы кене фельсефеге чевирип йибере. Онынъле эр вакъыт джиддий лаф этеджексинъ. Шимди Самединни де эвде тапсанъ ал. Тёшегинде бир кере танъ юкъусы коръген адам дегиль. Акъшам олса, беклейим беклейим кельмей. Сонъра бонъайып юкълап къалам. О явашчыкътан къапыны ачып келе, яныма тыкъыла, озюм сескенем амма, козьлеримни ачып оламайым. Сабагъа якъын татлы танъ юкъусына далдым, дегейде ёргъаннынъ астындан сыптырылып чыкъа. Бундан сонъ, оны бир даа тапсанъ ал. Эбет мында ялынъыз о дегиль, эписи шай. Макъпуле де танъ юкъусыны тек къышта юкълай.

— Тютюнджилик иши ойле экен, Айрие,— деди Катерина.— Эписи сыджакъ тёшеклерини ташлап, сабалар къу-

чагында тютюн тарлалары ичинде козьден гъайып олып кетелер...

Катерина бираз токъталды, сонъра башыны котерип муляйим назарнен Айриенинъ козьлерине бакъты.

— Мен энди медпунктка къатнап оламайджагъым, Айрие. Ара-сыра озюнъ келип мени ёкъла. Мына алымны коресинъ, эвде янъгъыз къалмагъа сакъынам.

— Медпунктка кельмесенъ де, бираз аякъ устюнде юрмек файдалыдыр.

— Утанам чыкъып адамларгъа корюнмеге. Бетим пек лекеленди, пудра да файда бермей.

— Утанмагъа не бар? Санки сен оны хырсызлагъан-сынъ. Халатынъны бираз боллаштырмакъ керек, устюнъ-де пек тартылып турмасын.

Азбарда Каштанов ве бир адам даа пейда олды.

— Олар эвге киреяталар, ма, халатынъны тез-тез сокъ устюнъе,— деди Айрие пенджереге козюни тикип.

— Мусафирни кутип ал, Катя, мына бизге ким кельди!— деди Каштанов котерийки рухнен.

— О-ой, Валерик! Сен къайдан бойле?..

— Селям, Катейна Мануйловна. Багъышланъ, сизни раатсызлагъаныма. Андгъей Андгъсевичнинъ мектюбинни алгъанымнен ёлгъа чыкътым,— деди Валерик озюне хас дюльбер аэнкле пельтекленип.

Каштановнынъ онъа мектюп язгъанындан Катеринанынъ хабири ёкъ эди.

— Меним мектюбимни алмадынъмы?— деди Катерина онынъ бетине бакъып.

— Ёкъ, алмадым.

Валерик бойле дегени киби, Катерина кулюмсиреп Каштановка чевирильди де:

— Ярамазсынъ, Андрюша, адресини къайдан тапкъанынъны биле айтмадынъ,— деди.

— Молдабай бизим экимизге де садыкъ бир адамдыр, Катюша. Санъа тапкъан адресини манъа тапмайджакъмы? Айды, мен кеттим. Я сен не аякъ устюнде къалдынъ, Айрие? Катя апанъны санъа эманет этем. Мукъайт ол, онынъ эбанайы сен оладжакъсынъ!— деп Каштанов кенъ адымларыны созып чыкъып кетти.

Бир къач кунъ совхозда яшагъан сонъ, Валерик мында къалып чалышмагъа разы олды. Комсомол тешкилятыннъ секретары, арыкъ черели, чабик арекетли сарышын къыз, Галя Гурченко Валерикнинъ комсомол билетини

корип чыккѣан сонъ, джедвельнинъ сонъунда онынъ адыны язды да:

— Тешкилятымызда бир аза даа артты,— деп козьлерини сюзип кулюмсиреди. Сонъра Галя оны яшлар ятакъханесине къадар озгъарып кетти. Яшайджакъ ода-сыны, кроватины косътерген сонъ:

— Эвленгендже мында, эвленген сонъ, комсомол тою япып айры эвге ерлештиремиз, бизде адет бойле,— деди.

Валерик совхозда къалгъанына пек къуванды. Мында озюне яхшы достлар тапты. Техникумгъа киргендже, къуруджылыкъ бригадасында чалышмагъа къарар берди. Анасыны да мында алып кельмеге истеди, лякин Флора, ничюндир, бунъа разы олмады.

Тарлада къызгъын иш кете. Бу йыл фидени он кунъ эвель отуртмагъа башладылар. Сийрек-сепелек сагъанакълап кельген ягъмур сачувгъа кедер этсе де, ава ачылгъанынен башлап кеткен къызгъын иш онынъ устюни орьте. Арслановнынъ бригадасында бу йыл етиштирилъген фиделер рамка астында сыгъмайлар. Къалын озекли, сагълам тамырлы фиделер джамгъа таянып къалдылар.

— Бойле фиде биз даа етиштирмеген эдик,— деди Еремеев рамканы юкъары котерип. Фиденинъ кейфиетини бакъып юрген Каштанов ашагъы эгилип бир топ фиде тартып чыкъарды. Онынъ япрачыкъларыны, авуч толусы топ-топ кубрели тамырларыны тутып бакъкѣан сонъ Арслановкъа айланып:

— Бу йыл фидени насыл етиштиргенинъни башкъа бригадирлерге де айтып анълатмакъ керексинъ,— деди.

— Мында гизли бир шей ёкъ, Андрей Андреевич,— деди Арсланов.— Бригадирлер чокъ келип кетелер. Озь козьлеринен корелер. Вакъытны аямай, парниклернинъ арасында токътамайып къыбырданып юрсенъ мына бойле фиде етише экен.

— Тек къыбырданып турмакънен фиде етиштирилъсе оны сенинъ эвинъдеки къартанайлар да асрар эдилер. Совхоз агролабораториясынынъ хадимлери бутюн бригадаларгъа косътеришни бир гюрлю япалар амма, эписининъ фидеси башкъа-башкъа олып чыкъа.

— Биз бу йыл парниклерге дагъ отлакъларындан къара топракъ кетирип къойдыкъ, Андрей Андреевич,— деп сёзюни девам этти Арсланов.— Топракъны къызгъан-

мадыкъ, къалынджа тѣшедик. Буны япмакъ ичюн чокъ шей керекмей. Ялынъыз дагъгъа кетмеге эринмейджексинъ...

Каштанов кульди. Арсланов даа зияде юрекленип девам этти:

— Беш-он кере де Ешильбаскъангъа барып келеджексинъ,— деди о кульмейип.

— Ешильбаскъан озени къайда ята? Анда баргъандже, мына Къаракъамыс аягъынъ тюбюнде!— деп ташлады Каштанов.

— Ёкъ, Андрей Андреевич, Къаракъамыснынъ къумы бизге кечмей. Мен былтыр алдангъаныма аля даа пешман олып юрем. Якъындан къум ташымакъ эльбет де къолай. Амма Ешильбаскъаннынъ къумы бам-башкъа экен. Мына нетиджесини корип турасыз. Дагъ топрагъына шу къумдан отуз процент къадар къоштыкъ. Бундан сонъ тавукъ фермасына барып кельмеге де эринмейджексинъ. Тавукъ кубреси киби гъыданы къайдан аладжакъсынъ? Мына бу ишлерни япкъан сонъ, парник араларында къыбырданып юрмеге мумкюн. Яни, вакъыты-вакъытында сувараджакъсынъ, керек химикатларнен темин этип тураджакъсынъ, ачаджакъсынъ, япаджакъсынъ... О якъы белли шей. Бу йыл ойле олып чыкъты ки, топракънынъ теркибинде туз къалмады, зиянкярлар зарар кетирмеди, фидемиз ич бир тюрлю хасталыкъ корьмеди.

Каштанов экинджи парниктен де бир топ фиде тартып чыкъарды. Сонъра Еремеевке бакъып:

— Арсланов фидени отуртып битирмезден алдын бригадирлерни мында топлап келинъиз де, бу тедбирлерни эписине яхшы анълатынъыз,— деди.

VI

Боденеджиев бир къач ишчинен берабер Валерийни Алма-Атагъа кересте юклемеге йиберди. Машинанынъ кабинасында Матвей Петрович отура. Онынъ козьлери мунарлы, чырайы кускюн. Тамам учъ ай олды агъызына юз грамм алмагъаны. Ичмегенинден берли семирп башлады. Бети тегерекленди, манълайынынъ ортасындаки терен чызыкълар азгъана язылдылар. Ким биле, бельки бугуньки иш чыкъып къалмагъан олса, о кене ичмез эди. Эвинден, совхоздан тышкъа чыкъкъанынен онынъ дудакълары курмекленип къалды. Машина Джанашар озенининъ

копюрини кечкенинен ёл четиндеки кичкене тюкянинынъ янына якъынлагъанда ишчилер кабинанынъ тѣпесини шамарламагъа башладылар. Шофер меселени анълады ве тюкяннынъ къаршысына келип токътады. Ишчилер кузовдан сычрап тюштилер ве бири-бири артындан тюкянгъа кирип кеттилер. Машинада ялынъыз Валерик отурып къалды. Онынъ джебинде бир капик ёкъ эди. Матвсей Петрович кабинада. шофернинъ янына тарсыкъып отура. Лякин озъ-озюнен курешип еринден кыбырдамамагъа тырыша. Джебини къармалады. Папирос якъмагъа истеди. Орьселенип къалгъан «Хан-тенгри» къутусыны чыкъаргъанда къолуна учъ кумюш илишти. Оны авучына сыкъып бираз тутты, лякин тюкянгъа тараф башы бурулып-бурулып кеткенини озю дуймай къалды. Ишчилер шакъалашып, зийчув олып тюкяндан чыкътылар. Матвей Петрович биревининъ джебинде тюртип тургъан шишенинъ башыны корьгенинен кабинанынъ къапысына япышты.

— Отур еринъде!— деди шофер къаба давушнен онынъ енъинден тутып.

— Мен аля даа анавы агъач меселесини унутмайым. Эгер, бир ютум ютып келирсинъ машинадан тюшюрим. Каштановнынъ алдында кыызармагъа вакътым ёкъ!

Матвей Петрович индѣмей кабинанынъ къапысыны тартты. Агъызындаки папиросны пенджеренден котерип атты ве къакъырып тюкюрди. Ачувындан къоллары къалтырап башлады. Отургъан еринде кыбырдана берди. Дерсинъ онынъ янбашларына кыджыткъан окъалайлар.

Машина Алма-Ата вокзалына келип, кересте юкли вагонгъа янашты. Матвей Петрович документлерни догъурлап кельген сонъ вагонны ачып бердилер. Леспромхоздан совхозгъа адресленген бу вагоннынъ агъачыны бир кунъде бошатмакъ керек.

Ишчилер машинаны юклемеге башлагъанларынен Матвей Петрович козьден гъайып олып кетти. Джебиндеки анавы учъ кумюш онъа раатлыкъ бермеди. Вокзал мейданына чыкъты, башыны алып кете берди. Янъы ешерип башлагъан тереклернинъ арасындан онынъ бурнуна «кеспе» къокъусы урды. Багъча тарафкъа бурулды, къазах миллий орьнеклеринен безетилип япылгъан язлыкъ «Асхана»гъа кирди. Мында ялынъыз кеспе пишириле... Бу, къазахнынъ севген ашы. Ичинде эти де бар, къамыры да.

Матвей Петрович кошедеки столгъа ерлешип отурды. Козюнинъ къаршысында буфет. Къырмызы юзлю, семиз къазах къадыны буфетнинъ ичинде муштери беклеп тура Матвей Петровичнинъ алдына бир чанакъ кеспе шорбасы кетирип къойдылар. Мында ойле адет экен. Столгъа келип отурдынъмы, кеспе ашамагъа киргенинъ белли. Официантка аман сенинъ алдынъа чечекли терен чанакъны кетирип къоя. Матвей Петрович элине къашыкъны алгъаны киби, буфетчи къадынгъа бакъты. Къадын исе, онъа келип отургъанындан берли козь къиясындан бакъып тура эди. Олар бири-бирини анъладылар. Буфетчи къадын йылытыравукъ тырнагъынен коньяк шишесини чертип косътерди. Матвей Петрович «ёкъ» деген манада башыны силькти. Къадыннынъ чырайы бозулды. Козълерини Матвей Петровичтен алды. Ичери эки къазах кирди. Бириси, узун бойлу, экинджиси алчачыкъ шишман. Узун бойлу сою догъру буфетчининъ алдына барды. Кичкене джепчигинден бутюн юзерликни чыкъарып, къадынгъа узатты. Къадын ич бир шей сорамайып, столнынъ астындан къурсакълы бир шише Мысыр коньягы чыкъарды. Столгъа отургъан шишман союна бакъып, кулюмсиреди ве шишенинъ тапасыны бурып ачмагъа башлады. Эки узун къадени тёпесине къадар толдургъанынен, юзерликни алып чекмеджеге ташлады. Козь къиясындан кене шишмангъа бакъып кульди. Кеспени ашап, башлары думанланып башлагъанынен, буфетчи къадын бир тепси бавурсакъ алып, оларнынъ янына кельди. Бир шейлер айтышып шакъылдап кульдилер. Къадын тепсиден бир дане бавурсакъ алып, боялы дудакъларына тийдирмейип агъызына къапты. Сонъра бош къаделерни джыйыштырып кетеджек олды. Семиз къазах онъа эки пармагъыны косътерди. Буфетчи къадын истемей-истемей шишенинъ тюбюнде къалгъан коньякны кене шу къаделерге бошатып кетирди. Ашап, ичип, козьлери баягъы тегерекленген сонъ, экиси де турып къапыгъа догърулдылар. Буфетчи къадын айнеджиликнен ырджайып, козьлерини къыйыштырып, оларнен хайырлашайым дегенде, узун бойлу къазах догъру онынъ янына кельди де:

— Пулумды бер!— деп къычырды.

Буфетчи къадын бир сёз айтмайып бир къырмызы онарлыкъ чыкъарып узатты.

— Ене он сум!— деди о.

Буфетчи он кумюш даа чыкъарып атты. Акъча онынъ аякълары устуне тюшти.

— Алып бер!— деди ачувланып. Оларнынъ арасында не олып кечкенини анъламагъан официантка келип он кумюшни котерип онъа узатты.

Матвей Петрович кеспени ашап битиралмады. Маддеси ёкъ. Ашагъан ашы тамагъында тыкъылып къала. Сигаретнинъ бирини ташлай, дигерини якъа. Турып буфетчининъ янына бараджакъ ола, амма шофернинъ айткъаныны хатырлай, еринден къыбырдамай. Энди къайтаджакъ олып котерильди, къапы янына кельгенде аякълары чаналанды. Буфетчи къадын онынъ токъталгъаныны корип «кель» деген манада козюни къымды. Матвей Петрович кельди. Буфетчи къадын коньяк шишесине къолуны узатаджакъта Матвей Петрович башыны терс къакъып, шарап шишесини косътерди. Къолларыны къалтыратып, аякъ устюнде бир стакан «Солнцедар» котерип ичти де, агъызына сигаретини къапып тез-тез чыккып кетти.

Ишчилер машинаны энди юклеп битирген эдилер. Шофер Матвей Петровични корьгенинен:— Абдест бозулдымы?— деп сертейди. Сонъра документине имза чектирип совхозгъа таба ёл алды.

Экинджи машина, ничюндир, аля даа кельмей. Ишчилер фуфайкаларыны ерге тёшеп ерлештилер. «Бираз къапынып алайыкъ, деди олар ве ашамагъа эвден ким не алып кельген олса, ортагъа чыкъардылар. Ерге тёшельген газетанынъ устюнде сувгъа пишкен къартоп, отъмек, согъан, сарымсакъ, сувып къалгъан чиберек, морпатильджан туршусы, кабачки икрасы ве дигер ашлар обаланып къалдылар. Термоснынъ къапачыгъыны чыкъарып, невбетнен ракъы сюзмеге башладылар. Сыра Валерикке кельди. Ичмеди. Зорладылар. Тюрлю сёзлер айтып зыкъарладылар, кене ичмеди.

— Мен ракъынынъ леззетини бильмейим, агъызыма алмам,— деди Валерий.

-- Сен даа чокъ шейнинъ леззетини бильмейсинъ!— деди бириси.

— Вазгеч шуны, бильмесе билир, даа яш,— деди дигери ве эписи дженнетте ерлерини корьген киби шакъылдап йибердилер.

— Ичмегенинъ ярамай дегиль, кадай, бизге чокъча къалыр,— деди пошычыгъындан чиберек чыкъарып къойгъан татар йигити.

— Ичмесенъ, ичме, ашамакъ керексинъ!— деди патильджан тұршусы чыкъаргъан сою.

Шай дегенде Валерий узанып бир парча отьмекнен согъан алды.

— Чиберек ал, чиберек!— деди онъа кене шу йнгиг агъызына къартоп шыплап. Сонъра, къолундаки отьмекнинъ чёкюрли кошесини сарымсакъламагъа башлады.

Машинаны озгъарып кеткен Матвей Петрович келип къалды. Эписи зий-чув олып, онъа ер косътердилер ве ракъы туттурдылар. Ерге отурмады ракъыны алды. Ичкен сонъ, агъызына кене сигаретини тыкъты. Къартоп, отьмек узаттылар, алмады.

Шакъалашып баягъы вакъыт кечирдилер. Экинджи рейске ЗИЛ кельди. Онынъ артындан арды-сыра кельген машиналарны юклеп, алель-аджеле автовокзалгъа ашыкътылар. Сонъки машинанынъ кабинасында Матвей Петровичнен Валерий къалды.

Алма-Атанынъ дживарына чыкъар-чыкъмаз Матвей Петрович шашмалап башлады. О энди баягъы кейфленген эди. Ёлда шоферни раатсызлай. Онынъ къолундан тута, рульге узана, агъызындан не чыкъкъаныны озю билмей...

Кунеш энди байырлар артына саркъмакъта эди. Онынъ айдын нурлары ёлнынъ эки тарафыны къаплап алгъан юксек тереклер арасындан кечип, асфальтни йылтырата, козюнъни къамаштыралар. Шофер акъшам къаранлыгъы чёккенге къадар совхозгъа барып етишмеге ашыкъа. Лякин, юкли машинаны къарардан зияде айдамагъа истемей. Бундан да башкъа, Матвей Петрович токътамай онъа кылынып тура. Машина Таскъансувгъа якъынлашты. Автобус токътагъан ерде шофер Матвей Петровичнен Валерийни тюшюрмеге къарар берди. Валерий эльбет де оны ташламай. Автобус кельсе минип кетеджеклер. Лякин, Матвей Петрович Валерийни эп тюкянгъа тараф тарткъычлай.

— Мен сени бир якъкъа йибермем! Эвинъе алып бараджагъым!— дей Валерий.

— Эвим де ёкъ, балам да ёкъ, йибер мени! Эписини фашистлер якътылар!— деп кычырыкълай. Валерий кене йибермей.

— Йибер мени сопляк!— деп Валерийнинъ якъасына япышты. Автобуснынъ кельмесине баягъы вакъыт даа бар эди. Валерий онынъ къолуны къуртарып аладжакъта ёл кенарындаки отлар устюне чалкъа тюшти. Бу вакъыт

экиси юзме-юз келип, бири-бирининъ козюне бакътылар. Эки мавы козь. Лякин бу козьлерде насыл сыр сакълы экенини олар анълап оламадылар.

VII

Он кунъ эвель башлагъан фиде отуртув кампаниясы муддетинден он кунъ эвель битти. Адамлар, не исе бираз тынчландылар. Тарла иши бир кунъ токътамайып девам этсе де фиде отуртув биткен сонъ, тютюнджилер белли бир вакъыт раат нефес алалар. Чюнки, ёлакъ арасы иш-лев, чапалав киби бир сыра агъыр къол ишлерини йыл-йылдан механизация енгиллештире.

Бугунъ раатлыкъ куню. Арсланов, Айрие, Макъпуле шеэрге барып кельмек ичюн ёлгъа чыкътылар. Оларгъа Валерий де къошулды.

— Анама барып келеджегим,— деди о. Автобуста адам аз эди. Арслановнен Валерий ян-янаша отурдылар. Оларнынъ алдындаки бош ерге Айриенен Макъпуле ер-лешти. Ёлда къызгъын лаф ачылды. Валерий Матвей Петровичнинъ кене ичип башлагъаныны, онынъле чекке-лешкенини айтты:

— Мен дженкте олдым, фашистлер аилемни якътылар,— деп къычырыкълай. Тартыша-тартыша, не исе мен оны эвине кетирип теслим эттим. Къолумдан къуртулса даа барып ичеджек. Сонъ оны тапсанъ ал,— деди Валерий.

Арсланов индемей Валерийни динълеп тура. Онынъ лакъырдыларыны бегене. Кимерде бир онъа бакъып башыны саллап ала.

— Санки дженк тек онынъ башындан келип кечкен,— деди Валерий лафыны девам эттирип.— Мен яш эдим, дженкте олмадым амма, баягъы шейлер коръдим. Меним де анам козюмнинъ огюнде янды, айса мен де ичейимми?

— Инсаннынъ психологиясы пек муреккеп, оны эр кес анълап оламай, къардашым,— деди Арсланов.— Эр кеснинъ мийи озюндже ишлей. Бир адам мен озюмни асаджагъым, деп башладымы, бир кунъ илле о бойнуна ип кечире. Яшагъанда бизлер онынъ айткъаныны эшитемиз, лякин эмиет бермеймиз, кулип кечиремиз. Эгер шу адамны этрафлыджа огренсенъ, акъыкъатен онда бир хасталыкъ олгъаныны, мийи янълыш ишлеп башлагъаныны анъларсынъ.

— Ола билир, шу Матвей Петрович де ойле хасталардандыр,— деди сёзге кёшулып Айрие.— Акъылынъ-дамы Макъпуле, биз Отуз докъузынджыда ишлегенде, ойле бир адам анда да бар эди. Ичкиден козюни ачмай эди. Къайдандыр, къорантасы тапылды. Апайы, эки баласы келип чыкъты. Шу кунъден, сонъ агъызына ракъы алмады, эм ударник олып чалышты... Бу заваллы Матвей Петровичте де ойле бир шей бар. Ола билир шу адам къорантасынынъ талийи ичюн яныкълап ичедир.

— Ольгенлер тирильмей, Айрие — деди Макъпуле. Афатлы дженк чокъ адамларнынъ башына етти. Шу къурбанларны яхшы сёзлернен хатырлайджагъымыз ерине базыларымыз ичкиге урунамыз. Эр шей адамнынъ озюне багълы. Менимдже, ичмегеннинъ агъызына кимсе зорлап ракъы тёкмей. Мына, Валерий догъру айта. О яш олса да, бу меселеге акъыллы янаша экен. Кимерде бир яшларнынъ арасында да чыкъып къала ойле сойлары. Олар эм савлукъларыны кёрлайлар, эм ишке зарар кетирелер. Эр шейнинъ бир сырасы, къарары олур даа, акъыз. Оны иче берсенъ, эльбет де акъылынъны зарарлагъанынъдан башкъа инсанлыкътан да чыкъарсынъ.

— Макъпуле, сенинъ не демек истегенинъни яхшы анълайым,— деди Арсланов къолларыны Айриенинъ отургъычына таяндырып.— Мында психология меселеси бар. Дженктен сонъ бунынъ чокълашып кетмесининъ де себеби ана шунда... Биз дженк корьген уйкен несиль шубесиз бунъа ёл бермемек керекмиз. Яшларымыз бизим корип кечирген феякетимизни бильмейлер. Лякин, олар бинъде бир бойле тертипсиз ичип юргенлерни корелер. Олар терен тюшюнип отурмайлар. О дженк феякети себебинден ичеми, ёкъса себебли-себепсиз ичеми, яшлар буны анализ этип отурмайлар. Адам бу алны бир кере коре, эки кере коре, йыллар кечип кете, кене коре, башкъа ерге авушса анда да оны коре, сонъ озю де бунъа мейиль этип башлай. Ким къабаатлы? Менимдже, уйкен несиль ичюн — дженк къабаатлы, яшлар ичюн — биз къабаатлымыз. Бу джиддий меселе. Тербие меселеси де бунъа багълы. Бойле ишни бир, я да эки адам аль этип оламай. Бу джемаат иши, джемиет алдында ичтимай эмиети олгъан муим иштир. Ташкенттен къайткъанда бизим купеде бир къадын ходжасынен давалашып башлады. Къадын дей:— Меним къолумда олса, ракъы заводларыны бир тамам къапатыр эдим. Эри кулип онъа шойле джевап къайта-

ра:— Мен аксине япар эдим,— дей.— Ракъыны ойле уджузлатырым ки, онъа кимсе эмиет бермез эди. Эвинъе мусафир кельсе, ракъы ерине энъ яхшы лимонадлардан чыкъарып къояр эдинъ. Чюнки лимонад ракъыдан мот олур эди, ойлеми?— дей. Апайы куле, лякин акъайынынъ фикиринен разы олмай. Онынъ ичмейджегине ишанмай. Эльбет де, бойле шейлер бир кереден олмай. Онъа джемиетни он йылларнен азырламакъ керек. Месея Валерий шу адамнынъ фикиринен шимди де разы ола билир, ойлеми Валерик? Чюнки о ичмей. Онынъ ичюн ракъы, истесе, озенлерден акъып кельсин.

Автобус Аджджыбулакъ посёлкасынынъ ортасында токътады. Бир къач адам тюшти ве бир къач адам минди. Шофер тюшип ёл кенарындаки къарт къарагъач терегининъ тамырлары арасындан фышкъырып чыкъкъан чокъракъ сувундан къана-къана ичти. Онынъ ичкенини корип, автобустан бир къач адам даа тюшти. Оларнынъ чокъракъкъа джувургъаныны корьген шофер,— Тез олынъыз,— деп енъинен агъызыны сюртти. Устюнде къалын тону, башында балабан тери къалпагъы олгъан бир къарт чокъракънынъ янына кельгенинен токъталып, къарагъачкъа козьлерини тикип къалды. Сонъра дудакъларыны къыбырдатып, бетини сыйпады, ерден эгилип бир ляпек ташчыкъ алды да, къарагъачнынъ ачылып къалгъан тамыры устюне къойды.

— Бу икметли теректир балам, халкъта бойле бир эфсане бар,— деди о сув ичкенлерге.— Бир заманларда бу чокъракътан аджджы сув келе экен. Бай озюнинъ малларына татлы сув бере, ыргъатларыны бу аджджы сувдан ичмеге меджбур эте. Бу сувны иче-иче аул халкъынынъ ичи багъыры, куйип къала. Нефретленген халкъ бир кунъ онынъ малыны-мулькюни тар-мар этип, озюни аулдан къувалай. Шу йыл мына бу чокъракъ олгъан ерде бир къарагъач тереге осип башлай. Терек кевделенип гурьленген сайын, чокъракънынъ суву татлылаша. Азатлыкъкъа чыкъкъан аул халкъы шу кунъден сонъ татлы сув ичип къана. Маллар да озълери де сувгъа тоялар...

Къартнынъ икяесини шофернинъ сигналы больди. Елджулар аман машинагъа джувурдылар. Къарт чокъракъ башында бир озю отурып къалды. Автобускъа янъы мингенлерден къырмызы янакълы, толу бетли бир къадын эр кесни козюнен сюзип чыкъты ве нияет Арслановнынъ янашасындаки бош ерге келип ерлешти. Онынъ янына

арыкъ бир адам отурды. Къадын онъа козълерини къы-
йыштырып бакъты да:

— Ташла бу арам шейни агъызынъдан, бутюн авто-
бусны сасыттынъ,— деди. Янында отургъан арыкъ адам
онынъ эри олса керек, озюни сыкъмады, кене сигарыны
думанлата берди. Бу къадыннынъ зытына тийди. Къолун-
даки къасыр сепетини аякълары арасына къыстырып, се-
миз пармакъларынен джирене-джирене эрининъ агъызын-
даки сигарнынъ уджундан тутып, къуракъшыгъан дудакъ-
лары арасындан сувурып алды ве пенджеренден фырлатты.

— Асыл янынъда отурыладжакъ киби олмадынъ.
Ичинъ, багърынъ шу тютюнден сасып къалды. Озюнъ де
къакъач олдынъ. Эгер мен девлет ерине олсам, шу тютюн
асрагъан адамларгъа бир капик бермез эдим. Тютюн асра-
макъ не о? Олар адамларгъа зеэр асрайлар. Мына биз
керчектен де акъыллы ишнен огърашамыз. Юзюм асрай-
мыз, шарап япамыз, адамларгъа зевкъ беремиз!

Арсланов отургъан еринде бир силькинип алды. Та-
магъына тапа тыкъылгъан киби олды, енгильден оксюр-
ди. Макъпуленен Айрие кулюмсиреп онъа юзлерини чевир-
дилер. Валерий индемени. О автобуснынъ пенджересинден
узакътаки ешилъ байырларгъа бакъып зевкъланмакъта
эди. Къадын эрининъ даргъын отургъаныны эслеп, кене
«лекциясыны» девам эттирди:

— Мен санъа шарап ичме, дейимми? Демейим. Акъыл-
лы акъайлар шарап ичер де, семирлер. Коресинъми
мени? Кимден эсиклигим бар?

О эки омузыны джелъкесине къадар котерип, мусюр
киби къабарды. Тамагъынынъ тубюнде къатмерленип
къалгъан токъ герданы ашагъы саркъты. Къоллары ара-
сында сыгъмагъан балабан кокюслери бири-бирине къо-
шулып, тёпеге котерильдилер.

— Кимден эсик сенинъ апайынъ?— деди о текрар.—
Юзюмни де ашайым, шарапны да ичем. Сенинъ киби о
сасыкъ сигарны сувурып чанкъылдап къалмадым, бакъ сен
кимге бенъзейсинъ. Бутюн къияфетинънен анавы телефон
дирегини анъдырасынъ,— деп пенджереге айланды.

— Ашыкъма, сенде де диабет,— деди акъайы яваш-
чыкътан.

— Не дединъ? Сен озюнъсинъ джинабет! Бакъ сен
онъа, бир сигар тубюне олып, мени халкъ арасында
аскарблять этеджек оласынъмы? Шу индемегенинънен
индемей тургъайдынъ बारे. Бир кере шеэрге барып келе-

йим деп берабер ёлгъа чыкъсам, бакъ сен онынъ марифетине!

— Манъа шарап ярашмай, сен буны анълап оламагъанынъа шашам,— деди акъайы ялварыджы сеснен.

— Я тютюн ярашамы?!— деди о кычырып. Ачувындан онынъ миявкъуш козьлери патлап чыкъаджакъ киби тегереклендилер.

Макъпуле даянамады. Айланып шу къадыннынъ бетине бакъты да:

— Енгепче, сиз янълышасыз!— деди.— Меним сизге ич бир тюрлю итиразым олмаз эди, эгер бу автобус ичинде бир озюнъиз кетсёнъиз. Сизни эр кес динълеп тура. Коресизми, арамызда яшлар да бар.

— Я сенинъ юрегинъе не ятмады, ханийим?— деди о башыны силькип.— Мен акъайымнен лаф этем. Санъа келишмесе къулакъларынъа памукъ тыкъа! Пек грамогный олсанъ, айт бакъайым, тютюн яхшымы, шарапмы?

— Сипиртли ичимликнен, тютюн арасында чокъ фаркъ ёкъ — деди Макъпуле. Амма сиз, тютюнни яманлап шарапны макътайсыз. Сиз бу меселеге озъ аршынынъызнен янашасыз. Бизлер тютюнджимиз. Онынъ инсан организmine кетирген зарарыны да яхшы билемиз. Тютюн чекмек, я да чекмемек эр бир адамнынъ озюне багълы. Сиз юзюмджисиз. Пек яхшы иш. Зенаатынъызнен къарт олунъыз. Лякин шарапны не о къадар котересиз? Шимди оны автобуслар ичинде макътап юрмесёнъиз де ичмеге адам тапыла.

— Эр алда тютюннинъ зарары шараптан буюк,— деди къадын бираз йымшап.

— Оны кимсе инкяр этмей, — деп Арсланов лафкъа къошулды.— Эльбет де тютюн чекмекнинъ сагълыкъ ичюн зарарлы экени, чекюв нетиджесинде адамнынъ нерв системасы, психикасы, юрек ве къан дамарлары, ашкъазан ве ичеклери, козю, къулагъы ве даа бир чокъ органларынынъ зарарлангъаны акъкъында эр ерде айтыла. Мадам ки, сиз аркъадашынъызгъа тютюн чекювнинъ зарарыны анълатмакъ истейсинъиз, ойле олгъанда динъленъ мен сизге кыскъадан бир мисаль кетирейим.

— Къулагъынъны ачып динъле, олян, эшитесинъми мынавы алим адам нелер айтаятыр?!— деди о юкъсырамагъа башлагъан акъайынынъ омузындан къакъып.

— Тютюннинъ организмде къалдыргъан яман тесири акъкъында шимди пек чокъ янъы малюматлар бар,— деп

сёзюни девам этти Арсланов.— Италия сагълыкъ-сакълав министрлигининъ бильдиргенине коре, тютюн чекюв инсан омюрини орта эсапнен алгъанда алты йылгъа къадар къыскъарта экен. Англияда малюм олгъанына коре, тютюн чеккенлер арасында опыке рагы хасталыгъына огърагъанлар гъает чокъ расткеле экен. Анда бу дертнен эр йыл еди юз бинъ адам олер экен.

— Эшитесинъми? Вай, аначыгъым, бу акъылгъа зарар къоркъунчлы бир шей де я?— деп къадын омузы устюнден акъайына козь ташлады.

— Инглиз докторы Дуглас тютюн макъсулатларыны саткъанда онынъ зарарыны муштерилерге бильдирмек кереклигини айта. О сигарет къутусынынъ устюне «Сигарет хавфлы, эджель» деп язылмасыны теклиф эте. Никотининъ зеэр экени эр кеске белли. Онынъ бир эки тамчысы копекни ольдире. Тютюн ичюв нетиджесинде гипертония хасталыгъы да зияделеше.

— Ойле дегенинъиз не я? Бизимкине анълатып айтсанъыз шуны,— деди къадын эрнини косьтерип.

— Давление деген шей, яни къан басымы котериле. Джигернинъ фаалиети де зайыфлаша, акъибети джигер хасталыгъы...

— Айды, етер шу,— деди Айрие сабырсызланып.— Санки сенинъ айткъанынъны мында динълейджек бар. Тютюн чеккен де, шарап ичкен де, онынъ файдасы олмагъаныны пек яхшы билелер.

— Сиз, енгепче, бираз тюшюнип лаф этинъиз,— деп Арсланов сёзюни девам этти.— Эринъизнинъ шарап, рагы ичмегенине къуванынъ. Юкъарыда айтып кечкен шейлеримнинъ эписи тек тютюнге аит дегиль. Айни шу дертлерни спиртли ичимликлерден де къазанмакъ мумкюн. Сиз шарапчыларны макътап, тютюнджилерни акъаретлеменъиз. Эпимиз девлет ишинде хызмет этемиз.

— Анъладынъмы?— деди акъайы башыны котерип.— Энди, бельки тилинъни тыйып отурырсынъ, бер манъа бир сигарет!

Адамлар кулюштилер. Бу кулькю къадыннынъ тилини бираз тыйса да эрине олгъан окесини даа зияде къозгъады...

Валерий Алма-Атагъа келип тюшкени киби анасына кетти. О Андрей Андреевичнинъ теклифинен бу йыл кой хозайствосы техникумына киреджек олып азырлана. Эвинден керек документлерини алып, къабул комиссиясына

бараджакъ, шеэр китабханесине киреджек, етиштирип олса, акъшамгъа къадар дост-эшлернен корюшип совхозгъа къайтып кетеджек.

Арсланов, Айрие, Макъпуле алель-аджеле таксиге минип, догъру «Балалар дюньясы»на ашыкътылар. Анавы даваджы къадыннен ходжасы «Ешилъ базаргъа» таба ёл алдылар. Къыскъасы совхоздан кельген автобустаки адамлар дёрт бир якъкъа даркъашып, шеэр эалисине къарышып кеттилер.

Раатлыкъ куню шеэрге эр кес бир де бир ишнен келе. Алма-Атанынъ дживарындаки якъын койлерден колхоз-совхозлардан мында токътамай автобуслар къатнап турмакъта. Шеэр сокъакъларында адамдан юриш ёкъ. Автобуслар, троллейбуслар, трамвайлар рыкъма-рыкъ. Минсенъ тюшальмайсынъ, тюшсенъ миналмайсынъ. Тюкянларда да ойле.

Такси «Балалар дюньясы»нынъ алдына келип токътады. Учеви де бири-бири артындан тюшип, ярым кварталны къаплап алгъан буюк тюкянынъ учюнджи къатына котерильдилер. Айриенен Макъпуле бир къаттан дигерине авушып, нелердир къыдыралар. Арсланов оларнынъ артындан ничюн юргеннини озю де билъмей. Олар адамлар арасына тыкъылып, сатыджынынъ янына баралар, сонъра бир шей алмайып кери къайталар. Арслановнынъ джаны тарсыкъып башлады. О мында аякъ ёруп бош вакъыт кечире.

— Бу джеза манъа не керек аджеба?— деди о.— Балаларгъа керек шейни сиз менден яхшы билесиз, истеген шейинъизни ала беринъиз,— деп бир четке чекильди. Бу ерде бираз бекледи, аякълары талды. Ашагъы къаткъа тюшти. Сонъра тюкянынъ алдына чыкъып, папирос якъты. Чокъкъа бармады, сабыры тюкенип кене тёпеге котерильди. Эски ерине келип оларны беклеп турды.

«Балалар дюньясы»нынъ балабан джам пенджерелеринден онынъ козю алдында шеэрнинъ гузель панорамасы ачылды. Ешилъ тереклер арасына комюлип кеткен биналар, Ленин проспектинде янъы къурулгъан чокъ къатлы эвлер, Абай мейданындан башлап, юксеклерге котерильген дагълар корюнди. Дагъларнынъ тёпеси кумюш тюркъарнен ортыюльген, ашагъысы чам ве арча тереклеринен ярашкъан.

Арсланов пенджереден козюни алмайып тюшюнджеге далды. Балалыкъ чагъында къартбабасынынъ айткъан.

ларыны хатырлады: «Къарт биринджи кере огълуны шеэрге алып кеткен экен. О вакъыт автобус деген шей къайда? Джаяв кете, джаяв къайта экенлер. Акъшамдан сувгъа джибитильген чий чарыкъларыны кийип, аркъаларына тарпилерини сыкъынып ёлгъа чыкъалар. Огълунынъ фындыкъ чубугъындан балалар ичюн махсус орюльген тарпичигинде эки багъ согъан, эки кило дюгене армуты ве ёлда ашайджакъ такоз питеси бар экен.—Ич олмагъанда озь масрафынынъ чыкъармакъ керексинъ,—дей бабасы. Баба ве бала кете-кете юксек бир дагънынъ тёпесине чыкъалар. Баланынъ аякълары шу къуракъшыгъан чарыкълар ичинде эзиллип къалгъан. Тизлеринден такъаты биткен. Тарписининъ къайышлары омузларыны сиярткъан, бель кемиги сыдырылгъан. Шеэрге барып етмек ичюн ярым кунъ даа юрмек керек экен. Бабасы баланынъ артта къала бергенини корип, онынъ тарпичигини де озюнинъ аркъасына сыкъынгъан. Бираздан сонъ, бабасы да акъсап башлагъан.

— Бугунъ шеэрге барып етишалмайджакъмыз огълум, баре дагъда бир ыйыкъ ер тапайыкъ,— деген о токъталып.

Бала энди эр шейден кечкен экен. Онынъ аякълары сызлай, бели сызлай, козьлери торлана, лякин, не чаре, даянмакъ керек. Шеэр корьмек къолай шей дегиль. Баба, бала къуджакълашып бир эмен терегининъ тюбюнде созулып яткъанлар. Ушюген сайын бири-бирине джылышкъанлар. Ерге ярыкъ тюшкенинен тарпилерини сыкъынып, кене ёлгъа чыкъкъанлар. Вуджуд сувугъан сонъ, агърылар даа зияде сызлап башлагъан. Шишик аякълар чаналаса да, ёлгъа чыкъкъан сонъ, кетмек керек. Не япаджакъсынъ, эм тиджарет, эм зиярет...

Не исе, шеэрге келип еткенлер. Баба, бала, «Койлюлер эви»нинъ азбары ичинде тарпилерини ташлап, чарыкъларыны чыкъаргъанлар да аякъларынынъ эзик ерлерине сары мазь сюртип, чылгъавларыны къуруткъанлар. Сонъра базаргъа чыкып, юклерини саткъан да, шеэр бойлап тюкянларгъа кеткенлер. Биринджи кере шеэр корьген огълуна бабасы биринджи кере бахшыш алып берген.

— Бу сенинъ акъкъынъ огълум, эвге къайтсакъ киерсинъ,— деп эки резина калошны къувана-къувана огълунынъ тарписине ташлагъан... Мына бабамнынъ о девирдеки алы-эхвалы».

Арслановнынъ хаялыны Айриенен Макъпуленинъ шаматасы бозды. Экисининъ де къучагъы толу эди.

— Бездинъми беклеп тувгъаным, кель тут мынавы шейлерни ерлештирейик,— деди Айрие къучагъындаки ирили-уфакълы къутуларны столгъа обалап.— Мынавы чех костюми Эскендерге, мынавы юнь кофтачыкъ Фида-неге, бу балабан къутунынъ ичинде не олгъаныны сонъ айтырым. Оны Катерина башта озю коръмек борджлы.

— Пек аджайип къадынларсыз,— деди Арсланов.— Даа бала дюньяда ёкъ, энди бахшышыны алып азырланасыз. Я онынъ не тападжагъыны къайдан билесиз? Огъланмы, къызмы?

— Бизим бахшышлар ойлесине де келишир, бойлесине де,— деди Макъпуле ве учеви де джан-юректен шакъылдап кульдилер.

— Пек яхшы, хайырыны коръсинлер. Алгъан шейлеринъиз эписи олса-олса эки багъ согъаннынъ фиятыдыр,— деди Арсланов кулюмсиреп. Бу вакъыт онынъ козю алдына бабасынынъ коръген ильк бахшышы — резина калошлар кельдилер. Лякин юрегининъ терен кошесинден, чыкъкъан бу сёзлернинъ манасыны не Айрие анълады ве не де Макъпуле...

Олар шенъ-шерамет «Балалар дюньясы»ндан чыкътылар. Алма-Атанынъ кенъ, дюльбер сокъакъларыны бойлап, чешит тюкянларгъа кирдилер. Озьлерининъ кереклерини текмиллеген сонъ, къартыйлерни де унутмадылар.

Акъшам «Къозукурпеч ве Баянсулув» ны коръмек ичюн шеэрде къалдылар. Раатлыкъ куню театр мейданында кезинмекте олгъан чокътан-чокъ адамлар арасында къарышып юрдилер. Буллюр тамчылары этрафкъа ссринлик сачкъан дюльбер чешменинъ янында нефес алдылар. Шеэр багъчасыны доландылар. Безд чечеклерге бурюнген акациялар, даллары ешерип башлагъан тазе япракълы, чубар акъкъайынар, гонджелери патлап ачылмакъта олгъан безд, къырмызы гуллер, махсус кетирилип отуртылгъан булгъар къаранфили, мелевше ве даа чешит сой къыр чечеклери арасында зевкъ алып юрдилер.

Алма-Ата шеэри юксек къырлар устюнден бакъкъанда тыпкъы бир балабан, чечек черепи ичинде отуртылгъан дюльбер гульбагъчаны анъдыра. О яз ве къыш ешерип гулленип турмакъта. Бу шеэрнинъ эр ери парк. Дживарлары исе, табиатнынъ чебер къолунен безетильген. Пиченли йылгъалар, ешилъ къырлар, чамлы-арчалы дагълар ве

ниает къарлы, суюрю тёпели къаялар шеэрнинъ устюнден бакъып туралар. Даима кокрегинъни серинлестип тургъан темиз ава инсангъа тендюристлик бере, кейфинъе кейф къоша. Шеэрнинъ озю киби дюльбер, медениети киби, медений халкъы бар.

Алма-Ата... 1845 сенеси Джетисай улькеси Русие империясынынъ имаесине къошулгъан эди. Лякин, бу кеништен-кениш, буюк диярнынъ дженюбий районлары Къокъанд ханлыгъынынъ эли алтында инълемекте эди. Рус аскерлери къазах джигитлерининъ ярдымынен 1851 сенеси Къокъанд ханлыгъынынъ къальасы Таучебекни алдылар. Ханлыкъ Джетисай вадисиндеки укюмдарлыгъындан марум этильди. 1854 сенеси, бааръде Алмату деген эски къазах аулы ерине арбий пекинти-къазармалар къурулып башлай. Бир йылдан сонъ, бу арбий къалбагъа Верный ады бериле. Девам этмекте олгъан къуруджылыкъкъа русияден ве дигер диярлардан пек чокъ адамлар кочип келселер. Къальанынъ дженюби кунъбатысына сибирь казаклары ерлешелер. Кунъдогъуш тарафында исе, о вакъыт эксери алышверишнен огърашкъан татарлар келип, «Татар слободка»сы къуралар.

Къокъанд ханлыгъы даа чокъ кере баскъынджа уджюмлер япса да, озъ макъсадына иришалмай ве 1860 сенеси Узун-Агъач тарихий урушындан сонъ, Джетисай бир тамам Русиеге къошула. Верный къальасы даа зияде къурула, инкишаф эте ве озъ сынъырыны кеттикче кенишлете. Улу Октябрь социалист революциясына къадар «Верный» эсасен кой хозяйствосы шеэри олып къала.

1918 сенеси мартнынъ учюнде Верный шеэринде Совет акимieti енъди. Март айынынъ сонъуна къадар бутюн Джетисайда Совет акимieti мейдангъа кетирильди. Лякин чокъкъа бармай мемлекетни граждан дженки къаплап алды. Къазах халкъынынъ садыкъ эвладлары бу урушларда чокъ къурбан берселер де, ниае гъалиб чыктылар. Октябрь революциясынынъ гъаелери бу дияргъа да енъиш ве азатлыкъ кетирди.

1927 сенеси Совет къазахстанынынъ меркези Къызыл-Ордадан Алма-Ата шеэринге авуштырылды.

Совет акимieti девиринде шеэрнинъ къияфети бир тамам денъишип кетти. Онынъ сокъаклары, проспекtlери, тарихий ве земаневий абиделери, скверлери эр кеснинъ дикъкъатыны джелъп эте. Сонъки йыллар ичинде мында янъы-янъы юксек биналар осип чыкты. Ялы-

нъыз Ленин проспектинде къурулгъан эвлер, муэссиселер, эйкеллер ве дигер иншаатлар адамны айретте къалдыра. Кок юзюне бой созгъан сыра-сыра сельбилер ве арчалар-нен ярашыкъ бу проспект бою кетсенъ озюньнинъ юксек дагъ этегине барып чыкъкъанынъны дуймай къаласынъ. Мында секиз, он, он эки къатлы биналар къурулгъан. Бу юксек эвлернинъ алдында дюльбер чешмелер, скверлер, чешит сой гуллернен безетильген клумбалар, миллий орнаментлер ве скульптуралар ярашып турмакъталар. Проспектнинъ юкъары башында Абай мейданы бар. Язнынъ сыджакъ кунълеринде мында кичик Алма-Атинка озенининъ Тянь-Шань дагъындан алып кельген авасы гонълюнъни охшай. Абай мейданындан Кок-тюбе дагъынынъ тёпесине чыкъкъан асмаёл бар. Бу ерден сенинъ козюнъ алдына Алма-Ата шеэрининъ панорамасы ачыла. Албу исе, шеэрнинъ башкъа проспектлери ве сокъакъларыны да корип сукъланмамакъ мумкюн дегиль экен...

Арсланов саатине бакъты. Спектакльнинъ башламасына ярым саат къалды. Олар кене театр мейданына къайтып кельдилер. Чешме янында бир топ яш зий-чув олып фотокарточка чыкъартмакъталар. Айрие де авес этти. О Макъпуленинъ къолтугъына кирип, фотоджыгъра таба ашыкъып адымлады. Бакъса, яшларнынъ арасында Валерийни коръди. Валерий оларны эслемей кетейта эди. Айрие адымларыны сыкълаштырып онынъ артына етти ве къолундан тартты.

— Валерик, кель, берабер ресим чыкъартайыкъ,— деди Айрие. Валерий токъталды ве шимдичик совхоздан кельген адамнен корюшкенини ве Катерина Мануйловнаны хастаханеге алып кеткенлерини айтты.

Айрие абдырады ве отургъан еринде силькинип алды.

— Я биз мында даа не ишлеп юремиз?— дегенинден озюнинъ хабери олмады.

— Мен саба анамнен берабер кетеджегим,— деди Валерий.

Айрие Арслановкъа чевирилип:

— Шимди, шимдичик къайтмакъ керекмиз,— деди ве онынъ тирсегинден тутып бир-къач кере тарткъычлады.

— Саба ола, хайыр ола!— деди Арсланов озюни сыкъмайып.— Невбетте турып билет алдыкъ, театрни корейик.

— Ёкъ, арсланым, инсан джан котере. Сабагъа къадар... Ялварам, шимди къайтайыкъ...

Макъпуле де къайтмакъ тарафдары эди. Экиси Арсла-

новны енъдилер. Билетлерини Валерийнинъ къолуна туттырып «Ыссыкъ» мусафирханесинде къалдыргъан шейлерини алмагъа ашыкътылар.

VIII

— Балам, энди къартайып кетятырсынъ, озюнъе бир элял сют эмген союны бакъып алмайсынъмы? — деди Себиля апте. Юнускаа аш бошатып къойгъан сонъ.

— Эвленмеге вакъыт ёкъ анай!

— Сен чокъ баш кутме, бала! Копек суварып юрмеге вакъыт тапасынъ да? Ич де аптенъе бенъземейсинъ, быралкъылананып башладыны!

Себиля апте Юнускаа бойле къатты сёзлер даа айтмагъан эди. «Бабасыз осьти, къыргъычым» деп, оны бу кунъге кельгендже эркелеп осьтюрди. Юнус намуслы, ишкир бала. Юнуссыз совхозда бир эвнинъ лампочкасы янмай, бир адамнынъ радиосы чалмай. Эр кеснинъ ишини Юнус битире.

— Юнус койимизнинъ чырагъы, онынъ къоллары алтын, — дейлер совхоз ишчилери.

— Мен сагъ олгъанда бир къыз тапып башынъны багълап къой балам. О заман ольсем де окюнчли кетмез эдим. Гедже-кунъдюз Айрие татанъны тюшюнип юрер эдим. Бир баланен ёл ортасында къалды, деп ашагъаным, ичкеним аркъама кете эди. Шукюр, коресинъми онынъ бахтыны? Эр кес сукълана. Энъиштенъ киби аптаритетли адам бармы бу ерде? Аптенъ оны намусы, ырызынен тапты балам. Санъа бойле шей айтып башласанъ ярашмай, ырджая къаласынъ алдымда. Эр шейнинъ вакъыты бар. Алма пишкен сонъ терегинде турмай. Амма сен ернен кокнинъ арасында саллана юресинъ. Вакъытны кечирдинъми, терегинъде къурур да къалырсынъ. Козюнъни ач, мен сагъ экенде озюнъе акъран тап, юва къур. Ольсем козюм артта къалмасын о бир дюнъяма раат кетейим.

— Мында манъа акъран ёкъ, анай. Бирине рум къызы дейсиз, бирине уйгъур къызы... Ангисине баш ураджагъымны бильмей юрем. Шимди къыз къыдырып Алсабадан чыкъып кетейимми?

— Ой матюв, я анавы Кериме? Я Мемедля акъайнынъ ортанджысы, ады не шунынъ?.. А, Сефае. Я да анавы Къуртваапнынъ кенджеси.. Мында къыз азмы?

— Олар манъа селям бермейлер, айланып да бакъ-майлар, анай. Къартсынъ, дейлер.

— Коресинъми? Эм догъру айталар. Эр шей озюнъе багълы. Акъыллы къызлар яхшы йигитнинъ яшыны чокъ сорап отурмайлар. Анълашылгъанына коре олар сени бегенмейлер.

— Айды, сиз, къасеветленменъиз анай бегенген сою да чыкъар. Керек олса мен сизге келинни та Ташкенттен алып келирим. Энъиштем кельгенинден берли манъа бир къызны макътай-макътай тамагъы къуруды. Ады Сусанна экен.

— Вай, балам адынен къарт олсун. Бельки кимнинъ къызы олгъаныны да биледир...

Себиля апте къуванды. Къызнынъ озюни коръген къадар олды. Арсланов Ташкенттен къайтып кельгенинден берли Чешмеджиеванен мектюп язышып тура. Чешмеджиева эр мектюбинде Фидане акъкъында меракълана, онынъ лакъырдысыны сорай, базы бир файдалы кенъешлер язып ёллай. Сагъ-селямет олса язда бу якъкъа келеджегини, отпусказыны бу орталыкъларда кечиреджегини яза. Арсланов да, мектюплерде пек хош сёзлер язып, бутюн аилеси, хусусан Фидане оны сабырсызлыкънен беклеп тургъанларыны билъдире. Эгер мумкюн олса озюнен берабер Сусаннаны алып кельмесини риджа эте. Макъсад Юнуснен экисини корюштирмек, таныш этмек. Сусанна шеэр тербиеси коръген къыз. Ким биле, бельки бири-бирлерини бегенирлер. Умютсиз чалы тюбюнден тавшан чыкъар дегенлер...

Себиля апте бугунъ огълунен лаф эткенине, онынъ фикир-тюшюнджесини билип къалгъанына джан юректен севинди. Саба эписини ашатып ишине ёллады. Сонъра Юнус турды. Онынъ акъшам кеч келип, саба еринден турмагъа эрингенине ачувланып, Себиля апте кене къаттыджа лаф этмеге меджбур олды. Озю аля даа сабалыкъ къавесини ичмеген эди. Юнусны да ёлуна къойгъан сонъ, не исе бираз тынчланды. Джебзесини тютетип Месюде къартийнинъ янына кирди.

Ич бир къаве, Месюде,— деди о астына кичкене кийиз парчасыны тартып.— Анавы бизим ярамаз даа янъычыкъ турып кетти. Тюрткючлей бермесенъ къушлукъкъадже еринден турмайджакъ. «Даа мени бегенмейлер» деп юре. Бу маальгедже юкълагъан адамны алла да бегенмез, къул да. Саба эрте тургъаннынъ къысмети бол олур. Раметли

анам айта тургъан эди, къысметлер даркъалгъандже еринъ-ден тур балам. Эрте тургъаннынъ къысметини алла берир. Бизимкине шаша да къаласынъ. Бутюн гедже биревлернен чыйкъылдашып юре, саба баш котермеге эрине. Ойле адамгъа къысмет къайдан келеджек? Коресинъми, Самединни? Танъда турып кете. Береми алла къысметини? Бере. Даа эвленгенине не олды, эви-баркъы шейге толып къалды. Энди тельвизор аладжагъым деп юре. Эм алыр. Онынъ кибиси ач къалмаз. Алла сенинъ де савлугъынъны берсин, Месюде, эвлядынънынъ ферагъыны корип яша.

— Тек Самединни макътама, Себиля,— деди Месюде апте тютюн толу чубугъыны тартып.— Акъайыны адам эткен апайдыр,— дегенлери пек догъру. Айриени алмаздан эвель онынъ неси бар эди? Устюндеки, устюнде, башындаки башында. Къуру боюнен юрер эди. Амма, шимди коресинъми? Акъайлар сырасына къошулып юре. Эр шейге къолу ете. Ишкирликке о яшлыкътан алышып кельди. Танъ юкъусы не экенини балалыгъындан берли бильмей. Бала яшлыгъында не коръсе, оны огренип къала экен. Бизде бир Кятибе апте бар эди. О догъургъан баласыны докъуз яшына къадар эмизе эди. Акъыз, не ичюн япасынъ бу шейни, десенъ, ана сютюне тоймагъан, тана сютюне тоймаз, сагълам олур дей эди. Эм керчектен онынъ балалары сагълам эдилер амма, ишкирликке кельгенде... Бир кунъ онынъ кичкене огълу дагъгъа одун кетирмеге кете. Бир юк одунны аркъасына сыкъынып яваш-яваш эвге къайтаткъанда акъылына анасы тюше даа. Эмеджеги келе. Аман одунны ташлап эвге джувур. Анасыны эмип тойгъан сонъ, кене барып одунларыны кетире. Эй, не япаджакъсынъ, о да бир нишаретлик экен. Заваллы анасы онынъ къолундан бир къапым отъмек ашап оламады. Дженк фелякетинде эляк олды. Сен къааръ этме, Себиля. Алла кимсени къысметсиз яратмагъан. Юнуска да тапылыр озю киби бир токълал баш. Биз ашымызны ашадыкъ, яшымызны яшадыкъ. О якъыны энди озълери тюшюнсинлер.

Месюде апте тютюнге богъулды. Къатты-къатты оксюрмеге башлады. Козълери балабанлашты, къызарды, агъызындан силекийлери акъты, лякин оксюригини токътатып оламай. Себиля апте бир фильджан сув узатты. Бир къач ютум юткъанынен оксюрюги сакинлеп башлады, къолуны сетке таяндырып, аякъларыны узатты. Не исе, нефеске тоюп башлады.

— Ташлап оламадым бу арам шейни,— деп чубугъыны айландырып къакъты.— Самедин манъа къанлы киби ялвара, шимди Айрие де онъа къошулды, экевлешип ялваралар, кене ташламадым, ташламадым. Мына сен чекмейсинъ Себиля, не раатсынъ я.

— Озюнъ къабаатлысынъ, Месюде. Сексенге кельген адамгъа акъыл огретмеси къыйын. Мен сенинъ еринъде олсам, о сасыкъ шейге агъызымны булаштырмаз эдим.

— Айды, не япайым, яшагъаным къадар даа яшайджагъым ёкъ. Бир кунъ мына бойле оксюре-оксюре баджакъны узатыр къалырым, алып кетер комерсиз. Себиля, тувгъаным, санъа деп айтам, бир бахтымыз бар экен. Сен бу ернинъ мезарлыгъыны барып коръдинъми? Коръмеген олсанъ бир кунъ Айриенинъ къолундан тут да, барып бакъ. Ем-ешиль къыр устюнде. Топрагъы къуру, чевре-чети къоравлы, айван тюшеджек киби дегиль. Мезарлыгъымыз пек яхшы. Къач йыллар эвельси Самедин мындан кочип кетеджек олгъан эди. Мен агъладым. Бу ернинъ мезарлыгъыны къыймайым балам, дедим. Кочмедди. Шимди озюни къувсанъ да кетеджекке ошамай. Айриени алгъан сонъ юреги ат башы къадар олды. Юре чайыр-чайырдан. Тютюнджи баласы дегильми санъа.

Месюде къартий баш пармагъынен басып кене чубугъына тютюн толдурып башлады. Себиля апте тизлери устюне котерилип, онынъ къолундан чубукъны тартып алды да, кийиз тюбюне тыкъып къойды.

— Алла, алла, Месюде. Сенде текаранчыкъ сабыр деген шей бармы, акъыз? Озюнъ шимди мезарлыкъны макътадынъ. Ойле пек ашыкъма. Озь вакътынъы шашырмай турчы! Олюмнен оюн ёкъ. О «мааллеге» бармакъ бельки сенден эвель меним башыма язылгъандыр. Топрагъынъ къайдан алынгъан олса, анда барып ятарсынъ. Яш экенде адам бойле шейлерни чокъ тюшюнмей. Озюнъни дюньягъа дирек олып къаладжакъсынъ беллейсинъ. Совхозгъа ишлемеге кельген яшларны башта клуб меракъландыра. Тюкянларгъа джувуралар. «Амам бармы, кино оламы, артистлер келеми?..» Оларгъа кереги шу. Эй-ей, дюнья дегенинъ ойле экен. Мусафир келе де, кетесинъ. Бизим генчлик чагъымыз хор кечти. Шимдики яшларнынъ гурълюгине бакъа да сукъланасынъ...

Азбарда Арсланов пейда олды. О ичери кирмеди. Къапыны аралыкъ этти де, Еремеевнен берабер тарлагъа кеткенини айтты.

Бу йыл тютюнлер пек яхшы бойгъа кеттилер. Тарларда сонъки ишлер япылмакъта. Ёлакъ аралары темизлене, машина айланаджакъ ерлер, тютюн сепетлери чыкъарыладжакъ мейданчыкълар тегизлене. Сонъки суварув биткен сонъ, тютюн къырмагъа башланаджакъ. Еремеев Арслановны Макъпуленинъ тарласына давет этти. Мында тютюнлер адам боюнджа. Тарланынъ юкъары башында сувджынен Макъпуле лаф этип туралар. Бу ерден бутюн бригадаларнынъ тютюн тарлаларыны сувнен темин эткен балабан арыкъ кече. Арыкънынъ бир чети джап, дигер тарафы тютюн занлары. Бу арыкътан яз ве къыш сув эксильмей. Бригадаларгъа сувны бу арыкътан болюштирелер. Къаршыдаки юксек къарлы дагъларнынъ этегинде бири-бирине келип кюшулгъан эки деренинъ сувы яз бою бу тарлаларны суvara. Арыкънынъ башы койден бир верст къадар узакълыкътадыр. Сувджы къарт ёлакъларгъа сувны болюштирип йиберген де, чапасына таянып Макъпулеге бир шейлер икяе этмекте эди. Макъпуле Еремеевни корьгени киби тюзликке чыкъып:

— Ёлакъ арасындан юрменъиз, устюнъиз зифирленир!— деп кычырды.

Еремеев ве Арсланов кюлларыны четке керип, ёлакъ арасындан кечерек, Макъпуленинъ янына келип чыкътылар.

— Къашкъырдан кюркъсанъ дагъгъа чыкъмайджакъсынъ, зифирленмек дегиль, япракълары кюлтугъынъа сарылып къала. Бу йыл тютюнинъ козь кюувандыра, Макъпуле!— деди Еремеев селямлашмаздан эвель.

— Бу иште мынавы сувджы къартымнынъ иссеси пек буюк. О манъа гуя бир агроном киби ярдым эте,— деди Макъпуле сувджы къартны косътерип.— Эльведин агъа! Бу якъкъа кель!

— Макъпуле кюлуны саллап къартны чагъырды. Эльведин акъай кельди. Чапасыны сол кюлуна авуштырып селямлашты ве бир сёз айтмадан кюлюмсиреп беяз сакъалынынъ уджуна япышып къалгъан зифир буртючиклерини тинтип башлады.

— Ишлер насыл, къартым?— деди онъа Еремеев.

— Шимдилик беш. Сонъу бильмейим не олур.

— Сонъу не оладжакъ онынъ? Энди суварувны токътатамыз. Бир къач кунъден къырмагъа башлайджакъмыз. Сен мынавы тахталаргъа сув ничюн йибермейсинъ?

— Оларгъа бугунъ сув бермек эрте, агроном аркъадаш. Бир кунъ, бир гедже даа сабыр этмек керек.

— Сен теджрибели къартсынъ. Айды, озъ ишинъни озюнъдже япа бер.

— Сувджынен эким бирдир,— деди къарт бираз къабарып.— Эким инсаннынъ набызыны насыл сезсе, сувджы да эр тюр тютюнни ойле сезмек керек. Не вакъыт сув бермек кереклигини бильмесе сувгъа не къадар икътияджы олгъаныны сезмесе, о сувджынынъ иши де озюне бенъзер. Шукюрлер олсун сувны сакъанен ташымаймыз.

— Догъру айтасыз, къартым. Пек догъру. Тютюн тарласы сувджынынъ постудыр, сувджы исе, озъ постунынъ сакът бекчисидир!..

Еремеев Макъпуленинъ бригадасындан кечип, Арслановнынъ тарласына кельгендже ава булутлап кок юзю сиярмагъа башлады. Тузлусай беттен котерильген къара булут энди къырлар артына къонмакъта олгъан кунешнинъ огюни бир тамам къапатты.

— Шимди бизге ягъмурнынъ асыл кереклиги ёкъ,— деди Арсланов тёпеге бакъып.— Керек олгъанда бир тамчы таммады.

— Кереклиги ёкъ, амма, авада бир къурунты бар,— деди Еремеев.

Эмирвели ёлакълар ичинден кестирип оларнынъ алдына чыкъты. О суварувны бираз вакъыт токътаткъаныны, авадан хавфсырагъаныны айтты.

— Макъпуле де ойле япмакъ керек эди,— деди Еремеев.

— Пек яхшы. Мен онъа хабер этерим...

Макъпуле суварувны токътатмады амма, янълышлыкъ этти. Токътатса да, файдасыз эди. Чюнки арадан бир саат кечер-кечмез ягъмур сепелеп башлады. Сувджы къарт чапасыны алып балабан арыкътан ёлакъларгъа болюнип акъмакъта олгъан сув козьлерини тыкъатмагъа башлады. Лякин, ягъмур кеттикче зыкъарлай. Къартнынъ башы тёпесинде кок ойле гудюрдеп шатырдады ки, дерсинъ аякълары тюрбюнден ер къуртулып кетти. Къартнынъ бетинден, манълайындан тернен къарышып сув чыбыра. О устюнден кольмегини чыкъарып ташлады, ялынъыз йыртыкъ майкасы къалды. Не исе, биринджи сагъанакъ кельгендже, бутюн сув козьлерини къапатып чыкъты. Ёлакъ араларына энди сув кетмей. Ялынъыз ешилъ япракъларны къыбырдатып ягъмур ягъа. Къарт сувгъа

шишельген майкасыны ве кольмегини сыкъты, башы устю-
не фуфайкасыны ташлап арыкъ кенарындаки индже тал
терегининъ астына пысты.

Ягъмур кеткен сайын арта. Бир сагъанакъ сакинлеп
башладымы, дигери шувулдап келе. Тарланынъ юкъары-
сындаки эниш ерден кечкен буюк арыкънынъ сувы тыйы-
лып, сакин акъар эди. Бу ерден теренлешип башлагъан
арыкъ, юз метр къадар ерден кечкен сонъ, вызлы акъып
кете. Токътамай ягъып тургъан ягъмурдан энди ёлакъ
аралары голленип башлады. Байырлардан акъып кельген
сель кеткен сайын арыкънынъ сувуны арттыра. Къарт
даянамады. Арыкъ бою ашагъы юрип, сув тыйылгъан
эниш ерге кельди. Бу ерде сув баягъы котерильген эди.
Эгер ягъмур бойле ягъып тураджакъ олса, арыкъ шубесиз
ташаджакъ. Денъиз киби далгъаланып тургъан тютюнни
сув басаджакъ.

Къарт чокъ тюшюнип отурмады, фуфайкасыны омузы-
на урып ёлгъа чыкъты. Сачындан тырнагъынадже джи-
бинсе де, бир ерде токътамайып джувурды. Къайда, ким-
ге? Озю бильмей. Эльбет де башта бригадирге хабер эт-
мек керек. Я о къайда экен? Эмирвелилерге къошулып
къайткъан эди. Эвиндеми, ёкъса идаредеми? Макъпуле-
нинъ эви узакъ. Къарт башта идареге кирмеге къарар
берди. О эм кете, эм тюшуне. «Арыкъ ягъмур сувуны
котерир амма, дагъ башындан акъып кельген сув къошул-
са, оны сыгъдыралмаз, мытлакъ ташаджакъ. Ягъмур токъ-
таса къуртулдыкъ, токътамаса ишлер масал. Коресинъми
дубараны? Бутюн яз осьтюрген берекетимиз, тёккен эме-
гимиз лайгъа батаджакъ». Къарт талды. Энди чапып ола-
май. Сол къолуны талагъы устюне къойды, джувурып
олмаса да, адымларыны кенъ-кенъ атлап, эп огге ынтыл-
ды.— Койде бир адам къалмагъан экен,— деди о ачувын-
дан.— Тарлада кимсе олмагъаны олмагъан, ёлда да адам
расткельмей...

Эльбет де, кунъ арты ягъып башлагъан ягъмур эр
кесни эвлерге къувалагъан. Конторанынъ ичи де, сачакъ-
ларнынъ тюбю де адам толу. Иши олмагъанлар да ягъ-
мурнынъ сакинлемесини беклеп туралар.

Макъпулени коръдинъизми?!— деди къарт босагъадан
атлагъанынен.

— Еремеевтелер!— деп мыскъылнен башыны саллады
бир къадын. Эльведин агъа сувгъа шыркъылдап къалгъан
балчыкълы керз чызмаларынен конторанынъ полларыны

былаштырып, Еремеевнинъ кабинетине кирди. Бахтыдан бригадирлер эписи мында тютюн думанлатып субетлешмекте эдилер. Къартны корьгенинен Макъпуле абдырап аякъкъа турды.

— Эльведин агъа! Насыл шей?— деди онынъ нефеси тутулгъаныны эслеп.

— Арыкъ ташаджакъ... Бу сёзден сонъ къарт эки кере даа нефес алды да:— Дагъдан номай сель тюшти, сув арыкъкъа сыгъмай!— деп юреги устюне къолуны кьойды. Макъпуле Еремеевке бакъты. Онынъ бакъышындан адже-ле арекет этмек керек олгъаныны анълагъан Еремеев тез-тез Каштановнынъ кабинетине кирди. Еремеевнинъ артындан Макъпуле, Арсланов ве бир къач адам даа сокъулды.

Каштановда байрам кейфи бар эди. Онынъ къашлары де котериле, де тюшелер. Ойле джошкъунлыкънен лаф этип тура ки, кабинетке кирген адамгъа шимди онынъ сёзюни больмек ичюн буюк джесарет керек. Дерсинъ ки, о бутюн дюньясыны унуткъан. Къуванчындан кимерде бир кьопайсырап, къабарып ала. Явлугъыны чыкъарып, кульгенинден козьлерининъ яшыны сюрте. Шакъамы ёкъ-са? О бугунъ омюринде биринджи кере баба олды. Севим-ли Катеринасы къыз тапты. Чокъ йыллар девам эткен дженк фелякетинден сонъ, онынъ оджагъында бугунъ бахт чырагъы янды. Барышыкъ аят севген эмекчилер багъчасында бир гуль даа ачты...

Каштанов бири-бири артындан кирген адамларгъа тикилип:

— Янгъынмы шу?— деп кульди. О белледи ки, адам-лар онъа козь айдын айтмагъа кирдилер.

— Янгъындан бетер, Андрей Андреевич!— деди Эль-ведин къарт огге чыкъып.— Балабан арыкънынъ суву таша, тютюнни гъайып этеджек!

— Я мында даа неге турасыз?!

Каштановнынъ эеджанлы суалине джевап оларакъ:

— Арыкъ башыны барып йыкъмакъ керек!— деди Ере-меев.

— Арыкъ башы бизге пек паалыгъа отурыр!— деп Каштанов телефонгъа япышты...

Арадан бир саат къадар вакъыт кечти. Тарладаки арыкънынъ анавы эниш ери энди голленип, ташып баш-лагъан. Сабан сюрюльгенде зап башында асыл олгъан андеклер, чукъурлар, трактор излери сув астында къал-

гъанлар. Гедже. Къаранлыкъта сувгъа батып къалсанъ, кимсе кореджеги ёкъ. Каштанов насос юкю эки грузо-викнен тарлагъа кельди. Еремеевни исе янгъын машинасынен арыкъ башына ёллады.

— Эгер сувны насослар эксильтип олмаса, арыкъ башыны эшермиз!— деди Каштанов.

Насослар байыр тёпесинден сувны эки къалын трубадан фышкъртып башладылар. Лякин, тютюн занларынынъ биринджи ёлакълары энди сувгъа комюльген эдилер. Насослар сувны джапнынъ артына акъызып башлагъан сонъ, Каштанов арыкъ башыны бакъмагъа кетти. Мында дерелерден йыгъылып кельген сув гуя денъизни анъдыра эди.

— Насослардан файда ёкъ, арыкъ башыны эшмек керек!— деди Еремеев.

Чомучыны ашагъы саркъытып, ерни титретип келеяткъан экскаваторны арыкъ башынынъ энъ терен ерине онъайтлап янаштырдылар. Каштанов номай сувнынъ тазйыкъына чыдагъан, устаджа къалангъан бу юксек, къалын бентни йыкъмагъа языкъсынып:

— Бираз сабыр этейик!— деди.

— Андрей Андреевич дакъкъасы паалы! Биз энди тютюн сувармайджакъмыз, исарны эшмек керек!

Каштанов къолуны саллады. Экскаватор челик панджасыны къалавнынъ астындан илиштирип тарткъанынен пейда олгъан чатлакълар арасындан сув фышкъртып башлады ве озюнинъ кучюнен къалавны абрап, терен йылгъа бою гурьлеп акъты.

Арыкъ башындан энди тарлагъа сув кетмей. Лякин сувнынъ арды кесильгендже энъ аздан бир саат даа кечеджек. Каштанов янгъын машинасынынъ да тарладаки насосларгъа ярдымгъа етишмесини эмир этти.

Тарлада не къадар тютюнни сув баскъанындан кимсенинъ хабери ёкъ эди. Къаранлыкъта оны кенардан эшмек де мумкюн дегиль. Ешилъ тютюн тарласы гедже къаранлыгъында инсаннынъ козюне тюпсиз денъиз кибисим-сия олып корюне. Каштанов сув баскъан ерни сабагъа къалдырмай, шимди, бу алекетте корип бильмек истеди.

— Айда, машинаны зангъа!— деди о Молдабайгъа.

Машина тютюн ёлакълары арасындан кеткен топракъ ёлгъа бурулгъанынен, лайгъа батып къалды. Не арткъа, не огге.

— Сув бу ергедже кельген экен, Андрей Андреевич, джаяв чыкьмасакъ олмайджакъ, — деди Молдабай. Каштанов озюнинъ янълышкъаныны анълады.

— Аджеле ишке шейтан къарыша дегенлери бойле шейдир даа, — деди Каштанов ве Молдабайнынъ теклифине разы олмакътан башкъа чареси къалмады. Олар тютюнлер арасында балчыкъкъа, сувгъа чомулып, зорнен заннынъ кенарына тырмашып чыкьтылар. Каштанов белине къадар сыланды. Чызмаларынынъ ичине сув толды. Джибинип, былашып устюне япышып къалгъан ягъмурлыгъы астында эти-тени къалтырады...

Арыкъ башындан сувнынъ арды кесильген сонъ ташкын токътады. Грузовиклер ве янгъын машинасы ишчилерни койге алып къайттылар. Табиат фелякетинен куреш аман-аман яры геджеге барды. Бея кечип кетти. Адамлар онъа бойсунмадылар. Тютюнлер саба кене ешилъ япракъларыны джайып кунешнинъ алтын нурларыны эммеге башладылар.

Экинджи куню Каштановнынъ сыджагъы котерильди, къатты оксюрикке тутунды. Директор ве сувджы къарт область хастаханесинде корюштилелер.

Бу хабер локъсаханеде яткъан Катеринаны гъает мугъайтты. Не вакъыт чыкъаджагъыны озю бильмей. Каштановнынъ джигерлери сувукълангъан. Экимлер онынъ огюни алмагъа тырышалар. Бу агъыр дакъикъаларда барып хатирини сорамагъа Катеринанынъ да чареси ёкъ. «Коресинъми дубараны, не япмалы, не чарелер корьмели аджеба?» Бу тюшюнджелер Катеринагъа раатлыкъ бермейлер. «Озюмни бираз яхшы дуйсам мытлакъа чыкъарым. Эким рухсет бермесе де чыкъарым», дей о ичинден.

Палатанынъ къапысында Айрие корюнди. О хатир сорамагъа кельди. Катеринанынъ сыджакъ манълайындан опип, кроватинынъ четине отурды. Катерина агълады. Айрие онынъ муляйим козьлери яшлангъаныны биринджи кере корьди. Булар бир тарафтан къуванч, дигер тарафтан къайгъы козьяшлары эдилелер.

— Къуванч ве яныкъ берабер юре экен, — деди Айрие явлугъынынъ уджуны онынъ козьлерине тийдирип. — Санъа, эр алда, къуванмакъ керек. Сен бахытлысынъ, Катюша. Андрей Андреевичнинъ башы уджунда экимлер. Сен онынъчюн ич раатсыз олма. Аш-сув етерлик. Тюневин Валерик барып кельди. Яхшы экен. Ярын Самедин бараджакъ. Мен тазе бал азырлап къойдым. Къач йылдан

берли бала истеп тельмирип юре эдинъ. Мына, энди янынъда джанынъ-джигеринъ ята. Къашлары, манълайы Каштановкъа бенъзей, акъыз. Къуван Катя! Эвляд корьгенинъе къуван!

— Эв янъгъыз къалды, Айрие, сен Валерикни корьсенъ айт, бельки анасы келип бир къач кунъ бизде отурыр?

— Бир афта ичинде не оладжакъ шу? Мен козькъулакъ олып турарым, сен раатсыз олма.

IX

Еремеевнинъ кабинетинде къызгъын лаф кете. О шимди директорлыкъ вазифесини де алып бара. Бир къач кунъден бригадалар тютюн къырмагъа башлайджакълар. Яз бою етиштирилъген берекетни вакътында тымар этип алмакъ ичюн бригадалар азырлыкъ корьмектелер. Аранларда тютюн тизиджилер ичюн махсус ерлер, темен бошатыджылар ичюн тезьялар, ип сырыкъ, сепет ве дигер кедиклер ерли-еринде озь саиплерини беклеп турмакъта.

— Алдымызда бир муим вазифе тура,— деди Еремеев бригадирлерге.— Биз шеэрден ярдымджы алмайджакъмыз. Ярдымджылар бизге пек паалыгъа отураджакъ. Келиримизнинъ белли бир къысмыны оларгъа бермеге не керек? Кейфиет меселесинде де зарар этемиз. Ярдымджы къуветке ишанмайып, кене озюмиз тырышып бакъайыкъ. Бундан бизим хозяйствомыз ялынъыз кяр этер, ишчилеримизнинъ къазанчы да артар. Озюнъизге малюм ки, тютюн вакътында къырылса, къурутылса, даметленсе, о вакъыт кейфиети де яхшы ола. Биринджи, экинджи сорт не къадар чокъ олса, келиримиз де онъа коре арта. Шунынъ ичюн акъикъий тютюн устасы онынъ эр бир япрачыгъыны алтын ерине коре. Кечкен йылнынъ екюни эпинъизге белли. Макъпуленинъ бригадасы былтыр энъ юксек берекет етиштирди. Къалгъан бригадалар да ярамай чалышмадылар. Бири-бирлеринден чокъ артта къалмадылар. Умумен совхоз боюнджа гектардан он бир центнерден берекет алдыкъ. Бойле къазанчкъа биринджи кере наиль олдыкъ. Юксек берекет алмакънен бирге, юксек кейфиет огърунда курешмек керекмиз. Кейфиет меселесине кельгенде биринджи ерде Арслановнынъ бригадасы тура. Макъпуленен тенъештиргенде, онынъ бригадасы экинджи.

учюнджи сорт тютюнни учь процент зияде берди. Парагъа чевиргенде бунынъ буюк эмиети бар. Эпимизге малюм ки, Арслановнынъ бригадасында еди гектар тютюнни мантар ургъан эди. Демек, берекет башкъа бригадаларгъа коре шубесиз эксик олмакъ керек, шаймы? Ойле олгъанда, насыл этип бу бригада биринджи, экинджи сорт тютюнни башкъаларындан зияде берди? Мына бунынъ бутюн сыры ве себебини яхшы бильмек керек. Шунунъ ичюн де бугунъ мен сизлерни топладым. Арсланов аркъадаш! Сиз бу меселе акъкъында озъ теджрибе ве фикиринъизни къыс-къадан айтып беринъиз.

Еремеев сёзюни битирди ве Арслановкъа мураджааг этип, ерине отурды.

— Сигар якъмагъа мумкюнми?— деди звено башларындан бириси.

— Якъсанъыз-якъынъыз, лякин форточканы ачынъыз!

Арсланов макъталгъанындан аркъадашлар арасында озюни къолайсыз бир алда дуйды.

— Мында гизли бир шей ёкъ достлар,— деди о аякъкъа турып.

— Отургъан еринъден айта бер!— деп Еремеев онынъ сёзюни больди.

— Бутюн меселе тютюнни къырувда ве къурутувдадыр, аркъадашлар,— деди Арсланов ерге отурып.— Биз, адетиндже чокъусы вакъыт тютюн къыргъанда пишкен ве пишмеген япракъларны къарыштырамыз. Хусусан ашыкъкъанда. Мени багъышланъыз, бу ерде ачыкъ фикирлешмеге кельдик. ойлеми? Мен бильгенимни айтмакъ истейим. Пишмеген япракъта сув чокъ ола. Ойле сою пек яваш къуруй ве кереги киби сарарып оламай. Мадам ки, биз оны пишкен япракълар арасына къарыштырамыз, о кереги дереджеде къурып етишмеген сонъ, пек тез куфленип башлай. Демек, кемалына кельмеген япракъ узюльсе онда кейфиет эксик ола. Шунунъ ичюн, кечкен сене тымар вакътында биз бунъа айрыджа эмиет бердик. Тарлагъа къайта-къайта тюштик, пишмеген япракъны узмедик. Бу — биринджи тарафы. Экинджиси шу ки, адети узъре бизлер учюнджи къолдан сонъ тютюннинъ устюнде не къадар япракъ къалгъан олса, эписини къыра ве сепетке толдурамыз. Догърумы?

Аркъадашларнынъ чокъусы тасдикълайыджы манада башларыны саладылар. Арсланов девам этти:

— Ава бозаджакъ, япракълар сычан къулагъы киби,

бу кьол туткьан бир иш ве даа бильмем нелердир айта да, тез-тез тарланы темизлемеге ве сюрип ташламагъа ашыкъамыз. Мына, бу меселеде биз гъает чокъ зарар этемиз. Былтыр меним бригадамда учюнджи ве дёртюнджи кьол тютюнни учь кереден кьырып алдыкъ. Нетиджеде, кемалына келип узюльген япракълар эписи биринджи ве экинджи сортнен кетти. Мына, кейфиетни насыл этип арттырамыз.

Арсланов бу ерде сёзюни кести. Еремеев онынъ айткьанларыны дикъкъатнен динълеп турды ве озюнинъ кьыскъа сёзюнде Арслановнынъ ялынъыз бригадир оларакъ дегиль де, озь ишине агроном козюнен янашкьаныны кьайд этти. Дигер аркъадашлар да онынъ фикирине кьошулдылар. Тютюннинъ совхозгъа кетирген келири шубесиз онынъ кейфиетине багълы олгъаныны, берекетни арттырмакънен бирге, кейфиетини юксельтюв ёлунда бутюн чарелерни корьмек кереклигини кьайд эттилер.

— Совхознынъ планлаштырув болюгине теклиф этермиз,— деди Еремеев сонъундан,— кейфиетнинъ не кьадар кяр бергенини косьтериджи тахта япсынлар. Бутюн бригадаларда асып кьоярмыз. Барсын тютюнджилер эписи бунынъ фаркъыны корьсинлер. Аркъадашлар, шубесиз тютюнджилеримизнинъ теджрибеси йыл-йылдан арта. Бу иште бизге кьазах топракъчылыкъ ильмий тешкерюв институтынынъ хадимлери токътамай ярдым косьтерип турмакъталар. Ишлер кеттикче механизмлештириле. Умют этемиз ки, илериде тютюн тизюв киби кьол туткьан агъыр ишни де машиналарнен япармыз. Шунунъ ичюн бизге озь теджрибемизни даима арттырмакъ керек. Совхоз янында тешкиль олунгъан агролабораториянынъ ильмий хадимлеринен сыкъы багъ тутмакъ керекмиз. Кузьде сюрюльген топракъта берекетнинъ учь-дёрт кере зияде олгъаныны энди билемиз. Шимди тымар ишини алып бармакънен бирге бунъа да азырлыкъ корип, тютюн кьырылып биттими тарланы суварып, йигирми беш сантиметр теренликте сюрип ташламакъ керекмиз. Топракъны сюрип, суварып, кубрелеп кьойгъан сонъ, парник ишлерини кьыш бою раат-раат алып бара билемиз. Айтаджакъ бармы даа? Айдынъ аркъадашлар энди ишке!..

Арадан бир кьач кунъ кечти. Ишлер озь ёлуна кьойылды. Тютюн аранларында эксериетни кьадынлар тешкиль эте. Дирекциянынъ риджасынен эвде тарсыкъып отургъан кьартийлер де беш-он темен тютюн тизип кете-

лер. Мектеплилер де аранларгъа келип бир-къач саат олса да, аналарына ярдым этелер.

Макъпуленинъ энди Айриенен корюшип лаф этмеге вакъты ёкъ. Гедже келе, гедже турып кете. Тютюнджилек — экинджилек демек дегиль. Экин кунештен къоркъмай. Оны кунъ къыздыргъан сонъ чалып ала билесинъ. Лякин, тютюн кунештен сола, япракълары бири-бирине япыша, агъыр зифир къокъусы бурнынъны йырта. Кунеш чыкътымы, ишнинъ зевкъы къача. Шунынъ ичюн ишчилер танъны эр вакъыт тарлада къаршылап алалар. Ёлакъ арасына кирген сонъ, алышып къалгъан ишкир пармакълар гедже салкъынындан тавшан къулагъы киби тим-тик тургъан тири япракъларны шытыр-шытыр сындыралар. Дерсинъ ёлакълар арасында адамлар мысырбогъдай патлаталар. Базы шакъаджы кишилер тосат-тосат чешит сеслер чыкъарып, козьлери юкъу баскъан адамларны сескендирелер. Танъны тарлада къаршылап алмакънынъ къыйынлыгъынен берабер, омюринънинъ сонъуна къадар унутылмайджакъ зевкъы да бар. Эр шей алышмакъкъа багълы. Алышкъан адамнынъ башындан бир вакъыт юкъу басмай. Онынъ башы тёпесинде йылдызлар парылдайлар. Олар дерсинъ гедже къаранлыгъында севдалар киби бири-биринен сырдашалар. Танъ агъарып башлагъанынен йылдызлар бири-бири артындан гъайып олып кетелер. Сабалар къучагъында тютюнджилернен сырдашып, ялынъыз танъ йылдызы къала. Бу вакъыт ёлакъта ян-янаша тютюн къырмакъта олгъан яш йигитнинъ ве къызнынъ къуванчлы кулькюлери эшитиле. Эки яш юрекнинъ кокрегинден чыкъкъан сыджакъ нефес япракълар устюнде кумюш киби йылтырап тургъан чыкъ данечиклерини бувландыра. Ёлакълар арасындан базан бель догъуртып башыны котергенлер бири-бирлерининъ юзлерини корип таныгъанларынен саба ачылгъаныны анълап, даа зияде давранмагъа башлайлар.

Макъпуле, ничюндир, бугунъ саба тарладан буюк къуванчле къайтты. Къурбанбеков сабагъа къадар онынъ бригадасында олды. Тютюнджилернинъ арасында юрип, чокъусына тютюн къырмагъа ярдым этти. Бригада азалары бугунъ сабаны партия тешкилятынынъ секретарынен бирликте тютюн тарласында къаршыладылар. Кунешнинъ алтын шавлелери ерни къыздырып башлагъанынен сепетлерини машинагъа юклеп, эписи бирликте арангъа кельдилер. Даа эрте олса да аранда къызгъын иш кете эди.

Эр кес ерли-еринде, озь ишининъ башында чалышмакъта. Дирекция ве партия тешкиляты Макъпулени Бутюнсоюз кой хозайствосы сергисине ёлламагъа къарар бергенини Къурбанбеков бригада азаларына илян этти. Тютюнджилер къуванышып Макъпулени тебрикледи, опытилер. Къурбанбековкъа озь тешеккюрлерини бильдирдилер.

Бугунъ Айрие эвде эди. Макъпуле иштен эрте къайтты ве озь къуванчыны онъа бильдирди.

— Бу сефер Самединни алмайсынъмы янынъа?— деди Айрие кулюмсиреп.

— Самединни не япайым мен, онынъ апайы бар, отурсын яресининъ козюне бакъып,— деди Макъпуле ве озь шакъасына озю шакъылдап кульди.

— Сенинъ ишинъ яхшы, Макъпуле. Мен санъа бакъам да къуванам.

Сенинъ тирнеклигинъе о къадар муим вазифелернинъ астындан чыкъкъанынъа къуванам. Нам къазанмакъ инсаннынъ озюне багълы экен. Коресинъми, бир къач йыл ичинде Озбекистангъа барып кельдинъ, шимди Москвагъа кетесинъ. Сагълыгъынъ олса умют этем ки, даа чокъ ерлерни корерсинъ. Мемлекетимиз балабан. Онынъ эр ерини корип чыкъмакъ ичюн юзь йылларнең яшасанъ азлыкъ этер. Къач адам кетесиз?

— Эр бригададан бир векиль. Ёлбашчымыз Къурбанбеков.

— Айды, санъа огъурлы ёл тилейим. Сен барып кельсенъ, озюм баргъан киби олам. Сырасы кельсе биз де кетермиз. Пайтахтымызны коръмеге пек авес этем. Эскендернен, Фиданени Лениннинъ дюрбесине алып бармагъа истейим. Самедин анда эки кере олгъан. Москва тубюнде дженклешкен. Къызыл мейданда озь танкынен парадда иштирак эткен. Москвагъа барып да даийни коръмегендже къайтма! Балаларгъа сенинъ кетиреджек энъ кыйметли бахшышынъ ана шудыр...

Бир кунъден сонъ олар ёлгъа чыкътылар.

Москва! Бу шеэрде кимлер олмай, кимлер онынъ сокъакъларыны, паркларыны, метросыны корип сукъланмай. Бутюн дюнья халкъларынынъ дикъкъаты шу шеэрге догъуртылгъан. О барышыкъ севгенлернинъ юрегидир. Бу юрекнинъ эбедий урып турмасы ичюн, Ватанымызнынъ бутюн халкълары курештилер. Фашистлер бойле бир кузьде бутюн арбий къуветининъ аман-аман ярысыны топлап, бу шеэрге къаршы къойгъан эдилер. Онынъ «Йылдырым

дженки» деп адландыргъан планында Москва энъ муим ерде тура эди. Москва — Совет девлетининъ юреги ве мийи, буюк санайы, ильмий ве медений меркези олгъаныны олар яхшы биле эдилер. Бу шеэрни ер юзюнден силип атмакъ истедилер. Олар бу макъсадкъа иришмек ичюн ич бир шейден къачынмадылар, не къадар буюк гъайыпкъа огърасалар да, эп огге догъру ынтылдылар.

Бу агъыр куньлерде Коммунист партиясы ве Совет укюмети бутюн халкъны душмангъа къаршы курешке чагъырды. Онынъ джанаварджа арекетини токътатмагъа ве тар-мар этмеге котерильген тувгъан халкъларымызнынъ эвлядлары «Русие пек буюк, лякин кери чекильмеге ер ёкъ, чюнки аркъада Москва» деп къатты дженк алып бардылар.

Мына шимди барышыкъ аят къайнагъан улу шеэрнинъ сокъакъларында чешит халкъларнынъ векиллеринен бирликте Макъпуле де адымламакъта. Олар узакъ ве кунешли диярдан кельдилер. О диярда шимди алтын кузь. Къызгъын тымар вакъыты. Берекетни девлет амбарына ерлештирмек ичюн ешилъ тарлаларда куреш кете.

Макъпуленинъ юзюни серин ельчик чертип алды. Бу анъде онынъ юреги гуя экиге болюнди. Фикири къанатланып Алсабанынъ тютюн тарлаларына учып кетти...

— Бугунъ Москва дживарына экскурсиягъа кетеджек-миз! — деди оларны шеэрде алып юрген экскурсовод къыз.

Тамам саат экиде таин олунгъан ерге топландылар. Экскурсовод къыз къазах тилини озъ ана тили киби биле. Лякин Къазахстандан кельген векиллер рус тилини анълагъанлары ичюн о субетни ве бутюн анълатувларны рус тилинде алып бара. Автобус келип Москва якъынында бир койде токъталды.

— Козюнъиз алдында тургъан мына бу ярашыкъ койде, — деди къыз ортагъа тюшип, — пайтахтымызны душмандан сакълап къалдырмакъ ичюн къатты дженк олды. Бу ерде немселер беш юз солдат ве офицер гъайып эттилер. Куньбаты фронтынынъ джесюр солдатлары бу койнинъ этрафында душманнынъ учъ танкыны, йигирми еди топуны, отуз пулемётыны ве чокътан-чокъ снарядыны къолгъа кечирди. Дженк къурбансыз олмай. Бизим тарафтан да баягъы адам эляк олды. Мына бу къардашлыкъ къабыринде эллиден зияде солдат ве командиримиз ята. Бу эйкель оларнынъ хатиресине тикильгендир.

Къыз къолундаки дефтерни ачып:—Мына, динъленъиз, бу ерде урушта иштирак эткенлерден бирисининъ хатырлавларында не дегенини сизге окъуйым,—деди. «Фашистлер эвлерге толуштылар ве кереги киби ерлештилер. Биз взводымызнен экишер адам олып, оларны гранаталарнен къоркъузып, тышкъа зыкъарлап чыкъармагъа башладыкъ. Взвод командири бир эвге якъынлашты. Бакъса, азбар ичинде бир къадын къучагъына балаларыны алып чыкъкъаныны ве шашмалап юргенини коре. Къадын командирни эслегенинен бир шейлер айтып къычыра. «Бу эвге кирменъиз анда немселер бар!»—дегенини анълай командир. Олар шу ан ерге яталар. Фашистлер атеш ачалар. Эки солдат юзю къоюн сюйрелип къадыннынъ янына келе. О къоркъудан къалтырап, агълай-агълай, шу эвде он беш немсе солдаты ве бир офицер олгъаныны айта. Солдатлар эвнинъ къайсы якъындан бармакъ мумкюнлигини сорайлар. Къадын амбар тарафны косътере. Немселернинъ ич уют этмеген якъындан барып саралар ве эписини гъайып этелер. Акъшам бизим солдатлар шу къадыннынъ эвине раатланмагъа келелер. Бу къара козьлю, мераметли къадын оларгъа къартоп пишире, консерва къыздыра. Эписи шу къадыннынъ икяесини, динълеп туралар ве солдатларгъа косътерген ярдымы ичюн алгъышлайлар. Эльбет де, бу къадыннынъ ве балачыкъларынынъ джаныны къуртаргъанлары акъкъында да айтышалар. Саба сагълыкълашкъанда бу къадынгъа хатире оларакъ бир бахшыш бермек истейлер. Не бермели аджеба? Шу арада солдатлардан бирисининъ янында анасынынъ орип ёллагъан юкъ чораплары бар экен. Торбасындан чыкъара да, узата онъа»...

Къыз бу ерде дефтерини къапатып, яваш-яваш адымлады ве икяесини девам этти:—Шу куньден сонъ, арадан еди йыл кечти, аркъадашлар,—деди о.—Бизим аскерлеримиз душманны озъ ювасына къадар къувалап кеттилер. Дженкнинъ сонъуны, енъиш кунюни сагъ селямет корьдик. Кечкен дженк ёлларыны хатырлап бир кунь бу койге бизге таныш олмагъан бир адам кельди. Кельди амма, койни зорнен таныды. Колхозджылар оны бус-бутьюн янъыдан къурдылар. Дюльбер, орьнекли эвлернинъ алдында, окоп чукъурлары ерине чечеклер, гуллер, вишне тереклери отурттылар. Мына шимди корьгенинъиз киби, бу ерде бир вакъытта дженк олгъандыр деп кимнинъ акъылына келир? Дейджегим, бу адам койнинъ ортасына

келип токътала, нелердир эслеп юре. Сонъра онынъ этрафына адамлар топланып башлайлар. Мен де шу арада сизинъ киби бир группаны бу койге алып кельген эдим. Бу адамнен сорашып билишкен сонъ, шу къадын эпимизни эвге чай ичмеге давет этти. Эвде озъ икяесини девам эттирди: «Солдатлар мени анълады ве эвни айланып сардылар,— деди о. Ойле дешетли атеш ачтылар ки, эв ичиндекилернинъ бир данесининъ тынкъы чыкъмады. Сонъра бизимкилер меним эвимде геджеледилер. Оларнынъ арасында эсмери юзлю бир атик сою бар эди. О манъа тешеккюр бильдирип, хатире багъышлап кетти».

Къадын еринден турды ве юнъден орюльген эки чорап кетирди.— Мен буларны джаным киби сакълайым,— деди къадын.— Ким биле, бельки сагъдыр, бир кунъ озюнинъ дженк эткен ерлерине зияретке келир...

Мусафир чорапларны къолуна алды ,тюшюнджеге далды. Козълери торланып башлады.

— Сиз онынъ ким экенини билесизми ёкъса?— деди къадын эеджанланып.

— Пек яхшы билем. Сизинъ эвде шу акъшам геджелеген солдатлардан бириси мен эдим. Бу чорапларны сизге багъышлагъан адам меним танкчы достым, Семён.эди! Биз онынъле сонъки кере Кенигсберг тюбюнде корюштик ве айрылыштыкъ. Ондан сонъ бири-биримизни коръмедик.

Къадыннынъ чырайы денъишти, козълери яшланды ве башыны ашагъы асты. Бираз тюшюнген сонъ:— Эр алда мен онынъ чорапларыны сакълайджагъым»,— деди козълерини сюртип.

Экскурсовод къыз бу вакъианынъ шаады озю олгъанындан гъает эеджанланып айтты. Бираз вакъыт индей турды, сонъра группанынъ огюне чыкып, сыра-сыра къурулгъан эвлер арасындаки кенъ сокъакъ бою адымлап кеттилер.

Къызнынъ икяеси Макъпуленинъ дикъкъатыны джелъп этти. «Семён» дегенде онынъ акъылына Самедин тюшти. Фикири, хаялы кене узакъ Алсабагъа кетти. О Самединнинъ агъызындан чокъ кере дженк лафы эшитсе де шимди бу къызнынъ икяеси киби ич бир вакъыт тесирленмеген эди. «Ким биле, бельки шу танкчы йигит бизим Арслановдыр, Айриенинъ Самединидир» деп тюшюнди о. Сонъра экскурсовод къызнынъ янына келип:

— Багъышланъыз, сизде шу вакъианы айткъан адамнынъ адреси ёкъмы?— деди.— Мен бир адамнен чокътан берли танышым, бир ерде ишлеймиз. Москва тюбюндеки урушларда иштирак эткен адам...

Къыз козьлерини Макъпулеге тикти. Бираз индемей тургъан сонъ:

— Ёкъ, деген шей бизде олмай апа,— деп къолундаки мешин къаплы блокнотнынъ япракъларыны акътармагъа башлады. Сонъра тизи устюне блокнотыны къойып бир шейлер язды ве Макъпулеге узатты.

— Мына онынъ адреси,— деди къыз.— Эгер сизинъ тюшюнген адамынъыз акъикъатен шу олып чыкъса, риджа этем манъа язып бильдиринъиз. Бизде ич бир шей, ич бир адам унутылмай. Дженк излери бизге янъы-янъы саифелер ача. Бутюн вакъиаларны огренмек ве онынъ эса сына яш несильни тербиелемек борджлымыз.

— Пек яхшы,— деди Макъпуле кягъытны сумкачыгъына тыкып.— Хаберлешмек дегиль, керек олса, келип де кетермиз.

— Буюрынъыз, мусафирим олурсыз,— деди къыз ве кене группанынъ алдына чыкты...

Макъпуле Москвада бир афта олды. Баягъы ерлерни, музейлерни, театрлерни коръди. Улу дайнинъ дюрбесини зиярет этти. Эльбет де, вакъытынынъ чокъусыны сергининъ павильонларында кечирди. Чокъ аджайип шейлер коръди. Мемлекетимизнинъ колхоз ве совхозларында эльде этильген енъишлернинъ, буюк къазанчларнынъ кузгюси олгъан бу сергиден гедже-куньдюз чыкъаджагъы кельмеди. Къазахстан павильонында «Алсаба» совхозы ичюн айырылгъан махсус болюмдеки тютюн тайларыны, алтын тюрс даметлерни, айры тарлалардан алынып мында кетирильген ве ерлештирильген тютюн тюблерини, кейфиедни косьтерген чешит тюрлю экспонатларны коръгенде Макъпуленинъ гъуруры даа зияде артты.

«Бу экспонатлар ичинде шубесиз меним бригадамнынъ макъсулаты да бардыр» деп къуванды о.

Сергидеки павильонларны корип чыккъан сонъ, Макъпуле ве онынъ аркъадашлары «Бутюнсоюз кой хозяйство-сы сергисининъ иштиракчиси» медалинен мукафатландылар. Сонъки геджеси бутюн группанен бирликте «Акъкъув голю» балетини сейир эттилер.

Каштанов хастаханеде тамам къыркъ беш кунъ ятты. Экимлер онынъ джигерлерини къайта-къайта тешкерди ве бир илле къалмагъанына къангъан сонъ, хастаханеден чыкъмасына рухсет эттилер. Бу девир ичинде совхозда чокъ ишлер япылды. Тютюн къырув кампаниясы сонъуна етти. Тарлалар бошалды. Аранлар толды. Къурутылгъан тютюнни иплерге тарттырып, аранларнынъ тюбюнден тѣ-лесине къадар шыпладылар. Демет эвлери, магъазлар, сушилкалар ве дигер тютюнханелер эписи рыкъма-рыкъ толды. Бир ай эвельси денъиз киби далгъаланып тургъан тарлаларда шимди тютюннинъ ялынъыз къорайы-сапы къадалып къалды. Механизаторлар бу ишнинъ де сонъуна чыкъмакъталар.

Тютюн къырув ишлерининъ мувафакъиетли кечмесине аванынъ пек буюк ярдымы олды. Къырув алды олып кечкен шу афатлы геджеден сонъ ерге бир тамчы ягъмур тюшмеди. Кузь айлары кунешли ве къургъакъ кечти. Бу ишнинъ ѳнелишини кунъ-кунъден чабиклештирди, тютюнни ярдымджысыз тымар этип алмагъа имкян догъурды. Ишлернинъ кетишаты акъкъында Каштанов токътамай хабер алып турды. Еремеев, Къурбанбеков, Арсланов ве бир сыра ишчилер арды узюльмеден онынъ хатирини сорамагъа кельдилер. Каштановнынъ яткъан палатасы хастахане дегиль де, къабулханеге чевирильди. Илк вакъытта эким бунъа разылыкъ бермеди, сонъундан баш этип оламады. Ялынъыз «Тютюн чекмесинлер» деп къуртулды.

Катерина эвде озюнинъ «Янъы дюньясынен» огъраша. Бала пек агълай. Аджеми ана исе, бунынъ себебини анълап оламай. Агълавыны токътатмакъ ичюн чешит тюрлю чарелер коръсе де, ич бир шей файда бермеди. Бала агълап олдукъча, агълай. Гедже озюнинъ агълагъанындан бонъайып юкъугъа кетсе, шу арада Катерина да бир тыныш козь юмып ала. Анасы оны сарып, къундакълап бир къач кере экимге алып кетти.

— Балада бир шей ёкъ, раатсызланманъыз ана, — деп къайтардылар. Эльбет де ана юреги бундан тынчланмады. Онынъ юреги къырпаланды, баланынъ неден себеб агълагъаныны бильмек истеди.

Баланынъ къарарсыз агълавы Катеринагъа сыкъ-сыкъ

келип тургъан Айриени де тюшюнджеге къойды. Озюнинъ бильген усулларыны япты, лякин бала кене тынчланмады.

— Баланъ ач,— деди бир кунъ Айрие Катеринагъа.— О сютке тоймай. Сенинъ гульпенпе алмасы киби кокюслеринъден оладжакъ шей ёкъ. Онъа ашамагъа, сют ичмеге огретмек керек.

— Айрие, тюневин сенинъ ананъ келип кеткен эди. О баланынъ агълагъаныны корип, шимдилик бу могурдекли арабачыкъны четке къой, къызым, мен Юнуска айтайым да бу балагъа бир асма бешик ясап берсин, деди.

Айрие индемени. Катеринанынъ асма бешиктен хабери ёкъ эди. Айрие онъа тарифлеп косътерген сонъ, анълады ве экиси де кульдилер. Катерина бешик меселесине узакъ девирден къалма бир адет деп бакъа.

— Бешик къурмагъа Андрей разы олмаз,— деди о кулькюсини токътатып.

— Учъ гедже юкъламаса, ойле разы олур ки, кормелисинъ. Яхшы адамдыр къайда бараджакъ? Бешикни мен де чокъ бегенмейим амма... Чаре тапмасанъ не япаджакъсынъ?— деди Айрие.

— Айды, Андрей мында чешит халкълар арасында яшап алышкъан адам. Бешикнинъ чешитини корьген. Къазахнынъ да, уйгъурнынъ да, булгъарнынъ да... Барсын татарнынъ да асма бешигини корьсин,— деди Катерина.— Себиля апте къапыдан чыкъаджакъта: сен ана олдынъ, аля даа салынджакъта салланмагъа севесинъ, ойлеми? бу сабийнинъ де онъа авеслиги бардыр даа, акъыз, деп кетти. Барсын онынъ дегени киби олсын.

Каштанов бир геджеге биле даянамады.— Хасталыкътан сонъ, манъа раатлыкъ керек, санъа да кыйын, Катя,— деди о саба козьлерини уфкъалап.

Катеринанынъ бешик лакъырдысыны динълеген сонъ, индемейип чыкъып кетти...

Шу куню Молдабайнен Юнус бешик кетирип къурдылар. Айрие бешикни донатып, баланы ерлештирмеге ярдым этти. Оялы чаршаф, ленталы ястычыкъ ве атлас ёргъанчыкъ ичинде къарынчыгъыны тойдуруп яткъан бала, дюньягъа кельгенинден берли биринджи кере къатты юкъугъа далды.

— Директор баласы дегильми санъа, озюнинъ ятаджакъ ерини шимдиден биле,— деди Айрие шакъанен.

— Не исе, шукюр, мен де бир нефес алдым. Бу недир меним устюм-башым? Къана, озюмни бираз тертипке чекейим,— деп Катерина сачларыны чубалтып кузгю къаршысына кечти...

Матвей Петрович Валерийнен тартышкъан кунюнден берли озь-озюнден утанып юрди. «Мен акъикъатен ахмактым,— деп тюшюнди о. Шу комсомол яш меним балам еринде. Агъаргъан сачым, сакъалымнен утанмайып шу баланен чеккелештим. Ой матюв. Ёкъ, эсимни текяран джыймакъ кереким гъалиба. Биринджи къорантамны дженкте гъайып эттим. Бойле кетсе, бу къорантамдан да марум къалырым. Къартлыкъта ёллар ичинде сюйрекленирим. Бу ишке нокъта къоймакъ кереким...»

О акъшам кене ичип кельген эди. Тёшегинден котерилип тураджакъ олды. Лякин кевдесини къыбырдатып оламады. Агъырлашкъан башы кене ястыкъкъа тартты. Бир эки сомурданды ве ёргъун козьлери кене юмулып кеттилер. О тюш коръди: «озюнинъ яшлыкъ чагъы. Аягъында сахтиян чызмалар, устюнде этеклери ве якъасы орьнекли узун кольмек. Белине исе, эки уджу пускюлли безъ йипек къушакъ багълагъан. Днепр ялысында, серин авада кезинмекте. Къып-къырмызы ханым чечеклери ачкъан пиченлик ичинден онынъ къаршысына севген къадыны чыкъты. Чешит тюрлю чечеклерден гульчембер ясап, башына такъкъан бу къадыннынъ янында кичкене огъланчыгъы ойнап юрмекте. Олар бири-бирини коръгенлери киби, къолларыны керип джувурышты ве къучакълаштылар. Днепрнинъ мас-мавы кокю тюбюнде татлы-талы опюштилер. Бирден кок гудюрдеп башлады, орталыкъ къарарды, кучлю боран котерильди. Чёль бою пичен сарпанлары, ашлыкъ культелери тыгъырып авагъа котериле ве савурылып кете. Къара булут келип къызнынъ устюне саркъкъанынен афатлы ель онынъ этеклерини ельпиретип Днепрге тараф тарткъычлап итеклеп алып кетти. Бала анасынынъ артындан джувурып етиштиралмады. Ана кийик сеснен къычырыкъламагъа башлады: Матве-эй! Баланы а-ал!!! Къычыра-къычыра балабан ярдан ашагъы тыгъырып кетти. Бала юксек байырнынъ тёпесинде агълап къалды...»

Матвей Петрович абдырап уянды. Тёшегинден турмады. Баягъы вакъыт даа тюшюнип ятты. Эли-аягъы къал-

тырагъан киби олды. Сонъра башына эсини топлап, еринден котерильди. Аяткъа чыкъты, алюмин мешребени алып къопкъагъа далдырды. Ичининъ алевини сувнен сѣндюрди.

Къапыда почтаджы къадын пейда олды. О чантасындан мавы конверт чыкъарып, Матвей Петровичнинъ къолуна туттырды. Ачты, окъуды ве янъы озюне келеяткъан чырайы кене денъишип кетти. Оны район партия Комитетининъ биринджи секретары чагъыра. Не ичюн аджеба? Буны Матвей Петрович озю де бильмей.

Идареге догъру адымлады. Онынъ акъылындан бинъ бир тюрлю шей келип кечти. «Энди ишим райкомгъа тюшсе керек, деди о тюшюнджеге далып. Ишимни кимседен эсик беджермесем, кимсеге къабалыкъ косътермесем, низам бозмасам, девлетке хиянетлик этмесем не ичюн аджеба, мени чагъыралар? Ёкъса, биревлерге меним ишим кедер кетиреми? Мен кимсенинъ алдына чыкъмайым, озъ ишимни темелинден билем. Портфелиме къызышкъан шахс олса, алдыма кельсин. Эксиклигимни козюме бакъып айтсын. Мен дженктен эвель къуруджы эдим. Дженкте де къурдым, дженктен сонъ да къурам, эм къураджагъым! Юрегимнинъ адджысыны къозгъай бергенге дейджек лафым шудыр. Къураджагъым! Башта Къурбанбековкъа кирейим. Керек олса Андрей Андреевичке де. Райкомгъа мени не себебтен чагъырылгъанымны олар бильмек борджлылар. Ёкъса, тьфу, янъылам. Бильмек борджлы дегиллер лякин бильмек мумкюн. Эр алда мени яхшы сопаласалар да ери бар. Сѣзюмни тутмадым. Ичтим... Ничюн ичем, ничюн озюмни туталмайым? Буны кимсе анълап оламаз. Къурбанбеков буны къайдан анъласын? О чѣльде догъды, чѣльни биле. Ёкъса дженкте олдымы? Атеш тюшкен ерини якъа. Къач йыл олды янып куль олгъанынъ, Ксенья, аля даа тюшюме келесинъ. Севгимизнинъ ильк емиши олгъан тос-томалакъ ёсмачыгъымызны къучагъынъа алып, бу геджс де алдыма чыкътынъ, Ксенья!..»

Матвей Петрович Къурбанбековнынъ кабинетине кирип кеткенини озю сезмеді. Онынъ фикири узакъ Днепр ялыларында доланмакъта эди.

— Мени райкомгъа чагъыргъанларындан хаберинъ бармы?— деди о къолуна мавы конвертни тутып.

— Тек сени дегиль экимизни де. Шимди машина келир, берабер кетермиз,— деди Къурбанбеков сувукълыкънен.

— Меселенинъ бир уджуны манъа бильмек мумкюнми?

— Анда барсакъ, әкимиз де билирмиз. Фал бакъмагъа аджет ёкъ,— деди о чырайыны сытып.

Әкиси де бираз вакъыт индемей отурдылар. Әкиси де бири-бирине къаш котерип бакъмадылар. Оларнынъ бу сюкюнетини идаре алдына келип токътагъан ГАЗикнинъ давушы больди.

Катерина Мануйловна шеэрде яшагъанда Валерийнинъ анасынен якъын дост эди. Олар бири-биринен керек вакъытта корюшир, фикир алышып беришир ве базы бир ишлерни бирликте япар эдилер. Валерийнинъ анасы, даа догърусы аналыгъы Флория баягъы яшларда къадын олгъанына бакъмадан Катеринагъа бутюн корип кечиргенлерини, акъай тарафындан озюнинъ бахтсызлыгъы неде олгъаныны икяе әтер эди.

«Меним бахтсызлыгъым шунда ки, балам олмады Катерина,— дей эди о.— Биринджи акъайым къазаланып ольген сонъ севген яшлар чокъ олды. Лякин әвленюв меселесине кельгенде... Иште омюрим бойле кечти. Балам олмагъаныны биле-биле мени къабул әтип аладжакъ союны расткетирамадым. Кель-келелим дженк чыкъты. Корьген хорлукъларым, чеккен әзиетлерим мени бир тамам къартайтты. Бала севгиси ве достларгъа олгъан урьметим мени балалар әвине алып барды. Андан мына шу Валерикни алып бутюн аятымны онъа багъышладым. Эй, әй... Мен оны къыдырып тапкъандже нелер чектим. О меним бильген адамларымнынъ баласы эди. Бабасы дженкке кетти, анасы да әляк олгъан сонъ, шу оксюзни алайым, дедим. Бутюн документлерини озъ адыма яптырып, къанун боюнджа әвляд әтип аналыкъ борджымны бойнума алдым».

Катерина бу шейлерни яхшы биле эди. Бельки Валерикке инсаниетли янашмасынынъ әсас себеби де шундадыр. Инсан юреги, хусусан къадын юреги йымшакъ, мераметли ола. Озюнде де баягъы вакъыт бала олмагъан сонъ; Катерина озъ келеджегини, такъдирини Флориянынъ такъдирине бенъземесин деп къасеветленир эди. Коресинъми, шимди әр шей бам-башкъа олып чыкъты. Катерина озъ бахтына иришти. О даа яш. Флориянынъ чагъына кельгендже әки-учъ баланынъ анасы олмагъа мумкюн.

Валерик анасына Катерина Мануйловнанынъ бала тап-

къаны акъкъында хаберни айткъан сонъ:— Ойле олса мытлакъ барып хайырлап кельмек борджлым,— деп Флория да Валерикнен берабер ёлгъа чыкъкъан эди.

Шу куню Флория Катеринада мусафир олды. Баягъы вакъыт корюшмегенлеринден экисининъ арасында лаф артындан лаф ачылды.

Катерина Валерикнинъ совхозгъа келип ишке киргенини пек догъру таный, Флория исе, бунъа ич де равы олмагъаныны айтты.

— Сен нафиле япасынъ Флория,— деди Катерина.— Валерикнинъ мында ерлешкенине къуванмакъ керексинъ. Ёкъса о мында янъгъызмы? Ёкъса сени ташлап къайдаларгъадыр кетип юргенини арзулайсынъмы? Шимди о ишке кирди. Бираз вакъыт чалышыр ве сонъра окъуп башлар. Окъувыны битирген сонъ, истесенъ сен де бу якъкъа авушырсынъ. Андрей Андреевич онъа бу ишлерде къол тутта. Яшагъан ерини корьгендирсинъ. Анда эписи онынъ акъранлары, комсомоллар яшайлар. Низам яхшы, бозгъунлыкъ ёкъ. Ичкиджиликке ёл бермейлер. Санъа даа не керек? О энди адамларгъа алышып башлады. Сакъын оны сувундырма. Аксине бойле яшларнынъ совхозгъа кельгенине къуванмакъ керекмиз. Шимди яшларнынъ совхозда къалып чалышмалары ичюн, укюмет ве ерли ёлбашчылар тарафындан бир сыра тедбирлер корюльмекте. Сен коресинъми мында къурулаяткъан Медениет сарайыны? Я парк? Я спорт мейданы? Булар эписи яшлыкъны джелъп этмек ичюн япыла. Тезден Флория, сен бизим «Алсаба»ны танымазсынъ. Биз шеэрге дегиль де, сизлер бизге акъып келирсиз. Сен мында яз вакъыты келип, мынавы къырларны бир кере чыкып корьсенъ бутюн дюньянынъ унутырсынъ. Акъылынъдамы, мен де шай, совхозгъа кельмеге истемейип баягъы вакъыт Андрей Андреевичке эришип юрген эдим. Амма, шимди пешман этем. Мында кельген сонъ сагълыгъым тюзелип кетти. Мына бу эвлядны корьмеге де, бу ернинъ авасы, бу ернинъ емиши ярдым этти. Бизлер эпимиз койде догъдыкъ, кой отьмеги ашап осьтик. Экимиз де Украиналымыз. Дженк фелякети бизлерни шеэрге котерип атты. О вакъыт ойле керек эди. Заводлар, фабрикалар бизни беклей эдилер. Чалыштыкъ. Эм джанымызны къуртардыкъ, эм devletке файда кетирдик. Шеэр яшайышына алыштыкъ. Алышкъанымыз яхшы, лякин базылары киби алджырмакъ ярамай. Эки антер корьгенинънен озюнъни «белз

кѡоллу» саймакъ пек аджыныкълы шей. Базы адамлар корип кечиргенини пек тез унуталар. Ойле союна не кой керек, не шеэр. Онѡа ялынѡыз енгиль кѡазанч керек. Онынѡ бутюн гѡаеси пара устюнде кѡурулѡан. Сен озюнѡ билесинѡ, Флора, мен шу агѡыр йылларда пединститутны битирдим. Шеэрде тербиеджи олып чалыштым. Мына шимди бу ерде кене шу иште чалышам. Айни шу бала багѡчасы, айни шу балалар. Сен барып бизим багѡчаны корѡчи. Шеэрден бир фаркѡы ёкъ. Ешиллик, серинлик. Балалар яз, кѡыш, темиз дагѡ авасынен нефес алалар. Эписи сагѡлам, чырайлары кѡип-кѡырмызы.

— Эр алда мен Валерикнинѡ мында кѡалѡанына разы дегилим,— деди Флория кестирип.— Онынѡ анасы меним. Кѡайда истесе анда кетерим, артындан кѡалмам, ялынѡыз бу ерге кельмем. Вокзалда онынѡнен чалышкѡан аркѡадашлары ичип, ёл бою сасып кѡайткѡанлар. Якѡасындан тутып тарткѡанлар да тапылѡан...

— Сен Матвей Петровичнинѡ лафыны манѡа юзлеме. О кимсеге зарары тиймеген бир адамдыр. Валерик бизге айткѡан эди, Алма-Атадан кѡайткѡанда бираз ассызлагѡан экен. О гѡарипнинѡ дерди башкѡа. Ичкиси де шунынѡле багѡлы. Апайынынѡ, баласынынѡ фаджиалы олюми мийине урса керек. Ичкенде тек оларны хатырлап сачмалай. Мен о адамны чокѡтан берли денѡеп юрем. Онынѡ психикасыны огренмек истейим. Дюнѡяда себебсиз бир шей олмай. Олюмге де бир себеб ола. Лякин, эвель даврансанѡ базы себеблернинѡ огюни алмакъ мумкюн экен. Сен Айриенинѡ кѡызы Фиданени корѡген эдинѡми, эсинѡдеми, берабер Алма-Атагѡа баргѡан эдик? Шимди о баланы корѡсенѡ танымазсынѡ. Тутукѡлыгѡы тюзелип кетти демеге мумкюн. Эким-логопед кѡолуна тюшти. Матвей Петровичке де мен беллесем ойле бир шей керек.

— Мен о адамны билем, онѡа бир шей керекмей, яшлыгѡында да иче тургѡан эди,— деди Флория ачувнен ве тез-тез шалыны алып кѡапыны урып чыкѡып кетти.

Катерина козѡлерини тикип, онынѡ артындан бакѡып кѡалды. Кѡулагѡы эшиткенине инанаджагѡы кельмедди.

«Бу кѡадын Матвей Петровични кѡайдан биле, аджеба? деп тюшюнди о. Ёкъса, Валерик Алма-Атагѡа баргѡанда оны эвлерине алып бардымы? Коресинѡми?.. Достамма, ичи зеэр толу экен. Мына насыл инсанлар ола. Мен онѡа яман лаф айтмадым беллейим. Валерик ичюн кѡаыгѡыргѡаныма ачувланса керек. Барсын Валерик озю чез-

син. Бала дегиль энди. Истесе бугунь къайтып кетсин. Санки онъа ичегим багълы эди. Бугунь Андрей Андреевичке эписини айтырым. Огюни алып айтмасанъ, бойле къадындан чокъ шей беклемек мумкюн. Джалагъай табиатлы экен. Къач йыл энди бири-биримизнен таныш олып юргенимиз, оны бойле ич корьмеген эдим. Мында бир сыр бар...

Катерина Флориянынъ бойле ачувлы чыкъып кеткенине пек ынджынды. Лякин онынъ алдында не къабааты олгъаныны анълап оламады. Катерина онъа чокъ яхшылыкълар япты. Атта совхозгъа кочкенде квартирасыны онынъ адына авуштырды. Эгер меселе Валерикнинъ устюнде олса, Катерина шу ан кенаргъа чекильмеге разы. Андрей Андреевичке бунынъ кереклиги де ёкъ.

«Эписи менимчюн, эписи менимчюн олгъан шейлер. Андрюшамнынъ темиз юрегине буз къойгъан да меним! Манъа ойле керек. Флория! Сен меним беш йыллыкъ танышымсынъ. Къапымны урып кеткендже, мен матювнинъ башына ургъайдынъ!»

Катерина бетини къолларынен орътип, озюни юзю къоюн дивангъа быракъты. Аягъындаки папичлерининъ бири ерге тюшти, бири диванда къалды. Кедерли тюшюнджеге далды. Агълады. Флория онынъ япкъан эйликлерини таптап кеткени ичюн агълады.

Мына оларнынъ корюшюви бойле кечкен эди.

Кабинетинде индемей тургъан Къурбанбеков ёлда Матвей Петровични баягъы тазирледи.

— Сенинъчюн олып, мени де раат быракъмайлар,— деди Къурбанбеков.— Энди Район партия комитетине чагъырып башладылар. Бизим тешкият сенинъ акъкъынъда эки кере къарар къабул этти. Бундан озюнъе ксерск дерсни аламадынъ. Анълашылгъанына коре кене бир марифетлер косътерсенъ керек? Менден гизлесенъ де, партиядан ич бир шей гизлеп оламазсынъ. Яхшы инженерсинъ, яхшы адамсынъ. Насыл ола да озюнъни туталмайсынъ. Шу арам шейни ичеджегинъ кельгенде богъазынъа бир тапа тыкъып къоймайсынъмы?

— Мен бир кере ичеджегим келип де ичкенимни бильмейим,— деди Матвей Петрович.

— Сени анъламакъ къыйын. Бугунь райкомда кене бу меселе акъкъында лаф котерильсе, мен дейджегим: сени

эким-психиатрга косътермек керек. Эм озюм алып кетеджегим сени.

Матвей Петрович кульди. Къурбанбеков эр алда, онъа яхшылыкъ истегенине къуванды.

— Биз сени озъ коллективимизден кенаргъа чыкъарып атмагъа истемеймиз,— деп сёзюни девам этти Къурбанбеков. Сен бу совхознынъ темель ташыны къойгъан ветеранлардан бирисинъ. Биз сени тербиелемек истеймиз. Эм япармыз. Санъа сёзюмизни динълетмеге кучюмиз етер!

Газик Район партия комитетининъ азбарына келип янашты. Ава ачыкъ ве сувукъ эди. Кунеш къаяларнынъ тёпесинден нурларыны сачса да, ерни къаплап алгъан индже къырав талда ерлерде аля даа йылтырап турмакъта. Ёллар къаткъакъ. Кичкене сув ийинтилерининъ устюни индже буз пердеси къаплагъан. Райком азбарындаки чешме талыкъ-талыкъ акъып турмакъта. Матвей Петрович чешмеге тараф адымлады. Башыны эгильтип азгъана сув ичти ве мердивен устюнде беклеп тургъан Къурбанбековнынъ артындан адымлады.

Секретарь къыз селям алса да, башыны машинкадан котермей бир шейлер басып турмакъта эди. Къурбанбеков къапыгъа догърулды. Къыз кене башыны котермейип,— бираз сабыр этинъиз,— деди.

Матвей Петрович озюни къабаатлы таныгъан адам киби, аякъ устюнде къатып къалды. Экиси де скемлеге отурмайлар. Къурбанбеков де пенджереге, де къызгъа козь ташлап, о якъ, бу якъ адымламакъта. Къыз оларны скемлелерге давет этти. Кене отурмадылар. Бираздан къапы ачылды, Райком секретарынынъ кабинетинден эки адам чыкъты. Экисининъ де чырайы куськюн эди. Олар санки денъиз сувы юткъанлар.

— Кириъиз,— деди секретарь къыз башыны котерип. Къурбанбеков кирип къалгъан арада къыз Матвей Петровични токътатмакъ истеди.

— Багъышланъыз, биз экимиз де бир ишнен кельдик — деп Матвей Петрович де кирди.

— Отурынъыз,— деди секретарь оларнен къол тутушкъан сонъ.— Иштер къалай?— деп кулюмсиреди ве сонъра Матвей Петровичке козь ташлап, русча лаф этмеге башлады.

— Бу йыл тютюнни къырав урмады. Авалар яхшы кетти. Тымар мувафакъиетли кечти, ойлеми? Не индемей отурасыз? Сиз бу йыл макътансанъыз да ери бар. Укюмет

тарафындан сизге мукаяфат азырланмакѣта. Айры адамларнынъ эмекте косътерген ярарлыгъыны кѣайд этмек истеймиз.

Кѣурбанбеков секретарьнынъ котеринки рухнен сыджакъ сѣзлернен лаф этип тургъаныны динѣлей, лякин не ичюн чагъырылгъаныны анѣлап оламагъанындан агъызына сув алгъан киби индемей отура. Матвей Петрович мукаяфат сѣзюни эшиткенинен кулюмсиреп алды. Сонѣра секретарь онынъ козюне бакъып шойле деди:

— Матвей Петрович! Сиз улу Ватан дженкинде иштирак эткенлерден бирисиз. Дженк чокъ адамларнынъ башына унутылмаз феякетлер кетирди. Чокъ адамлар балачагъасындан, тувгъан-урувындан айырылды. Сиз де озъ севимли аиленѣизден марум кѣалдынѣыз. Дженкнинъ кѣалдыргъан яралары аля даа тюзельмей. Сизинъ де юрегинѣиз яралы. Лякин Совет халкѣы кимсени унутмай. Мына, мен сизинъ акъкъынѣызда Украинадан кягъыт алдым. Оны озюнѣизге окъуп бермек истейим: «Урьметли Матвей Петрович! Днепровский район партия комитети «Урожайка» коюнде немсе-фашист баскѣынджыларынынъ кѣолундан эляк олгъанларнынъ хатиресини эбедийлештирмек ичюн кѣурулмакѣта олгъан эйкельнинъ ачылув кунюне сизни давет эте. Ачылув мерасими майыснынъ докѣузында, Енѣиш куню отъкериледжек».

Секретарь еринден котерилип, мектюпни Матвей Петровичке узатты. Сонѣра, Кѣурбанбековкѣа бакъып:

— Кетюв, келюв ишлерини тешкилятландырырсынѣыз. Ёл масрафыны совхоз озъ устюне алыр. Биз район эмекдарлары адындан гульчембер азырлармыз.

Матвей Петровичнинъ чырайы агъарды, дудакѣлары кѣалтырап башлады. Онынъ ичюн бу беклейильмеген бир янѣылыкъ эди. Еринден котерилип турды, райком секретарьнынъ кѣолуны буюк тешеккюр иле сыкъты. Кѣапыдан чыкѣкѣанда секретарь кѣыз онынъ яшлангъан козѣлерини эследи. Лякин бу козѣ яшлар, эм яныкѣ ве эм кѣуванч козѣ яшлары экенини бильмеди.

ДЕРТЮНДЖИ КЪЫСЫМ



I

Алма-Ата аэропортынынъ заллары ичинде адам-дан юриш ёкъ. Мында геджелеген ёлджулар озь скемлелери ве креслоларыны кыймагъан киби, саба ачылгъанына бакъмадан кене ерлеринден котерилип турмайлар. Даа догърусы къркълар. Бир де бириси аякъ устюне турдымы, онынъ ерине башкъасы ерлеше къоя. Ёлджулар болдургъан ве усангъанлар. Анълашылгъанына коре, ава мусааде этмегенинден пек чокъ самолётлар вакътында учмагъанлар. Юкъусызлыкъ заметинден креслолар устюнде боюнлары кыйышып къалгъан ёлджулар бири-бирлерининъ омузларына таянып юкъусырагъанларыны биле сезмейлер. Ёлджулыкъ не къадар кыйын олса, юкъусы да о къадар татлы олур экен. Илле вокзалларда самолёт я да поезд беклеп тур-

масы. Эгер янынъда яш балалар да олмасын, оларнынъ кийик сес чыкъарып агълавлары, къапыларнынъ токътамадан гыйчылдап ачылып-япылмасы омюр билля эсинъден чыкъмай экен. Шунынъ ичюн эвель-эвельден берли адамлар башта авагъа бакъып сонъ ёлгъа чыкъкъанлар. Ёлджулыкъны чокъусы сеятчылар киби къышта дегиль де, язда япкъанлар. Шимдики девирде, шубесиз, бунынъ чокъ фаркы къалмады. Земане техникасы ичюн къышнынъ ве язнынъ эмиети ёкътыр. Истеген еринъе, истеген вакътынъда етишип бара билесинъ. Самолёт муакъкъат учмаса, поездлар бар, автобуслар исе, бир республикадан дигерине къатнашалар. Ич олмагъанда янынъдан вызнен кечип тургъан таксилерге ышмар этсенъ, сени истеген еринъе етиштирип барырлар. Эм буюк зевкъ иле...

Бугунъ аэропортта ёлджуларнынъ чокъ олмасынынъ башкъа себеби де бар. Апрельнинъ отузы. Ярын майыс байрамы. Эр кес озь ерине барып етмек истей. Озь ше-эринде, озь достлары, тувгъан-урувлары арасында байрам кечирмек истегенлер азмы? Я студентлерни айтмайсынъмы? Ёлджуларнынъ аман-аман ярысыны яшлыкъ тешкиль эте. Эписи ашыкъа, эписине тез барып, тез къайтмакъ керек. Ашыккъан ёлджугъа исе, самолёттан эльверилиси ёкъ. Мына ичюн, бугунъ аэропортта адденашкын къалабалыкъ. Адамлар кассалар къаршысында, сорав бюросында невбет тутып отуралар. Базылары буфетке къапынмакъ ичюн кельселер, базылары афъён патлатмакъ ичюн къара къаве сорап кирелер. Бойле вакъытта оны къайдан аласынъ? Адамларнынъ арасында адашып киргенлерге де расткелине. Бу ерде сёзю кечмейджегини анълагъан сонъ, адашкъанлар «акъ къаве» къыдырмагъа кетелер. Лякин ким къайда кетмесин, не ерде олмасын, эр кеснинъ къулагъы радиорепродукторда. Диктор самолётларнынъ кельгенини, кетеджегини токътамай илян этип тура. Аллеяларда, буюк ве кичик залларда, ресторан ве буфетлерде къойылгъан репродукторлар къарыкъ сес чыкъарып, манъкъалап башладымы, эр кес отургъан еринде къатып къала. Илян биткен сонъ, кене гъаля-гъуля, кене шамата, кене ашыкъчан арекетлер башлана.

Бойле къалабалыкъ бир кунъде, эеджанлы саатлерде, буфет янында сютли къаве беклеп тургъанлар арасында Самедин ве Айрие де бар эдилер. Айриенинъ къолунда бир топ къыр лялеси. Самединнинъ къолунда бир шей ёкъ. О эки стакан къаве ве эки къурабие алып, четке

чыкъты. Пенджере янындаки юксек, тегерек столыны янына келип, аякъ устюнде туруп къавелерини ичмеге башладылар. Шу арада репродуктор кене хырылдамагъа башлады: «Ташкент, рейси саат он экиге къадар къалдырылды» деген сес ялан-янълыш Айриенинъ къулагъына киргенинен, тишлеген къурабиеси эки дудагъы арасында къысылып къалды. О Самединге бакъты. Самедин омузларыны къысты ве бир шей анъламадым деген манада бош къолунен къулакъларыны косътерди. Айрие онынъ биджагъынынъ джебинден корюлип тургъан телеграмманы тартып алды, окъуды ве саатине бакъты да;

— Самедин, асыл озюньни сыкъмайсынъ вакъыт кечип кетти. Ташкент самолёты чокътан кельсе керек?— деди абдыравукъ сеснен.

— Иче бер къавенъни, Ташкент самолёты даа еринден чыкъмады,— деди Самедин кейфини бозмайып.

— Олян сен насыл адамсынъ, неге бойле ишанып турасынъ? Вакъыты кечти де я!

— Кечсин. Ойле пек абдыравукъ олма,— деди Самедин бир ютум къаве ютып. Сонъра козьлерини къаршыдаки скемлелер устюнде янтайып отургъан эки къызгъа тикти де:

— Анавы къызларны коресинъми, Айрие?— деди.— Мен Ташкент самолёты кельмегенини оларгъа бакъып билем.

Айрие онынъ не демек истегенини анъламады.

— Сенинъ шакъанъ битмез,— деди о кулюмсиреп.— Шимди бу ашыкъчанлыкъ арасында тапкъансынъ бакъмагъа шей, шакъанынъ да ери олмалы. Юрь, «Сорав бюросындан» билейик. Кельмейджек олса, ич олмагъанда не къадар вакъыткъа токътатылгъаныны анълармыз.

— Къавенъни ич битир де, сонъ барып сорармыз,— деди Арсланов кене шу къызларгъа бакъып. Айрие лялелерни ве телеграмманы алып, Самединни сорав бюросына тараф тартып кетти. Шу къызларнынъ янына кельгенде Арсланов токъталды, ич бир сёз къошмадан бираз бакъып турды ве кульди. Къызлар ерлеринден атылып турдылар ве Айриеге якъын келип:

— Бу адам сизинъ эринъиз оламы?— дедилер.

— Эбет, эрим ола.

— Гъарип, аля даа тюзелип оламадымы?— деди пускюль сачлы къыз.

— Биз оны былтыр Ташкент вокзалында корьген

эдик. Къызчыгъы да янында эди. Заваллынынъ психбольницагъа кеткенини, мий хасталыгъындан чекишкенини о вакъыт бильдик. Ушюгенимизден ашыкъып эпимиз бир таксиге минген эдик. Сонъра онынъ бу къолайсыз дерди олгъаныны анълап тюшип къачтыкъ. О кунъден берли, не вакъыт акъылымызгъа тюссе, гъарипке аджынамыз...

— Самедин, эшитесинъми мынавы къызлар не дейлер?— деди Айрие акъайынынъ козьлерине бакъып. Самедин кулюмсиреди де:

— Келинъиз энди таныш олайыкъ,— деп къызларгъа къолуны узатты.

Къызлар онынъ козюне шубели-шубели бакъып, арткъа тартылдылар, сонъра сакъына-сакъына къолларыны бердилер. Эски ёлджулар ниает, таныш олдулар. Эр экиси де Ташкентте гъиябий окъугъанларыны ве йылда эки кере имтианларгъа къатнагъанларыны, бу йыл диплом алгъан сонъ, Алма-Ата областындаки тютюнджилик совхозына ишке ёлланыладжакъларыны айттылар.

— О-о, сиз бизим ичюн азырланаяткъан кадрлардан экенсиз де,— деди Арсланов къуванып.— Ойле олса бизге даа берабер олмагъа, корюшмеге ве давалашмагъа сыра келеджек экен. Мен о совхозда бригадир чалышам. Башымыз устюнде еримиз бар, буюрынъыз. Бойле теэсдюф танышлыкътан сонъ, эм мытлакъ келинъиз. Бизде яшлар чокъ, комсомол тешкилятымыз кучлю, шенъленмеге де ер бар, пешман этмезсиз.

Къызлар къуванып кульдилер. Диплом алсалар, мытлакъ келеджеклерини айттылар.

— Демек, сиз мени Ташкентте корьгенинъизден берли хаста беллеп юрдинъизми?— деп пармагъынен башыны тюртип кульди Арсланов.— Мен де сизни о вакъыт аджып таксиге отурткъан эдим. Сиз ушюгенинъизден когерген эдинъиз. Урбаларынъыз да шимдики киби дегиль эди. Энди бираз акъылынъыз ерине кельгенге ошай.

— Коресизми дюньяда адамлар насыл янълыша билелер!— деди дигер къыз.— Биз сизни акъылы еринден тайгъандыр белледик, сиз исе, бизим урбамызгъа бакъып яман фикирде къалгъансыз. Онынъ ичюн яхшы бильмеген адамынъ акъкъында бир корьгенде фикир айтмакъ къыйын шей. Эр вакъыт янъыла билесинъ.

— Сиз кене Ташкентке ёл тутасызмы?— деди Арсланов.

— Ташкентке. Лякин самолётымыз кечикти. Я сиз?

— Биз мусафир беклеймиз. Анавы психбольницадан, — деп кульди Арсланов.

Къызлар кене Арслановкъа шубенең тикилип бакътылар, лякин бу кереси эписи бирликте шакъылдап кульдилер. Олар энди бири-бирлерини яхшы анълай эдилер. Эписи берабер сорап бюросынынъ алдына кельдилер. Айрие кичкене пенджеречик артында тургъан яш къазах къызына телеграмманы узатты. Къыз самолётнынъ учъ саат кечикип келеджегини айтты. Айрие себебини бильмек истеди, башыны пенджеречикке якъын кетирип:

— Ничюн? — деди. Невбетте тургъанларнынъ зыккысындан Айрие кенаргъа тартылмагъа меджбур олды ве къызынынъ «Ава, ава» дегенинден башкъа ич бир сёз анълап оламады.

Адамлар арасындан кечип, бираз тынчланмакъ ичюн тышарыгъа чыкътылар. Ава ачыкъ, кунеш къыздыра, кокте бир булут ёкъ эди.

— Бир шей анъламайым, — деди Айрие. — Бойле авада самолёт учмаса, не вакъыт учаджакъ?

— Сен кунешнинъ йылтырагъанына не бакъасынъ? Ташкентнен Алма-Ата арасында къарлы, думанлы дагълар бар. Къайдап билесинъ анавы къаялар артында бельки яшын яшынлап ягъмур ягъадыр. Сенинъ лялелеринъ солып кетятыр Айрие, юрь оларны сувгъа къояйыкъ.

Олар аэропорткъа якъын ердеки ешилъ къарагъачлыккъа таба кеттилер. Самолётнынъ кельмесине учъ саат даа бар. Вакъыт кечирмек ичюн тюкянгъа кирдилер, эки шише къызылчыкъ ситросы ве къазы эти алып кягъыткъа сардылар. Айрие сокъакъта бираз токъталып: — Баре сенинъ эски достларынынъ да чагъырайыкъ, — деди. Арсланов разы олмады. — Оларны чагъырсакъ башкъа бир шей даа алмакъ керек оладжакъ, къызышып кеткен сонъ самолётнынъ кельгенини дегиль, кеткенини де дуймай къалырмыз, — деди.

Къарагъачлыкъта махсус кезинмеге чыккъан шеэрлилер арасында Айриенен Самедин де къошулып кеттилер. Бир тарафындан демирёл ве асфальт ёл кечкен бу ешилъ орман шеэр дживарыны гуль-багъча киби яраштырып турмакъта. Алма-Аталылар бу орманны озъ къолларынен яраткъанлар. Онынъ узунлыгъы беш километрден зияде олса керек. Мында раатланмагъа кельгенлер озълерини гуя буюк орман ичинде сезелер. Къушларнынъ чивильтиси, тереклериниң шувултысы адамларнынъ гонъю-

лини охшай, табиятнынъ муляйим джошкъун эзгилерини юрегинъе синъдире. Орманнынъ кенарындан шувулдап арыкъ акъа. Бу арыкъ озюнинъ буллюр сувларыны шеэрнинъ устюнден бакъып тургъан къарлы дагълардан ала. Айрие лялелернинъ сапларыны къампа япрагъына сарып сувгъа саркъытты. Самединнен ~~экиси~~ арыкъ боюндаки къарагъачларнынъ астына ерлешип къазы этини чакъынен тилип ашамагъа башладылар. Артындан къызылчыкъ ситросы ичип, къарагъач тереклерине таянды ве бир тыныш индемей турдылар. Олар саба эрте турып ёлгъа чыкъкъан эдилер Айриенинъ кирпичклери ашагъы саркъты...

Чешмеджиеванынъ келеджеги акъкъында хабер алгъан сонъ, Айрие бир къач геджелер эв ишинен огърашты. Чамашыр ювды, утюледи, эвни сылады, орталыкъны джыйыштырды.

— Бу мусафир меним ичюн пек кыйметли, оны кереги киби кутип алмакъ борджлымыз,— деди Айрие. Тюневин Самединнен ~~экиси~~ кечке къадар юкъламадылар. Мусафирни яхшы къаршылап алмакъ ичюн азырландылар, чешит планлар къурдылар. Чешмеджиеванынъ келеджегини досташлерге, къомшуларгъа бильдирдилер. Фидане де онъа тиль берген бу экимни экинджи анасы ерине корип беклемекте. Иште бугунъ, сагъ-селямет келип чыкъса, чокътан берли арз этильген мусафирни буюк къуванчле къаршылайджакълар. Амма, коресинъми къарсамбаны. Ничюндир, самолёт кечикти. Эгер учъ сааттен кельмесе, ярын байрам куню самолётларнынъ янына барылмаз, билет де тапылмаз. Не япмалы экен?

Самедин Айриенинъ кирпичклери саркъып башлагъаныны корьген сонъ, бир къач дакъикъа индемей отурды. «Барсын бир чырымчыкъ алсын», деди ичинден. Лякин озю эп раатсызлана, тосат-тосат саатына бакъып ала. Къайдандыр къарагъачнынъ тёпесине бир сюрю къарылгъач келип къонды. Оларнынъ къанат пытырдысындан ве чивильтисинден Айриенинъ козьлери ачылып кетти.

— Юкъу татлы шей, Айрие,— деди Арсланов.— Санъа бакъам да, кене шу вокзалдаки ёлджуларны ве озюмнинъ башымдан келип кечкен ёлджулыкъ этиетлерини хатырлайым. Мен о вакъыт яш эдим. Коюмизде бир Нимет акъай бар эди. Революциядан эвель бутюн яшлыкъ чагъыны чобанлыкъ этип кечирген. Топлагъан парасына эки огюз сатып алгъан. Огюзи ве арабасы олгъан сонъ, дагъ-

дан агъач ташып, таш ташып, эв ясагъан. Бир кунь бабасына:—Мен эвленмек истейим, манъа разылыкъ беринъиз, баба,—деген. Бабасы Абибулла къарт о вакъыт докъсан докъуз яшында экен.—Аферин огълум,—дей онъа.—Энди акъыл балигъ олдынъ. Эвленмеге вакъыт кельди. Бар, кет, кез огълум, озюнънинъ бегенген кызынъны манъа келип айт. Мен нышан бермекни озъ устюме алам. Бир той япайыкъ огълум, бутюн койге намынъ кетсин. Мен де сенинъ тоюнъда бир ойнап тояйым.

Нимет акъай бабасынынъ дегени киби япкъан. Он еди яшында бир кыызгъа эвленген. Къазан-къазан аш пиширткен, бутюн койнинъ халкъына аш дагъыткъан. Келин хайырлап эвине баргъанлар айта экенлер ки, Нимет акъайгъа джиэзли бир келин тюшкен. Рафларында кыркъ дане саан тизип къойгъан. Гугюми, къуманы джезден экен. Учъ дане синиси, кыйма тахтасы, сатыры ве келин сипирткисине баргъандже алып кельген экен.

Заваллы бабасы торун корьмей, тойдан сонъ чокъкъа бармадан ольген. Кель-келелим, койде Совет акимieti къурулды. Нимет акъайнынъ ыргъатлыкъ эткен байлары койден къувулды. Колхоз къурулып башлады. Койлюлер ариза берип колхозгъа кирдилер. Къапысында олгъан атыны, арабасыны колхозгъа теслим этип, коллектив хызметке башладылар. Нимет акъай исе эп шу огюзлернинъ артындан юре. Дагъдан одун кетирип сата, дегирменге бара, базар кунълери къолум-къомшунынъ одыр-будырыны юклеп шеэрге кира ташый. Бир кере бизге де сыра кельди, бир араба махсул юклеп, саба базарына шеэрге етиштирмек ичюн ёлгъа чыкъкъан эдик. Мен о вакъыт бала олсам да, ярдым этерсинъ деп арабагъа мени де минсетти. Акъшам ерге къаранлыкъ чёкер-чёкмез ялла бисмилля деп Нимет акъай огюзлерининъ башындан тутып, арабасыны кочюрген эди. Бутюн гедже «кя-чу, кя-чу» деп огюзлернинъ де алдындан, де янашасындан кеткенини билем. Арабанынъ чешит макъам чыкъарып гыйчылдагъаны аля даа къулакъларымдан кетмей. Сабагъа якъын бу заваллы болдурса керек, арабаны токътатты да, мени уятып бираз огюзлернинъ башындан тутып кетмемни риджа этти. Юкъудан бонъайгъан Нимет акъай чуваларгъа башыны къояр-къоймаз хырылдап башлады. Мен де юкъусырайым амма, огюзлернинъ баш сильтевинден абдырап, абынып-сюрюнип кетем.

— Айды, икяенъни сонъ девам этерсинъ,— деди Ай-

рие.— Кечке к̄алырмыз, аэропортк̄а барып отурайык̄ самолёт келип к̄алмасын.

— Ашык̄ма, даа эрте. Анавы к̄арык̄ сеснин̄ зырылтысыны дин̄леп безмедин̄ми?— деди Самедин.

— Айса, не япаджак̄сын̄, истер-истемез дин̄лей-джексин̄. К̄арык̄ сесли олса да бин̄лернен адамнын̄ к̄улаг̄ы онда. Дин̄лемесен̄ мынавы к̄араг̄ачнын̄ тюбюнде отурыр да к̄алырсын̄. Ёлджу ёлуна ярашыр, дегенлер.

— Ток̄та, лафымны битирейим де, сон̄ кетермиз. Дейджегим, мен ойле бир юк̄уг̄а далг̄аным ки, юрегим байылып кеткенинден хаберим ёк̄. Энди мен огюзлерни дегиль де, огюзлер мени алып кетелер. Мен к̄олума кечирильген ипни тутып огюзлернин̄ янашасындан юк̄усырап тыпыр-тыпыр кетем. О заваллы огюзлер яваш-яваш топрак̄ ёлг̄а чык̄к̄анлар, сон̄ра арабаны чёльге бург̄анлар. Копчеклернин̄ сарсынтысындан абдырап уянг̄ан Нимет ак̄ай, меним к̄олумдан ипни тартып алды да, зар-зорнен юк̄лю арабаны ёлг̄а чык̄арды. Не к̄адар ачувланса да, заваллы огюзлерге бир таяк̄ биле урмады.

— Огюзлернин̄ не к̄абааты бар?— деди Айрие кулюмсиреп.

— Э, дог̄ру айтасын̄, меним башыма бир чомач яплаштырг̄ан олса да ак̄лы эди. Лякин, к̄арт ман̄а да бир сёз айтмады. Не исе, саба базырына барып еттик. Малларны насылдыр бир тюкянджыг̄а теслим этип к̄айтк̄ан эдик. Лафымнын̄ к̄ыск̄асы шу ки коюмизде Нимет ак̄айдан башк̄а колхозг̄а кирмеген бир адам к̄алмады. Он̄а чок̄ айттылар, чок̄ ялвардылар, кирмеди. Лякин колхоз идареси он̄а зорламады.— Барсын коюмизде эски аятны хатырлатк̄ан бир аиле к̄алсын. Он̄а бак̄ып бабаларымызнын̄ кечирген эски девирини, аг̄ыр кун̄лерни хатырлап янармыз, бугун̄ки омюримизге исе к̄уваныр ве шадланырмыз,— дедилер. Яваш-яваш койде трактор, комбайн, автомашиналар пейда олды. Топрак̄ны трактор сюрди, шеэрге автобуслар к̄атнап башлады. Нимет ак̄айнын̄ огюзлерине ич бир тюрлю иш к̄алмады. Колхозджылар аллы-так̄атлы олып яшайлар, к̄анда узанса к̄оллары ете, сёзлери кече. Лякин Нимет ак̄айнын̄ эвинде не саан к̄алды, не гугюм. Эписини базарг̄а ташыды. Бу девир ичинде эки ог̄лу осюп етишти. Нимет ак̄ай исе, башыны ястык̄к̄а к̄ойды. Буюк

огълу мектепни битиргенинен колхозгъа кирди. Огюзлернинъ башындан тутып идаренинъ алдына кетирди. Колхоз огюзлерни алмады.— Сенинъ бабанъ бутюн омюрини шу эки огюзге багъышлагъан, эвинъизге алып къайт ве бабанъа айт: истесе союп ашасын, истесе сатсын, колхозымызнынъ бунъа ихтияджы ёкътыр,— дедилер. Огълу идаренинъ бу къарарыны бабасына айтты. Нимет акъай бир даа башыны ястыкътан котерип туралмады. Оьлди. Иште, эскиликнинъ бешарет адетлеринден бири шунынънен битти. Эски аят, эски омюр къалымтысы халкънынъ козю огюнден бир сагъын киби гъайып олып кетти. Шимди о кунълер ве ойле адамлар халкъ тилинде эфсанеге айландылар. Айды, турайыкъ Айрие. Акъикъатен, айткъанынъ догъру, шимди Нимет акъайнынъ огюзлери ёкъ, самолётнынъ келип-кеткенини дуймай къалырмыз. Ташкентнен Алма-Атанынъ арасы бир саатлыкъ ёл.

Айрие лялелерини къолуна алды ве ярым саат кечеркечмез экиси де аэропортнынъ буюк залында эдилер. Сабаки къалабалыкътан бир шей къалмагъан. Ёлджулар бир къач саат ичинде о къадар эксильгенлер ки, санарсынъ эписини топлап, бир самолёткъа отуртып йибергенлер. Скемлелер, креслолар бошап къалгъан. Истесенъ отур, раатлан. Кедер этеджек кимсе ёкъ. Экиси де отурмакъ ичюн онъайтланып турар экен, радио илян этип башлады: «Дикъкъат, Ташкент—Алма-Ата самолёты кельди...»

Айрие ве Самедин тез-тез мердивенлерден тюшип азбаргъа джувурып чыкътылар. Мейданда самолёт даа корюнмей эди. Ёлджуларны къаршылап чыкъкъанлар баабан къапыларнынъ этрафына тизилип отурдылар. Гурюльтиси къулакъларны тындырып ИЛ—18 озюне косътерильген мейдангъа келип янашты. Резина копчекли арабачыкъ аркъасындаки мердивенни самолётнынъ къапысына догъру кетирип таяндырды. Къапы ачылгъанынен стюардесса корюнди. О башындаки дюльбер, такъиесини тюзетип, кенаргъа чекильди. Ёлджулар тюшип башладылар. Арсланов козьлерини керип бакъса да, мердивенден тюшеяткъанлар ичинде озъ мусафирини корип оламай. Айрие де сабырсызланып онынъ янында тарсыкъып тура. Самолётнынъ къапысында къадын киши пейда олса:— Бугегилими?— деп пармакъ уджларына котерилип бакъа.

Айрие Чешмеджиеваны танымай. Онынъле биринджи кере корюшеджек. Шунунъ ичюн, сабыры тюкенгенинен

Арслановнынъ омузына япышып, кимерде бир адамларнынъ артындан башыны юкъарыгъа узатып секириклеп ала. Лякин мердивенде Арслановны эеджанландыраджакъ киби ич бир кимсе пейда олмады. Эр кес тюшип битти. Стюардесса еринден къыбырдамай тура. Мердивен де алынмай. Аджеба не олды экен? Демесе, Чешмеджиева...

Арслановнынъ чырайы тюрленди, юреги дюкюльдеп башлады. Айрие адамларнынъ арасына сокъулып, демир пармакълы къапылардан кечти. Лякин, самолёт тургъан мейдангъа чыкъкъанынен оны кери къайтардылар. Мейдангъа «Аджеле ярдым» машинасы келип токътады. Къолуна ящичигини алып, эким мердивенлерден юкъары котерильди. Къапыда тургъан стюардесса да самолётнынъ ичине кирип кетти. Арсланов даянамады. О Чешмеджиевагъа бир шей олгъандыр, сагъ-селямет экенми?— деп джан аляметинен демир пармакълыкъ устюнден атлап самолёткъа тараф джувурды. Айрие де, невбетчиге нерлердир айтып къапыдан кечти. Экиси де мердивеннинъ янына келип токътадылар. Экисининъ де чырайы къоркъуве къайгъы тесиринден нурсызланды, дерсинъ вуджутларында къан арекети токътап къалгъан. Арадан чокъ кечмеден къапы ачылды. Самолёттан эссизленген бир эсли-башлы къадыннынъ къолтугъындан тутып, эки ёлджудаа чыкъты. Буларнынъ бириси Чешмеджиева, экинджиси Сусанна эди.

II

«Алсаба»нынъ бугуньки сабасы да эр куньки киби, юксек дагълар артындан къызарып догъгъан кунешнинъ шавлелеринен нурланды. Бир майыс куню. Балалар багъчасынынъ яш гонджелери бир тюсте тикильген майыс урбаларыны кийинип-къушангъанлар. Мектеп талелери, комсомоллар, совхознынъ активи «Алсаба»нынъ бутюн сокъакъларыны донаттылар. Шиарлар, транспорантлар язып ильдилер. Ленин сокъагъынынъ эр эки тарафыны яраштырып тургъан узун сельбилер, дерсинъ, бугунь кокреклерине къызыл бантлар такъкъанлар. Эр бир теректе байрачыкълар ельпиреп турмакъта, астларында исе, махсус кетирилип отуртылгъан къыр лялелери гузеллик сачмакъталар. Совхоз ишчилерининъ азбарларыны алма, вишне, шефтали, тереклерининъ чешит ренкли дюльбер

чечеклери яраштыра. Базы эвлерни ешилъ тереклерден, эрылгъан ве акация далларындан сечип оламайсынъ. Барънинъ дюльбер къадифесине ортыюльген энъишли-ёкъушлы къырлар наргис, мелевше, дагъ гулю киби даа бир чокъ къыр чечеклеринен безенген. Дагълардан эскен серин майыс ельчиги табиятнынъ бу аджайип мельэмли къокъусыны «Алсаба»гъа алып келе. Бу къокъулар ишкюзар халкънынъ джигерлерине, къанына синъе, оларда даима тендюристлик ве сагъламлыкъ ашлай.

Бу йыл бир майыс байрамыны совхоз ишчилери буюк къуванч ве енъишлернен къаршыламакъталар. Кечкен сене тютюнден юксек берекет етиштиргенлерине бакъмадан бу йыл сачув мейданыны даа зияде кенишлетип былтыркине нисбетен гектар башында орта эсапнен берекетни бир центнер даа арттырмагъа къарар бердилер. Аванынъ яхшы кеткенинден файдаланып бу йыл фиде отуртмагъа бир афта эвель башладылар. Фиде отуртув девиринде ишчилер ичюн эр бир дакъикъа эсапкъа алына. Шунынъ ичюн бугунъки тантаналы байрамгъа эр ким тешкилятлы чыкъмагъа ве оны юксек севиеде кечирмеге эвельден азырлыкъ коръди.

Нумайыштан сонъ, медениет сарайы алдында митинг отъкериледжек. Совхозда байрам отъкермек ичюн район ве областтан реберлер кельдилер. Саат докъуз. Мектеп талабелери, оджалар, балалар багъчасынынъ тербиеджилери, ана-бабалар, къартлар, яшлар эписи медениет сарайы алдына топландылар. Совхоз авескярлар тегерегининъ чалгъыджы такъымы байрам авалары ве маршларны токътамай янъгъыратмакъта. Къурбанбеков совхоз ёлбашчыларыны, мусафирлерни музыка сеслери алтында идареден алып чыкъты. Эр кес колоннагъа тизильди. Огде совхознынъ ветеранлары, къарт коммунистлер, пенсионерлер, мусафирлер. Къурбанбековнынъ командасы алтында, колонна еринден кочтъю. Оркестр чала, мектеплилернинъ ве эалининъ «Урра» сеслери узакъларгъа янъгъырап кетмекте. Колонна Ленин сокъагъындан кечип, Алсабанынъ ешилъ тюземлигине чыкъты. Бу ерде бир саат къадар оюн, кулькюнени эгленген сонъ, кене колоннагъа тизилип медениет сарайынынъ алдына кельдилер. Эр кес махсус япылгъан мейданда ерлешип отурды. Къызыл ортыюлернен донатылгъан столлар башында Каштанов, Къурбанбеков, Еремеев, Арсланов, Чеврениди, Макъпуле ве дигерлери — агрономлар, сувджылар, тютюн усталары, рай-

он ве областтан кельген мусафирлер кечтилер. Митингни Къурбанбеков ачты. Сонъра сёзни Каштановкъа берди. О бутюн совхоз эмекдарларыны бир майыс байрамынен тебрикледи ве бугуньки тантаналы куньде бир чокъ илери ишчилерни «Макътав ярлыкъларынен» ве дигер къыйметли бахшышларнен мукаяфатлангъанларыны илян этти. Сонъра сёзге Район партия комитетининъ секретары чыкъты. О совхоз ишчилерининъ бир майыс байрамына буюк енъишлернен кельгенини къайд этип, илериде даа буюк къазанчлар эльде этмелерини истеди. Сёзюнинъ сонъунда шойле деди:

— Урьметли аркъадашлар, къыйметли ве сайгъылы тютюнджилер! Сиз бугунь, бу ерде, тантаналы митингге топлангъан совхоз эмекдарлары озюньизнинъ кучь-къуветинъизни аямадан бош топракъларны гуль багъчагъа чевирдинъиз. Бундан къач йыллар эвельси бу ерлерге кельсенъ, тикенли деве отундан башкъа ич бир шей корьмез эдинъ. Къышта аджджы ель бораны, язда топракъ бораны эсинъни алыр эди. Бу ерлернинъ икълими, авасы инсан къолу саесинде, сизинъ эмегинъиз саесинде бир тамам денъишип кетти. Шимди сизнинъ совхоз посёлогыны корьген адамнынъ къайтып кетеджеги кельмей. Бу ерде къалып, бир кунь де олса темиз аванен нефес аладжакъынъ раатланаджакъынъ ве ниает алгъан кучюньни эмек тарласына чыкъып, буюк эшкъ иле тёкеджегинъ келе. Сизинъ тылсымлы къолларынынъ бу ерде мисли корюльмез муджизелер яратты. Сизлер раатланмагъа бильгенинъиз киби, чалышмагъа да билесиз. Эр биринъиз тютюнджилик ишинде бирер мутехассыс киби чалышасыз. Къазахстан чёлюнде дюбек тютюни етиштирдинъиз. Сизинъ асрагъан тютюнинъиз эм берекет джеэтинден, эм ароматы джеэтинден мемлекетимиз боюнджа етиштирилъген энъ яхшы дюбеклерден бириси сайыла. Партия ве укюметимиз сизинъ япкъан ишлеринъизге буюк къыймет кести ве бир чокъ аркъадашларны орден ве медаллернен мукаяфатлады. Мен бугунь сизге область партия комитетининъ авалесинен СССР алий совети президиумынынъ къарарыны буюк гъурур иле беян этем.

Бу ерде район партия комитетининъ секретары бираз токъталып областтан кельген реберлернен сёйлешти ве сёзюни девам эттирип мукаяфатлангъанларнынъ фамилияларыны окъумагъа башлады. Митингде топлангъанлар Андрей Андреевич Каштановнынъ Ленин орденинен мука-

фатлангъаныны эшиткенлери киби, гурьдели эль чырпмаларынен аякъкъа турдылар. Совхоз коллективи севимли ёлбашчысына берильген лыйыкъ мукафатны джан-юректен тебрикледи. Ондан сонъ, Арсланов Самединге «Эмек Кызыл Байракъ» ордени, бригадирлерден Макъпулеге ве Чевренидиге «Урьмет бельгиси» ордени, сувджды Эльведин къарткъа «Урьмет бельгиси» ордени ве медаллернен мукафатлангъан бир сыра аркъадашларнынъ фамилиялары окъулды.

Митинг иштиракчилерининъ эль чырпмалары, гурьдели «Урра» садалары, оркестр сеслери адамларнынъ къуванчына къуванч къошты. Шенъ ве шерамет байрам тантаналары медениет сарайынынъ алдындан койнинъ юкътарысындаки чечекли къыргъа авушты. Мында ешилъ отлар устюнде, адамлар дост-эшлери ве акъранларынен топ-топ олып, кечке къадар шенълендилер. Айрие ве Самедин озь мусафирлери ве достларынен топланып наргис чечеклери ачкъан бир аланда ерлештилер. Бираз вакъыттан сонъ, оларгъа Валерик де келип къошулды. Фидане ве Эскендер чечек джыялар. Макъпуле ве Айрие байрам мунасибетинен алып кельген бутюн зияфетлерини ортагъа чыкъардылар.

Валерик келип къошулгъанынен, ничюндир Юнуснынъ кейфи бозулды. Чюнки о Сусаннаны озюнинъ шахсий мусафири сая эди. Олар Алма-Атадан акъшам кеч кельселер де, яшларгъа таныш олмагъа чокъ вакъыт керекми? Сусанна ве Юнус бири-биринден чокъ ятсырап отурмадылар. Асыл олар Арслановнынъ Чешмеджиеванен бир йыл девамында мектюплешюви саесинде гъиябий таныш эдилер. Арсланов эр бир мектюбинде Сусаннагъа лыйыкъ къайыны олгъаныны бильдирмеге тырыша эди. Ким биле, Сусаннанынъ Чешмеджиеванен берабер келювинде бельки бойле бир макъсад бардыр. Оны яшларнынъ озьлерине ташлайыкъ. Вакъыт эр шейни косътерир. Эки арада севги догъса, онъа кимсе къаршы чыкъалмаз. Месафенинъ узакълыгъы да кедер эталмаз.

Юзер грамм ичилип, бир-эки къапынып алгъан сонъ, адамлар март къозулары киби къырлар устюнде даркъашып кеттилер. Чешмеджиева Фиданенинъ къолундан тутып салкъын дере сувундан ичмек ичюн юксек къырдан ашагъы тюшти. Бир-къач авуч сув алып юткъан сонъ, яваш-яваш къыргъа тырмаштылар. Джапнынъ тёпесинде Валерик отура эди. О Чешмеджиеванынъ зорнен байыргъа

тырмашып адьмлагъаныны корип, бираз ашагъы тюшти де:

— Къолунъызны беринъиз, ярдым этейим, Земине Гафаовна,— деди.

Чешмеджиева къолуны узатты, Валерикнинъ онъа косьтерген дикъкъатына ве пельтекленип лакъырды эткенине шу ан эмиет берди. Чешмеджиева байыргъа янтайып отурды, онынъ янында Валерик тиз чёкти. Фидане гогем береги этрафында айланып юрген кобелеклернен эгленмекте эди.

— Багъышланъыз, Земине Гафаовна,— деди текрар Валерик.— Сиз мында чокъ тураджакъсынъызмы?

— Мусафирликте не къадар турулыр, беш-он кунь олурмыз гъалиба,— деди Чешмеджиева.

— Языкъ. Мен белледим бир ай тураджакъсыз .

— Сен, йигитим, бизнен пек меракъландынъ. Юрегинъде бир мерам олса айта билесинъ... Къызнен йигит олгъан ерде севги де...

— Ёкъ, ёкъ Земине Гафаовна, менимки севги дегиль, башкъа меселе.

— Ойлеми? Мен 'белледим сени Сусанна меракъландыра.

— Ёкъ, мени сиз меракъландырасыз.

Чешмеджиева тишлерини сырытып, енгильчиктен шакъылдап кульди. Валерик кедерли козьлерини онъа тикти де:

— Акъикъатен, сиз меракъландырасыз,— деп текрарлады.— Фиданенинъ тилини тюзетип йибергенинъизден берли сизнен корюшмекни арз этип юре эдим. Не Айрие апагъа, не Арслановкъа бу акъта бир кере айтмадым. Даа догърусы айтмагъа утандым. Сиз экимсиз, сизден утанмайым. Мына алдынъызгъа тиз чёкип ялавам, мумкюм олса манъа да ярдым этинъиз, мени бу пельтекликтен къуртарынъыз.

— Сенинъ тилинъни тюзетмек къыйын шей дегиль, Валерик. Хусусан озюнде истек олгъан адамгъа бизим усул пек тез файда бере. Шунунъ ичюн, санъа бир йылдан берли меним келеджегимни беклеп турмагъа ич бир тюрлю аджет ёкъ эди. Сизде, Алма-Атада пек яхшы логопедлер бар. Шимди эр ерде кабинетлер земане иншаатларынен донатылгъан. Бизде де айни шунунъ озю. Санъа анда барып мураджаат этмек керек. Истесенъ мен санъа бир къагъытчыкъ язып берейим.

— Мен озюм Алма-Атада осьтим. Анам да анда яшай. Лякин мен, ничюндир, сизде деваланмакъ истейим. Мында бу ишни сиз аль этамайджагъынъызны мен билем. Алма-Атада ве бу ерде мени таныгъанлар ве достларым бар. Бир узакъ ерлерге кетип, кимсе танымагъан, бильмеген ерде айларнен турып деваланыр эдим.

Чешмеджиева Валерикни дикъкъатнен динъледи, козьлерине бакъты ве белли бир дереджеде онынъ юрек аизарыны, психологиясыны анълап башлады. «Догъру айта Валерик» деп тюшюнди о.—Таныш-билишлер арасында онъа деваланув курсы кечмек къыйын оладжакъ. Бойле хасталарнынъ чокъусы озъ тувгъанларынынъ козю алдында курс кечселер де, Валерикте бунынъ акси олгъаны корюлип тура».

Къолуна бир топ чечек тутып байырдан ашагъы Сусанна кельмекте эди. Онынъ устюнде енъсиз беяз кофтасы, къыскъа къара юбкасы бар. Башы устюне къаталакълап топлагъан сачларынынъ арасына бир къач дане ляле кечирип къойгъан.

— Мен сизни джойдым, Земине Гъафаровна,— деди о бираз эркеленип.

— Янынъда бойле йигитлер тургъанда джойылмакъ мумкюнми?— деди Чешмеджиева Валерикке бакъып.

— Бу йигитлерге ышансанъ, не десенъ олур, олар джоймагъа усталар, тапмагъа бильмейлер.

Сусанна къара кирпичлерининъ астындан дуйдырмайып Валерикке бакъты, лякин онынъ лафына ич бир тюрлю эмиет бермегенини эслегенинен, Сусанна Фиданенинъ янына кетти.

— Ойле олса, яхшы,— деди Чешмеджиева лафыны девам эттирип.— Сен бутюн омюринъни, яни автобиографиянъны манъа тавсилятлы суретте язып кетир. Истегенинъ къадар яз. Не къадар чокъ олса, о къадар яхшы. Мен мында олгъанда сенинъ язгъанларынынъ окъуп чыкъарым ве озъ фикиримни айтырым. Бизлер девалавгъа мына бойле башлаймыз. Сонъра керек олса Ташкентке де келирсинъ.

Валерик пек къуванды. Чешмеджиевадан бойле джылы джевап алырым деп беллемеген эди. Аман еринден турды, Фиданенинъ янына барып, къолундан алды ве байырнынъ тёпесине чыкъарып ташлады. Онынъ артындан Чешмеджиева ве Сусанна котерильдилер. Бу арада Юнус койге барып, бир шише «Атешли» даа алып кельди.

Олар акъшам салкъыны тюшкенге къадар къырларда эглендилер...

Валерикнен олып кечкен лакъырдыны Чешмеджиева акъшам Айриеге айтты.

— Эгер чареси олса, сизинъ медпунктта мен оны къабул этип бакъарым. Фиданеге бир къач сеанс даа япмакъ керек оладжакъ. О вакъыт Валерикнен де корюширмйз. Янларында энъ якъын адамларындан чокъча олса, эффеки де яхшы ола,— деди Чешмеджиева.

— Ойле десенъиз меним де сизге бир теклифим бар. Мынавы совхозымызнынъ темелини къойып, къурып чыкъкъан бир инженеримиз бар. Къач йылардан берли бир ерде яшаймыз, чалышамыз. Лякин, гъарипни корьген сайын джаным-джигерим еринден кочип кете. Пек бильгили, пек медений бир адам. Дженк йылары насылдыр бахтсызлыкъкъа огърагъан. Аля даа озюне келип оламай. Лакъырды эткенде пельтеклене, ичкенде исе лакъырдысы асыл анълашылмай заваллынынъ. Ойле корюле ки, онынъ ичмесинде де бир себеб олса керек. Кимсенен сырдашмай.— Мен не себебтен ичкенимни тек озюм билем,— дей. Лякин себебини кимсеге айтмай. Эр вакъыт ичмей. Ойле вакъытлары ола ки, айларнен чалышып юре, агъызына алмай. Сонъ биревлернинъ вастасынен иче ве эсини джойып къала. Якъында оны Райкомгъа чагъырдылар. Андан пек къуванчлы къайтып кельди. Дженк вакъты койлеринде немсе башкесерлерининъ япкъан джанаварлыкълары нетиджесинде фаджиалы олюмнен эляк олгъан отуз алты адамнынъ хатиресине эйкель ачыладжагъыны ве бу ачылыш мерасимине оны да чагъыргъанларыны айткъанлар.

— Я онынъ анда не иши бар экен?— деди Чешмеджиева меракъланып.

— Отуз алты адамнынъ экиси онынъ къадынынен, баласы экен эмиш.

— Вай-вай... Ойле адамны анда кетмезден эвель бираз рухий, психологик джеэттен азырламакъ керек...

— Валерикнен Фиданени къабул эткенде, мумкюн олса, оны да чагъыртайыкъ, Земине Гъафаровна?

— Чагъырмаздан эвель онъа бир къач вазифелер бермек керек. О не вакъыт кетеджек?

— Майыснынъ докъузында анда оладжакъ. Демек бир кунъ эвель кетеджек.

— Ойле олса ярындан кеч къалдырмай онынъле мен

корюшмек кереким. Я озю разы оладжакъмы, аджеба?— деди Чешмеджиева.

— Мен онъа пек чокъ уколлар яптым. Не вакъыт кельсе манъа озъ дердини айтып кете эди. Шунынъ ичюн мен эминим ки, о бизим теклифимизни тешеккюръ иле къабул этер.

Чешмеджиеванен лаф эткен сонъ Айрие раат ятаджакъмы? О Матвей Петровични корип, хабер этмеге истеди. Лякин эвдеки мусафирлерни ташлап чыкъалмай. Акъшамдан хабер этильмесе, ола билир, Матвей Петрович саба эвинде тапылмаз. «Ёкъ, бир шейни япаджакъ олгъан сонъ, эхмаллыкъ этмейджексинъ», деди Айрие озъ-озюне. Сонъра бир къгъыт язды ве конвертке къойып клейледи. Юнуснен Сусанна къапы алдындаки къарт тал терекнинъ тюбюнде отура эдилер.

— Юнус! Кельчи бу якъкъа!— деди Айрие къолуны саллап. Юнус азбаргъа кирди, аптесининъ къолундаки конвертни алып, Сусаннанен берабер меркезий сокъакъ бою джонеп кеттилер. Юнус догъру Матвей Петровичнинъ эвине кирди. Озюнинъ козюнен корьгенине озю инанмады. Матвей Петрович диван устюнде газета окъуп турмакъта эди. Байрам куню онынъ ичмей отургъаны эльбетде шашыладжакъ шей эди. О Юнуснынъ къолундан мектюпни алгъанынен ачты, окъуды.— Пек яхшы, сагъ ол,— деп кене газетагъа япышты. Къапы алдында апайы тавукъларны кумеске къапатмакъта эди.— Не отурмадынъ, Юнус?— деди о.

— Матвей Петровичте бугунъ джан сыкъысы, агъызына биле алмагъангъа ошай,— деп ташлады Юнус.

— Алмагъаны ярамай огълум, алса ондан яхшы олур эди. Акъылына бир шей эткендир деп къоркъам...

Койнинъ яшлары энди оюн мейданында топлангъан эдилер. Бутюн кунъ чалып ёрулгъан яш чалгъыджылар эвлерине раатланмагъа къайткъанлар. Яшлар радиола чалдырып ойнай эдилер. Юнус Сусаннаны оюнгъа алып тюшти. Чеврени бир къач кере айлангъан сонъ, оюн битти. Совхоз къызлары бир тарафкъа, яшлары дигер тарафкъа чекильдилер. Сусанна Юнуснынъ янындан айырылмай. О эльбет де аджеми. Мында кимсени танымай. Юнус онъа биринджи кунюнден берли тувгъан агъасы ерине олып корюне. Оюнгъа да тек онынъле берабер тюше. Къайдандыр орталыкъта Молдабай пейда олды. Онынъ устюнде кок костюм, беяз кольмек ве галстук бар эди. Молдабай-

ны эр вакъыт фуфайканен корип алышкъан адамлар шимди онынъ оюн мейданына кирип кельгенини абайламадылар. Базылары, атта танымадылар. О догъру Юнуснынъ янына кельди. Сусаннанен таныш олды ве оюнгъа теклиф этти. Юнуска разы олмакътан башкъа чаре къалмады. Молдабай онъа бугунъ пек къоркъунчлы корюнди. О къулакъларына баргъандже къызаргъан. Бети даа зияде ирилешкен. Кольмегининъ сыкъы якъасы къалын энъсесининъ ичине батып кеткен. Галстугы де ойле сыкътырылгъан ки, истер-истемиз башыны юкъары котерип тутмагъа меджбур. Оюн биткенинен Сусаннанынъ къолуны опюп ерине озгъарды. Юнусны кенаргъа чагъырды да:— Сенден адам олмайджакъ!— деп сомурданды. Юнус индемени. О Молдабайнынъ не демек истегенини анъламай эди.

— Сени бир ерге йибердилерми, экинджи тарафкъа бурмагъа не акъкъынъ бар? Мен йигирми йылдан берли руль башында турам, даа истеген тарафыма изинсиз бир кере бурулмадым!— деп къычырды о.

— Молдабай, сен не демек истейсинъ? Меним къолумда руль ёкътыр, истеген якъыма бурула берем!

— Санъа рульни ким ишанаджакъ?! Айды бар, барышнянъны ал да берабер кетейик. Менден башкъа сени «Алсаба»да ким тапа биледжек эди. Айды, кеттик.

Олар догъру Каштановнынъ эвине кельдилер. Андрей Андреевич кунъдюз мусафирлерини озгъаргъан сонъ, орден хайырлап кельгенлернинъ де хатирини тапмагъа тырышты. Акъшам эв кене рыкъма-рыкъ адам толды. Арслановнынъ эвинде де столлар ачыкъ къалды. Озюнинъ мусафирлери олса да, Каштановнынъ теклифини ред эталмады. Эписи котерилип директорнынъ эвине кельдилер.

— Айып этменъиз джемаат, айып этменъиз мусафирлер!— деди Каштанов къаде котерип.— Совхоз еринде байрам бир кунъ ола. Биз бугунъки тантанамызны сабагъа къадар девам эттире билемиз. Лякин тарлада кимсе юкъу сырамайджакъ!— деп кулюмсиреди.

Онынъле берабер эписи кулюштилер. Сонъра сёзюни девам эттирип:— Сизинъ сагълыгъынъызгъа, сизинъ эшкъынъызгъа, сизинъле берабер иришкен бугунъки бахтлы кунюмизнинъ даа парлакъ, даа айдын олмасы ичюн бирер къаде теклиф этем аркъадашлар!

— Сизинъ сагълыгъынъызгъа, Андрей Андреевич...

— Сизинъ сагълыгъынъызгъа, Катерина Мануйловна!— деп къычырышты къадынлар...

Мусафирлер чокъ отурмадылар. Эр кес ёргъун. Бутюн кунни аякъ устюнде кечирдилер демене мумкюн. Саба иш куню. Тарлаларда фиде отуртыджы машиналар бир кунъге токътатылды. Парниклерде фиделер джамларны котерип чыкъаджакъ киби тикленип туралар. Бир къач саат олса да, къайтып раатланмакъ керек эди.

Айрие мусафирлерге айрыджа ер къойды. Сусаннаны Макъпуле алып кетмек истеди, лякин Айрие разы олмады.

— Ярын сенде мусафир олурлар,— деди.

Ала-Тау дагъларынынъ тёпесинден төгерек айнынъ шавлелери койнинъ устюне төкюльмекте. Алсаба татлы юкъугъа далды. Ич бир ерде инсан даушы эшитильмей. Серин бааръ геджесининъ тынчлыгъыны ялынъыз чыр-чырмазиннинъ чырылтысы боза. Патта-сатта копеклер авлай. Койнинъ юкъары мааллесинде тек бир хораз къычыра. Вакъытыны шашырса керек. Ергъун вуджутлар раатланмакъталар. Дерсинъ энди оларны еринден котереджек бир къувет ёкътыр. Дерсинъ олар эбедий юкъугъа яттылар. Ёкъ, олар раатланалар. Танъ атаркен эписи турар ве кене де шаматалы ишчи куню башлар. Олар бунъа алышкъанлар. Бунсыз бир кунъ биле яшап оламайлар. Истесснъ саат учъте ятарлар, лякин танъ хоразынынъ биринджи даушындан сонъ юкъламазлар. Бу къуветни оларгъа темиз видждан бере. Ялынъыз видждан оларны сыджакъ ятакътан турсатып сабалар къучагъына ташлай. Видждан иле эмекке сарыла, аятны безетелер. Сабаларны тарлалар ичинде кутип алышкъанлар вакъытны ич де шашырмайлар. Олар шимди татлы юкъудалар. Тезден тураджакълар, барсын раатлансынлар.

III

Матвей Петрович ве Чешмеджиева медпунктта корюштилелер. Бу шартны Айрие онъа тюневин ёллагъан къягъытында язып билъдирген эди. «Эр алда эким ичюн, энъ кслишикли ер медпункттыр» деп тюшюнди о.

Чешмеджиева Матвей Петровични этрафлыджа динълеп бакъты ве айни шу Валерикке берген вазифесини ондан да талап этти.

— Не вакъыт язып кетирирсинъиз, сонъра мен сизнен лаф этерим,— деди Чешмеджиева къыскъадан. Матвей Петрович разы олды ве эки кунъден бутюн кечмишини бир дефтерге язып кетирмеге сёз берди.

— Меракълы адам,— деди Чешмеджиева Матвей Петрович чыкып кеткен сонъ.— Онъа мытлакъ бир-къач гипноз япмакъ керек. Лякин бу шейлер, Айрие, шимди меним вазифеме кирмей. Мен мында раатлаймагъа кельдим. Биз совет экимлеримиз. Эпимизнинъ джевап берген, даима чалышып тургъан белли еримиз бар. Меним бу ишке акъкъым ёкътыр. Акъыл танышмагъа ве базы бир меслеатлар бермеге мумкюн. О якъы хастанынъ озъ иши. Эр алда экимликтен башкъа инсансынъ эбет. Къаршынъа догърулып ксльген сонъ адамнынъ кокрегинден итеп къайтаралмайсынъ. Бакъайыкъ, обириси кунъ мен оларгъа керек шейлерни айтып анълатмагъа тырышырым. Элимден кельген ярдымны япарым.

— Огъурлы аякънен кельген экинсиз, Земине Гъафаровна,— деди Айрие. Сиз кельген куню Арслановкъа да, Макъпулеге де орден бердилер. Макъпуле бугунъ акъшам сизни мусафир чагъыра. Шимди эвде тынчлыкъ. Юринъ ичери, кунъдюз бираз ятынъыз, раатланынъыз. Ярын истесенъиз Арслановнынъ бригадасына чыкъармыз. Янъы машиналарнен насыл фиде отурткъанларыны сейир этермиз. Ишчилер тарлада беяз халатлы адам корьселер пек севинелер. Мен невбетнен бутюн бригадаларны айланып чыкъам. Эм темиз авада юрем, эм ишчилернинъ хатирини тапам. Не япайым. Кой еринде бойле зенаатта чалышкъан сонъ эписине къатланаджакъсынъ.

— Институткъа кирмек керек эдинъ, Айрие. Сенден пек яхшы эким олур эди.

— Вакъыт мусааде этмеди, Земине апте. Энди яшайышны бир ёлуна къойдым дегенде эки баланынъ анасы олмагъа сыра кельди. Самединге эвлендим. Гъиябий факультетке кирмеге мумкюн эди, лякин зенаатымны авуштырмагъа истемедим. Энди алий бильгини балаларымызгъа бермеге тырышамыз. Бизге коре олар чокъ бахтлылар. Дженк фелякети корьмедилер, тынчлыкъ ве боллукъта яшайлар. Мурад эткенге шимдики девирде окъуп алим олмасы не, бир шей дегиль.

— Догъру айтасынъ. Мурад эткенге... Биз де къолайлыкънен окъуп эким олмадыкъ. Эр шей мурадкъа багълы экен...

Олар бу ерде лакъырдыны токътатып эвге кирдилер. Себия къартий оджакъ башында бир шейлер къарыштырып тура эди.

— Кирињиз, кызым, саба эрте чыкып кеттињиз, къаве биле ичмединњиз,— деди къартий.

Чешмеджиева ичери кирди. Эвде кимсе ёкъ эди. Сусанна без ястыккъа сачларыны джайратып татлы-татлы юкъламакъта эди. Себиля къартий къаве кетирди. Учеви де янаша одагъа чыкып къаве ичмеге тутундылар.

— Лафынъызны девам этсенњиз, Земине апте,— деди Айрие дудакълары арасына кичкене шекер парчачыгъы кысыгырып.

— Мен о вакыт беш яшында эдим,— деп сёзюни девам этти Чешмеджиева.— Анам пек агъыр хасталанды. Биз къартбабамнен бир эвде яшай эдик. Тизем мени пек север эди. Яныма кельди де,— ананъны башкъа бир шеэрге алып кеттилер,— деди. Мен ойнап отургъан еримде тарс токътадым ве тикилип тиземнинъ козюне бакътым.— Анамны башкъа шеэрге не ичюн алып кеттилер, я мени де не ичюн алмадылар?— дедим. Тизем меним къолумдан тутып, софагъа алып чыкыты. Анамнынъ яткъан одасынынъ къапысыны ачты да:— Мына коресинъми, ананъ ёкъ,— деди. Акъикъатен ода бош эди. Анамнынъ яткъан кровати устюнде тёшеги тыгъыртылып, джыйыштырылгъан эди. Бу ерде тизем бетини оглюгинен къапатып агъламагъа башлады. Бизим янымызда ортанджы агъам тура эди. О, де тиземе, де манъа бакъты да софагъа чыкыты. Анълашылгъанына коре о мени де агълар деп къоркъа ёкен. Мен агъламадым. Аксине, тиземнинъ гонълюни алмагъа тырыштым.

— Агъламанъ, тизе, анам тезден къайтып келир,— дедим. Бу сёзлернен мен эм тиземни, эм де озюмни къолгъа алдым, сонъ экимиз де агъламадыкъ. О вакыт тизем меним сёзлеримни текрарлады: «Эбет, эбет кызым, ананъ тезден къайтып келир».

Тизем бираз тынчлангъан сонъ, меним антерчигимни, явлучыгъымны, чорапларымны топлап бир богъчагъа къойды да: «Мына кызым, ананъ кельгендже енгенънинъ ёвинде отураджакъсынъ, юр кетейик, анда сени беклейлер», деди. Сонъундан анъладым ки, анамны носилканен алып чыккъанда мени коръмесин деп сакъламакъ истеген ёкенлер. Бир къач кунъден сонъ, меним башыма апансыздан бир къаза даа кельди. Мердивенден йыкълдым ве къолумны сындырдым. Ойле кийик сеснен кычырып агъладым ки, бир къач дакъикъа ичинде бутюн айлемиз меним башыма топланды. Къолум шишмеге башлады. Тека-

ран тутып бакъаджакъ олсалар, агърысына даянамайып сесим-седа кетип агъладым. Эмджем мени къучагъына котерип, догъру устаханеге кельди. Сыныкъ къолумнынъ пармагъында оюнджакъ ерине къулангъан юзюгим бар эди. Оны не исе, зорнен кесип, шишик пармагъымдан чыкъарып ташладылар. Сонъра эмджем мени сыныкъ-чыкъыкъларны ерине къойгъан бир белли адам бар экен, онынъ эвине алып кетти. Мени столгъа отуртып, къолумны тартты, ерине къойды сонъра киришлеп байлады ве энъсеме асты. Бу шейлерни япкъан адам манъа шашып къалды. Чюнки мен чыдаялмайджакъ агърыгъа даянып, сесимни биле чыкъармадым.

— Вай балам,— деди Себиля апте,— Дохтур оладжакънынъ та яшлыгъынъдан белли экен де.

— Эбет, мен де оны айтмакъ истейим. Сонъра, бутюн къорантамызнен меним чыдамлы экенимни айтып юрдилер. Бир-къач кунъден сонъ, бу хабер бабама барып етти. О мени ич де сёгмез ве урмаз эди. Тизлери устуне отуртты да:— Ах меним къызым, «Кобете кенар» къызым,— деп охшады.

— Ойле дегени не экен?— деди Себиля апте.

— Анам меним сачларымны орип, башымнынъ тегерегине айландырып багълар эди. Бу шей, ничюндир, бабама кобетенинъ кенарыны хатырлатыр экен.

— Ананъызгъа не олгъан экен?— деди Айрие.

— Анам о вакъыт пек агъыр операциядан къуртулып кельди. Лякин, даа пек чокъ вакъыт еринден турмайып яткъан эди. Бир къач ай девамында бизим эвге сыкъ-сыкъ эким келип турды. Бу эким дюльбер ве шакъаджы бир яш адам эди. Балаларны севсе керек, эр кельгенде мени охшар ве кульдирип кетер эди. Меним чыкъаргъан ресимлеримни къолуна алып бакъар ве макътар эди. Бу эким менде насылдыр бир кемалатлыкъ корип:

— Сен доктор оладжакъсынъ!— дей эди. Шимди мен онынъ сёзлерини хатырлайым да, озъ-озюмден сорайым: «Аджеба о адам ничюн манъа рессам оладжакъсынъ демеди де, доктор оладжакъсынъ», деди? Бельки мен рессам олур эдим. Амма о бутюн вакъыт «доктор оладжакъсынъ» деп юрди. Кимерде башындан шапкесини чыкъарып меним башыма кийдирир де, «Мен балабан докторым, сен кичкене докторсынъ», деп кулер эди.

Шу кунъден сонъ, инанасызмы, мен доктор оладжакъым деп юрдим. Меним бала юрегиме бу зенаат ичюн бир

сыджакълыкъ синъди. Адетиндже баладан,—Сен ким оладжакъсынъ?—деп сорайлар. Бу суальге мен эр вакъыт,—доктор оладжагъым,—деп джеваплана эдим. Бойле дегенде акъранларым арасында мени мыскъыллагъан, эриштиргенлер ола эди. Амма, мен оларнынъ бирине къулакъ асмай, озъ ниетимден, мурадымдан къайтмай эдим.

— Мына, коресизми, банаки «Мурад этсенъ» деген лафымызнынъ манасы да шу эльбет де,—деди Айрис.

— Лякин о вакъыт девир башкъа эди. Сен мурад этесинъ амма, санъа къаршы чыкъсалар, я да ананъ, бабанъ окъугъанынъа разы олмаса не япаджакъсынъ? Озюм де къыз балам. Сизге малюм ки, о вакъыт къыз балагъа бойле къапылар къолайлыкънен ачылмай эди. Не исе, мен докъуз яшына кельдим, мени аля даа мектепке бермейлер. Анам исе, мени даа пек яш сабий ерине коре эди.

— Ах, аналар, аналар,—деп кокиос кечирди Себия апте.

— Бир кунъ агъаларым янъы кольмеклер кийип, китапларыны къолтукъларына къыстырып мектепке кеттилер. Мен анамнынъ янына келип:

— Мени мектепке не вакъыт йибереджексиз?—деп агъладым.

— Акъшам бабанънен лаф этермиз,—деди анам. Акъшамгъа къадар софада отурып бабамны бекледим. Лякин бабамны корип оламадым. Анълашылгъанына коре иштен пек кеч кельген. Мен ятып юкъладым, лякин саба эр кестен эвель уяндым. Бабам мени мектепке бермеге разы олды.—Ялынъыз бир шартнен къызым, бир кунъ даа сабыр эт, мен санъа элифбе ве чанта алайым,—деди.—Ёкъ, ёкъ бугунъ мени мектепке алып барынъыз, элифбени, чантаны сонъ алырсыз,—деп инатландым. Сонъра долафтан тез-тез эки дефтер ве къарандаш тартып чыкъардым ве бабамнынъ алдында «Мен азырым» деген киби къадалып къалдым. Бу адетимни бабам пек бегенсе керек,—Кийиндир оны!—деди анама. Энъ яхшы антеримни кийдирип, сачларымны кене ойле, «Кобете кенар» байлап, анам мени мектепке озгъарды. Дефтерлеримни исе, джоймасын деп явлукъкъа сарды. Мен о явлукъны ольгендже унутмайджагъым. Чюнки манъа чанта алмадылар. Бир йыл китапларымны шу явлукъкъа орап мектепке къатнадым. Асыл о вакъыт ойледир даа, бакъсам акъранларым да китапларыны явлукъкъа сарып кетире эдилер. Мен

пек яхшы окъуп йылы екюнледим. Экинджи йылы кене агъыр хасталанып алты ай тѣшекте яттым.

— Вай, балам, сенинъ де корьмегенинъ къалмагъан экен, къавенъизни ичсенъиз, сувып къалды,— деди Себиля апте.

— Токътанъ, мен сизге башкъасыны къойып кетирейим,— деп Айрие ашханеге чыкъты.

— Дейджегим, энди хасталыгъым кечип башлагъанынен яткъан еримде дерслеримни огренмеге тырыштым. Чокъкъа бармадан окъумагъа ве окъугъан шейимни къайтарып айтмагъа огрендим. Яваш-яваш агъаларымнынъ китапларыны алып окъумагъа башладым. Олар энди бешинджи сыныфта эдилер. Акъшам олар дерс япсалар, мен де кенардан бакъып турар эдим. Мен олардан токътамай-турмай бильмеген шейлеримни сорар эдим. Сыджагъым котерилип башласа, бабам кълумдаки китапларымны тутып алыр эди. Мен кене чаресини тапып тѣшегим астына сакълар эдим. Хасталыкъ себебинден бир йыл мектепке бармадым. Кузьде яхшы олдым ве догъру озь сыныфымнынъ партасына — учюнджи сыныфкъа барып отурдым. Балалар манъа,— экинджи сыныфта окъуйджакъсынъ,— деселер де, мен еримден турмадым. Олар энди кълшмакъ, чыкъармакъ, дарб этмекни кечкенлерини айталар, мен кене озюмни сыкъмайым.— Манъа истеген вазифенъизни беринъиз, чезип берейим,— дедим балаларгъа. Эм ойле яптым ки, оларнынъ бильмеген, чезамагъан вазифелерини япып бердим. Балалар мени китап окъугъаныма ве вазифелерни чезгениме шашып къалдылар. Бу шамата арасында оджапчем кирип кельди. О балаларны тынчландыргъан сонъ, меним яныма кельди де:

— Сен шимдилик мында отур, кълзым, сонъра мен сени башкъа сыныфкъа авуштырырым,— деди. Бутюн сыныфнынъ балалары меним тарафымны тутып оджапчеге ялвардылар.— Земине яхшы окъумагъа биле, вазифелерни де тек яхшы чезе!— деп чувулдаштылар. Оджапче эр кесни ерине отуртты ве мени тахтагъа чыкъарды. Биринджи, экинджи сыныф вазифелери берди, чездим. Учюнджи сыныф китабы берди бир ерде тутулмайып окъудым ве анълаттым.

— Аферин!— деди оджапче ве биринджи партадан манъа ер косьтерди. Бир йылдан сонъ, мен бешинджи сыныфта окъуп башладым.

Он учъ яшымда экенде пек чокъ ильмий брошюралар окъудым. Экимликке олгъан севгим, авеслигим кеттикче артты. Чешит хасталыкълар акъкъында язылгъан брошюраларны къолумдан ташламай, окъуп огрендим. Башта эким олмагъа истейим десем де, бу балалыкъ эди. Энди акъыкъатен экимнинъ не демек олгъаныны анълап башладым. Он беш яшымда экенде, агъамнен меслеатлашып эмшире-эбанайлыкъ техникумына кирдим. Дёрт йыл буюк авесликнен окъудым ве алий ишаретнен битирип чыкътым. Ондан сонъ мединституткъа кирдим. Беш йыл окъуп, имтиязлы диплом алдым...

Къапыдан Макъпуле келип кирди. Онынъ къуванчы ичине сыгъмай. Догъру Айриенинъ бойнуна келип сарылды ве сонъра Чешмеджиевагъа айланып:

— Багъышланъыз, мен гъалиба сизинъ лакъырдынъызны больдим,— деди.

— Зарар ёкъ, Макъпуле. Биз озъ арамыз лаф этип тура эдик,— деди Чешмеджиева онынъ къуванчлы козьлерининъ ичине бакъып.

IV

— Къуванчынъны бизге айт, Макъпуле, биз де сенинъле бирге къуванайыкъ,— деди Айрие оны тынчландырып.

— Бугунъ меним энъ бахтлы кунюм, тувгъанларым!— деди Макъпуле котеринки сеснен.— Шимди партия тешкилятынынъ меджлисинден чыкъып келеятырым. Райком векиллери алдында менимчюн юрегиме тийген чокъ сыджакъ лафлар айтылды. Сонъра эписи бирер-бирер къолумны алып хайырладылар.

— Орденими?— деди Айрие сабырсызланып.

— Ёкъ, тувгъаным, мени бугунъ партия сафына аза къабул эттилер.

— Буюк козь айдын, тебриклеим сизни — деп Чешмеджиева еринден турды ве Макъпуленинъ комюр киби сим-сия козьлеринден опыти.

— Хайырлы олсун тувгъаным,— деди Айрие онынъ артындан.— Мен санъа айтмадыммы? «Яхшыны — яхшылыкъ излер, яманны — яманлыкъ», дегенлер. Сен озюнъни Таубасыда ишлегенде косьтерип башлагъан эдинъ.

— Керчек Леспромхоздан Мефодий Пантелеевичнинъ имзасынен кельген характеристиканы да окъудылар. Къурбанбеков, Каштанов, Боденеджиев эписи сёзге чыкътылар.

— Я бизимки индемедими?— деди Айрие джиддий-лешип.

— Арсланов индемей отурырмы, акъыз? О Ургутке, Москвагъа барып кельгенимизни, бригадамнынъ совхоз боюнджа энъ юксек берекет алгъаныны, бир шей къалдырмай эписини айтты.

— Бахт инсангъа чифт олып келе экен, Макъпуле,— деди Чешмеджиева.— Сиз бу байрам кунълерини керчектен де унутып оламазсыз. Орден алдынъыз ве партия азасы олдунъыз. Эписи бир къач куннинъ ичинде. Сагъ-селямет олынъ да бахтлы яшанъ.

— Сагъ олунъ, Земине Гъафаровна. Айды, Айрие мен кетейим. Анълашкъанымыз киби акъшам мусафирлерни озюнъ алып келирсинъ. Беклерим Земине Гъафаровна,— деп Макъпуле чыкъып кетти.

— Макъпуленинъ бахтына пек къуванам,— деди Айрие о чыкъып кеткен сонъ.— Эринмек бильмеген намуслы ве ишкир къадын. Къайда барса озюни эмекте коръсете ве севдире.

Шу арада, ашханеде озъ ишинен мешкъуль олып тургъан Себиля апте къолларыны сюртип ичери кирди.

— Къана, дохтур лафынъызны динълеп тура эдик, айтсанъыз сонъуны да эштейик,— деди.

— Айтмагъа не бар я, Себиля апте? Эр кес киби биз де окъудыкъ, эким олдыкъ, деп башлады Чешмеджиева.— Мен де омюримде эки кунню энъ бахтлы кунълеримден саям. Бириси, ана шу Макъпуле киби партия сафына кирген кунюм. Эй-эй, о агъыр кунълер эди. Башымыз тёпесинде топ-снаряд патлагъан вакъытлар эди. Экинджи бахтлы кунълеримден бири де шуны саям ки, о вакъыт байрамгъа азырлангъан киби кийинип-къушанып девлет имтианлары бермеге кеткен эдим Мен асыл имтиан берип оламам деп раатсызланмадым. Озюмни энди эким эсаплай эдим. Эм ойле де олып чыкъты. Имтианларнынъ эписинден «аля» ишарети алдым. Имтианларны берген сонъ, группамызнен бир ерге топландыкъ ве не япаджагъымызны бильмей тура эдик. Эписи къуванч алямети олса керек, бакъсакъ аудиториядан профессорымыз чыкъты.

Не беклеп турасынъыз?— деди о кулюмсиреп.— Имтианларны бердинъиз, энди эпинъиз экимсинъиз. Эпинъиз-

нинъ юзюньизде мерамет ве джиддийлик корюлип тура!

Къарт профессорымыз бу сёзлерни айтты да, мердивенлерден тюшип кетти. Мен о вакъыт анъладым ки, эким олмакъ ичюн инсангъа эвеля эки кейфиет керек экен. Бириси — мераметлик, экинджиси — джиддийлик.

— Психиатр-логопед зенаатына сонъундан окъугъандырсыз даа? — деди Айрие меракъланып.

— Эм техникумда, эм институтта окъугъанда мен ялынъыз хирург олмакъ истей эдим.

— Коресинъми, балам анасыны операция япып кетиргенлери онынъ юрегине балалыкътан синъип къалгъан, ойлеми къызым? — деди Себиля апте.

— Ойле олса керек. Мен яш экенде анамнынъ хасталанувы, эвимизге шу эким-хирургнынъ келип турмасы, ниает меним къолумнынъ къырымасы — булар эписи манъа белли бир теэссурат къалдырса керек. Институтнынъ сонъки курсында бизни психиатрия хастаханесине алып барды ве лекциялар окъудылар. Мен анда яткъан чешит хасталарны корип, инсаннынъ психологиясынен меракъланып башладым. Инсангъа физик ярдым япмакъ мумкюн, лякин медицина ярдымы тек бунынъле сынъырыланмай экен. Стол устюнде без чаршаф тюбюнде яткъан хастанынъ агъыргъан ерини операция япар, кесер, алыр, къуртарырсынъ. Лякин онынъ даа ахлякъий-рухий ярдымгъа икътияджы бар, чюнки о озюнинъ дерди акъкъында тюшюне, яныкълай ве даа зияде чекише. Мына бу ерде хастанынъ психикасыны анъламакънынъ пек буюк эмиети бар. Психиатрия хастаханесинде мен чешит тюрлю экимлернинъ, чешит сой хасталарнен курешкенлерини коръдим. Бу ишке буюк сабыр, буюк теджрибе ве мерамет керек олгъаныны анъладым. Сонъра бир намлы къарт психиатрнен таныш олдым. Онынъле кечирген файдалы субетлеримиз манъа бу зенаатны сайлап алмагъа ярдым этти. О къарт психиатрнынъ янында мен чокъ йыллар чалыштым, ондан чокъ шейлер огрендим. Мына, бойледжесине мен экимликке кельдим. Шукюрлер олсын, ич пешман этмейим. Энди эким-психиатр олып чалышкъаным йигирми йылдан зияде.

— Алла савлугъынъны берсин де балам, къыркъ йыл даа чалыш. Чырайынъа бакъкъанда ойле эсли корюльмейсинъ. Яшлыгъынъда ири козлю, къырмызы янакълы, тос-томалакъ бир къыз олсанъ керек. Тевекель ерде завалы бабанъ сени «Кобете кенар» деп севмегендир. Шимди де

бетинъден шу яшлыкъ чагъынънынъ нурлары тамлап тура. Даа кельгенинъизге эки кунъ олмай, бутюн совхозымызнынъ джемааты сизни коръмеге авес эте. Сен балам, бир афтанен бизден къуртуламазсынъ. Он къорантадан бириси сени мусафир этсе, кене энъ аздан бир ай отурмакъ керексиз. Совхозымызнынъ халкъы мусафирчен экенини озюнъиз билесиз. Бирине барып, дигерине бармасанъ жанларыны агъыртырсынъ,— деди Себиля къартый.

— Сагъ олунъыз, къартана. Мен бир афтадан зияде отурмам. Бир афта Алма-Атада, бир афта Ыссыкъ-гольде олмакъ керекмиз. Айт-уйт этип эвге баргъандже отпускамыз кечип кетер.

— Айды, о якъыны сонъ бакъармыз Земине Гъафаровна. Безгендже отурырсыз. Биз де сизни бездирмеге элимизден кельгенине коре тырышырмыз. Шимди сиз бир аз ятып раатланынъыз. Тюневин кеч яттынъыз, бугунъ акъшам да отурмакъ, къонушмакъ керек оладжакъ. Киринъиз кишилик эвге, буюрынъыз,— деп Айрие мусафирни раатлыкъ одасына алып кирди.

Бираздан сонъ юкъусына кереги киби тоюп-къангъан Сусанна чыкъты. Онынъ устюнде тизлеринден ашагъысы бол, юкъарысы тар тикильген йылтыравукъ штан бар эди. Элини, бетини сабуннен копюртип ювгъан сонъ, кене одагъа кирип кетти. Шифоньернинъ къапысындаки бойдан-бой кузгюнинъ алдына кечип, сачларыны къызыл лентачыкънен котерип багълады. Штанынынъ туюсуне келишкен бенекли енъсиз ве якъасыз кофтачыгъыны кийип, Айриелернинъ янына чыкъты.

— Битай, келинъиз къолунъызны алайым, саба шерфинъиз мубарек олсун— деди о.

— Вай, балам, бойле шейлерни шеэрлилер де билеми ёкъса?— деди къартый тааджипленип. Сонъра, чатлакъ пармакъларынен штанынынъ балагъыны сыйпап бакъты.— Тегиз шей экен, амма устюнде не гузель ярашып тура я, балам. Бойле шейлерни эвелькининъ ханийлери, антер астындан кие тургъанлар.

Сусанна индемени. Утансыргъа киби олып, азачыкъ чырайыны сытты,— аралыкълангъан дудакъларынынъ арасындан сютдай без аз тишлерининъ уджлары корюнди.

— Земине Гъафаровна юкълаймы?— деди Сусанна.

— Шимдичик таянды. О саба эрте тургъан эди. Медпунктымызны корип кельдик. Сусанна, сиз анамнен эгленип турынъыз, мен барып чай къояйым,— деди Айрие.

— Мен де сизге ярдым этейим,— деп аякъкъа турды Сусанна. Айрисенен экиси ашханеге кирдилер. Экиси де оглюк багълап, ишке тутундылар.

— Къыймамыз тазе, согъан истегенинъ къадар. Земи-не Гъафаровна тургъандже чиберек ясап азырлайыкъ,— деди Айрие. Сонъра сёзюни девам эттирип Сусаннагъа озюнинъ кечмиши акъкъында икяе этти. Лакъырдысынынъ сонъунда Сусаннаны пек бегенгенини, къардашына чокътан келин къыдыргъаныны айтты.

— Бельки сенинъ таныш-билишлеринъ бардыр, Сусанна. Юнус ярамай огълан дегиль, озюнъ корип турасынъ. Тек бильгиси ёкъ.

— Бильгиси олмаса да зенааты чокъ экен онынъ,— деди Сусанна.

— Зенааты чокъ. Учъ тюрлю курс битирди. Озю пек уста адам, эр шейге къолу яраша. Койнинъ электриги де о, монтёры да о, телевизор, радиоприёмниклернинъ де устасы. Мында онынъ иши пек яхшы. Эр кеснинъ ишини о битире. Лякин, не япайыкъ даа эвленмей юре къафир. Къыз бегенмей эмиш. Анам да оны эр кунъ зокъумлай. «Сенинъ озюнъни бегенмеселер керек» деп сёге.

— Ничюн я, онынъ мында къызлар арасында намы буюк. Тюневин экимиз ойнаймыз, къызлар мени козьлеринен ашайджакълар. Меселе къыз бегенмеювде олмаса керек. Онынъ озъ тюшюнджеси, озъ хаяллары бар.

— Санъа бир шейлер айттымы ёкъса?

— Ёкъ. Биз онынъле бир кереден догъмуш киби якъын олып къалдыкъ. Мен мында кимсени бильмегенден сонъ... Онынъ табияты пек яхшы экен. Адамгъа тез алыша ве озюне джелъп этмеге биле. Асыл койде оськендир демезсинъ.

Айрие Сусаннанынъ козюне бакъты. Лякин онынъ не демек истегенини анълап оламады. «Эльбет де къыз баланы бир кереден анъламакъ зор. О къальбиндеки сырыны бир вакъыт ортагъа чыкътарып къоймаз. Барып да, Сусанна оны бегенсе? Ёкъ ич оладжакъ шей дегиль. Окъугъан, эким олгъан, шеэр тербиеси коръген. Олар экиси — эки тюрлю адам. Юнускъа кене озюнинъ къысметини Алсабадан къыдырмакъ керек. Анамнынъ айтмасы киби, мен де мында бахтлы олдым. Ёкъса, Алсабанынъ къызлары адам дегиллерми? Эписи бирер гондже гуль. Эм окъувны беджерелер, эм ишини билелер. Не сыджакътан не де сувукътан къоркъалар. Анджакъ бойле къызлардан

озюнье омюр аркъадашы сайлайджакъсынъ. Бойле къызлар адджынъа да даяныр, арджынъа да» деп тюшюнди Айрие. Шу арада ашханеге Себиля апте кирип кельди. О Сусаннанынъ оглюк такъып къартоп артлагъаныны корьгенинен хихилдап кульди де:

— Сен яхшы ана-бабадан тербие корьген къызгъа бенъзейсинъ, балам,— деди.— Устюнъни-башынъны былаштырырсынъ. Къартопны сенсиз де артлармыз. Чез оглюгинъни де, кеч меним къаршыма отур. Санъа бакъып-бакъып тоямайым.

— Айса, мен сизге бир къаве пиширейим,— деп Сусанна джезwege япышты.

— Эшитесинъми, Айрие, мынавы шеэр баласы не дей?! Къаве пиширмеге де биле экен. Эбет, эбет къызым, пишир, ичермиз. Къол опымеге огреткен ана, къаве пиширмеге огретмезми?

— Мени девлет тербиеледи, битай, анам да ёкъ. бабам да. Мектепни битиргендже балалар эвинде тербиелендим. Бу шейлерни сизинъ киби адамлардан корип огрендим.

— Башында олмагъангъа балам, бир шей файда бермей экен. Инсаннынъ урбасына бакъып къабул эт, акъылына бакъып озгъар, дегенлер. Талаб эткенсинъ, огренгенсинъ. Шимди зарар эттинъми? Эр шейни биль де, япма дегенлер. Омюр чаталлы бир ёлдыр. Эписи керек олур. Къана, Айрие, кыйманъ азырмы? Уйле олды, бу адамларгъа аш-сув береджекмизми?..

Почтаджы къадын азбар къапыны ачты да къутугъа бир шейлер ташлап кетти. Айрие пенджеренден корип къалды, лякин чыкъмады. Къоллары къамырлы эди. «Зарар ёкъ, ишим биткен сонъ чыкъып алырым» деди о озь-озюне.

Къамыр басып, кыйманы азырлап, устюне чанакъны къапакълап кыйды да:

— Земине Гъафаровна тургъан сонъ пиширirmиз,— деп Сусаннанынъ къайнаткъан къавесинден ичмеге отурдылар. Шу арада азбарда Фиданенен Эскендер пейда олдылар. Олар аля даа байрам урбаларынен, байрам зевкъынен шадланып юрмектелер. Азбарда чувулдашып башлагъанларынен Айрие чыкъты, яваштан къулакъларына эгилип бир шейлер айтты. Балалар кене зий-чув олып сокъакъкъа чыкъып кеттилер.

Байрамнынъ экинджи куню олгъанына бакъмадан тарла ишлери даа буюк джошкъунлыкънен алынып барылды. Майыс айында бир йыллыкъ ишнинъ негизи къойыла. Фидени йигирми кунъ ичинде отуртмакъ керек. Эрте башласанъ сувукъ ура, кеч башласанъ осюп етишмей. Шунунъ ичюн тютюнджилер тарла ишининъ устасы олып къалдылар. Майыснынъ он бешине къадар бутюн бригадалар фиде отуртув ишини юксек кейфиетте аль этмек борджлылар. Бу ишлерге олар ойле алышып къалгъанлар ки, кимсенинъ тешвикъатыны я да биревнинъ келип чагъыраджагъыны беклеп турмайлар. Эр кес озъ вазифесини биле. Джемаат иши бу коллективде шахсий иштен устюн тура. Чюнки олар шахсий къыйынлыкъларыны да, коллективнен бирликте аль этелер. Партия тешкиляты, дирекция эр ан озъ хозяйствосында чалышкъан бойле намуслы эмекчилерге юксек къыймет кесе, оларнынъ сагълыгъы-селяметлиги ве бахты ичюн къайгъырып турмакъталар.

Мына, шунунъ ичюн олса керек ки, тюневинки байрам тантанасындан сонъ, бугунъ тарлагъа чыкъмагъан бир адам олмады. Кимсенинъ башы агъырмады, кимсе эвинде ятып къалмады. Арслановнынъ бригадасында бугунъ янъы фиде отуртув машинасы сыналаджакъ эди. Онынъ саба еринден турып кеткенини эвде кимсе дуймады. Не къадар эрте кетсе де, о тарлагъа кельгенде Каштанов, Еремеев, Къурбанбеков ве Молдабай энди фиде машинасынынъ этрафында доланып юре эдилер.

— Башынъ, агъырмаймы, Арсланов?— деди Каштанов селямлашкъан сонъ.

— Ёкъ, Андрей Андреевич. Биз ишлемеге бильгенимиз киби, ичмеге де билемиз. Башынъ агъыраджакъ олса, оны ичкенинъден не файда?

— Яхшы. яхшы. Мен шакъа эттим. Шимди кене башларсынъ озъ фельсефенъни.

— Эгер бу машинаны кереги киби чалыштырып олсакъ, он кунъде фиде отуртувны битирирмиз,— деди Еремеев.

— Девлет оны бизим ичюн чыкъаргъан, чалыштырмагъа бильмек борджлымыз.

Къурбанбеков бу сёзлерни озюне базанып айтты. Чюнки о механизаторлар курсында озю дерс бере. Кой хозяйствосы институтында гъиябий окъуй.

— Биринджи ёлакъкъа башта озюм тюшеджегим — деди о тскрар.

Танъ къаранлыгъы дагълар артына чекилип кетти. Сини киби тегерек кунеш уфукъны къызартып гуя ер багърындан чыкъкъан киби догъды. Башта ярысы корюнди, сонъра яваш-яваш тегерекленип авагъа асылып къалды. Кунеш догъувынынъ ялынъыз денъизде дегиль, чельде де озюне хас дюльберлиги ола экен. Машина-машина адамлар тарлаларгъа келип тюштилер. Оларнынъ шеньлиги, шераметлиги, бири-бирлерине эткен шакъалары ве кулькюлеринден беллейсинъ ки, санки олар тюневинки байрамны мында девам эттирмеге кельгенлер. Тал тереклерининъ астына кечип, усть урбаларыны ве аякъкъапларыны авуштырдылар. Къадынлар ве къызлар фырланталарыны чезип, тарлада махсус къулангъан явлукъларынен сачларыны топлап, манълайларына къадар сыкътырып багъладылар. Огъланлар енълерини чермеп, фуражкалаанынынъ козырёкларыны энъселерине айландырдылар. Дерсинъ, эписи цехке ишке тюшеджеклер. Ёкъ, цехке дегиль де гарлагъа. Олар буны яхшы билелер. Арадан бешон дакъикъа кечер-кечмез фиде ёлакълары арасына даркъалып кеттилер. Ишчи куню башлады. Механизаторлар исе, озълерине айрылгъан махсус тарлада буюк эшкъ ве къуванч иле янъы машинанынъ унеринден файдаланмакъталар...

Вакъытнынъ кечип-кеткени дуюлмай къалды. Ерге акъшам къаранлыгъы чёкти. Макъпуле столлары яхшы донатты. Эр кес ерли-еринде отура, чай сюзе ве джошкъун-джошкъун лаф этмектелер. Ялынъыз, Арсланов ёкъ. Айрие тарсыкъып башлады. Къапы ачылып-япылгъан сайын, тельмирип бакъса да, ничюндир, Арсланов корюнмей. «Бу маальгедже къалмамакъ борджлы эди, эвде мусафир олгъаныны, Макъпуленинъ эвине чагъыртылгъаныны яхшы биле. Не олгъан экен аджеба? «Бу тюшюнджелер Айриенинъ юрегини раатсызлап башлады. Сусанна пластинка чалдыра. Юнус онынъ янында козълерини фырландырып отура. Приёмник эски олса да, яхшы чала. Бу Юнуснынъ юрегине ярашмай. О приёмникнинъ бозулып къалгъаныны истей. «Чалып тургъан еринде хырылдап, токътап къалса да, Сусаннанынъ кейфи бозулса. Сонъра элине алетлерини алып, приёмникни дарма-дагъын этип, тамирлеп, къайта баштан, даа яхшы чалдырса, ниает Сусанна къуванса ве онынъ усталыгъыны, чеберли-

гини макътаса...» Юнуснынъ бу анде тек бойле арзусы бар. Лякин, аятта базан ойле расткелине ки, бир шейни зиядесиле истеп башладынымы, эр вакъыт аксине олып чыкъта. Мына, шимди де ойле. Бир къач кунъ эвельси бу приёмникнинъ янына бармакънынъ чареси ёкъ эди. Не сёзю анълашыла эди, не музыкасы. Шимди, бакъ сен онъа, бульбуль киби сёйлене.

Баягъы вакъыт кечти. Айрие даянамады.— Эвге барып бакъайым, Самедин бу вакъыткъа къадар кельмек керек эди,— деп къапыдан чыкъты.

Койни акъшам къаранлыгъы къаплагъан. Тёпелери бири-бирине къошулгъан акътереклернинъ астындаки къалдырым бою адымлагъан адамнынъ козюне чёп тюртсенъ корюльмейджек. Тёгерек ташлардан япылгъан бу къалдырым устюнден кунъдюз биле юрьмеси къыйын эди. Айрие ашыкъта. Тез-тез эвге барып, Самединнинъ кельгенини, кельмегенини бильмек истей. Сакъынгъан козьге чёп тюшер,— дегенлери киби онынъ подворы негедир илишти. Айрие абынды, лякин йыкълмады. Чорапынынъ ильмеги къуртулды. Этрафта кимсе ёкъ, токътап илиштиреджек олды, токътамады.— Эвде бакъарым,— деп адымларыны даа зияде тезлештирди. Азбаргъа киргенинен пенджеренен лампочка ярыгъыны корип себинди.— Не исе, шукюр, Самедин эвде экен,— деп къуванды. Къапыны ачып бакъса, Самедин миндер устюне таянгъан, нефес алмагъан адам киби ята. Онынъ къолунда конверт ве балабан бир табакъ къагъыт. Козълери къызаргъан. Айрие эгилип онынъ бетине бакъты ве абдырап:

— Самедин, тувгъаным. санъа не олды, сен не ичюн агълайсынъ!?— деп къычырды.

— Мен агъламайым,— деди Самедин яваштан.

— Ёкъ, агълайсынъ, козълеринъ яшлы.

— Ма, ал, мынавы мектюпни де, къычырып окъу. Сонъ агъламайып не япарсынъ? Бу мектюп манъа чокъ шейлерни хатырлатты. Окъуп башлагъанымнен элим-аягъым къалтырады, башым устюнде бомбалар патлады, козюм алдында серс окоплар, ачлар, эсирлер, дженкявер достларым жанландылар. Окъудым ве озюмни ялынъыз агълап енъдим.

— Багъышла манъа Самедин, багъышла, тувгъаным! Мен бугунъ почта къутусыны ачмагъа унуткъаным. Анда бойле къыйметли мектюп ята экен де мен оны алып, сени

бир кѣач саат эвельси кѣувандырамадым, бу кѣусурымны афу эт,— деп эрининъ сачларыны сыйпады.

Арадан ярым саат кечер-кечмез олар экиси де Макъ-пуленинъ эвинде эдилер. Айрие ичери киргенинен Макъ-пулеге мектюпни косътерди:

— Мына, тувгъаным, бакъ Самедин не ичюн кечиккен. Бу мектюп ичюн. Эвге барсам, не корейим, яткъан миндер устюнде агълап отура. Эбет, эбет, меним Арсланым агълай. Бу сенинъ Москвадан кетирген адресинъе язылгъан мектюпнинъ джевабы. Сагъ экен. Самединнинъ дженкчи досты, сагъ экен! Динъленъиз мектюбини окъуйым: «Кѣыйметли достым, Семён! Мен сенинъ язгъан мектюбинъни алгъан сонъ, бир афта башыма эсимни топлап оламадым. Бу — сенсинъми, сен дегильсинъми? Асыл инаныладжакъ шейми бу? Дюнъяда муджизе олмай, дейлер. Я бу муджизе дегильми? Сен Кенгсберг тюбюндеки сонъки урушта ольген эдинъ де? Шимди насыл олды да тирильдинъ? Мен янъыла экеним. Албу иссе, табиятта ольгенлерни тирильткен кучъ де бар экен. Мен буны бильмей экеним. Бундан учъ йыл эвельси Москвагъа баргъан эдим. Дюнъяда эр шей денъишип тургъаны кибизим дженк эткен ерлеримиз де денъишип кеткен. Окоп ве бомба чукъурлары тегизленген, харабе алына келип къалгъан эвлер янъыдан кѣурулгъан. Бизим аязлы кѣышта, кѣарлы боранда тувгъан Москвамыз ичюн олюмден кѣоркъмай курешкен ерлеримизде вишне багъчалары ве раатлыкъ аллеялары мейдангъа кетирильген. Мен сенинъ шу кѣадынъгъа къалдырып кеткен юнъ чорапларынынъ озъ козюмнен коръдим. Бу пѣк аджайип бир вакъиа эди. Озюмни тутып оламадым. агълап йибердим. О вакъыт экскурсовод кѣыз менимле меракъланды ве адресимни язып алгъан эди. Коресинъми, кѣач йылдан сонъ шу адрес сенинъ кѣолунъа келип тюшкен. Мына, сагъ олгъан инсанлар бири-бирлерини бойле тапа экенлер»

— Макъпуле сагъ олсун! Макъпуле тапты бу адресни!,— деп кѣошты Арсланов.

Чешмеджиева козълерини Арслановтан алмайып дикъкъатнен динълемекте эди. Мектюп окъулгъан сайын Арслановнынъ юзюнде чешит тюрлю денъишмелер олып кече. Кедерленгенинден тамагъы кѣуруса керек ки, тосат-тосат «Ала-Тау» сувундан юта.

— Окъунъыз, сонъуна кѣадар динълейик,— деди Чешмеджиева. Айрие девам этти: «Энди бир кѣач сѣз озюм

акъкъымда. Мен душманны ювасына къадар къувалап бардым. Лякин енъиш кунюни сафта дегиль де, ятакъта къаршыламакъ насип олды. Хорватия дагъларында олып кечкен чарпышманынъ биринде яраландым. Бу мени учюнджи ве сонъки кере «сыйлангъаным» эди. Госпитальде чокъ яттым. Аягъымнынъ биринден марум къалдым. Сагъ аягъым. Тизимден ашагъысы. Эвиме ярым къайтмагъа истемедим. Алып башымны чыкъып кетеджек олдым. Экимлерим пек яхшы эдилер, манъа рухий къувет берип турдылар».

Бу ерде Айрие кене токъталды. Стол башында отургъанларнынъ эписи ничюндир, Чешмеджиевагъа бакъып алдылар.

— Кунъдюз сизинъ айткъан лафларынынъыз, бу мектюпте де язылгъан экен Земине Гъафаровна,— деди Айрие.

Чешмеджиева индемени. О мектюпнинъ сонъуны эшитмеге ашыкъа эди.

— Окъу, окъу, Айрие.

«Сонъра экимлер меним адресимни алып, эвге мектюп язгъанлар. Бир кунъ бакъсам, госпитальнинъ азбарында огълумнен, къадыным келип меним бойнума сарылдылар. Бир къач кунъден сонъ, олар мени эвге алып къайттылар. Шимди огълум инженер, къадыным уста тикишчи, озюм пенсионерим, кичкене къызым окъуй. Огълум Генджеде ишлеген сонъ биз де онынъ янына авуштыкъ. Девлет бизге яхшы эв берди. Амамы да ичинде, чешмеси де, аякъ ёлу да. Яшайышымыз пек яхшы. Энди бири-биримизни тапкъан сонъ, корюшмек, дертлешмек керекмиз. Чокъ языкъ ки, Москва тюбюндеки шу таныш къадынымыз якъында вефат этти. Сен манъа бала-чагъанънен истеген вакътынъда мусафирликке буюр. Эр алда сен эки аякъненсинъ. Корюшкен сонъ бир шейлер планлаштырырмыз. Бельки Москвагъа балаларымызнен кетермиз. Оларгъа бабаларынынъ дженк эткен ерлерини косътерирмиз. Айды чокъ сагъ ол! Аиленъе селям! Сыджакъ достлыкъ селямынен муаребе аркъадашынъ, Карагёзов Мирселим. (Миша). Къаршылыкъ беклерим.

Айрие мектюпни къатлады, конвертке къойды ве Арслановкъа узатты. Бир къач сание кимсе нефес алмагъан киби отурды. Оданынъ ичини сюкюнет къаплады.

— Мына, бу саатте Арсланов догъгъан эди, котеринъиз къаделерни!

Макъпуленинъ юрек джошкъунлыгъынен айткъан бу сёзю тынчлыкъны бозды.

— Алынъ, ашлар сувумасын.

— Ташкентте бир ай отурып кеттинъиз, озюнъизнинъ дженкчи олгъанынъызны сездирмединъиз,— деди Чешмеджиева вилкасынынъ уджуна тазе чыкъкъан айлыкъ туптан алып.

— Дженклештик, енъдик, къайттыкъ. О йылларны хатырлай берсенъ, дердинъе дерт къошасынъ. Мен элимден кельгендже хатырламамагъа тырышам. Яшайыш тюзельген сайын, къыйынлыкъ унутула экен. Эльбет, эр кес бир дегиль. Меселя, бу мектюп мени бугунъ агълатты. Амма, мен, омюримде козьяш чыкъаргъан адам дегиль эдим. Дженктен эвель Лугада танкчылар мектебини битирдим. Фин дженки чыкъкъанынен танкчылар батальонында механик-айдавджы олып Эстонияда хызмет эттим. Бу фелякетли немсе дженки башлагъанынынъ дёртюнджи куню Кутузов шеэриндеки танкчылар батальонына тюштим. Кишинев, Киев ве ниает Москва тюбюндеки дёгюшлерде олдым. Сонъра маршал Марецкийнинъ команданлыгъы алтында единджи Армиянынъ тертибинде олып, Ленинград тюбюнде уруштыкъ. Мирселим достым мектюбинде бирасачмалай Мени Кенигсберг ёлунда яраладылар. Анълашылгъанына коре о мени ольди беллей экен. Шундан сонъ, биз бири-биримизни корьмедик. Мен дженюбий фронткъа авуштым. Сату-Мареде бир даа яраландым. Москвада госпитальде, яттым. Сагълыгъым тюзельген сонъ, дженкнинъ битмесине бир бучукъ ай даа къалгъанда мени танкчы-миномётчылар батальонына ёлладылар. Анда бизни биринджи ве докъузынджы мыйыста Москвада отькериледжек парадкъа азырладылар. Омюримдеки энъ бахтлы куньлеримден бириси — Къызыл Мейданда танкчылар парадында иштирак эткен кунюмдир. Эльбет де Юкъары команданлыкънынъ тешеккюрини алмакъ меним ичюн буюк бахт эди. Багъышланъыз, Земине Гъафаровна, асыл бу лакъырдынынъ шимди кимсеге кереклиги ёкъ. Тилим чезильди, айта берем. Энъ яхшысы, келинъ шу куньлернинъ бир даа къайтмамасы ичюн бирер данечик котерейик!

— Онынъ кереклиги олмаса, бугунъки яшларымыз бойле бахтлы кунню корер эдилерми? Дженкявер достларымызнынъ сагълыгъына!— деп Чешмеджиева къадесини дудакъларына тийдирип алды.

— Демек, бизге Кавказны корьмек кыысмет оладжакъ экен,— деди Айрие кулюмсиреп.

— Эбет, эбет, мен де сизден артта кыалмам. Озюмнинъ тапкыан адресиме баре сизлерни озюм алып барайым. Бакуны, Тбилисини корьмеге чокътан авес эте эдим,— деп кыошты Макъпуле.

— Кезмекни пек бегене башладыныыз, Макъпуле татам, сонъу хайыр олсун!— деди Юнус шакъанен.

— Кыайда баргыаным мен олян? Корьгеним Самаркыанднен Москва дегильми?

— Биз оны да корьмедик.

— Даа яшсынъ, корерсинъ...

— Мытлакъ барырмыз, эм эпимиз берабер кетермиз,— деди Арсланов Айриеге бакъып.

— Эскендернен Фиданенинъ язлыкъ татилинде кетмек керек олур гъалиба,— деп кыошты Айрие.

— Татильде, лякинъ кыышлыкъ татильде,— деди Арсланов.

— Коресинъми, кене кыыш лафы чыкъты. Кыышта Кавказда не япаджакъмыз?— деди Макъпуле сертейип.

— Язда тютюнни кимге ташлайджакъсынъ?

— Сенден башкыа совхозда тютюнджи ёкмы?

— Эй, кыадынлар, сиз манъа уджюм этменъиз. Кыышта, дедим, кыышта. Мен бир кере янъылып язда Ургутке кеттим де, еди гектар тютюнимни гъайып эттим. Аля даа ичим, багырым яна.

Мантар ураджакъ олса сен мында олсанъ да урар. О кимсенинъ хатирини бакъмай. Топракъны яхшы ишлеп, яхшы иляджламагыансынъ гъалиба. Мен сенинъ мантардан кыоркыкыанынъны бильмей эдим, бакъ санъа бу йыл бир иш кесейим, корьмелисинъ,— деп эришти Макъпуле.

— Айды онынъ давасыны быракъайыкъ. Язда олурмы, кыышта олурмы, ишнинъ кетишаты корьсетир.

— Не исе, бираз йымшадынъ. Кыана Юнус, сенинъ музыканъ не тынып кыалды я?— деди Макъпуле.

Бу лаф Юнуснынъ юрегине пек ярашты. О кокюсини мусюр киби кыабартып, кыопайсырап еринден турды. Су-саннагъа козы ташлап приёмникнинъ янына барды. Кыайдандыр «Ах, Фадимем нечюн, нечюн» деген пластинканы тапып чыкыарды. Чалдырып башлагыанынен пластинка чаналады ве тарс токытады. Юнус приёмникни кыарыштырмагъа тутунды. Сокъурнынъ арагыаны эки козы, деген-

лери киби, Юнус да арагъаныны булды. Лякин приёмник бир даа тынкъыны чыкъармады.

— Айдынъ, озюмиз йырлайыкъ,— деди Макъпуле ве эписи бир кереден «Ах Фадимем нечюн, нечюн»— деп алып кочтюлер. Йыр артындан, йыр айтылды, шакъа ве кулькюлер олды. Юнус эп приёмникни къарыштырмакъта эди.

VI

Медпунктнынъ азбарында кимсе ёкъ эди. Когерип ачылгъан эрылгъанларнынъ ве къар киби без аз эрик чечеклерининъ устюнде вызылдап балкъуртлар айланмакъталар. Айрие къабулханенинъ пенджерелерини ачып, ода-ны аваландырды. Шприцлерни ве дигер алетлерни сюртип, ерли-ерине ерлештирди. Экимнинъ ишке кельмесине бир саат даа бар эди. Адетиндже бу вакъытта медпунктнынъ азбарында ич олмагъанда бир къач адам беклеп турар эди. Шимди кимсе ёкъ. Баарь. Эр кеснинъ иши башынынъ сачындан ашкъан. Бойле сыкълет вакъытта адамлар олур-олмаз шейлерге вакъыт сарф этмейлер. Пек зарурий бир шей чыкъып къалса, акъшамдан сонъ невбетчи эмширеге мураджаатта булуналар. Уфакъ-тюфек яралар, я да енгиль хасталыкълар ичюн тарлаларда даима ильк ярдым пунктлары чалышып тура. Шунунъ ичюн олса керек ки, бугунъ медпунктнынъ азбарында ич бир вакъыт олмагъан тынчлыкъ укюм сюръмекте.

Айрие, азбардаки эрылгъан тюбюне Фиданени алып чыкъты. Узанып бир пытачыкъ къопарды, сонъра скемлеге отурып, экимни бекледи. Район автобусы келип токътагъанынен Айрие азбар къапыгъа чыкъты. Автобуста элинде индже чильтерчигини тутуп эким тюшти. «Тамам вакъытында кельди Мунавар апа. Озю районда яшаса да, бир вакъыт ишине кечикмей», деди Айрие саатине бакъып.

Экиси корюштилер, эким Фиданени севип къолундаки чильтерининъ ичинден бир алма чыкъарып, узатты. Фидане алды ве къыз балагъа хас татлы тильнен русча,— Сагъ олунъыз,— деди. Айрие экимге бу кунълер ичинде олып кечкен вакъиаларны къыскадан бильдирди ве Фиданенинъ экими оларда бир къач кунъден берли мусафирликте экенини, бу мунасибетнен Валерикнинъ ве Матвей

Петровичнинъ де онъа корюнмеге истегенлерини айттып анълатты.

— Пек яхшы,— деди эким Айриени дикъкъатнен динълеген сонъ.— Кельсин, корюшейик, таныш олайыкъ.

— О мында кельмеге истемей, Мунавар апа. Сизден тартынса керек. Зенаатдаш олгъанынъыз ичюн гъалиба.

— О насыл лаф? Зенаатдаш олсакъ не олгъан? Зенаатнынъ зенааттан фаркъы бар. Кельсин, бизге бир аз ярдым берсин. Арамыздан бир дерт эксик олса, о да бизим файдамызгъа. Сенинъ эп бир ишинъ ёкъ, бар чагъыр. Ич бир шей тюшюнмеден кельсин. Мен чокъ отурмай-джагъым. Бугунъ районда меджлис бар.

Чешмеджиева ве Сусанна совхознынъ экими Мунавар апанен таныш олдылар. Эр экиси де озъ ишлери акъкъында айтыштылар. Мунавар апа, къатнап чалышмакъ бир аз къыйынлыкъ догъургъаныны, кочмеге исе эрининъ иши келишмегенини айтты. Чешмеджиева, совхозны пек бегенгенини, хусусан адамларынынъ пек шенъ, ишкир, мусафирченлигини, табиатнынъ дюльберлигини, аванынъ темизлигини макътады.

— Мына сизге медпункт,— деди Мунавар апа лафынынъ сонъунда.— Истегенинъиз киби, сакъынмай ишленъиз. Бу бинанынъ шорбаджысы Айриедир. О мында кельгенде даа бу эвлер къурулмай эди. Эписи онынъ козю алдында къурулды. Мен мында эким таин олунмаздан эвель бутюн ишлер бу заваллынынъ башында эди. О бизде универсаль олып чалыша. Асыл озю экимлик ичюн яратылгъан. Эм къолу яраша, эм тили. Мени афу этерсиз, бугунъ районда меджлисимиз бар. Лякин манъа бир кунъчик мусафир кельмей къайтсанъыз джаным агъырыр. Айды, шимдилик сагълыкънен къалып турынъыз.

Мунавар апа чыктып кетти. Чешмеджиева къабулханеге кирип, экимнинъ столы устюне эки дефтер чыкъарып къойды. Буларнынъ бирини Валерик язып кетирген эди, дигерини Матвей Петрович. Сусанна Фиданени башкъа одагъа алып кирди ве мешгъулиет кечип башлады. Фиданенинъ тилинде аз бучукъ илле къалгъан эди. Чешмеджиева бунъа энди чокъ эмиет бермей. Чюнки о даа яш бала, оськен сайын тили даа зияде инкишаф этеджегини ве озъ ил-лесини озю тюзетеджегине эмин эди. Сусанна элифбеден башлады ве Фиданеге бар сесинен къычыра-къычыра озюнинъ артындан текрарламасыны теклиф этти. Фидане сыкъылмай. О энди Сусанна татасына алышып къалды.

Ташкентте де бир ай девамында онынъ иштирагинен мешгъулнет кечти. Фиданенинъ активлиги ве авеслиги Сусаннагъа буюк уют бере. Чюнки о яхшы биле ки, булар эписи экимнинъ къойгъан эмегининъ бош кетмегенине ве хастанынъ файдасынадыр.

Азбарда Матвей Петрович пейда олды. Айрие оны корьгенинен чыкъты ве бираз сабыр этмесини бильдирди. Матвей Петровичнинъ устюнде костюм, башында шляпа, беяз кольмеги ве галстуги бар эди. Чырайы бираз солгъун козьлеринде юкъусызлыкъ ве ёргъунлыкъ сезиле.

— Байрамны яхшы кечирдинъизми? — деди Айрие онынъ дикъкъатыны джелъп этмек ичюн.

— Пек яхшы кечирдим. Нумайыш ве тантана биткен сонъ, насыл келип яттым, экинджи куню еримден турып ишке кеттим.

— О-о, байрамны юкълап кечирген экенсиз де. Озюнъиз бойле бакъкъанда ёргъун корюнесиз.

— Ничюндир, бильмем, юкълап да оламайым. Докъуз майыс келеятыр. Эки куньден ёлгъа чыкъмакъ керек. Акъылыма тюшсе, этим-теним чимирдей, тишлерим килтлене, буз-бузлап къалам. Насыл барып келирим бильмем. Озюме чокъ ишанмайым. Аилемнинъ эляк олгъаныны анълагъан сонъ, мен бир даа о ерлерге аякъ басмадым. Шимди бу меселе чыкътып къалмагъан олса, ольгендже бармаз эдим. Кене барып яралы юрекнинъ дердини кьозгъайджагъым.

— Сиз янълыш тюшюнесиз, Матвей Петрович. Анда ялынъыз дерт кьозгъамагъа бармайсыз. Эляк олгъанларнынъ хатиресине озъ борджунъны эда этмеге, гонълюнъни чезмеге, теменнагъа барасынъ. Сиз юрегинъизге ничюндир, ойле сйнъдиргенсиз ки, санки сизден башкъа бойле фаджиа кимсенинъ башына кельмеген. Озюнъиз айтып отурасыз, отуз алты адам бир кереден эляк олгъан. Оларнынъ да сизге ошагъан тувгъанлары, сой акъраблары бардыр эбет.

— Эбет, бардыр, бельки. Лякин менден бир кереден эки адам. Ондан да башкъа меним биринджи севгим кетти. Мен оны ич унутамайым. Аля даа тюшюмде корем.

Бу арада къапыдан Валерий кирип кельди. Селямлашты, къол тутушты ве Айриенинъ козюне бакътып кулюмсиреди. Онынъ бу кулькюсинде бираз утанув алямети корюнди. Валерийнинъ устюнде де байрам костюми, галстуксиз, беяз якъалы кольмек, аякъларында сюйрю бурун йыл-

тырувукъ аякъкъаплары бар эди. Айрие олары азбарда къалдырып, Чешмеджиеванынъ янына кирди.

— Дефтерлерни эвде эки кере окъуп чыкъкъъэн эдим Айрие шимди кене бир кере окъудым, мени пек тааджиин лендирген бир шей бар, бакъайыкъ сонъу не олып чыкъар. Чагъыр экиси де кирсин,— деди Чешмеджиева.

Башта Матвей Петрович, онынъ артындан Валерий кирди. Экиси де Чешмеджиеванынъ къаршысына кечип отурдылар. Чешмеджиева Матвей Петровичке козьлерини тогереklenдирип джиддий назар ташлады да:

— Бу сенинъ дефтеринъми?— деди. Лякин къолунда Валерийнинъ дефтерини тута эди.

— Ёкъ, деди Матвей Петрович.

— Сенинъкими?— деди Валерийге айланып.

— Менимки.

— Яхшы, пек яхшы. Экинъиз де меним суаллериме джевап беринъиз, мен не якъкъа адымласам, менден козьлеринъизни алмайып манъа бакъып турунъыз.

— Матвей Петрович, сен анги районда догъдынъ?— деди Чешмеджиева кене онынъ козьлерининъ ичине бакъып.

— Днепровскийде.

— Сен, Валерик?

— Алма-Атада.

— Догърусыны айт.

— Паспортымда ойле язылгъан. Озюм Украиналы экеним. Балалар эвинде...

— Токъта!— деди Чешмеджиева ве энди Валерикнинъ янына келип, козьлерини эслеп бакъты. Сонъра, бир адым кери чекилип, сагъ къолуны юкъары котерди де:— Къолумны не якъкъа салласам, о якъкъа бакъынъыз,— деди.

— Яхшы, пек яхшы... Етер. Отурынъыз энди сёйлендирип бакъайым.

— Яшасын ишчи сыныфы!— деп башта биринъиз, сонъ дигеринъиз айтынъыз.

— Яшасын ишчи сыныфы,— деди Валерик озъ тилинде.

— Текрарланъыз, Матвей Петрович.

— Яшасын ишчи сыныфы.

— Яхшы, пек яхшы. Энди кольмеклеринъизни чыкъарынъ. Чыкъардынъызмы? Аркъанъызны айланынъ, пек яхшы. Манъа чевирилинь, узатынъ къолларынъызны. Яхшы, пек яхшы. Кийинъ кольмеклеринъизни.

Экинъизде бир сой пельтекленюв хусусиетлери бар. Экинъизни де пельтекликтен къуртармакъ мумкюн,— деди Чешмеджиева ве дефтерлерини алып Сусанна олгъан одагъа кирди.

— Сусанна, чагъыр Айриени.

Чешмеджиева эки къолунен башыны тутты. Айрие киргенинен Земина Гъафаровнанынъ агъарып башлагъан янакъларыны эследи ве абдырап:

— Сизге бир шей олдымы, Земина апте, шимди воли-дол берейим, сабыр этинъ,— деди.

— Ич бир шей олгъаны ёкъ, Айрие. Манъа бир шей керекмей. Кель, отур яныма. Шимди кечип-кетер.

Айрие ве Сусанна онынъ къолтугъына кирип, кушетка устюне отурттылар, экиси эки янына кечип, бираз индемей отурдылар. Чешмеджиева къолуны козьлери устюнден алды, азгъана кулюмсирейджек олды, лякин кулип олмады. Бир ютум сув ютты ве кене бир къач сание индемей турды. Сонъра бир кереден ири, дюльбер козьлерини ачып, сёйленмеге башлады:

— Билесизми не, Айрие?— деди о яваштан.— Валерик Матвей Петровичнинъ огълу... Бакъынъ мынавы язылары, санки экисини де бир адам язгъан. Матвей Петровичнинъ автобиографиясында косътерильген шейлер Валерикнинъ балалыгъында корип кечирген мусибетли вакъиаларны анъдыра. Экисининъ де сагъ омузлары тюбюнде кичкене бенълери бар, экиси де бадем тырнакъ, хасталыкълары да бир. Атта тишлерининъ шекили ве тизилиши бир. Не десенъиз, денъиз, менимдже олар баба ве огъулгъа бенъзейлер. Юринъ эпимиз берабер кирейик. Бойле шейни бильдиргенде адам не къадар чокъ олса, о къадар яхшы.

Чешмеджиева, Айрие ве Сусанна оларнынъ янына кельдилер. Чешмеджиева кене дефтерлерини алдына къойып:

— Динъленъиз, сизге озъ автобиографияларынъыздан бирер парча окъумакъ истейим,— деди.— Матвей Петрович шойле яза: «Фронттан къайтып кельдим, коюмиз, хатамыз ернен-ексан олгъан. Не вакъыт огълум ве севимли аркъадашымны фаджиалы олюмини эшиттим, о вакъыт догъру вокзалгъа келип поездгъа миндим де, устюмде олгъан парамны иче-иче суткаларнен кеттим. Къайда кеткенимни озюм бильмедим».

Чешмеджиева бу ерде токъталды ве кене Валерикнинъ козюне бакъып, онынъ дефтерини алды.

— Энди Валерикнинъ язгъаныны окъуп берейим: «Анамнынъ фаджиалы олюминден сонъ, мен къол-къолдан кечип, Къазахстангъа, балалар эвине келип тюштим. Андан мени шимдики анам алып, бакъып осьтюрди».

Чешмеджиева дефтерлерини устлю-устюне къойды да:

— Валерик, сен ананънынъ фаджиалы эляк олгъан ерини козюнъ алдына кетирип оласынъмы?— деди.

— Бир тюш киби. Бильмейим,— деп омузларыны къысты.

— Ананънынъ адыны?

— Билем, Ксения эди.

Шай дегенде Матвей Петрович отургъан еринде титреди. Чырайы къар киби агъарды ве башына япышты. Эки козюни Валерикке тикти ве индемени.

— Сизинъ язгъанынъызгъа коре севимли аркъадашынъызнынъ ады да Ксения экен, ойлеми Матвей Петрович?— деди Чешмеджиева.

Матвей Петрович кене индемени. Дерсинъ онынъ тили тутылып къалгъан. «Мына онынъ дерди неде?» Ичкени де бунынъ акъибети» деп тюшюнди Чешмеджиева. Сусанна сув берди. Матвей Петровичнинъ кирпичклери ойнап башлады. Чешмеджиева суалини кене текрарлады.

— Ойле, амма огълумнен экисини магъаз ичинден куйген бир алда тапып чыкъаргъанлар да я?— деди о Чешмеджиеванынъ суалинден телашланып.

— О тарафы манъа бельгисиз. Озюнъиз билирсиз, Матвей Петрович. Шимди сиз эвге къайтып, бираз ятып раатланынъыз. Бельки мен янълышадырым. Ничюндир, сизни баба ве балагъа ошатам. Бутюн сынавларымнынъ ве бельгилеринъизнинъ нетиджеси манъа шуны коръсете. Эм сиздеки тутукълыкъ дегиль де пельтеклик экен. Бойле хасталыкъ сой къува билир. Айды, бунынъле, бугунъки субетимизни битирейик. Эгер сиз пельтекликтен къуртулмакъ истесенъиз махсус вакъыт тапып, биринджи кере бир ай, сонъра логопеднинъ таин эткенине коре текрар келип девалав курсуны кечмек керексинъиз. Мадам ки бу деваланув процесси чокъ вакъыт талап эте, менимдже сиз, область диспансерине мураджаат этинъиз. Анда сизни бир группагъа таин этерлер, къатнарсыз ве тедавийленирсиз.

Чешмеджиева ве Сусанна медпункттан къайткъанлары

киби, Айрие догъру Катеринагъа джувурды. Катерина къач куньлерден берли мусафир къабул этмек ве озгъармакънен огърашты.

— Андрей Андреевичнинъ ордени манъа ярады,— деди о Айриени корьгенинен.— Къач куньден берли столым джыйылмай. Биревини озгъардым дегенде, башкъалары келип чыкъалар. Бойле вакъытта сен ярдымгъа келе тургъансынъ, шимди озюнънинъ ишинъ де етеджек. Мусафиринъ де бар. Эбет сизге де келедирлер орден хайырламагъа, ойлеми Айрие?

Айриенинъ къулагъына Катеринанынъ бир лафы кирмеди. Онынъ бутюн тюшюнджеси Валерик эди. Бутюнджаны ве джигеринен бу анълашылмагъан меселенинъ акъикъат олып чыкъмасыны истей. «Къолай шей дегиль эбет, он еди йыл озь эвлядынъны ольдю беллеп юрь де, сонъ бирден алдынъа йигирми бир яшында къувурчыкъ сач йигит пейда олып:— Баба мен сенинъ огълунъ олам,— деп чыкъса, онъа ким севинмез? Акъылынъны чылдырмагъа мумкюн. Ах, бу шей керчек олгъайды баре. Бунъа къуванмагъан адам олмаз эди. Чешмеджиеванынъ тылсымлы сёзлери акъикъат олып чыкъсын. Барсын адамлар къувансынлар, асретлер къавушсынлар...»

Катерина тепсилерни сюртип, серванткъа тизип къойды ве Айриеге айланып:

— Не аякъ устюнде къатып къалдынъ, ёкъса атеш алмагъа кельдинъми? Кеч дивангъа яслан. Мен шимди элимни-бетимни ювуп келейим,— деди.

— Катерина, билесинъми достчыгъым не? Мен санъа Валерик ичюн кельдим.

— Кене Валерик. Асыл шу огъландан къуртулып оладжакъмызмы? Мен къуртулдым дегенде, сен тутулдынъ. Не олды, Сусаннагъа козь этtimi?

— Ёкъ, башкъасына.

— Кимге?

— Матвей Петровичке.

— Аля даа Алма-Атадан къайткъанда тартышкъанларыны унутамаймы? Инат экен. Анасынынъ къанына тарткъан.

Катерина ашханеге чыкъты, къолларыны салкъын чешме тюбюне тыкъып сабунлады. Айриенинъ сабыры тюкенди, онынъ янына келип, бугунъ олып кечкен лакъырдыларны ве Чешмеджиеванынъ кетирген бутюн ошатув аляметлерини айтып анълатты.— Албу исе, Матвей Пет-

ровичнинъ эляк олгъан къадыны Ксения, Валерикнинъ анасынынъ ады да Ксения экен,— деди о тааджипленип.

Катеринанынъ къолундан сабуны тюшип кетти. Шаш-малады, юзбезге узанды. Сонъра къолларынынъ сабуналы экенини эслеп, тез-тез ювмагъа башлады.

— Украинада Ксения ады олмагъан койге расткельмек къыйын,— деди о къолларыны сюртип.— Эр алда бу сырнынъ анахтары ялынъыз Флоранынъ къолунда. Онынъ совхозгъа кельмеге истемегенинден, Валерикнинъ мында къалгъанына разы олмагъанындан, сонъки кере меним къапымны урып, чыктып кеткенинден мен бир шейлер дуймай къалмагъан эдим...

— Буны ялынъыз, Флория чезе биледжек,— деди Айрие.

— Бармакъ керек. Эвине барып богъазына япышмакъ керек. Къолнен дегиль де, сѣзнен.

— Я о да инат олса?

— Онъа шек-шубе ёкъ. Эгер уджуны тутып олсакъ, айтмай къайда бараджакъ. Пек тирельсе къоркъузырмыз. Ондан башкъа бизде къанун бар. Бу ишлернен огърашкъан тешкилятлар бар. Ярдым этерлер. Шимди эр шей Флориягъа багълы. Меселени тезлештиреджек де о, со-ваджакъ да о. Мен ярын Алма-Атагъа кетем.

VII

Катерина Алма-Атагъа келип тюшкенде кунеш Ала-Тау дагъынынъ устюнден бир сырыкъ къадар котерильген эди. О Флорияны ишке кетмезден эвель эвинде барып корьмек истеди. Бахтындан Флориянынъ чалышмагъан кунюне расткельди. Лякин Флория озюнинъ эски достыны пек сувукъ къаршылады. Атта чай биле къоймады. Катерина лафкъа башлагъанынен Флория онынъ сѣзюни болюп:

— Мен сенинъ нечюн кельгенинъни пек яхшы билем. Айтмасанъ да олыр. Валерикни сен совхозгъа тарткъанындан берли мен буны беклей эдим. Сиз адамны пек къолай балалы этеджек олып тырышасыз, амма, ойле ягъма, ёкъ. Йигирми яшына кетирген сонъ, мен оны анасы тирилип кельсе де бермем. Анъладынъмы?!— деп ачувындан меселенинъ устюни озю ачып башлады.

— Сенден бала истеген адам бармы, Флора? Матюв

олма. Биз ялынъыз акъикъатны бильмек истеймиз. Буны бутюн джемиетимиз, бутюн халкъ истей. Эгер сен бойле бир алидженаплыкъ япкъан экенсинъ, неге сычан киби пысып, сакъланып юресинъ? Аксине, кокрегинъни керип, гъурурланмайсынъмы?

— Бойле гъурур манъа керекмей. Меним бир ышанчым олса о да Валерик эди. Лякин сен бутюн ишни къарыштырып ташладың. Баре етишмегейдим сеннен таныш олмагъа. Тевекель ерде айтмагъан экенлер: «Аллам сен мени достларымдан сакъла, душманларымдан озюм къуртулырым» деп. Бизим достлыкънынъ сонъу да бойле олып чыкъты.

— Эгер мен санъа яманлыкъ истеген олсам, Флора, алдынъа кельмез эдим. Сенинъ балалар эвинден о агъыр йылларда бала алып осьтюргенинъе мемлекетимизде къуванмагъан бир адам тапылмаз. Лякин сен озь шахсий менфаатынъны джемиетнинъ алгъышындан устюн коресинъ. Япкъан яхшылыгъынъны тек озюнъ билесинъ. Сенинъ киби нидже адамлар, нидже тюрлю алидженаплыкълар яптылар. Лякин буны кимседен гизлемедилер. Гизлемек баланынъ бахтсызлыгъынъны истемек, демектир. Сен атта буны биле тюшюнип бакъмагъансынъ. Ташкентли Шаахмад Шамахмудовнынъ аилеси он бир бала бакъып осьтюрди. О да сенинъ киби япа билир эди. Лякин онынъ виджданы буны къабул этмеди. О мубарек къартларнынъ адыны урьметнен анъмагъан, алгъышламагъан аилега расткельмезсинъ.

— Мени джемиетнинъ алгъышы бакъмайджакъ, бутюн ишанчым Валерик!

— Инсан ялынъыз къарын токълугъынен яшамай, рухий емеклер де керек! Эр алда нафиле тирелесинъ. Дженк вакътында гъайып олгъанларны араштырув ишлеринен огърашкъан махсус тешкиятлар бар. Биз совхоз джемаатчылыгъы адындан бу тешкияткъа мураджаат этермиз. Эгер Валерикнинъ бабасы сагъ-селямет олса оны еди дерья артындан тапарлар!

Катерина еринден турды ве къапыгъа тараф адымлады. Флория да къашларыны сытып, башына чечекли къара шалыны ташлап онынъ артындан къапыны килитлеп чыкъты.

— Мен догъру Къурбанбековкъа кетем, эм бу ишке кимсенинъ аралашкъаныны истемейим. Эгер Валерикнинъ къальби бозулып, менден тартылса, джеседимни «Джана-

шарнынъ» сувларындан тапарсыз!— деди Флория мердивенден тюшкенде.

— Пек яхшы, Флора. Шимди «Джанашарнынъ» кьутургъан вакъыты. Алдына расткельгенни алып кете. Озю де быланчыкъ, буз киби къарлы сув насыл чыдарсынъ?— деди Катерина мыскъылнен. Сонъра экиси де кулюмсиреп, такси токътагъан ерге кеттилер.

Айрие, келип токътагъан автобусларны медпунктнынъ пенджересинден козь этип тура. О Катеринаны сабырсылыкънен беклей. Валерик ве Матвей Петрович меселесинден энди Къурбанбековнынъ хабері бар эди. Лякин кимсе меселенинъ асылыны билип оламай. Эльбет де, бойле хабер ерде ятып къалырмы? Озю де кой еринде. Къурбанбеков тарладан къайтып кельгенинен Матвей Петровични чагъырды. Ярын, майыснынъ секизинде ёлгъа чыкъаджагъы, командировка, билет ве дигер меселелер акъкъында субетлештилер. Лакъырдынынъ сонъу Валерик меселесинен багъланды.

— Ташкенттен кельген психиатр сизни баба ве бала этеджек оламы шу?— деди Къурбанбеков.

— Шашмалады о къадын. Неге эсасланып айтты бильмем. Манъа, шахсен онынъ айткъанлары бир тюш киби олып корюне. Бу якъта огълунъ ве къадынынънынъ хатиресине мерасимге кель, деп чагъыралар. О исе... Акъыл етеджек шей дегиль. Козюнъиз ошай, тишинъиз ошай, даа бильмем нелердир айтып, анавы яшнынъ да гонълюнни чийлендирди. Инсан инсангъа эр вакъыт бенъзер, ойле дегильми?

— Эльбет де бенъзей. Мен кеченлерде «Кайратнынъ» оюнына бардым. Стадион адам толу. Янымда бир къазах отура. О манъа къулакъ асмай, мен исе ондан козюмни алмайым. Биринджи таймдан сонъ, козюне бакътым да:

— Пек тез унуттынъ, Досмамбет!— дедим.

— Мен сизни танымайым,— деди бу адам.

— Институтнынъ биринджи курсында ян-янаша отурып окъугъанымизны унуттынъмы?— дедим.

— Мен институт корьмедим, адым да Досмамбет дегиль,— деп кетти. Артындан бакътым да къалдым. О къадар адамлар бири-бирине бенъзей экенлер даа. Албу исе, якъында сорап бильдим, меним студент аркъадашым шимди Акъмолла областында агроном олып чалыша экен.

Къапыдан Катерина ве Флория келип кирдилер. Къурбанбековнынъ дикъкъаты бир кереден бу танымагъан, бильмеген къадынъга тюшти.

— Таныш олунъыз, Валерикнинъ анасы,— деди Катерина.

Къурбанбеков селямлашты ве отурмагъа ер косътерди.

— Мен сизге шахсий бир ишнен кельдим,— деди Флория.

Онынъ сесинде баягъы йымшакълыкъ сезильди. Ёлда Катерина даа чокъ тырышса керек.

— Мен Валерикнинъ анасы олам,— деп сёзюни девам этти Флория.— Мында баламнынъ аятына, омюрине тесир этеджек киби бир чокъ лакъырдылар юре экен, мен бу меселени ерли-ерине къоймагъа кельдим. Риджа этем, манъа Матвей Петрович деген адамны чагъыртынъыз. Валерикни мен шимди озюм тапып келирим.

— Мына, Матвей Петрович, таныш олунъыз.

Флора козьлерини Матвей Петровичнинъ бетине тикти. Экиси де ерлеринден турмадылар. Сонъра Флория чырайыны чиркинлетип кене Къурбанбековкъа мураджаат этти:

— Мен аселет сизинъ алдынъызгъа кельдим. Сиз партия реберисинъиз, бизим джан меселемизге ярдым этинъиз.

— Бир шей анъламайым, сизни биревлер ынджытамы?— деди Къурбанбеков.

— Ынджыта, пек ынджыталар. Токътанъыз мен шимди Валерикни алып келейим де эписини озъ къулагъынен эшитсин.

— Сиз отурынъ, мен оны шимди чагъыртырым.

— Ёкъ, озюм барып келейим,— деп чыкъып кетти.

Матвей Петрович эеджанлангъанындан еринде отуралмай туруп чыкъмакъ истеди. Къурбанбеков йибермеди.

Катерина ве Флориянынъ Алма-Атадан кельгенини коръген сонъ тышта беклеп тургъан Айрие даянамады. Кабинетнинъ къапысыны ачып Катеринаны бир дакъкъагъа чыкъмасыны риджа этти. Къурбанбеков Айриени коръгени киби:

— Киринъиз ичери, керек эдинъиз,— деп кабинетке давет этти ве креслодан ер косътерди.

Валерик ятакъханеде велосипед тамирлеп тура эди. Анасыны ачувлы бир алда коръгенинен къолларыны чул-

гъа сюртип, тез-тез Къурбанбековнынъ кабинетине келип кирдилер.

— Мына бу меним огълум, Валерик!— деди Флория къапыдан киргенинен.— Мен оны он еди йылдан берли бакъып, тербиелеп кельдим. Шимди бабасы тапылгъан эмиш. Я сен он еди йылдан берли къайда эдинъ, Матвей? Инженер олып, Матвей Пет-ро-вич олып юрдинъ э? Догъру айткъан анавы сизинъ психиатр. Валерик сенинъ огълунъ! Эбет, эбет огълум, бу адам сенинъ бабанъ!.. деп Валерикке бакъты.

Катерина ве Айриенинъ козьлеринден дане-данае яшлар тыгъырыш чыкътылар. Валерик былашыкъ къолларынен Матвей Петровичнинъ бойнуна атылды. Баба ве бала бири-бирине япышып къалдылар. Къурбанбеков бойле алгъа омюринде расткельмеген эди. Козьлери яшланып башлагъанынен еринден турып, софагъа чыкъты. Жебинден бир сигар чыкъарып якъты, бираз озюни тынчландыргъан сонъ, келип ерине отурды.

— Девам этинъиз, сизинъ де ичинъизде дерт къалмасын,— деди Къурбанбеков Флориягъа.

— Ёкъ, ёкъ, айтманъ ана! Ялварам, ич бир сёз айтманъ. Мен энди бала дегилим. Эр шейни анълайым, сизинъ башынъыздан келип-кечкенлерни де пек яхшы билем. Сиз меним джанымны къуртардынъыз, адам эттинъиз, мен сизге омюримнинъ сонъуна къадар борджлым, анам!

Валерикнинъ бу сёзлеринден сонъ, Флория такъмакълап йиберди.

— Коресинъми, Флора, энди сенинъ гонълюнъ де ачыкъ,— деди Катерина оны тынчландырмакъ истеп.

— Бинъ-бир кере тешеккюръ сизге Флория. Мен энди тюшюнип таптым, сиз «Урожайкалы» Никифирнинъ кызы дегильсизми?— деди Матвей Петрович дудакъларыны къалтыратып.

— Эбет, онынъ кызы олам. Ксенья эляк олгъан сонъ, мен Валерикнинъ сагъ къалгъаныны бабамдан анъладым. Олар ормандан чыкъып, эшелонны дарма-дагын этип бу балаларны къуртаралар. Буюк топракъкъа юклеп йибергенлеринен бабам манъа хабер этти.— Балаларны Орта Асиягъа алып кеттилер,— деди. Мен биринджи эвакуация эшелонынен Ташкентке келип тюштим. Етим балаларны Самаркъанд шеэринде ёллагъанларыны анъладым. Андан Къатта-Къургъангъа бардым. Насылдыр бир себебтен огълан балаларны айырып башкъа тарафкъа ёллагъанлар.

Бир афтадан сонъ анъладым ки, бизим балалар Къазахстангъа барып тюшкенлер. Догъру Алма-Атагъа кеттим. Мында керек тешкиятларнен багъландым ве Валерикни тапып алдым. Шу куньден берли биз Къазахстанлы олып къалдыкъ. Бабам ольген сонъ, къайда къайтып бараджакъмыз? Къалдыкъ АлмаАтада. Шукюр, ич бир тюрлюшикяетим ёкъ. Бутюн бахтым ве аятымны бу балагъа багъышладым.

— Тешеккюр, сизге Флория апа! Лякин Матвей Петровичтен къачынмамакъ керек эдинъиз. Оларнынъ тувгъанлыгъыны бильдирмек ичюн мытлакъ Ташкенттен кельген эким-психиатрны беклемек керек эдими? Бу теса-дюфий бир шей олып чыкъты. Бир кунъ, бир афта эвель къувандыргъан олсанъыз даа яхшы олмазмы эди?— деди Къурбанбеков.

— Догърусыны айтсам, Матвей Петровичнинъ къайда яшагъанындан ич хаберим ёкъ эди. Кеченлерде Катеринагъа эвляд хайырлап кельгенде онынъ ким экенини эшитип бильдим. Ондан сонъ ичиме атеш тюшкен киби олды. Мени насылдыр бир къоркъу къаплап алды. Бабасыны тапкъан сонъ балам менден кетер, деп къоркътым.

— Нафиле озюнъизни къыйнагъансыз, ана. Мен сизни ташлап, къайда кетеджегим? Бабамнынъ озь къорангасы бар,— деди Валерик.

— Не олса да сонъу пек тесирли ве къуванчлы олып чыкъты. Мен бу меселени район партия комитетине бильдиририм. Бир даа джумленъизге тешеккюр! Сагъ олунъыз! Совет адамлары анджакъ бойле олмакъ кереклер. Бири-биримизнинъ бахты ичюн къайгъырмагъа ве къуванмагъа бильмелимиз. Сизге айрыджа тешеккюр, Айрие! Мусафиринъизге меним адымдан сыджакъ селям бильдинъиз. Матвей Петрович, мен бугунъ райкомнен багъланырым. Менимдже, эйкельнинъ ачылыш мерасиминде баба ве огъул бирликте иштирак этмек борджлылар. Умюг этем ки, ярын ёлгъа Валерикнен берабер чыкъарсыз!

Къурбанбеков сёзюни битиргенинен Матвей Петрович де Валерикнинъ бетине бакъты. Оларнынъ козьлеринде къуванч нурлары янмакъта эди.

ЭПИЛОГ ЕРИНЕ

Аязлы къыш куню эди. «Алсаба»нынъ мусафирханесинде бир адам пейда олды. Узун бойлу, кенъ омузлы,

къуракъшыгъан черели бу адам кимсеге айланып бакъмай ве ич бир тюрлю шейнен меракъланмай. Тосат-тосат къоюн джебинден чыкъарып, насылдыр бир илядж иче. Башыны арткъа къайырып ютып йиберген сонъ, сытылгъан титис чырайы даа бир бешарет алгъа келип къала. Яткъанда андан-мындан юнълери чыкъып къалгъан эски тонун устюне ташлай. Четтен бакъкъанда бу адам даима ушюпкъалтырап тургъангъа бенъзей. Саба еринден турдымы, аман устюне тонун кие, якъасыны котере, къалпагъынынъ къулакъларыны ашагъы тюшюре ве чыкъып кете. Къайда барып кельгенинден кимсенинъ хабери ёкъ. Бугунъ саба кене ойле япты. Къапыны килитледи, анахтарны невбетчининъ столы устюне ташлады ве Алсабанынъ меркезий сокъагъы бою адымлап кетти. Юксек сельбилернинъ тёпесине келип къонгъан къаргълар онынъ башы устюнде гъаркъылдап-гъаркъылдап терек-теректен авушалар. Сокъакъта кимсе ёкъ. О бир озю кете. Бойле аязда совхоз ишчилерининъ сокъакъта не иши бар? Олар сыджакъ эвлеринде зевкъланмакъталар. Ерлер сюрюльген, маллар емнен темин этильген, эр кеснинъ ашайджагъы, ичеджеги башы уджунда. Акъшам устю ялынъыз тюкянларнынъ алдында сийрек-сепелек адамлар пейда олалар. Яшлар исе, Медениет сарайына топланалар.

Бугунъ ава къарардан зияде сувутып башлады. Оджакълардан чыкъкъан тютюннинъ сырыкъ киби авагъа котерилип кетмеси де буны тасдикълай. Мусафирханеден чыкъкъан адам медпунктнынъ азбарына келип кирди. Токътады, этрафкъа бакъынды ве къапыны тартты. Къапы ачылмады. Кене тартты, ичериден бекитильгенини анълагъан сонъ, вазгечти. Бираз даа бекледи ве сонъра арыкъ-сюекли юмругъынен енгильден тыкъырдатты. Ичериде Айриеден башкъа кимсе ёкъ эди. О халатынынъ дёгмелерини илиштирип, къапыгъа кельди ве сувукъ кирмесин деп, зорнен кечирип къойгъан зембелекни котерип, къапыны ачты. Бу адам ичери кирди ве:

— Селям, Айрие!— деп къолуны узатты.

— Селям...

Айрие бу адамны таныды. Вуджудындан электрик токъы кечкен киби олды. Тизлери къалтырады, эеджанланды, козьлерине къаранлыкъ чёкти. Онъа къол бердими, ёкъмы, озю де бильмей къалды. Бираздан сонъ озюни къолгъа алып:— Алиман Шакирович къайдан бойле?... — деди.

— Алма-Атагъа эки вагон агъач кетирдим. Бу ерге кельген сонъ, сизни корип къайтайым,— дедим.

— Кене яхшы акъылынъа тюшкенмиз. Кир ичери, мында сувукъ. Озюнънен берабер сувукъ да кетиргенсинъ...

Шахардин ичери кирди, тонунынъ якъасыны чезди, къалпагъыны чыкъарып стол устуне къойды.

— Айрие, сен ич денъишмегенсинъ. Кене шу козьлер, кене шу кирпичлер...

— Амма сен денъишкенсинъ. Атта озюнъе бенъземейсинъ. Ёлда корьген олсам, танымайджакъ экеним. Неге ойле чаларып кеттинъ?

— Арадан он алты йыл кечти, Айрие. Мен сени бутюн омюрим хатырлайджакъым. Къабаат озюмде экен...

— Янъы аиленънен бахтлыдырсынъ эбет? Юнус баргъанда корип кельген эди.

— Мен ондан айрылдым. Яшап оламадыкъ. Озюни пек акъыллы сайды.

— Кене апайынъ къабаатлы, ойлеми?

Алиман индемени.

— Айды, яхшы. Шимди не демек истейсинъ?— деди Айрие.

— Мумкюн олса, манъа Фиданени косътер.

— Фидане шимди эвде ёкътыр. Аркъадашларынен берабер медицина институтынынъ азырлыкъ курсына къатнайлар. Вакъытынъ олса, бекле, акъшам келеджек, лаф этип бакъарым.

— Акъайынъ кене бригадир олып чалышамы?

— Ёкъ, энди совхозымызнынъ уйкен агрономы олды.

— Мен мусафирханеде бир кунъ даа къалырым. Фидане кельгенинен манъа хабер берирсинъ.

— Мен мусафирханеге бармам. Ярын бу маальде мында келирсинъ.

Айрие акъшам бу вакъианы Арслановкъа айтып анълатты. Олар экиси де тюшюнджеге далдылар. «Фиданеге айтмалымы, ёкъса бу хусуста лаф ачмакъ керекмейми?» Тюшюндицер, чокъ дерелерден сув кетирдилер. «Аджеба бу корюшюв Фиданенинъ юрегини яраламазмы?»

Айрие бутюн меселени Арслановнынъ озюне къалдырды.— Насыл истейсинъ, ойле яп, Самедин,— деди о. Сонъра:— Валерик меселесине бенъземесин,— деп экиси де Фиданеге айтмагъа къарар бердилер.

Фидане одасында дерс бакъып тура эди. Ана ве баба

онынъ янына кельдилер. Айрие буюк сакътлыкънен, йым-шакъ сёзлернен бу меселени Фиданеге айтып анълатты.

— Ана, сизге айып дегильми манъа бойле насиат бермеге?— деди Фидане чалыкъланып.

— Я къызым, мына бабанъ да бу фикирде, истесенъ бар, корюш,— деймиз.

— Меним бир дане бабам бар, Арсланов Самедин! Мен де Арсланова Фиданем! Истесенъиз бар, корюшинъ. Эм бу лафны манъа бир даа айтманъыз!

Фидане китапларыны алып, чыкъып кетти. Саба Айрие айни шу лафны Алимангъа бильдирди.

Онынъ мусафирханеге кельгенини корьмегенлери киби, чыкъып кеткенини де корьмедилер...

Аят токътамай денъишип тура. Матвей Петрович огълу тапылгъан сонъ бам-башкъа адам олып кетти. Бутюн дерди сёкюльди.

Эскилер ерине янъылар келе. Андрей Андреевич Каштанов область кой хозяйствосы идаресинде ишке таин втильсе де озюнинъ тешкиль эткен совхозыны, онынъ сыджакъ къанлы, ишкир адамларыны унутмай. Коллективнинъ янъы енъишлеринен гъурурлана. Эр йыл келип, эски достларынен, совхознынъ ветеранларынен корюше.

Бугунъ Алсабагъа эки мусафир даа кельди. Оларнынъ экиси де совхознынъ кыйметли мусафирлери эдилер. Бириси Андрей Андреевич, дигери Мефодий Пантелеевич. Леспромхоз онъа Алма-Атада раатланмакъ ичюн бир айлыкъ ёлланма берди. О, орманда чалышкъан совхоз ишчилерини — озюнинъ эски танышларыны, онынъ дагъ болюгинде азырланып бу совхозгъа ёллангъан керестеден къурулгъан эвлерни ве дигер ишханелерни козюнен корьмек истеди.

Кыйметли мусафир совхоз посёлкасыны корип чыкъкъан сонъ, эски дост-эшлеринен берабер Алсабанынъ та дагъ этеклерине барып таянгъан секиз юз гектарлыкъ узундан-узун тарлаларыны сейир эттилер. Эр кересиндеки киби, бу сефер де байыр тёпесиндеки ян-янаша яткъан эки къабирнинъ янында токъталдылар. Он еди йыл ичинде нидже кере къавесини ичкен, чиберегини ашагъан Себия ве Месюде къартийлерни хатырладылар. Бу юксек къырыннъ тёпесинден оларнынъ козюне Алсабанынъ четсиз тютюн тарлалары, багъча-багълары, сельбилер арасында узанып кеткен сокъакълары ве эвлери пек хош олып корюндилер.

МУНДЕРИДЖЕ

Биринджи къысым	3
Экинджи къысым	95
Учюнджи къысым	201
Дёртюнджи къысым	296

На крымскотатарском языке

ЧЕРКЕЗ-АЛИ

(ЧЕРКЕЗ-АЛИ АМЕТОВ)

В ОБЪЯТИЯХ ЗАРИ

Р О М А Н

Редактор — У. Эдемova
Рессам — З. Траснинова
Ресимлер редакторы — И. Цыганов
Технический редактор — Э. Сандов
Корректор — А. Нуриева

Басмаханеге берильди 14/XII-72 с. Басмагъа рухсет этильди 11/VI-73 с. Форматы $84 \times 108^{1/32}$. Басма табагъы 11,0. Шартлы басма табагъы 18,48. Нешир табагъы 18,88. Р 09488. Тиражы 5000. Ташкент, Навоий сокъагъы, 30. Шартнаме 123—71.

Озъбекистан ССР Министрлер Совети Матбуат Девлет Комитетининъ Ташкент Полиграф комбинатында азырлангъан матрицадан 1-басмаханеде № 2 — кягъыткаъа басылды. Ташкент, Хамза сокъагъы 21. 1973 с. Сымарыш № 345. Фияты 65 к.

Черкез-Али А.

Сабалар кьучагъында. Роман. Т., Эдебият ве санъат
нешриятъ, 1973.

352 б.

Инсанны беслеген топракътыр. Яшамакъ ве аятны зийнетлемек ичюн инсан топракътан кучь-къуветини аямай, оны манълай теринен сувары. «Топракъкъа не берсенъ, оны алырсынъ» дегенлер. Лякин топракъ не къадар джумерт олса да, озь багърындаки зенгинликни софрагъа чыкъарып къоймай. Бунынъ ичюн инсаннынъ данма тырышкъаныны, гъайрет эткенини эмек тѣккенини истей.

Иште, къолунъыздаки бу китап койлю эмекчилерине — оларнынъ эл эмеклерине, къыйынлыкъларнен къараманджа курешлерине, аиледеки мунасибетлерине, акъикъий севги ве инсаниетликке, интернациональ достлыкъларкъа — коммунизм джемнети огърунда куреште къойгъан исселерине багъышлангъандыр.

Черкез-Али А. В объятиях зари.

С (Крым.-тат.)



С
У 46

7—3—3—126 107—73
А—М—352—06—73